



BIBL. NAZ.
VITT. EMANUELE III


148

F

50

NAPOLI





V I T A E
I T A L O R U M

DOCTRINA EXCELLENTIUM

QUI SAECULIS XVII. ET XVIII. FLORUERUNT.

V O L U M E N VII.

A U C T O R E


ANGELO FABRONIO

ACADEMIAE PISANAE CURATORE



P I S I S MDCCLXXXI.
EXCUEBAT JACOBUS GRATIOLIUS

SUPERIORIBUS. ANNUENTIBUS.



FRANCISCO

ARCHIDUCI AUSTRIAE MAGNO
ETRURIAE PRINCIPI
ETC. ETC. ETC.

ANGELUS FABRONIUS.

SI fuit unquam tempus ullum,
quod mutum esse debuerit a lit-
teris, istud profecto est, CELSISSIME
PRINCEPS REGIE, quo Aviam tuam.

morte extinctam dolemus, cujus patrocínio ac numine illae non solum vigere, sed pene animari ac sustentari videbantur. Eheu eheu crudelis mors, quae nos tanto in squalore versari voluisti! Et cum omnium voces ad miserabilem sonum sint inflexae, omnibusque in hac calamitate tabescendum esse videatur, a nobis quoque omni de re filebitur, praeterquam de maximis hujus Heroinae factis, ex quibus fomenta atque solatia acerbissimae plagae haurire tantummodo possumus. Sed omnes solidam & expressam effigiem virtutum illius jam tenent, ut vel iis, qui cum eloquentia polleant, vitam ipsius totam explicare, atque eam non modo in animis hominum, sed etiam in oculis conspectuque omnium exponere sibi proposuerant,

desperandum sit posse se aliquid novi incognitique in medium proferre. Audivimus quae solitudo fuerit vel in frequentissimis urbibus, cum nuntium allatum est de illius morte, quae vastitas in agris, quae lamentationes universorum ordinum, perinde ac si spes omnis resque publica universa unius feminae fato perculsa cecidisset. Cum delatum sibi multarum gentium imperium non in beneficii loco, sed in laboris ac muneris arbitraretur, omnes reipublicae partes diligentia omnino singulari circumspiciebat, pari providentia cunctis consulebat, & in hac custodia regni videbat etiam atque etiam, ut non se unam, sed omnes ministros imperii subditis sibi populis praestare posset. Coacta vero arma sumere, non quo pericu-

lum aliis faceret , sed ut sua ab injuriis tuta forent , tremebat animo , cum audiebat rapi virgines , pueros , divelli liberos a parentum complexu , matres familiarum pati , quae hostibus collibuisse , fana atque domos expoliari , caedem , incendia fieri , postremo armis , cadaveribus , cruore atque luctu omnia compleri , ceteraque hujusmodi quae bellum comitari solent , indeque primum tot malorum miseratio , deinde indignitas & dolor Principum fortunae , postremo desiderium tot calamitates avertendi , firmumque propositum , quam minime posset , irascendi , cum quae apud alios iracundia dicitur , ea in imperio plerumque superbia atque crudelitas appelletur . Quam saepe Deo gratias agebat quod sibi datum esset diu frui

summa pace tranquillitateque, ita tamen ut ea dormientem gubernatorem nec obruere, vigilantem etiam delectare posset; & quae gessit aut in confirmandis sibi sociis, novisque parandis, aut in avertenda inopia stipendii reique frumentariae, aut in augendis copiis omnibusque iis rebus, unde custodia regni atque securitas publica, sapientiam omnino singularem declarant. Non extimesco ne nimis multa MARIAE THERESIAE laudibus concedere videar, cum quilibet per se facile comparare possit florentissimam, quam reliquit, regni totiusque familiae fortunam, cum afflicta ac prorsus luctuosa, qua pene opprimi videbatur, quando ipsa ad imperii gubernaculum accessit. Quae tum fuerunt consilia & facta ad recuperandam

pristinam dignitatem, ad excitandos
 omnes ad suorum regnorum defen-
 sionem, quae adhibita diligentia,
 quae institutiones ac disciplina in-
 vecta, ut animo aequiore gentes
 belli incommoda ferrent, & fortis-
 simis hostibus nimium alieni appe-
 tentibus resisterent, & quidquid ab
 iis aut pecuniae, aut copiarum de-
 cernebatur, non Reginae potius,
 quam universo hominum generi ac
 Deo immortali datum arbitrabantur!
 Quod si tantam feminam fors im-
 manibus ac barbaris nationibus prae-
 fecisset, pro suis singularibus meri-
 tis, & pro suis maximis beneficiis,
 non minus facile arctaque eas sibi
 obstrinxisset, ut nullam aliam po-
 testatem fuissent desideraturae. Vi-
 demus nunc etiam sacra illorum
 magnorum Ducum vestigia oscu-

lantes, qui pro incolumitate Austra-
 ciae imperii praeclara facinora edi-
 derunt, additumque non parum eorum
 gloriae arbitramur, quod sub
 signis MARIAE THERESIAE militarunt.
 At sicuti maris caelique temperiem
 procellae ac turbines commendant,
 ita ad augenda pacis bona, corro-
 borandamque animi magnitudinem
 ac fortitudinem in Regina, formido-
 losissimi temporis tempestatem obla-
 tam illi fuisse crediderim. Quid tam
 porro regium, tam munificum quam
 opem ferre indigentibus, excitare
 afflictos, dare salutem, liberare pe-
 riculis, quibus in rebus tanta esse
 solebat occupatio beneficentissimae
 feminae, ut tanquam Deam aliquam
 e caelo delapsam omnes intuerentur?
 Facile autem est conjicere quantis
 ipsa compleretur gaudiis, cum se

univerforum matrem appellari au-
 diret, & tum fortasse minime cam-
 dem pigebat se ad principatum vo-
 catam fuisse, quod multis benefa-
 cere posset. Tam velox erat po-
 tentia illius, tamque in omnia pa-
 riter intenta bonitas, ut tristius ali-
 quid passis ad remedium salutemque
 sufficeret ut ipsa sciret; & cum in
 adversis casibus tam amplam mate-
 riam campumque inveniret suarum
 virtutum suarumque laudum, ef-
 ficiebat ne omnes sui modo paren-
 tumque, sed ne posterorum quidem
 poeniteret. Acuebatur inde virtus
 in militibus; industria, fides, inte-
 gritas & justitiae amor in civilibus
 magistratibus, quibus erat persua-
 sum se sibi suisque consulere, si
 culpa vacarent, quae una poterat di-
 vinae feminae beneficia remorari.

Sic aequè summis ac infimis cara, si quando gravius aegrotavit, unius salutem spectare omnium vota videbātur, cum quisque sibi se ac liberis suis intelligeret precari quae pro illa precabatur. Non poterat, quamvis modestissima, ignorare ejus virtutes quodammodo consecratas, & in Dcōrum numero collocatas fuisse: quocirca in omnibus rebus quas statuebat, quas decernebat, quas agebat, quid tantis hominum opinionibus, tantis de se judiciis, tantae caritati deberet, cogitabat. Id autem erat hujusmodi, ut subiectos sibi populos esse quam beatissimos vellet, quare hi leges a sapientissima femina, quae salutem felicitatemque publicam bonorum consiliorum adjutricem habebat, non modo libenter accipiebant, sed

etiam efflagitabant . Quid memorem multas ab illa urbes magno & gravi aere alieno liberatas , complures dirutas ac pene desertas per illam fuisse recreatas , nullas extitisse in provinciis seditiones , nullas discordias , sublata latrocinia , caedes repressas , auctum commercium , remotam a fama , a fortunis calumniam atque injustitiam , provi-
sum ut civitates eorum consiliis , quorum fides & prudentia cognita esset , administrarentur , effectumque demum ut omnibus & ad periculum & ad salutem praesto esse posset ? Porro si liceret hominem Deo aliqua in re comparare , dixerim THERESIAM hujus imaginem quamdam fuisse , cum omnia sentiret ac videret , nihil non meminisset , cunctis provideret , & omnia sapien-

tissime regeret atque moderaretur. Quid illa quae ad doctrinarum, liberaliumque artium incrementum femina vel a pueritia interioribus quibusdam reconditisque litteris imbuta praestitit? Quot per eam vigerunt gymnasia, quot aut institutae, aut instauratae, ac pene renovatae Academiae, quantis praemiis homines doctrina clari ad eas invitati, quot instrumenta litterarum regio omnino sumptu comparata, quot praescripta utilissime ad studiorum & vitae rectam institutionem, quot doctorum hominum excitata industria ad praeclara ingenii monumenta edenda! Mirabantur omnes, qui noverant quantis oneribus premeretur susceptarum rerum & jam institutarum, nova in dies magis ipsam meditari, ut nunquam

conquiesceret a continuis in litteras & in litteratos homines beneficiis. Nullum profecto est magno Principe immortalitatemque merituro impendii genus dignius, quam quod erogatur in posteros, quodque pertinet ad ingeniorum cultum, optimarumque artium celebritatem. Nam cum duae sint artes potissimum, in quarum studium Reges incumbere, quas perdiscere, in quibus versari vel soleant vel debeant, una militaris & bellica, per quam hostilis & externa injuria propulsetur, altera civilis & urbana & quodammodo togata, per quam civitates optimis legibus institutisque temperatae, concordia, opibus, virtute florent, dubitari non debet, quin ea per quam populis vita beata quaeritur, & cujus causa prior

est illa comparata , longe illi sit anteponenda . Neque tanta femina fuit minus domi admiranda , quam foris clara , neque rebus externis magis , quam institutis domesticis laudanda . Quid enim ejus sedes & cubicula viderunt nisi pudicum , quid nisi ex optimo more & sanctissima disciplina ? Nemo vero ignorat quam optime mereantur de republica casti & religiosi Principes , quod non solum Christianas virtutes concipiant ipsi , sed eas infundant in civitatem , neque solum ad tempus maximam utilitatem afferant , sed etiam posteris aeterna exempla proponant ad imitandum . Ut ad templum accedere omnes videbantur ad Reginam , cumque facillimi essent ad ipsam aditus , paterentque aures illius querelis omnium , nulliusque

inopia ac solitudo non modo illo regio folio, sed ne interiori quidem cubiculo esset exclusa, & omnia plena essent clementiae, mansuetudinis, humanitatis, cuncti libenter fatebantur nihil unquam contigisse humano generi gloriosius, nihil saeculo dignius. Neminem supercilio ac rugis terrebat, neminemque imperiosa maiestate elinguem reddebat, sic ut suus cuique pudor atque reverentia finem sermoni faceret. Vel umbram superbiae, quamvis potentissima, averfabatur, perinde quasi nihil illi fortuna tribuisset. Eminebat, excellebat ut honor, ut potestas, quae super homines quidem, hominum sunt tamen; & cum ante illam Principes aut fastidio nostri, aut quodam aequalitatis metu plura exigerent, quibus verendos excolit-

pictas Superos, a se, a liberis suis, a domo sua periculosas hujusmodi consuetudines multas avertit, easque invexit, quibus de Principum superbia omnino triumphasse videretur. Sic cum propius & confidentius privati ad Principes ipsos accederent, hi quidem intellexerunt se quoque ad societatem communitatemque generis humani natos esse; & quae thronum obsedissee videbatur adulatio, qua certe nulla est capitalior pestis, plurimum de vi sua se amisisse doluit. Amabat libertatem dicendi, rectosque ac vivos animos, non, ut alii, contundebat ac deprimebat, sed fovebat attollebatque. Non ei mos erat flexiloqua & obscura oracula fundere; & quocumque se verteret, illam veritatis amor persequabatur; cum

que nihil in ea fallax , nihil non
flexibile ad bonitatem appareret,
inficiebat ac torquebat animos ac-
cedentium ad se , ut vellet , sic ut
Suada in ejus labris fissitare dice-
retur . Omnes stupefacti dicentem
intuebantur , & multi qui superiores
se ab ea discessuros , aut saltem as-
sensus suos firme se cohibituos spe-
raverant , flexanimæ victricis Regi-
nae orationi cedere sunt coacti . In-
finitum esset singula commemorare .
Quis demum ignorat tantarum vir-
tutum comitatum minime proximæ
mortis adspectu elanguisse , quin im-
mo vividiorum extitisse ; ipsamque
tanta animi tranquillitate , quam una
recte factorum conscientia parere po-
test , Reginae , Matris , Christianae
feminae officia persolvere , non secus
ac si de domo in domum esset mi-

gratura? Scio me in rebus celebratissimis omnium sermone versari; sed debet in tanta copia virtutum excitare animos non cognitio solum, sed etiam recordatio. Quoniam vero, CELSISSIME PRINCEPS REGIE, mente tota omnique animi impetu in id incumbis, ut in te exprimas atque effingas tantae Heroinae imaginem, te ipsum laudare existimaui, cum ipsam laudassem; praeterquamquod visa est mihi hoc tempore omnis oratio aut inopportuna aut injucunda praeter illam, quae facta praeclara atque divina exponit ad imitandum. Det tibi Deus aetatem quam mereris, fervetque animum quem dedit, quo voto sane multarum gentium felicitas continetur. Minime vero arrogantiae tribues, quod ad TE cum votis & cum

munusculo accefferim , cum compertum habeamus non aliter veneratam fuisse Antiquitatem magnos illos Heroas Diis proximos , quorum nomina immortalitati consecravit .

ANGELUS FABRONIUS

JOSEPHO BALTHASSARIO

S. P. D.

Nulla profecto non laude celebrandi sunt ii magistri, qui exemplum secuti summi illius eloquentiae doctōris Alabandensis Apollonii (1) adolescentes sic instituunt, ut quid efficere possint, & quo eos ferat deducatque natura attente perspiciant. Et si quidem viderint eos in aliqua arte ingenua posse ad summos pervenire, non solum hortabuntur, ut elaborent, sed etiam obsecrabunt; si videbuntur non multum illi profecturi, permittent ipsis quid velint; sin vero plane abhorrebunt, ut se contineant, aut ad aliud studium, ad quod magis fuerint apti, ut se transferant admonebunt. Nam neque is, ut praecipit Cicero de iis, qui eloquentiae dant operam, deserendus ullo modo est a cohortatione nostra, qui optime potest, neque is, qui aliquid potest, deterrendus, quod alterum divinitatis cujusdam sit, alterum vel non facere quod non optime posses,

Tom. VII.

A

(1) Vid. Cic. de Orat. lib. I, c. 28.

vel facere quod non pessime facias, humanitatis
 æternum ponis clamare contra quam deceat,
 quod hominis esse ait stultitiae suae quampluri-
 mos testes præconia sua colligentis. Qui igitur
 alicui arti se dedere, & in ea excellere cupit,
 primum vigilet necesse est in deligendo, seque ipsum
 percontando, deinde quam probavit, & ad quam
 se idoneum fore intelligit, sic amplectatur, tan-
 quam in illa una quasi tabernaculum vitae suae
 sit collocaturus. Usus annorum jam ferme duode-
 cim, quibus singulari Leopoldi Magni Ducis be-
 neficio in hac Pisana Academia Curatoris mune-
 re fungor, me edocuit nihil tam obstat atque
 officere reipublicae & litterarum commodis quam
 adolescentes illos, qui temere & nullo consilio
 multa non eodem tempore modo, sed & eadem, ut
 ita dicam, opera consectantur. Hi enim per lo-
 gicam, per physicam, per mathematicam, per meta-
 physicam, per omnia divina & humana jura, per
 caelestia, per terrestria omnia vagantur, quod non
 modo incaute, sed etiam stulte vel ab ingeniosissi-
 mis fieri judico, cum nemini unquam datum
 fuerit omnia scire, vel in multis facultatibus ex-
 cellere. Atque utinam aetatis hoc vitium esset,
 non naturae ac temporum. Nam ubi semel de-

ferbuisset juvenilis ardor, tum vero moderationi-
 bus iislem ac sanioribus uteremur, & viderens
 prudentes in vita, quod histriones vident in sce-
 na, qui non omnes neque optimas, sed sibi ac-
 commodatissimas fabulas eligere solent. Sed adul-
 ta jam aetate intemperantiae audacia accedente,
 omnis vis ingenii intenditur ad noscendas omnium
 fere librorum inscriptiones, ad quaerendum quid
 in controversiam ac disceptationem vocetur, ad
 leviter intelligendas plurium populorum linguas,
 quasi in aliquâ surdum esse dedecet philosophum,
 ad comparandos inter se veterum & recentiorum
 labores, inventa ac scripta, atque iudicium de
 omnibus pronuntiandum non delectu & sapientia,
 sed impetu atque temeritate omnino singulari.
 Praeclara quidem res esset atque magnifica posse
 nos doctrinarum omnium cursum conficere, &
 idem vere gloriari, quod falso Eleus Hippas,
 nihil esse ulla in arte rerum omnium, quod ipse
 nesciret, nec solum has artes, quibus liberales
 doctrinae atque ingenuae continerentur, sed an-
 tulum quem haberet, pallium quo amictus, soc-
 cos quibus indutus esset, se sua manu confecisse.
 Sed non est imbecillitatis ingenii nostri, non exi-
 gui huius spatii, quod est homini ad vivendum

Latum, non denique ipsius naturae rerum, quae
 in infinita cum varietate tum difficultate versan-
 tur, omnia assequi, omnia tenere, omnia me-
 minisse. Itaque qui excellere sapientiae gloria, &
 immortalitati nomen commendari suum exoptant,
 non plus suscipiunt quam se assequi posse spera-
 bunt, & aliam alii sibi facultatem in tanto tam-
 que immenso doctrinarum campo, in qua dies
 noctesque elaborant, seponentes, hanc tanquam
 spartam sibi vel sorte oblatam, vel consilio de-
 lectam pro virili parte exornabunt. Bene ac sa-
 pienter majores nostros fecisse arbitror, qui prae-
 stantiores disciplinas quasdam plures in partes,
 quasi in membra, idcirco discerptas esse volue-
 runt, ut quilibet e multis eligeret quam prae-
 cipue coleret, cum omnes comprehendere desperan-
 dum esset. Sic una philosophia, quae antea exi-
 guis quidem finibus continebatur, cum in res
 tantummodo partes distributa fuisset, in naturae
 obscuritatem, in differendi subtilitatem, in vi-
 tam atque mores, augeri & amplificari plurimum
 potuit multarum facultatum distributione separa-
 tioneque, in quibus illud admirandum est, quod
 quamvis omnes unius matris imperio sint subje-
 ctæ, omnesque artissimis inter se vinculis astrin-

ganatur, separatim tamen se cognoscat atque excoli
 minime recusent: Ita fit, ut qui tardo plane non
 sit ingenio [non enim omnes idem acumen re-
 quirunt] possit in aliqua consistere; & praeclare
 secum actum putare si omne id affecturus sit, quod
 tradi solet vel a metaphysicae, vel ab ethices,
 vel a physicae, sive chemiae, sive optices; sive hy-
 drostaticae; sive mechanicæ; aut naturalis histo-
 riae, aut denique astronomiae magistris. Quis ve-
 ro se immortalī memoria digne non putabit, si
 unam alteramve harum disciplinarum tractans ali-
 quid de suo aliorum inventis addere potuit? Haud
 paucos ego novi, quorum memoria canescet, ut
 ille ait Poeta; saeculis innumerabilibus, quod
 in unius corporis natura proprietatibusque inve-
 stigandis atque contemplandis plures annos, quin
 immo totam vitam fuerint versati, cum dubitari
 non possit reticentia posterorum sepultam fore in-
 exhaustam multorum aviditatem omnia noscendi & in-
 cuiusque facultatis fines penetrandi: Equidem mi-
 nime reprehendere audeam naturam; quod parca
 fuerit in suis largiendis donis; quin potius ipsam
 laudaverim, quod in infinita hominum multitudi-
 ne visa sit unicuique suum assignasse munus, &
 in hac prope aequalitate fraterna voluisse omnium

esse consensum quemdam conspirationemque mutuo
se se adjuvantium. Porro adeo verum est nolle
illam pluribus in rebus eundem excellere (si
perpaucos demas, quos ipsa ad vim suam quodam-
modo declarandam perraro edit) ut id usuve-
nire etiam soleat vel in una eademque arte,
quam Latinis & Etruscis litteris celebrandam at-
que exornandam suscipimus. Quod ut Francisci
Petrarchae confirmemus exemplo (innumerabilia
enim asserere possem) quid non modo fieri, sed
vel cogitari splendidius, uberius, mollius, elegan-
tius ejus Etruscis carminibus potest? Equidem sa-
tiari nequeo in iis legendis; sed cum ejusdem La-
tina, sive epica sive bucolica in manus sumo;
vix adducor ut credam illa ab eodem condita
fuisse poeta; & miror majorum nostrorum vel
inscitiam, vel nimiam indulgentiam, quod am-
plissimum illud coronae laureae praemium iis de-
beri unice existimaverint. Quis tam poetae finiti-
mus est quam orator? Nihilo tamen minus per-
paucos, & prope neminem invenies, qui utraque
in arte excelluerit, quamvis infiniti extiterint, qui
ad hanc laudem aspiraverint. Sed ut ad illa ma-
gnarum rerum studia redeat oratio, quae fere re-
conditis atque abditis e fontibus hauriuntur, non

negabo ea interdum indigere alterius artis subsidio, ut, hac incognita, nemo in iis ipsis satis callide versari & perite possit; & tum quidem, me ipso auctore, studiosi adolescentes tantum sibi ex illa assument, quantum necesse erit ad id, quod volunt, obtinendum. Neque repugnabo si rerum cognitioni tractationem orationis adungere volent: nam quamvis verum sit, quod Socrates dicere solebat, omnes in eo, quod scirent, satis esse eloquentes, nihilo tamen minus, qui gnarus erit faciendae & poliendae orationis, multo uberius de sua arte suisque inventis loquetur, & in universorum animos facilius influet. Ego vero quantum auguror conjectura, quantamque sapientiam esse video in rerum publicarum moderatoribus, non despero fore aliquando, ut singulis disciplinis sui reddantur tutores, qui minime in plura ac dissimilia studia distracti utrum, quod susceperunt, quodque est cujusque suum maxime, turgeant opus. Tum quidem superiorum temporum stultitiam damnabunt atque devovebunt, quando caecos quodam impetu concitata juvenus multa profiteri, non item multa praestare, nihil non conari, vix quidquam posse perficere, & plus coloris quam succi ac sanguinis sibi comparare

studebat. Quod malum si ad nos, ut reor, a Gal-
 lis maxime pervenit, qui artem se tradere glorian-
 tur, multa atque infinita propemodum parvo la-
 bore noscendi, fatebimur profecto nullam ab iis
 potuisse literis securim infligi graviolem. Haec
 commemoranda mihi esse putavi scripturo de vita
 Antonii Vallisnerii, qui quamvis ad multas phi-
 losophiae partes illustrandas idoneus esse videretur,
 in una tamen historia naturali voluit consi-
 stere, neque in hac universa, sed in ea tantummo-
 do parte, quae ad insecta ceteraque minora ani-
 malia maxime pertinet. Per hanc plurimum &
 nominis celebritati & reipublicae commodis con-
 sulere potuit; & quod infinitis pene erroribus ipsam
 liberaverit, nonnulli vere de eo praedicasse illud
 Ciceronianum videntur, suis manibus in rerum
 natura quasi alteram naturam efficere ipsum
 conatum fuisse. Sed jam vitam ipsam explica-
 re aggredior, quam ad te mitto, ut ad homi-
 nem, qui longe multumque praestat omnibus in
 hujusmodi rerum cognitione & scientia. Vale.

Pifis IV. Non. Mai. MDCCLXXX.

ANTONIUS VALLISNERIUS.

VAllisneria familia non tam antiquitate quam viris fortissimis illustris nomen a Valle Nigra habuit, quod est oppidum Mutinensis ditionis, quodque ipsam ut suum cum aliis oppidulis diu possedisse traditum est. Ab stirpe hujus familiae plurimi, sicuti palmarum, rami diffusi sunt, quorum varia fors fuit atque fortuna. Antonius, de quo scribendum suscepimus, natus est v. Non. Masi MDCLXI. in arce Tresilici non ignobilis Carferonianæ oppidi, quod ibi illius pater Laurentius munus de jure respondendi Mutinæ Ducis nomine sustinebat. Mater eidem fuit Lucretia Dacinia prudentissima & diligentissima femina. Adolescens quod disci poterat de philosophia Regii Lepidi didicit apud Jesuitas. Horum unus Blasius vir doctus e disciplina Peripateticorum quod explere non poterat discipulum, qui uno haud erat contentus Aristotele, & majus semper aliquid desiderabat, eo utebatur solatio, quod diceret ab illo tanquam a parente ceteros, qui maxi-

me celebrabantur, manasse philosophos. Sed respondebat Antonius: omnium magnarum artium sicuti arborum altitudinem se delectare; radices stirpesque non item, quamvis illae sine his esse non possent. Itaque rogavit patrem, ut se Bononiam mittere vellet, quam urbem doctorum nobilitate florere audierat. Illud profecto rarum est genus hominum, qui aut eccellente ingenii magnitudine, aut praeclara eruditione atque doctrina, aut utraque re ornati spatium deliberandi habuerunt, quem potissimum vitae cursum sequi vellent. In qua deliberatione ad alterius, & praesertim parentum, magis voluntatem, quam ad suam cujusque naturam saepe consilium omne revocatur. Sed datum est Vallisnerio, ut quam vellet studiorum viam ingrederetur, favitque ei fortuna, quod cum medicinam, anatomen, ac praesertim naturalem historiam excolendas suscepisset, praeceptorem nancisceretur Marcellum Malpighium, qui longe omnium in iis facultatibus princeps esse, & qui postremam non illustrasse modo, sed etiam pene genuisse judicabatur. Hic autem nominem qui Vallisnerio prae-

staret ingenio, neque studio, neque industria
 majore se cognovisse affirmabat; & cum nul-
 lum tempus illi unquam vacaret ab anato-
 micis exercitationibus, gravem & periculo-
 sum nactus est morbum. Id adeo commovit
 ejus parentes & Malpighium ipsum, ut illius
 impetum atque ardorem restringendum puta-
 verint. Tum ad remissionem animi, tum ad
 obsequium in Principem, qui suis licentiam
 libertatemque praeciderat insignia doctrinae
 ab externis Academiis accipiendi, anno
 MDGLXXXIV. Regium Lepidum venit, ibi-
 que laurea decoratus est a Casalecchio, cujus
 magnum erat in medicis nomen, & quem
de morborum transmutationibus omnium pri-
 mum scripsisse alibi narravimus (1). Bono-
 niam cum rediisset Antonius, summis viris au-
 ctoribus, pristinas exercitationes renovavit;
 & quo instructior ad medicinam accederet,
 praeter ceteros doctores maxime audivit Lae-
 lium Triumphettum virum in multis discipli-
 nis, sed praesertim in re herbaria praestantem,
 & instituendi docendique prudentissimum.

(1) In vita Baglivii Tom. IV. p. 22.

Vigere tum videbatur philosophia doctissimo-
rum contentionibus diffensionibusque, & cum
acriter inter se dimicarent Sbaralea & Mal-
pighius; hujus belli participes quoque erant
illorum discipuli sive studio in praeceptores,
sive spe quadam gloriae commoti. At Val-
lisnerius, qui otium & tranquillitatem sem-
per amavit, ita se gessit cum iis, inter quos
maxima laudis erat aemulatio, ut intelligi
non posset, uter eorum plus ipsum dilige-
ret; & id quod erat difficillimum obtinebat,
ut ad utriusque scholas tuto accedere pos-
set. Qua in re non solum tranquillitati ser-
viebat, sed etiam dignitati. Sic postquam
complures annos studio ductus rerum ad phy-
sicam pertinentium Bononiae habitasset, haud
paucas Italicas urbes peragravit, ac prae-
sertim Venetiis constitit, effecitque ut hujus
peregrinationis, cum multos doctos medicos,
& eos, qui in chirurgia & chemia excellere
putabantur, audivisset, sibi fructus extaret.
Habebat ille, profecto comprehensam animo
quamdam formam perfectae medicinae, &
multa & in se & in aliis desiderans, & o-
mnia se consequi posse desperans, unum prae-

fertim spectandum putavit, ad quod rectissimis
 studiis ac continuis laboribus contenderet. *Naturae contemplatio* (praeclara hac Celsi sen-
 tentia respondere solitus erat reprehensoribus
 suis) *quamvis non faciat medicum, aptiorem*
tamen medicum reddit atque perfectum, verique
simile est & Hippocratem & Erasistratum (&
quicumque alii non contenti febres & ulcera agi-
tare, verum quoque naturam ex aliqua parte
scrutari sunt) non ideo quidem medicos fuisse,
 verum ideo quoque majores medicos extitisse.
 Quaerebat igitur ex se ipso, idque jam sae-
 pius, quodnam physicae genus sequeretur
 maxime, & cum experiri tandem delibera-
 set quid efficere, aut quo progredi posset in
 historia naturali, minime deterritus est prae-
 claris Malpighii & Redii operibus, quod pri-
 ma sequenti honestum & gloriosum esse di-
 ceret in secundis tertiisque consistere, quem-
 admodum in poetis, ut est Ciceronis sen-
 tentia, non Homero soli locus fuit, aut Ar-
 chiloco, aut Sophocli, aut Pindaro, sed ho-
 rum vel secundis, vel etiam infra secundos;
 nec Aristotelem in philosophia deterruit a
 scribendo amplitudo Platonis; nec ipse Ari-

Stoteles admirabili quadam scientia & copia ceterorum studia restinxit. Antequam Vallisnerius ad inventoris gloriam aspiraret, aliorum inventa examinare voluit, & semel iterumque renovavit omnia experimenta, quae Malpighius ad bombycis naturam, & Redius ad insectorum ortum noscendum instituerant. Quoniam vero experiendo didicit non omnia vidisse Redium, & in quibusdam etiam ipsum peccasse, non dubitavit eandem pertractare materiam, quo convinceret eos, quorum sermo imperitus increbuerat, frustra susceptum a Redio laborem fuisse ad evertendas Peripateticorum sententias, qui plura animalia ex putri ortum habere gigni que docebant. Nec tam persuadere, quam delectare voluit lectores suos Vallisnerius, cum illud disputandi genus, quod dialogus vocatur, omnibus praetulisset, dans sermonem iis, qui principes in historia naturali tum apud veteres tum apud recentiores fuisse putabantur, Plinio & Malpighio. Itaque a re saepe discedit, intexit narrationes, sententias cum sententiis comparat, easque sic disponit, ut pictores varietatem colorum; & cum eleg

gantiam non solum Etruscae locutionis; sed & flores persequatur, hac quoque in re accumulari gloriam voluisse videtur Francisci Redii, cujus, non secus ac Xenophontis, vocem musas quasi locutas fuisse a nonnullis dictitabatur. Mollis est oratio Redii in philosophicis scriptionibus, nec sententiis, nec verbis instructa popularibus, neque exquisitis nimium. Naturali quadam pulchritudine commendatur, & delectat hoc ipso, quod inter se omnes partes cum quodam lepore, urbanitateque consentiant, quod vereor ne pronuntiari aequè possit de Vallisnerio, quamvis non tam docendo, quam dicendo delectationem haud mediocrem aucupetur. Hic quod animo sentiebat, & oculis conspexerat, libere in medium profert; haud reverens imperitorum reprehensiones ac maledicta; & homo navus & industrius, experientissimus ac diligentissimus observandi arte, & observatarum rerum copia ipsum superasse Redium videtur. Sed hujus fuit laus propria, quod Italorum primus physica constantique ratione innumera pene superstitione atque aniliter dicta everterit, & dormientium & vinolento-

tum, & furiosorum visa ab naturali historia
 propulsaverit. Ego autem mirifice capior ho-
 rum scriptorum lectione; & cum videam
 prudentissimos homines id elaborasse, non
 tam ut rebus probarent, quam ut vocibus
 delectarent, doleo ea effluxisse tempora,
 quibus nullum jus erat brachatis & transal-
 pinis nationibus aliquid peregrinitatis in no-
 stram linguam infundere, in qua potuisses
 imaginem antiquae & vernaculae festivitatis
 ac leporis agnoscere. Quoniam propositum
 erat Vallisnerio aliquid exquisitius moliri quam
 ceteri praestiterant, postquam confirmasset
 Redii sententiam, qui Plinio negaverat ex
 equorum carnibus vespas oriri, quid huic
 errori causam dederit exponit, & oculis
 subjicit formam partesque cujusdam muscae,
 quae cum vespa quamdam habet similitudi-
 nem, & quam prodire putat ab iis vermi-
 bus, qui in equorum & pullorum intestinis
 saepe reperiuntur. Quomodo vero fieri pos-
 sit, ut insectorum ova a pastu in intestina
 equorum delata (1) causa & origo sint ver-
 mium,

(1) Hanc sententiam postea correxit cum de luc equo-
 rum ageret. Vid. Tom. II. ejus operum p. 2,

mium, neque hos modo, sed etiam muscas ex iis genitas videre liceat existere *vivas stercore de tetro*, pluribus explicare nititur Vallisnerius, quod non tam propriae defensor esset sententiae, quam oppugnator alienae. Contrarie enim hac de re scriptum a Redio fuerat. Observaverat hic gigni vermes in naribus vervecum, quod non magnae artis ac laboris fuit. Sed quonam modo id fieret, id erat longe maximum videre. Satis hac in re studiosorum desiderio Vallisnerius fecit, & adversus ipsam Redii sententiam probavit huiusmodi vermes in muscas proprii cuiusdam generis converti; has ova deponere in naribus eorundem animalium, & novos inde oriri vermes. Neque horum modo, sed & aliorum multorum, qui inter ceterum taurorum, vaccarum, bovium, & similia brutorum existunt, figuram, & quidquid ad eorum mutationem in chrysalides & muscas pertinet, ob oculos ponit. Res erat obscura & difficillimos explicatus habere putabatur, qui fiat ut ex uno ovorum genere specie disparia nascantur insecta. Nonnulli, & quod mireris, Redius ipse, existimave-

rant hoc opus esse ipsorum insectorum animae; alii certissimum inde elici argumentum contendeant [1] cur quaedam, si non omnia, ex putri ortum habere insecta credere debeamus. In horum sententiis explodendis paralam fecit Vallisnerius idcirco ex ovis noctivagi papilionis prodiiisse minimas muscas, quod harum proprii vermes in eadem antea penetraverant, idque ex binis foraminibus apparebat, & multis similibus confirmabatur exemplis. Erant qui crederent cicadas ex cuculorum sputo nasci, & magnus ille e Verulamio Baconus monuerat philosophos, ut hujusce sputi causam inquirerent, quia *in aëre naturae erat*. Ne id amplius lateret, factum est Vallisnerii industria atque diligentia. Is enim comperit, sputum illud opus esse quorundam insectorum, quo involvuntur, donec formam adepta non plane dissimilem canorae cicadae ex eo tandem evadant. Accurate explicat omnia, quae ad hanc mutationem pertinent, invenitque contra id quod putabat Baconus, non calidas modo

(1) Vid. *memoires de Trevoux* an. 1701. art. X, c. 48

herbas, sed & frigidas & temperatas isthæ spumea vestiri materia. Haec & quæ de ver-
me *formicoso* (sic enim appellat, quem nos Itali dicimus *cevettone*, quod is formicis ve-
scatur) in altero dialogo scripsit, ventosissi-
mus Gallorum Poupartius paucos post annos
tanquam sua Academicis Parisiensibus vendi-
cavit (1), quam impudentiam Vallisnerius
inultam esse sivit, non quia negligeret quid
de se quisque sentiret, quod arrogantis ac
omnino dissoluti esset, sed quia probaturum
se omnibus confidebat, nunquam indignis
alienis ornamentis, cum propriis abundaret.
Adde quod iis temporibus plurimi erant te-
stes audaciae Gallorum in arrogandis sibi
Italorum inventis, ut nostri ob culpæ fre-
quentiam desierint iracundius aut vehemen-
tius conqueri. Non minus ex sententia cete-
ra processerunt Vallisnerio inquirenti quomo-
do nascantur, vivant, & in muscas abeant
xylophthori [nos hoc insectorum genus in
higniperdam terrestrem & aquaticam distingui-
mus] vespæ quaedam icneumones ab Ari-

B 2

(1) Vid. vol. Act. Acad. Paris. an. MDCCV. p. 162.

Botole appellatae, quae phalangia perimunt,
 & nidos in parietinis luto construunt, tar-
 mites ligna corroderentes, & cetera hujusmo-
 di infecta, & illa praesertim, quae rosis &
 salicibus gaudent, in illisque nascuntur. Sic
 dum occulta multa & quasi involuta aperit
 Vallisnerius, magis magisque confirmavit Re-
 dii sententiam, nihil ex putri nasci, & omnia
 infecta suos procreatores, suaeque ova habe-
 re, eodem prorsus modo, quo in seminibus
 causa est & origo omnium arborum, stir-
 pium atque plantarum. Ad convincendos
 vero pertinaces & liigiosos quosdam Peripa-
 reticos exquisitius & copiosius de alga ma-
 rina & palustri disserit, docens quomodo ex
 minutissimo semine illa quoque procreetur,
 augeat, & habeat quamdam maturitatem
 suam. Quidquid hoc loco de segetum ru-
 bigine (neque hanc aliud esse putavit nisi
 minutissimorum vermium acervum) & de
 musco non tam ejus diligentiam indicant,
 quam incitiam Alberghetti coarguunt, qui
 haec confundere videbatur. Harum omnium
 rerum explicationem tribuit Vallisnerius Ma-
 pighio, tum ad dialogorum ornamentum (ge-

nus enim hoc sermonum positum in illustrium hominum auctoritate plus nescio quo pacto videtur habere dignitatis) tum ad gratum animum suum in praeceptorem declarandum, de quo multa etiam memoriter & jucunde narrare solebat, nec dubitare illum in omni sermone appellare sapientissimum, & quasi philosophorum Deum. Cum videret Vallisnerius hanc primam ingressionem suam plurimum probari ab iis, qui de hujusmodi rebus judicare poterant, incendebarur quotidie magis desiderio universam naturalem historiam illustrandi: magnum opus omnino & arduum, sed nihil difficile amanti putabat. Horum studiorum causa agros & montes lustrabat, & tanquam venaticus canis erat incredibili sagacitate ad omnia curiosa indaganda atque noscenda. Referta jam domus ejus erat plantis, lapidibus, bestiis, ut miraretur veteres harum rerum contemplandarum voluptate non satis fuisse commotos. Etenim animorum naturale quoddam pabulum esse arbitrabatur considerationem & contemplationem naturae, neque in ea ullam esse partem uberiores, neque ad

prodendam divini Auctoris sapientiam magis idoneam, quam quae ad insecta pertinet. At quoniam non tam ingenio ac famae, quam fortunis erat inserviendum, facile passus est ab huiusmodi occupationibus se divelli, ut munus susciperet docendae medicinae in Patavina Academia. Assignatum est ei stipendium CCCL. florenorum, quod semel iterum ac saepius auctum fuit ad centum usque supra millenos. Dolebat Vallisnerius in celeberrimo Italicorum Gymnasio adeo dominari veterem philosophiam, ut recentiorum inventis omnis pene aditus interclusus esse videretur. Itaque verens reprehensiones & maledicta eorum, qui habebant auctoritatem & nomen, adhibendam sibi esse putavit quamdam moderationem, atque prudentiam, cum de genere studiorum suorum, & de universa ratione docendi esset dicturus. *Quae est ista, aiebat, insolens nonnullorum ostentatio, qui prae se irrident atque contemnunt omnes veteres scriptores, haud intelligentes se pervetera saepe dicere, sed inaudita plerisque, cum nova sibi dicere videntur? Et fateor me medicum, si molo sim, aut etiam quicumque sim, non ex*

neotericorum officinis ; sed ex divini senis Hippocratis schola extitisse ; ac video antiquam medicinam ; etsi reprehensionis aliquid , admirationis etiam plurimum habere : Omnia igitur expendat & seligat oportet medicus , percurrat omnes scholas , utatur alienis observationibus ; discat ex quo quidlibet emanat , & in omni re iudicium adhibeat : Ut vero apertum omnibus faceret se in veterum libris plurimum consumpsisse laboris & temporis , exposuit quae in his indicia ac vestigia apparerent celebriorum inventorum ; quibus recentiores maxime gloriuntur , & huiusmodi sunt sanguinis circuitus , halitus ex innumeris humani corporis meatibus erumpens ; cordis ; renum , hepatis , aliorumque viscerum ac membrorum structura : Haec quidem ad benevolos sibi faciendos collegas suos plurimum valere iudicabat , quo liberius eosdem monere posset , ut furere desinerent , neque omnia recentiorum inventa , quod ingratum ac superbum erat , exagitarent : pecudis enim non hominis se semper existimasse ; cum tantas res philosophi recentiores invenissent , non admoveere aures , & si palam audire eos non auderent ;

subauscultando saltem voces eorum non excipere, & procul quid narrarent attendere. Jam vero interpretaturus more institutoque majorum Avicennam de febribus, palam agere coepit, aperteque dicere eliminanda e medicina, quae de innato calore, de flamma vitali, de radicali humido, de humorum putri, de occultis qualitatibus ac facultatibus, aliisque hujusmodi ineptiis veteres somniaverant medici, & experientiam, & quaedam mechanica principia ad naturae vires melius noscendas consuli tantummodo debere. Quod haec minime consentire videbantur cum iis, quae attulerat in oratione, cujus supra mentionem fecimus, de veterum medicorum laudibus, aliud obscure moliri, aliud specie simulationis ostentare Vallisnerium seniores clamitabant. Eorum querelae tandem in apertum bellum erupere, ex quo fortasse minime victor discessisset, nisi quosdam obsequio & patientia mitigasset, omnibusque opposuisset auctoritatem Friderici Marcelli S. Marci, ut appellant, Procuratoris, itemque viri Academiae Patavinae regendae, a quo invitabatur ad minime deferendam phi-

Iosophiae causam. Fecit itaque ut scripta
 eorum, qui inventores, & quasi architecti
 existimantur veritatis in omni praesertim re
 anatomica & physica, non solum noscerentur,
 sed diurna nocturnaque manu pervolutaren-
 tur a discipulis suis, de quorum utilitate &
 commodis sic laborabat, ut pro iis a cete-
 ris oblectationibus ac voluptatibus deferri o-
 mnino videretur. Praeterea iis erat non modo
 in schola, sed etiam domi & in publicis no-
 socomiis, & si quem invenisset sententiae suae
 oppugnatorem patienter audiebat, nec quem-
 quam offendebat oratio illius, dum causam
 ageret optimorum studiorum, nisi quis se ita
 offerebat, ut in eum non invasisse, sed in-
 currisse videretur. In his occupationibus,
 quae tamen ad ornandam magis, quam ad fa-
 ciendam medicinam pertinebant, studia natura-
 lis historiae nunquam intermissa animo saepe
 renovabat. Istam enim doctrinam tan-
 quam filiulam osculabatur suam, quod non
 tam consilio delegisse, quam a natura illam
 sibi commendatam esse putabat. Ipsam vero
 cum intra unius gymnasii claustra contineri
 minime posse intelligeret, cum vacabat a

publico munere campos, littora & montes
vel asperrimos peragrabat, omnes, ut ita
dicam, naturae latebras, inquirens, multa
colligens, majora etiam in ephemeride de-
scribens, per quae rebus obscurissimis lucem
aliquando se allaturum confidebat. Non igno-
rabant quanto haec in pretio essent habenda
qui confectores erant operis, quod in-
scribitur, *la Galleria di Minerva*: quare il-
laepius rogabant Vallisnerium, ut de suis co-
piis aliquid sibi suppeditaret, quo illud ipsum
opus exornarent. Quae in hoc sparsa erant
simul collecta fuere, editaque Venetiis ann.
MDCCX. ab Hieronymo Albrizio. Quale sit
lenticulae palustris semen [multi enim, & in
his Aristoteles, illud esse negabant] & qui
flos esset pluribus Vallisnerius exponit. Cum
vero ei contigisset omnes minimas partes,
aetates mutationesque hujusce plantae con-
templari, multorum potuit de ea errores cor-
rigere. Neque defuerant, qui crederent eam-
dem in alterius generis plantam siumbrii si-
milem converti, quod nunquam fieri probat.
Atque hoc loco patumper a proposito digre-
diens levitatem confutat opinionis eorum,

qui hujusmodi mutationibus interdum gaudere naturam putabant. Sane huic nihil tam est contrarium, quam inconstantia atque mutabilitas; nec dubitabat Vallisnerius, quin pingui, ut ajunt, Minerva tum egerit praeceptor suus, quando scripsit, humido & pluvio caelo, raemos uvae in capreolos mutari. Dum inquit quid hisce erroribus causam dederit, sagacissime odoratur quem tenet cursum ipsa natura, & cum de una lenticula palustri, seu monophyllo adeo multa antea a physicis ignorata in lucem protulit, probavit omnibus exemplo suo sine minuta quadam diligentia & patientia prope incredibili vix quidquam certi hisce de rebus sciri posse. Post haec illa sequuntur, quae de rosarum muscis observavit. Quae cum in eo sunt ut pariant, adunco aculeo, qui ex infimo ventre prodit, sulcos imprimunt in rosarum ramis ad continenda ova pertenui discrimine inter se separata aptissimos. Cum ovis liquorem quemdam fundunt, per quem efficitur, ne sulcus nova cortice obducatur, neque concrescat plantae humor, qui ad mollienda ipsa ova, nutriendumque vermem in iis con-

tentum est necessarius. Editus in lucem veremis plantae foliis pascitur quoad maturescat. Tum folliculum sub terra ad plantae ipsius truncum contexit, ex quo musca exit non binis, sed quatuor plerumque praedita alis, & delicatae ac mundaе adeo naturae, ut non liguriat, sicuti ceterae muscae, sed hortos silvasque peragrans api similis purpureis nutriatur floribus. His aliisque rebus de natura & moribus hujusce muscae, aliorumque insectorum diligenter expositis, considerat quaedam monstra & prodigia, & quamvis ut physicus acutus & sapiens saepe rationem reddat, cur quodlibet factum sit, quoties tamen periculum est ne aut falsum, aut incognitum assentiatur, ac praecipitet, si temere processerit, cohibet omnem assensionem suam. Neque in aliis modo, sed in se quoque spectator fuit rerum mirabilium. Nam anno MDCCVI. facta solis defectione, ipse alique, qui ex morbo minime convaluerant, tremores & languotes corporis passi sunt insolitos. Cujus rei ex historiae monumentis alia profert exempla; neque ignorasse videtur Baconum quoque a Verulamio quoties

sol deficiebat, viribus & animo defecisse: Illa potiora putantur, quae ad anguillarum ova & ortum spectant. Quaesierat ex eo Bernardus Trevifanius num ne putaret post illos veteres, tot seculis, tot ingeniis, tantisque studiis quaerentibus, inveniri hac de re verum aliquando posse. Minime se mirari ait Vallisnerius per tot saecula historiam naturalem vix aliquantulum processisse ad veritatis aditum, quod superiorum auctoritas ita excaecaverat consequentes philosophos, & orbaverat sensibus, quasi nulla vis esset in iis ad ea, quae oculis subjecta sunt, iudicanda. Itaque quasi iratus increpat arrogantiam & stultitiam eorum, qui se scire aliquid putant, quod noverint sententias quorundam auctorum, quos probant, & tanquam Deos venerantur, quanquam, tantis offusis tenebris, ne scintillam quidem ullam ad aspiciendum reliquerunt. Et merito & iure commovebatur, cum de procreatione anguillarum, de quibus scribendum susceperat, nec veras, nec verisimiles res vel sapientissimi homines protulissent. Horum omnium opiniones ille narrat, & in quibusdam con-

futandis leporem magis & jocos, quam acumen adhibere debuit. Non defuere enim qui ex Jove genitas easdem fuisse affirmarent: adeo verum est nihil tam absurdum excogitari posse, quod non dicatur ab aliquo philosophorum. Diu quaesivit Vallisnerius quonam procrearentur modo anguillae, ac tandem invenit easdem ova parere in falsis aquis, neque ad earum genus pertinere, quanquam nonnullam cum ipsis habeant similitudinem, vermes, qui in earundem ventriculis & intestinis interdum reperiuntur; quod Reditus quoque & Levenoechius antea animadverterunt. Fors tulit ut in manus ejus perveniret anguilla ovis gravida, quod cum frustra Reditus alique quaesissent, gloriari potuit explorare a se perceptum & cognitum primo fuisse, eas in ovipararum bestiarum numero reponendas. Minime in veritate crimea arrogantiae extimescebat Vallisnerius, cum affirmaret sibi permulta suppetere aut ad augenda, aut ad emendanda, aut ad confirmanda scripta Redii, quod nemo unquam tam lynceus fuerit, ut in his studiis omnia viderit, quodque saepissime

accidit, ut cum omnia feceris, diligentissimeque circumspexeris, exeat aliquid, quod & verisimile videatur, & absit longissime a vero. Suum tamen gradum & honorem homini sapientissimo reddebat, cum prudentia & lingua principem, & veluti medicinae parentem praedicaret. Suspiciabatur, vel potius intelligebat ille scorpiones foramina in aculeo habere, per quae foras venenum emittant; sed cum hujusce rei rationem non satis explicatam attulisset, de ea adhuc ambigi videbatur vel inter peritissimos. Id ut esset apertum atque perspicuum Vallisnerii tandem diligentia obtinuit, quanquam in eo errasse putatur, quod tria ista foramina tribuerit, cum duo tantummodo ad latera posita eisdem habere constet (1). Elaboravit etiam ut insignem faceret naturam illorum vermium, qui navibus adhaerent (*brugas* nos Itali dicimus) & de quibus nonnulla leviter tetigerat Rēdius. In minimis

(1) Vid. Fontanam *Ricerche fisiche sul veleno della vipera* p. 92. Quae protulerit Bernardus Antonius Ghedini ad confirmandam Vallisnerii sententiam legi possunt in I. vol. commentariorum Bononiensis Academiae Instituti p. 498.

istorum partibus animadvertendis diligentissimus fuit, rationemque docuit, qua naucleri cavere ab iis facile possent. Post haec de variis locustis, & praesertim de *araneotocusta* (sic enim nominat ipsam, quod ei sit cum araneis quaedam similitudo) pluribus disseruit. Hanc Turcae consecrasse videntur, quod adeuntibus ad Meccam anterioribus cruribus viam commonstrare putent, cujus erroris originem facile Vallisnerius invenire potuit. Exposuit etiam quoddam esset locustarum genus, quibus ad eibum usus fuisse dicitur Joannes Baptista eo tempore, quo deferta incoluit, quod quidem consentaneum erat cum iis litteris, quas ab Hyacinto Cestonio accepit, & in vulgus emisit ad confutandam sententiam eorum, qui locustarum nomine genus herbae quoddam designari arbitrabantur. Docere quoque nos voluit, quomodo nonnulla insecta se se in dura corpora insinuent, iisque implicantur; & mirabatur illa egregie imposuisse homini acutissimo Redio, qui in anima plantarum eadem generandi vim inesse arbitrabatur. Ad haec navis experimentis comprobare voluit veritatem

tatem dogmatis Belliniani de ingressu aeris in ova; & quamvis perpauca definiret ad commune iudicium, popularemque intelligentiam accommodata, cavebat tamen ne cui obrectatorum videretur nimium pertinaciter Aristoteli infensus, quo molliores ad capienda praecepta animos legentium efficeret. Et quoniam hoc scientiae genus latissime patere, & quamplurimis prodesse intelligebat, nulum recusabat laborem ad illud provehendum; & agros & montes peragrans, modo se in silvas abstrudebat densas atque asperas, modo semicapro similis praecellias attingebat rupes, modo terrae ingrediebatur cavernas rariora invisendi & colligendi causa. Descriptio, quam fecit, itinerum, quae per Cisalpinam Galliam & Etruriam habuit, rerumque a se observatarum, satis quidem declarat fuisse illum speculatorem venatoremque insignem naturae. Neque est dubium quin eae res, quas persequimur, non modo ingenio & ratione, sed etiam viribus plurimum valeant ad delectationem, & magnam vim habeant ad gloriam. Saepe quidem accidit ut in his suis itineribus magus; & quae-

fuor thesauri esse putaretur; sed cum naturalis historiae studiosis commonstraret quod a se fuerat multifariam defossum, se aurum, & signa & notas locorum ostendere dicebat, quibus cognitis, quilibet sibi ipse foderet, & id quod vellet haud magno labore ac nullo errore inveniret. Erat autem artis exquisitae recte de omnibus judicare, neque specie rerum decipi. Ob hanc causam redarguere potuit hominem Gallum Verneyum, qui admiratione stupefactus rem omnium rarissimam philosophis ad contemplandam se proponere gloriabatur, cum de bovis cerebro in lapidem converso scribendum suscepisset. Plurimis argumentis ostendit Vallisnerius in calvaria bovum, ceterorumque animalium, quae cornibus sunt armata, posse fieri osseas concreciones, quae quidem habeant quamdam cerebri similitudinem, cum tamen natura omnino ab eo sint diversae, neque id raro adeo evenire, ut portentis & prodigii simile numerari debeat. Jam illud erat certissimum Vallisnerio, ossa, dentes, cornua, ligna posse veros in lapides verti, viscera, intestina, cerebra, carnes, sanguis

nem, ceteraque hujusmodi fluida corpora non item, quamvis haec interdum in lapide, qui scissilis dicitur, inclusa, & inter coagumenta terrei succi exarefacta inveniuntur. Sed in hujusmodi concretionibus nonnunquam est quaedam difficilis ad distinguendum similitudo, quam saepe errorem creare compertum omnibus est. Jam videbatur sibi navasse operam, quod Verneyum confutasset. Sed cum eruditissima illa Gallorum natio hoc cumulata sit vitio, ut suos scriptores tanquam Deos veneretur, ceteros vero inopes doctrinae atque elegantiae, aut *unius cujusdam operis*, ut ait Cecilius apud Ciceronem, *remiges aliquos, aut bajulos ducat*, huic arrogantiae obnitendum, & tuendam Italiae dignitatem esse putavit Vallisnerius. Itaque de vermibus humani corporis librum conscripsit, ut alteri, quem hac ipsa de re vulgaverat Andrejus, opponeret, quemque Parisini Academici summum ac perfectissimum esse judicaverant. Nil apparet in Vallisneriano opere nisi ingenuum, nihil nisi moderatum, pudicum & sapiens; neque dubitabis ex eo concludere adversus Andreii, aliorumque recentiorum sententiam.

illorum vermium ova minime ab iis rebus ; quibus alimur & vivimus , suppeditari , sed ingenerata fuisse hominibus a prima eorum origine ; vermes in ipsis nasci & enutrirī ; & adeo proprios eorumdem esse , ut nihil commune habeant cum aliorum corporum vermibus , ne lumbricis quidem terrestribus exceptis . Adversari naturae legibus extraneos & alterius generis foetus probat , unde occasionem sumpsit irridendi fabellas hujusmodi multas , quibus fidem adjungere indignum prorsus esse ait philosophi sapientia . Quaerit omnia diligentissime , quae ad naturam & formam pertinent eorum vermium , qui *lati* , *aeniac* , *folii* , & *cucurbitini* vocitantur , non iudicio solum & disceptatione , sed ipsa experientia multa ab Andrejo prolata everrens , in quo non solum naturalis historiae , sed etiam medicinae studiosis plurimum consuluit . Videas jam apud Vallisnerium ex variis cucurbitinorum colligationibus , quae ita perpetuae & arctae sunt , ut alterum ab altero vix distinguas , varias eorum formas magnitudinesque oriri , & si quem antea adducere cogebat de *lati* verminis natura do-

Etissimorum hominum dissensio, post Vallisnerii observationes facile fatebitur ipsum componi ex admirabili illa continuatione serieque cucurbitinorum. Vallisnerii liber, qui Andreii gratiam conciliare debebat, vehementissime exulceravit, mirabanturque omnes ingratiissimi hominis injuriam sic exultare non modo in Vallisnerium ipsum, sed in illius etiam laudatores, ut nihil illo arrogantius ac petulantius, nihil ineptius esse videretur. Hunc inultum non sivit esse Vallisnerius, & si quid persecutus est acrius in ea, quam pro sui defensione scripsit ad Danielelem Clericum, epistola, invitus & coactus fecisse videri voluit. Verens vero ne si diutius in hac disputatione perseveraret, ab animi sui lenitate deduceretur, adoptavit sibi defensorem Joannem Thomam Brinium carissimum discipulum suum; neque sane difficile fuit scripta multis vitiis & infinitis pene erroribus depravata confutare. Istam ipsam demonstrationem errorum Gallici scriptoris doctrinam esse non mediocrem existimabis. Fuit vero renovatio quaedam & confirmatio sententiae Vallisnerii liber, cui titulus: *nuova scoperta dell*.

ovaja e dell' uova de' vermi tondi degli uomini e de' vitelli, quem ad Jo. Mariam Lancisium instituit. Enitendum illi fuit, ut ostenderet magnam esse inter vermes tum vitulorum, tum hominum similitudinem, quorum in partibus, & iis praesertim, quae ad generationem pertinent, describendis minutam diligentiam adhibuit, gloriatus se primum omnium vidisse ova, & ovariam (si hoc verbo licet uti) eorumdem vermium, novamque lucem attulisse ad noscendam naturam eorum, quos hermaphroditos vocamus. Si haec gloriosa fuerunt Italae nostris, non igitur illi audiendi erant, qui ab huiusmodi occupationibus avocare Vallisnerium studebant, illud saepe inculcantes nihil altum, nihil magnificum ac divinum suspicere illum posse, qui suas omnes cogitationes abjecisset in res tam humiles tamque contemptas. Ad hos irridendos se cum Musis commercium habere velle ostendit; itaque ingressus est scribere de illo furore, sine quo Democritus quemquam poetam magnum esse posse negabat. Sed ipsa sermonis lenitas indicavit se aliud spectare, & ab illa inflammatione animi, & quasi su-

foris afflatu plurimum abesse : Descendit itaque ad describendam naturam ; formam ; mutationesque omnes oestri ; quod animalis genus (huic nomen asilo Latinum est) ad boves magis ; quos ad furorem verè adigit ; quam ad poetas pertinere dixeris : Hic plerumque montes ; eorumque vicinias incolit ; mediis fervoribus instat acrior ; aculeo ; quem in extremo corpore sub podice habet ; pungit acerrime bovem ; ut ovum in ejus pellem inducat . Natus ex eo vermis alitur materia ; quæ ex inflicto vulnere prodit , & quod sanari vetat sparium ab aculeo venenum ; crescit ad notum aut decimum usque mensem ; & qui torpere antea videbatur ; maturus factus agilitate magna mutat sedem ; sub terra vel sub lapidibus chrysalis factus quieturus ; donec in volatile abeat : Quanta sit admirabilitas naturæ in hujusmodi metamorphosi perficienda Vallisnerius ; solitus minima quæque explorare ; non tam accuratè quàm eleganter narrat ; redarguitque illorum errorem ; qui Aristotelem & Plinium secuti , asilum & tabanum ; duo animalium genera diversissima ; minime distinxerunt . Hoc

scriptum, quasi festivum acroama, ne sine corollario ad Alpheisbeum Carium Arcadiae Custodem mitteretur, laudes illorum pastorum celebravit, qui non tam aures multitudinis carminum dulcedine quasi titillare, quam naturae scientiam non alienarum opinionum, sed rerum sapientissimi inquisitores illustrare studuerunt. Inter hos quidem locum sibi dari vehementer optabat Vallisnerius; & quamvis intelligeret satis jam sibi gloriae quaesitum, & potuisse se desinere, animus tamen inquires pascebatur opere, in quo non tam liberam quamdam animi oblectationem, quam utilitatem necessariam quae-rebat. Infinitus essem si singula ab eo observata referre vellem, & ea ipsa, quae hactenus retuli, sentio fuisse longiora, nulloque ordine exposita. Sed nihil difficilius quam in hujusmodi rebus ordinem servare, quamvis Vallisnerius in ea erat sententia, ut crederet, eam historiae naturalis partem, quae ad insecta pertinet, posse ordinate explicari. Quatuor in classes illa distribuit, quarum priorem assignat insectis, quae plantas incolunt, hisque nutriuntur: alteram a-

quarum habitatoribus; ponit in tertia illa omnia, quae sub terra atque arena, in luto, in lapidibus, in conchis terrestribus, seu a mare relictis, & in mortuorum corporum ossibus vitam degunt; in quarta demum illa continentur, quae aliis animalibus adhaerent, aut sunt intus in ipsorum corporibus. Praecipue hae classes rursus in alias minores dividuntur, & ea, quam primo loco posuimus, quadraginta & unam minores continet, quarum singulae suas quoque in partes, seu articulos, ut ipse vocat, distribui possunt. Atque in his omnibus quid difficulter fieri, & quid facile posset consideravit ipse Vallisnerius. In hortis enim, in apertis agris, in plantis muscae, exempli causa, reperiuntur, quae in aqua commoratae sunt usque eo dum in volatilia fuerint conversae: atque has quam in classe adnumerabimus? Eadem pene dicito de iis insectis, quae sub terra vivunt, dum chrysalides fiant, plantarum & arborum folia postea corrosura. Sed quaecumque sit ratio ordinis & disponendarum rerum, plurimum semper intererit notam habere naturam, proprietatesque multorum insectorum;

isquē sciat optime se operam collocare, qui Vallisnerium imitatus in ea cogitatione curaque versatur, ut omnia per se, quam sagacissime possit, odoretur, minime aliorum, quamvis sapientissimorum hominum dictis, sed ipsis suis unice fidem oculis praestiturus. Ceterum ii, qui novari aliquid volunt, conficiant tabulas, (neque ab hac ratione dissentit Vallisnerius) in quibus adnotata sint insecta quarumdam plantarum propria; & quamvis una quercus quamplurima, quae alit, suppeditare possit insecta, ut infinitum pene opus videatur, haud tamen desperandum erit, quin aliquando diligentissimorum hominum conjunctis laboribus, perfectas hujusmodi tabulas habeamus. Ipsas divisiones, quas in rem herbariam induxit Tournefortius, posse utiliter ad insecta transferri existimabat Vallisnerius; & quia immensum erat & infinitum, quod nosci debebat, invitabat omnes ad multam operam, multumque studium in res prorsus miras conferendum, illa Plinii usurpans (1): *Elephantorum miramur humeros,*

(1) Hist. Nat. lib. II. c. 34.

*taurorumque colla & truces in sublime jactus
tigris rapinas, leonum jubas, cum rerum na-
tura nusquam magis quam in minimis sit. At-
que hic callidus rerum aestimator, ut exem-
plo suo magis magisque probaret, nihil in
medium proferendum, quod non experien-
tia & veritas ipsa convincat, an. MDCCXV.
vulgavit historiam chamaeleontis Africani,
quam tanquam illustre exemplar proponere
ausim omnibus iis, qui hujusmodi res tra-
ctandas suscipiunt: nihil enim illa diligentius,
accuratius atque elegantius excogitari po-
test. Exorditur ab explicatione colorum, qui-
bus istud animal ornatur, & in ejusdem cu-
tis fabrica, quae innumeris pene sulcis &
plicis distinguitur, & in aeris circuitu, qui
intra cutem ipsam per canaliculos a pulmo-
nibus huc & illuc transfertur, rationem in-
venit, cur tanta & tam subita existat colo-
rum varietas atque mutatio. Cum crispatur
aut dilatur cutis, aer aut excipitur aut
foras expellitur, & hinc major aut minor
excitatur motus in humoribus, quibus ipsa
irroratur. Nemo vero ignorat propter hanc
motus fluidorum varietatem varie vel ipse*

homines colorari. Sunt aliae hac de re philosophorum sententiae, quas apud Bomarium legas. Verum si noscere cupis interiorem admirabilemque fabricam membrorum, & praesertim linguae & oculorum, quae adeo propria est hujus animalis, ut cum ceteris nihil aut parum commune habere videatur, neque hunc, neque Parisienses Academicos (1), sed Vallisnerium unice consules, qui minima quaeque descripsit, & singulorum usum adnotavit. Palpebra una cum oculo non sursum & deorsum movetur. Alter oculorum ad animalis arbitrium movetur, altero immoto; unus sursum fertur, alter deorsum; unus antrosum, cum alter retrorsum contrario motu inflectitur. Motiones hae incredibili velocitate peraguntur; atque idem dicitur de lingua, in cujus extremo musculus visitur cylindri formam referens, & fibris in spirae modum superpositis constans, quem musculum hujus admirabilis velocitatis causam esse praecipuam putat. Cohortante Bel-

(1) Apud Hamelium de Historia Regiae Scientiarum Academiae lib. I. c. 11.

linio, qui mirabiliter de Vallisnerio & loquebatur & sentiebat, linguam ipsam in omnes suas minimas partes divisit, & de his, de capite universo, ne auribus quidem exceptis (quanquam his carere Academici Parisienses chamaeleontem affirmabant) quas in palato invenit, de cauda, de cruribus, de ovis, de ratione, qua illud animal sustentatur, incedit, ac procreationi dat operam, deque omnibus visceribus multa sane ceteris incognita protulit. Mirum vero quot mendacia scriptorum coarguat; & nullum fortasse animal reperiens, ex quo tot sumptae fuerint similitudines, & quod tot erroribus causam dederit, quia omni tempore homines speciem magis quam rem, opinionem magis & commenta quam experientiam, veritatemque fuerint consecrati. Quia ipsum cum lacertis aliquam habere videtur similitudinem, idcirco Vallisnerius plura a se se de his quoque observata, ut & de salamandris, bufonibus, & ranis persequi in eo libro sibi proposuit. Quae ad ranas pertinent non solum naturalem historiam, sed etiam medicinam plurimum illustrant, & merito Aur

flor irridet eos, qui illud bufonis America-
ni genus, quod *Pipal* nominatur, e dorso
foetus fundere putarunt, ex eo decepti,
quod semina ova pariat super masculi dor-
sum, cui firmiter adhaerent, dum ex iis
animal excludatur. Persuasissimum erat Val-
lisnerio illam, quam dicimus comparatam a-
natomen, magno usui esse posse vel ipsius
hominis cognoscendae fabricae; & a provida
solertique natura sic conformata fuisse omnia
corpora, ut esset quaedam colligatio causa-
rum; quare illum de philosophia universa o-
ptime mereri, qui vel minimam illius par-
tem illustrasset, Itaque diligentiam praeci-
pue sibi colendam esse putavit cum zoolo-
giam tractaret, cujus utilitas in scriptis Val-
lisnerii, ut in herbis non fallacibus fructus,
mirabiliter apparet. Dici non potest quanto-
pere ille sit gavisus, cum commodum ipsi
fuerit Struthionis fabricam contemplari. Rem
dignam putavit, de qua libellum conscribere-
ret tum ad observationes suas prodendas,
tum ad aliorum errores confutandos. Dis-
sentit interdum ab Academicis Parisiensibus,
qui ei in hac anatomica inquisitione prae-

cucurrerant (1). Nescias an inter bestias volucres, an terrestres ipsum adnumeres. Alas quidem habet, sed ad volandum minime idoneas: pluma, pennis & quibusdam etiam spinis vestitur; cruribus similis est camelo, supercilia, ut in homine, oculos ornant, & ut in plerisque brutorum vidimus, ad binas externas pupillas tertia interior additur, cujus usum ignoramus. Quanta in eo sit vis ad duriora concoquenda corpora pluribus persequitur Vallisnerius, volens convincere Gallos, qui ex vero, ut ego quidem judico, affirmaverant atteri quidem atque attenuari posse ferrum ceteraque metalla a musculo struthionis ventriculo (2) atque stomachi calore, minime vero consumi & in chylum converti. Neque solum describit externas par-

(1) V. Reg. Scient. Acad. hist. lib. I. cap. V.

(2) Vid. Morgagnium Adv. Anat. III. animadv. XVIII. Tantam vim esse in lacertosis adeo struthionis musculis, ut aliquibus in locis tres circiter uncias crassitudine sue aequent, mirum videri minime debet consideranti communium avium ventriculos musculis adeo firmis instructos fuisse, ut eisdem in gallo Indico Borellius non dubitasset eum potentia librarum 1350. comparare.

tes, sed etiam omnia quae intus inclusa sunt; quam admirabiliter fabricata, ut nihil eorum supervacaneum sit, nihil ad vitam retinendam non necessarium: quam mirae libidines & in mare & in femina commiscendorum corporum, & quam aptissimae horum partes ad concipiendum & procreandum, in quibus quadrupedem potius quam avem agnoveris. Respirationis organa multo accuratius sunt observata quam in aliis avibus, quod in struthione vesicae sunt firmae & densae, fere ut suillae; in plerisque autem avibus adeo sunt tenues, ut difficillimum sit eas inter dissecandum non perforare. Qui sint tot vesicarum usus quaesitum, & avium respiratio cum terrestrium animantium respiratione comparata. Multa ejusmodi proferre possem; sed genus diligentiae a Vallisnerio adhibitae vides, ut semper & novitate ipsa delectet & copia. Neque vero plurimum non laudandus is in eo est, quod nihil posset de natura cogitare & scribere, quin mentem revocaret ad illam summam rerum omnium consentientem, conspirantem, continuatamque cognationem, quam aptissimam esse putabat
ad

ad prodendam miram Dei sapientiam : undique enim omni ratione concluditur mente consilioque divino omnia in hoc mundo ad salutem omnium , conservationemque admirabiliter administrari . Atque hac de re cum ei in animo esset uberius & fusius disputare , quaedam breviter & anguste conclusit in ea , quam ad Academicos *Mutos* (sic enim appellabantur) collegas & cives suos misit dissertatione *de admirabili continuatione serieque rerum* . Orditur ab iis corporibus , quae gignuntur e terra , quibusque natura nullum sensum , nullumque semen tribuit , mediaeque inter haec & terrestres plantas esse putat lapideas maris plantas , quas opus insectorum esse minime suspicabatur . A plantis , ceterisque rebus , quae vim seminis habent in se , ut ex uno plura generentur , ad zoophita tum marina tum terrestria procedit , reprehendens Academicos Parisinos , qui eadem vix nata , dum moventur , invicem sibi fecunditatem tribuere existimaverant . Post haec contemplatur animalia utriusque sexus , ut sensim & quasi per gradus accedat ad insecta . Horum quanta varietas & copia , quanta ad

nam rem vis, ut in suo quaque genere perman-
neant! Dabat quidem & libenter de hac
historiae naturalis parte optime meritos fuisse
Redium, Malpighium, Lewenoechium, Swam-
merdamium, Bidloun, sed ea magis illi laus
erat jucunda, quam a propriorum inventorum
commemoratione derivabat. Neque erat in-
scius esse utilitatem maximam in his rebus,
quod insecta aliquid commune cum omnium
generum animalibus habere, & omnium fer-
me elementorum dominatum occupare vi-
deantur. Alia enim coriis tecta sunt, alia
villis vestita, alia spinis hirsuta; pluma alia,
alia squamma videmus obducta, alia esse
cornibus armata, alia habere effugia penna-
rum, alia gradiendo, alia serpendo ad pa-
stum accedere, alia volando, alia nando.
Atque etiam multorum ea est natura, ut
quamvis in terra partum edant, simul ta-
men ac niti possunt, aquam persequantur,
alia vero quamvis gignantur in aqua, vix ta-
men nata terram quasi naturalem domum pe-
tant: tantam ingenuit animantibus conservan-
di sui natura custodiam. Quanta similitudo sit
inter pisces & terrestria animalia, & per quos

gradus a piscibus ad aves, ab his ad quadrupedes sensim natura transeat, docte animadvertit Vallisnerius, ut tandem perveniat ad illud animal, quo nihil est melius, quia ratione utitur, cujusque causa factum esse mundum, quaeque in hoc mundo sunt omnia creditur. Non hoc fuit propositum Vallisnerio totam hominis fabricationem, omnisque humanae naturae figuram atque perfectionem inquirere, quod alii multi praestiterant; sed ipse voluit occultiora, & quae ab oculis removerat natura, scrutari, ipsam videlicet hominis procreationem. Librum itaque anno MDCCXXI. in lucem emisit, quem inscripsit: *Storia della generazione dell'uomo e degli animali se sia da vermicelli spermatici o sia dalle uova*, idque nobilissimum Vallisnerii operum praedicare non dubitabis. Is pollicetur magnae sibi curae fore, ut omnia ad experientiam revocentur; & lucem diligentissimi auctoris certe multa desiderabant, in quo omnium judicio ille princeps existimatur. Minime a me expectari puto, ut singula, vel praecipua enumerem eo in libro contenta, quae multi stomachantes veluti indecora re-

spuerent. Sed profecto mirificam se in latram conjecit Vallisnerius, qui opus naturae in procreatione hominis se noscere posse putavit. Erant permulti, qui totum hoc Lownocchianis vermibus tribuebant, quorum argumenta confutat, quamvis eos vermes esse minime dubitaret, & se vidisse testaretur. Discutit ea, quae obscurare videbantur ortum viviparorum ab ovis, quod systema a Graafio, vel si mavis a Stenone excogitatum, a Malpighio confirmatum, nova per se luce illustratum iri sperabat. (1). Nihil qui-

(1) *Buffonius* (Hist. naturelle des animaux chap. VIII.) *circumspectis rebus, omnibus rationibusque subductis summam fecit rerum ab iis doctissimis viris observatarum, conclusitque hanc sententiam.* Voyons donc ce qui nous reste de réel dans les découvertes de ces Observateurs. & sur quoi nous puissions compter. Graaf a reconnu le premier qu'il y avoit des altérations aux testicules des femelles, & il a eu raison d'assurer que ces testicules étoient des parties essentielles & nécessaires à la génération. Malpighi a démontré ce que c'étoit que ces altérations aux testicules des femelles, & il a fait voir que c'étoient des corps glanduleux qui croissoient jusqu'à une entière maturité, après quoi ils s'affaisoient, s'oblitéroient, & ne laissoient qu'une très-légère cicatrice. Vallisneri a mis cette découverte dans un très-grand jour, il a fait voir que ces corps glanduleux se trouvoient sur les testicules de

dem accuratius ejus observationibus fieri potest, ut merito de eo praedicasse videatur Buffonius (1) non posse quemquam reperiri, qui hanc philosophiae partem tam bene fundatam nobis reliquerit. Sed abreptus fortasse systematis amore, quamvis ova nunquam reperire potuerit iis in cavis, a quibus contineri in uterum mox descensura ar-

D 3

toutes les femelles, qu' ils prenoient un accroissement considérable dans la saison de leurs amours, qu' ils s' augmentoient & croissoient aux dépens des vésicules lymphatiques du testicule, & qu' ils contenoient toujours dans le temps de leur maturité une cavité remplie de liqueur. Voilà à quoi se réduit au vrai tout ce qu' on a trouvé au sujet des prétendus ovaires & des œufs des vivipares. Qu' en doit-on conclure? Deux choses qui me paroissent évidentes, l' une qu' il n' existe point d' œuf dans les testicules des femelles, puisqu' on n' a pu y en trouver; l' autre qu' il existe de la liqueur, & dans les vésicules du testicule, & dans la cavité du corps glanduleux, puisqu' on y a toujours trouvé, & nous avons démontré par les expériences précédentes, que cette dernière liqueur est la vraie semence de la femelle, puisqu' elle contient, comme celle du male, des animaux spermatiques, ou plutôt des parties organiques en mouvement.

(1) *Vallisneri est de tous les naturalistes celui, qui a parlé le plus à fond sur le sujet de la génération.* Loe. cit. cap. V. pag. 294.

bitratur, nihil tamen non confici ab ovibus affirmabat, quorum, ex ejus sententia, magna adeo copia in prioris feminae ovaria condita fuit, ut hominum, qui futuri essent, numerum aequaverint. Hac re posita, facilis multorum phaenomenorum explicatio videtur; & certe in plurium systematum inventionem, quamvis Vallisnerianum ceteris verius non ausim affirmare (causam enim procreationis fortasse Deus perpetuo latere voluit obscuritate involutam naturae) minus tamen illud habere judico vel obscuritatis vel erroris. Esse signa quaedam putat Vallisnerius; ut praedici possit quae sterilis futura sit femina, quae foecunda; & postquam pluribus persecutus esset sterilitatis causas, quae ad has removendas adhiberi remedia possint, exponit. In aliorum observationibus aut corrigendis aut confirmandis miram prudentiam prae se fert, neque mendacio, neque captilosa probabilitate fallitur, sed quodcumque ejus animum veri similitudine, vel oculos veritatis luce percussit, tantummodo comprobabat. Retinet saepe Hippocratis sententias, easque sic explicat & confirmat, quasi pro-

baturus omnibus nihil non vidisse divinum illum virum, ingenio & experientia duce. Quapropter solitus erat dicere (quo de argumento etiam orationem scripsit) *nunquam futurum, ut ars nostra in debellandis morbis, qui adhuc remediis non auscultant, incrementum capiat, nisi Hippocraticum observationum & experimentorum studium fere intermissum revocetur.* Triginta & amplius annis in hoc perficiendo opere elaboravit, nec quisquam inventus est tam insigniter impudens, qui, etsi universum de ovis systema abjudicaverit atque ejecerit, quod tamen plerique hodie sequi videntur; illi non mirificas tribuerit laudes. Ipse Carolus VI. Caesar, qui illud ab auctore dono acceperat, postquam totum legisset, aureo torquo cum numismate, & honorificentissimis litteris remunerandum putavit. Quoad vixit vero Vallisnerius, nunquam physicos hortari cessavit, ut in constantia perseverarent inquirendi ova in eorum receptaculis, ut ne parvula quidem titubatione ad suam causam defendendam impedirentur. Atque hujus argumenti opportunitate usus, ut & saepe alias, causam quaesivit monstrorum quorundam

foetuum, nec non vitiorum, a quibus non raro humana membra deformantur; & si ea excipias, quae ab imaginoso feminarum morbo effici posse putat, verosimilia mihi videntur, quae rationem reddunt hujusmodi naturae aberrationum, in quibus tamen, plus quam reberis, regulas quasdam ac praescriptiones ipsius naturae esse cognoveris. Inter haec nonnullis in locis, quae sunt in ditione Mantuani Ducatus, & Venetae Reipublicae, misera equi afflictiari coeperunt lue, qua de re multi statim exquisierunt Vallisnerii sententiam, quasi hominis, cui nihil occultum esset in historia naturali, quique remedia praesentibus invenire posset malis. Quorundam vermium originem & progressionem persequitur, a quibus saeviter roduntur interiores equorum membranae, quos quidem licet agnovisse quoque videantur Varro, Columella & Vegetius, e recentioribus Ruinius, Aldrovandus & Gesnerus, horum tamen nullus ortum ipsorum ab ovis, quae muscae in ano relinquunt, naturam, formam, mutationes percalluerat. Neque in his rebus omnibus modo diligenter declarandis satisfecit

Vallisnerius amicorum desiderio, sed etiam adnotavit, quae ad praecavendum horum vermium ortum, atque ad eosdem jam ortos necandos conducere possent. Opus est veterinariae medicinae utilissimum, ut & illud, quo novis argumentis, novisque experimentis confirmavit Caroli Francisci Congtossii sententiam de pestilentiae bubulae causa. Non hanc modo, sed & ceteros pestiferos morbos, quibus omne fere animalium genus vexatur, a propriis quibusdam vermibus causam habere existimat, quorum nonnulli liquida, ut loquuntur, alii solida invadunt & turbant. Nequicquam inermi oculo tenuissima animalia cernere conaberis, neque satis miraberis; ut irrequieta turba, qua nihil genuit natura foecundius, omnes pererrat locos, ova seu pestis semen ubique relictura. Hujusmodi infecta pestis causam esse ex ipsa remediorum natura conjeceris, quae remedia versibus sic expressit Horatius Burgundius in eo, quod ad Vallisnerium ipsum misit, de lue bovina elegantissimo carmine.

Prima medela malo est flammis abolere relicta

Germina serpentis morbi : comburere caras

Agricolae vestes , inopisque senilia tecti

Pignora ne piceat : tremulae praesepia flammæ

*Delambant , atque omne domus vitium excoquat
ignis .*

Sulphuris ingrato quandoque abigentur odore

Hofles , nitrati lentoque volumine fumi ;

Proderit & pingui perfundere corpus amurcæ ;

Vel grave morbosus hydrargyron indere fibris .

Ulla cum pertractaret Vallisnerius , quaedam etiam tetigit de phthiriasi & de scabie , horum morborum causam & remedia (haec anthelmintica , quod ad vermes occidendos sint inventa , a medicis vocari solent) exponens , & in ea omnia , quae a sapientissimis viris his de rebus memoriae sunt prodita , erudite & diligenter inquirens . Dolebat autem quod medici monendi essent & objurgandi , quia cum interdum multis signis natura declarat quid velit ac quaerat , quid desideret , quid respuat , obsurdescerent tamen , nec ea , quae admonerentur , in medicina facienda audirent . Quoniam ad hanc seri-

Vendi operam omne studium curamque converterat, & nullum esse feraciorem in historia naturali locum, nec uberiolem, quam de infectis, magis magisque intelligebat, ad idem saepe argumentum redibat, idque omnium iudicio assequebatur, ut princeps philosophorum, qui haec apud nos tractarunt, esse existimaretur. Homo vero, qui in maxima celebritate, atque in oculis omnium vivebat, & qui nulli unquam defuit officio, quod pulcherrima Academiae munera exigere videbantur, hoc etiam nomine gloriabatur, quod ea usurpare posset, quae Plinius quondam Vespasiano scribebat. *Homines enim sumus & occupati officiis, succisivisque temporibus ista curantes, idest nocturnis, ne quid vestris cessatum putetis horis. Dies vobis impendimus: cum somno valetudinem computamus, vel hoc solo praemio contenti, quod dum ista, ut ait M. Varo, musinamur, pluribus horis vivimus. Profecto enim vita, vigilia est* [1]. Minime vero assentior iis, qui ajunt, Vallisnerium in

(1) Plin. in praefat. histor. Natur. Vid. Vallisnerii epistolae.

plura distractum, minime idoneum fuisse ad medicinam faciendam. Scimus enim hac quoque arte & gratiam & gloriam haud vulgarem illum consecutum fuisse, quanquam non esset ignarus plerumque medicamenta plus obesse quam prodesse aegrotis, hosque cautissime ac simplicissime curandos esse. Neque defunt plura scripta illius, quae ipsam practicam, ut loquuntur, medicinam illustrent, majora quoque editurus, si diutius vixisset. Ex iis illud porro magno tum plausu exceptum fuit, quod de usu & abusu balnearum & potuum calidorum aut frigidorum confecit. Plenum est alienarum & propriarum opinionum atque experimentorum, ex quibus concludi posse videtur verissimam esse illam Celsi sententiam: *ego experimentis quemque in se credere debere existimo calida potius an frigida utatur*. Verum cum frigidam probat Vallisnerius, quae iis temporibus magno coeperat esse in usu, moderator & quasi temperator huiusce consuetudinis esse voluit, verens ne multi novitatis amore inconsiderate abrepti ad necem ducerentur. Indicat igitur quando, & qua ratione cum utilitatis

spe frigidam adhibere possumus. Sic vero calidam extollit, ut raro aut nunquam ab ea maleficia timeri, saepissime vero beneficia sperari debeant. Prorsus majorem quidem rem nullam se sciscere putavit ad tuendam valetudinem, quam ut a gelida aqua perpetuo abstineamus, contra quam sententiam multa nunc opponi solent, quod ad nimium laxatas fibras roborandas, perspirationemque adjuvandam magnum sit in gelida praesidium inventum. Sibimetipsi etiam in eo placebat Vallisnerius, quod non tam argumentis, quam ipsa experientia, in qua tota artis suae fiduciam positam esse dicebat, multorum remedium atque opinionum vanitatem probasset, atque Redii vestigiis insistens cum in historia naturali, tum in medicina homines docuisset verum a falso secernere. Neque mirus de medicina se optime mereri putabat, cum omnia adnotaret, quae a se animadverta fuerant in aegrotis curandis, & ex suis aliorumque hujusmodi observationibus illa scripta contexeret, quibus ad instituendos discipulos utebatur. Possem etiam multis testibus planum facere non ignobilem medicum

fuisse Vallisnerium, sed uno Morgagnio contenti erimus. Hic enim cum sermonem mecum haberet de eodem, affirmare non dubitavit viro egregio, sibi que multorum consiliorum societate conjunctissimo haud defuisse prudentiam in omni re medica singularem, ut facile Malpighii discipulum & Redii aemulum agnosceres. Itaque hoc nomine a Carolo VI. uti supra commemoravimus, & a Rinaldo Mutinensium Duce honorificentissimis titulis ornatus est, & invitatus etiam a Clemente XI., ut defuncto jam Lancisio, sibi medicus adesset, quod tamen munus aetatem valetudinemque excusans recusavit. Sed ut institutam narrationem ejus operum summatim persequamur (non enim puto a me exigi, ut singula in iis contenta, quod infinitum esset, commemorem) non mediocri in pretio habentur, quae ad Saxoli falsam pertinent. Haud longe ab ea via, qua itur ad montem Zibium, qui est in ditione Mutinensium Ducis, collis exurgit mille circiter passuum ab oppido Saxolo distans, in cujus summo planities se se explicat in latitudinem pedum circiter septuaginta quin-

que late vasta, ut quae herbis omnibus caret, nihilque nisi lapides & coenum aridum colore cinereo ostentat. In hac planitie parvus tumulus erigitur in altitudinem pedum trium, iisdemque lapidibus & luto formatus; isque in medio se se aperit, hiansque craterem efficit, cujus os duos circiter pedes in longitudinem patet. Hic illud proprie continetur, quod physicos allicit, & vel a Plinii temporibus (1) loco famam fecit. Namque craterem hunc usque fere ad os materia replet soluti coeni persimilis, coloris ad nigrum vergentis perpetuo aestuans & murmurans, quaeque inter aestuandum multiplices bullas efficit mox disrumpendas. Interdum vero fervescit validius, sic ut intra crateris hiatus contineri non possit, sed excedens hac illac passim dilabatur, intus & in illo ipso, quem diximus, cavo, lapides multi, & variis modis commixti simul & confusi volvuntur, in quibus & marchasitae observatae sunt, sicque inter eos lutum cum aqua pervolvitur, tanquam e subterraneo specu foras per interca-

(1) Hist. nat. lib. II. c. 83.

pedines & rimas in lucem & adspectum exi-
ret. Hos lapides, si quando gurgēs vehe-
mentius exaestuāt, magna vi atque impetu
eructat, & longe projicit ad multos pedes;
quibus eructationibus plerumque fragor, fu-
mus, & flamma nonnunquam adjunguntur.
Accenso *petroleo* haec aliaque hujusmodi tri-
buit Vallisnerius, cujus in aqua clara & lim-
pida innantis haud mediocrem ibi copiam
collegit. Gufmanus Galeatus vir physica do-
ctrina praecellentissimus, qui haec ipsa loca
postea invisit, non *petroleum* esse judicavit,
sed bitumen, quod cum aqua admodum tur-
bida atque obscura, contra ac viderat Val-
lisnerius, hac illac diffuebat (1). Ceterum
Vallisnerius non hunc modo, sed & alios *pe-
troli* fontes indicavit, de quibus cum disce-
reret, alia multa in iisdem locis extantia
quae ceterorum observatorum oculos effuge-
rant, exposuit. Non haec tamen ceteraque;
quae ad diversarum aquarum naturam exa-
minandam indicandamque & fecit & scripsit,
cum

(1) Vid. *Comptes Acad. Bonon.* vol. I, p. 95.

cum percuriosus peregrinaretur in Patavinis, Mutinensibus, ceterisque vicinis montibus, politius a se fuisse limata affirmat. Res est operosa, & hominis perdiligentis, & in chemia exercitatissimi, quae ad aquarum examen, seu ut vocant, analysim pertinet, quam physicae partem si leviter tetigit Vallisnerius, in eo quidem se maximam percepisse laudem arbitrabatur, quod non unius, sed universorum fontium veram originem rerum naturalium studiosis non indicaverit modo, sed certissimis argumentis probaverit. Vetus opinio erat fontes omnes ex imbribus & solutis nivibus originem ducere, de qua Aristoteles satis multa ad ipsam confutandam exposuit. Visus est eam renovasse Vitruvius, sed illius veritas latuit multis saeculis in occulto, quod unius Aristotelis auctoritas in omni re physica valeret. Ut coepere philosophi servile Aristotelicorum jugum a cervicibus deicere, sibi utendum esse observationibus & experientia in fontium origine quaerenda putarunt, & Petrus Perreaultius prae ceteris, libro sermone Gallico conscripto, multis rationibus probavit fontes & flumina a pluviis

niveisque aquis causam habere. Si nihil aliud egisset Vallisnerius, nisi ut rem hanc notam faceret Italis suis, magnas ei gratias agi par erat; sed tot argumentis hanc sententiam confirmavit, tot scriptis illustravit, tot difficultatibus liberavit, ut cum de physica bene mereret, ad inventoris gloriam aspirare videretur. Platonis, Aristotelis, Epicuri, Cartesii, aliorumque jampridem erant explosae sententiae; sed magnum jus disputandi illi habere videbantur, qui aquam a mari ad fontes deducebant. Siquidem fontes aliqui, aestuante mari, effluunt, recedente, decre-scunt, alii, qui prope mare sunt, ut & putei, magnam vim aquae salis continent, ut alia plurima argumenta, quae ab hujus sententiae propugnatoribus afferri solent, praetermittam. Qui huic adversantur, ajunt rarissimos aut nullos esse fontes iis in locis, in quibus pluviae raro decidunt, ut in Aegypto interiori, Africa, & Peruviana regione; fluvios omnes plurimum augeri, & late campos omnes inundare, cum imbres sunt maximi, nivesque solis aut ventorum calore subito solvuntur, contra vero eosdem

minui & ferme arescere, quando nullae aut rarae sunt pluviae; non posse aquam ex inferiore terrae loco ad summa montis cacumina extolli, neque e falsa in dulcem converti, considerantique montium structuram manifestum fieri ad conservandas, deducendasque pluvias ac niveas aquas eandem opportunam atque idoneam esse. Ex ipsa quoque organica, ut loquuntur, terrae structura, & quadam serie & colligatione montium probabilis ratio afferri potest, cur in quibusdam insulis, & vel in iis, ubi neque pluit, neque ulli exterius apparent montes, & vel in ipso mari aquae dulcis fontes erumpant, ad quod confirmandum argumentum plurimum Vallisnerius facere putat subterranea flumina, inter quae maxime celebrantur Mutinensia, quibus causam dare vicinos montes, contentasque in iis aquas minime dubitari posse affirmat. Calculo inito, statuit non plus aquae ad mare quotannis redire, quam quod de caelo pluit, quae & alia huiusmodi pluribus persequitur, quod ei propositum erat, sua non modo confirmare rationibus & argumentis, sed etiam refutare contraria. Plu-

res haec postea philosophi conquifivere curiosius, nec quidquam ab iis excogitatum fuisse videtur, quod non relatum fit in *Lexicon* illud Gallicum toto orbe celeberrimum, cui *Encyclopediae* nomen fecerunt. Non defuere Vallisnerii sententiae oppugnatores & defensores acerrimi. Ex iis inter omnes eminebat Nicolaus Gualterius; ex his Gasto Josephus Georgius & Josephus Avanzinius, quod duo ex ipsius Vallisnerii schola prodierant. Sed eminebat etiam magis amplitudo animi Vallisnerii his aliisque adversariis contemnendis; nam maluit dissolutus in tacendo, quam vehemens in respondendo videri. Verum quantum ipse abhorruit a litigiosis disputationibus, tantum amavit pacatas disquisitiones, hominesque, qui quidquid est lucri libenter in commune conferunt. Quapropter inter ipsius Vallisnerii scripta, quae tribus comprehensa sunt voluminibus, plurimas invenies doctorum virorum epistolas & opuscula historiam naturalem mirabiliter illustrantia, ex quibus intelliges homines summos quidquid observassent, alterum cum altero communicare consuevisse. Hoc fecisse veteres illos,

qui erudo caelo, ut Cicero in legibus loquitur, *merita locarunt*, Hippocratem Coum, & Democritum Abderitensem, Platonem Atheniensem, & Tarentinum Architam, Varronem, Plinium, aliosque bene multos satis aperte eorum monumenta declarant. Quorum exemplum Vallisnerius renovare cupiens multos ad hanc studiorum societatem vocabat, saeque leges ac pactiones erant, ut si alteri aliqua alterius opinio non probaretur, liberum ei solumque esset causas, cur eam non probaret, exponere, isque, qui reprehendebatur, aut potius admonebatur, non modo non laedi se ac violari in eo, verum etiam beneficium sibi tribui putaret. Haec facientes alter alterius industriam acuebant, ingenium excitabant, discabant denique vicissim, & vicissim docebant. Neque illud mediocri argumento est Vallisnerium non tam oblatas arripuisse occasiones, collatis multorum studiis, Rempublicam juvandi, sed etiam studiosae diligenterque perquisivisse, quod ejus non modo consilio, sed etiam opera factum est, ut extarent ephemerides Litteratorum Italiae, quae Venetiis vulgari sunt coeptae

anno decimo supra millesimum & septingentesimum. Plures quidem indicare possem, ut loquuntur, articulos ab illo confectos, in quibus tum physica doctrina, tum Etrusce scribendi elegantia, cui semper studuit & in qua se excellere posse sperabat, minime vulgaris comparent. Symbolarum quoque collator esse voluit, cum Venetiis ederentur libri, qui inscribuntur *la Galleria di Minerva*, & *la Raccolta di Opuscoli scientifici e filosofici*; neque mediocria sunt, quae concessit Naturae Curiosorum Academicis, quibus *Cennurias* suas ornarent, quorumque infra catalogum adtexemus. Consulentibus vero sic responderebat, & audiendi studiosos sic docebat; ut nescias, utrum plus in eo laudaveris praestantiam doctrinae, an morum facilitatem. In ipsis suis itineribus, cum nanciscebatur pusillum laxamenti, concinnabat amicis munuscula, & vel ipsae ejus epistolae plenae pulveris & festinationis aliquo in pretio habebantur, quod praeter illam laudem verborum continerent multa a se, aliisque sapientissimis viris descripta, notata atque praecepta. Erant multa inter Marfilium & Vallisnerium com-

munia, neque bonos exitus habuisse illa videntur, quae ad coralliorum & fungorum ortum pertinebant, in quo explicando ii a veritate aberravisse judicantur. Accedente ipsius Marsilii cohortatione, multa de marinis corporibus, quae in montibus reperiuntur, differuit, & dum accurate exponit varias de iis philosophorum sententias, ejus in judicando dubitatio apparet. Inclinare tamen ad eos videtur, qui putant illa corpora non diluvii reliquias esse, sed maris potius aliquando excelsiora loca occupantis, quae magnis ad excipiendas aquas, apertis cavernis, reliquisse creditur.

*. . . Vidi factas ex aequore terras;
Et procul a pelago conchae jacuere marinae
Et vetus inventa est in montibus anchora summis.*(1)

Multa attulit Vallisnerius huic convenientia sententiae, quam Leibnitio quondam se probasse gloriabatur. Ab eo enim saepe, quod ad ejus famam plurimum valere arbitror,

E 4

(1) Ovid. metam. Lib. XV. fav. IV.

de rebus naturalibus confulebatur. Sed cum ipse secum diu meditatus esset, quae huic opponerentur opinioni, eam si non veram, probabiliorem certe, ac vero similiorem esse iudicavit. Neque illud erat ex ejus sententia mediocre probabilitatis argumentum, quod montes, in quibus illa copia invenitur concharum, ostreorum, cheramidum, aliorumque hujusmodi corporum mare prospectant, neque in magnam extolluntur altitudinem. Quod argumentum cum Marfilii & Galeatii observationes quoque confirmassent, pluribus, qui per montosa loca iter habebant, auctor erat Vallisnerius, ut rem eandem inquirerent. *Quid enim haec scribentes (ait ille) aliud agimus, nisi ut multorum studia commoveamus? Cur autem non illud speramus fore ut dimetientes in quoque monte altitudinem, quatenus marina corpora passim dispersa sunt, inveniant; ea ad idem usque horizontale planum, omnibus in locis adscendere: ultra quod planum, si quae extant culmina, ea marinis corporibus prorsus careant, sic ut quod mihi aliisque paucis philosophis suspicari licuit, liceat aliis in posterum, vel scire vel opinari. Quod qui efficient, efficere au-*

tem nisi metiendo observandoque nemo potest; nae illi historiam naturalem praedaro invento locupletaverint. Dum haec tractaret, non alienum a proposito esse putavit de diluvii quoque effectibus, de annoso aevo hominum, qui ante diluvium vixere, aliisque hujusmodi scitu dignis differere, quae & laudatores & reprehensores habuere. Ex his unus extitit; qui librum vulgavit (1) ut probaret Vallisnerii dubia quaedam, seu potius argumenta cum sacris litteris minime congruere, & de tota hac re sic disputat, quasi illa, quae assert, convelli ac labefactari non possent; tanta est confidentia, seu potius audacia eorum, qui naturales quaestiones sola sacrorum librorum auctoritate confici posse arbitrantur; quasi vero aequitas, quae in explicando jure civili tantopere laudatur ab interpretatione divini codicis, cujus, Paulo teste, littera occidit, sit excludenda. Sed Vallisnerius non mediocrem fructum ex hoc opere se per-

(1) Huic titulus. *La verità del diluvio universale vindicata dai dubbj, e dimostrata nelle sue testimonianze; esame critico dell' Avvocato Giuseppe Antonio Costantini autore delle lettere critiche. Venezia 1747.*

cepisse existimavit, quod illud perplacuerit Cleliae Borromeae, cui ipsum inscripserat, cuique se omnium officiorum religione obstrictum esse putabat. Suspiciebat feminam humanitate, ingenio ac in litteras amore nulli secundam, singularia ab ipsa acceperat beneficia, & cum Mediolani apud eandem diversaretur, acri ac vehementi incitatione semper inflammabatur ad aliquid novi in naturali historia inveniendum, atque in lucem hominum promendum. Quantum haec societas sibi profuerit, narravit amico per epistolam, eamque narrationem, cum gravissima atque ornatissima laudatione nobilissimae feminae conjunxit (1) cujus non ultimam laudem esse dicebat, quod, sui contemptrix sexus curas & inania vulgi gaudia irrideret. Coram ea quoque disputavit de viperarum veneno, & correctione quadam adhibita, omnem Redii sententiam, quem potissimum sequebatur, accuratissime exposuit. Miror equidem eum putasse remedium huic veneno esse posse illud herbae genus, quod a Bo-

(1) V. Ved. I. p. 355.

tanicis *after montanus* vel *after Italorum* appellatur. Haec est gravium hominum atque magnorum consuetudo, ut vel ipsa oblectamenta cum sua, aliorumque utilitate velint esse conjuncta. Eodem tempore & sua sponte, & ipsa sapientissima femina hortante, dabat operam ut lexicon philosophicum esset, in quo de rebus ipsis praesertim ad physicam pertinentibus brevissime disputaretur, & quo Italica lingua efficeretur plenior aliquando. Nec vero arroganter hoc a se dici existimari volebat, quod postquam aetatem consumpsisset in investiganda natura, posset ea quae teneret (quoniam in hoc quoque studio plurimum elaboravit) apte, distinte atque etiam ornate exponere. Ex iis, quae ad nos pervenerunt [opus enim inchoatum reliquit] judicari sane potest de ejusdem operis utilitate, & quod inservire potissimum Auctor voluerit iis, qui rerum physicarum non admodum periti essent, satis ostendit aliorum commodum suae semper gloriae ipsum antetulisse. Nec dubium quin magno cuique viro plurimum debeat, qui in collocanda opera & studio hoc maxime officii esse pu-

tavit, ut quisque maxime opis indigeret, illi ei potissimum opitulari. Cum igitur doctrina Vallisnerii ad omnes pertineret, elucere, que in ejus moribus naturalia principia societatis & conjunctionis humanae ejus amicitia atque consuetudo appetebatur ab omnibus, & delectabat hoc ipso, quia quemadmodum pulchritudo corporis apta compositione membrorum movet & allicit oculos, quod inter se omnes partes cum quodam lepore consentiunt, sic ille movebat approbationem & caritatem eorum, quibuscum vivebat, quod ordinem, constantiam, moderationemque dictorum omnium atque factorum servaret. Nec solum ad quemdam quasi ornatum vitae pertinere arbitrabatur temperate, modeste, graviter, simpliciter, fideliter atque hominibus amice vivere, sed etiam placabilitate atque clementia uti in adversarios, omnemque morositatem inutilem atque odiosam vitare. Mirum vero minime videri debet homini licet moribus facillimis & commodissimis non defuisse adversarios, cum perpetuam sibi propugnationem suscepit pro veritate in naturali historia, idque curare;

est, ut philosophi ea, quae plerique tum expetebant, & de quibus inter se digladiari solebant, veluti inanissima prudentiae contemnerent, ac pro nihilo ducerent. Sed incensorum aut acerbitate aut iniquitate facile se consolabatur, & maxime illo solatio, quod ex sapientissimorum hominum praeconiis & nobilissimarum Academicarum testimoniis (1) accipiebat. Solent nonnulli in explicandis hominum doctorum vitis minuta diligentia huiusmodi laudationes conquirere atque referre, quem quidem morem neque reprehendere, neque imitari ausim. Et praeconium & grave testimonium impertitum clari hominis magnique Vallisnerio a Florentinis fuisse arbitror, cum numisma cudissent, quod memoriam posteris proderet ejus praecipuorum inventorum, earumque rerum, in quibus ipse visus est studiosius elaborasse. Neque existimaveris hominem discendi studio impeditum ea deseruisse, quae diligens pater familias

(1) Anno MDCCXXV in Academia Senensi propugnatae sunt publicae praecipuae conclusiones, quas in omni re physica statuerat Vallisnerius Vid. Tom. III. oper. Vall. p. 624.

tueri debet. Duxerat jam ab an. MDCXCII: uxorem Lauram Mattacodiam, ex qua duodeviginti liberos suscepit, in quibus educandis tanta cura & diligentia fuit, ut in hoc quoque genere laudis studuerit excellere. Dici vero non potest quanto perfruebatur gaudio, cum videret Antonium, qui e multis masculini generis superfuerat, sic patris persequi vestigia, ut ad eas laudes, quas a maioribus acceperat, additurus esset aliquam suam. Quo vero commoda haberet ingenii & industriae exercendae, museum, bibliothecam, aliaque plura glorioso quaestu parta ei reliquit, iussitque eum sic delectari re sua familiari, ut haec non luxuriae, sed liberalitati ac beneficentiae pateret. Haec praescripta servantem (nam an. MDCCXXXIV. Academiae Patavinae paternum museum (1) omni rerum naturalium copia refertissimum dono dedit) Senatus simplicium, ut vocant, scholae praefecit, novique conditi musei in ipsis Academiae aedibus curam commisit.

(1) Catalogum rerum in hoc museo asservatarum, vide apud Facciolatum: *Fasti Gymnasii Patavini* p. 407.

Nihil autem ei erat jucundius, quam ponere sub aspectu studiosorum quaesita a patre, de his differere, & pene ipsum devocare ab tumulto ad sua efferenda inventa. Neque hujus sui effusi in patrem studii mediocri indicium dedit, cum praefaretur universis illius operibus, quae in tria volumina distributa cum ejusdem vita anno MDCCXXXIII. in vulgus edidit, ex qua praefatione liceat demenda quaedam putaveris, omnia tamen libenter accipies, quod professione pietatis aut laudanda sunt aut excusanda. Quod autem proemii genus maxime conveniret, non est hominis semidocti, qualis profecto ego sum, judicare; quanquam, mea quidem sententia, non gloriose magis a veritate, quam a nescio qua dignitate ille exordiretur, qui miro candore ac diligentia explosas ejectasque a Vallisnerio veterum opiniones, veluti in tabula, repraesentaret iis ex Pindaro usurpatis carminibus (1).

(1) *Olymp.* in principio.

80 ANTONIUS

*Vana sed haec memorans vetustas
Impune gentes decipit, & venus
Antiqua Vatum callida musico
Condire sermones lepore,
Dat nebulis aliquando pondus;
Fidemque falsis arrogat: at dies
Seris recludit cuncta nepotibus.*

Quamvis homo in studiis philosophiae perpetuo occupatus ita vixerit, ut frustra se natum non existimaverit, discessit tamen ex hac vita, tanquam ex hospitio, non tanquam ex domo, eas spectans sedes, ubi in omni aeternitate se beatum fore sperabat. Sepultus est Patavii apud Eremitas Augustianos cum hac inscriptione.

D. O. M:

ANTONIO VALLISNERIO
ARTIS MEDICAE ASSERTORI EXIMIO
NATURALIS HISTORIAE AC PHIL.
RESTITUTORI CELEBERRIMO
SUMMIS HONORIBUS UNDEQUAQUE AUCTO
ANTONIUS FILIUS MOER, P.
OBIIT XV. KAL. FEB. ANNO SALUT.
MDCCXXX. AET. LXVIII. MENS. VIII.

Quam omnibus esset carus tum maxime cognitum est. Nam quamdiu valetudine implicitus jacuit (jacuit autem ad septem usque dies) qua cura, qua sollicitudine animi, quo timore universa civitas fuit! Ubi vero de ejus morte auditum, omnium ordinum extitit moeror, ut non alienigenam, sed civem omnibus rebus praecellentissimum lugere viderentur. Etenim ita se perpetuo gesserat (quod ad conciliandam benevolentiam plurimum semper valuit) ut neminem laederet, prodesset quamplurimis.

O P E R A E D I T A.

Haec tribus voluminibus comprehensa sunt, ac typis Venetis edita apud Sebastianum Coletum an. 1673. *Extat autem in primo vol.*

Dialoghi due con annotazioni della curiosa origine degli sviluppi e de' costumi ammirabili di molti insetti.

Osservazioni intorno i nidi d'alcuni insetti finora occulti. Datteri o dattili come si trovino dentro i marmi e Ballari o Ballani, dentro la creta durissima sotto l'acqua del mare.

Osservazioni intorno a un crine di cavallo dentro un uovo; intorno a' vermi nati dentro un uovo di lodola, e intorno alle cavallette o locuste che mangiava nel deserto S. Giovanni.

Considerazioni ed esperienze intorno al credere cervello
Tom. VII. F

di bue impietrito vivente ancor l'animale .

Considerazioni ed esperienze intorno alla generazione de' vermi ordinarij nel corpo umano .

Esperienze ed osservazioni intorno all' origine , sviluppi , e costumi di varj insetti con altre spettanti alla naturale e medica storia . *Sub hoc titulo habes*

... Osservazioni intorno alla mosca de' rosai .

.... Riflessioni intorno alla maniera finora creduta del nascer degli insetti .

.... Idea nuova di una division generale degl'insetti

.... Lettera al Sig. Giambattista Andriani, nella quale si dà notizia della nuova scoperta dell' origine delle pulci dell' uovo , e del seme dell' alga marina contro i difensori de' nascenti spontanei .

.... Descrizione della nascita , vita , mutazioni , costumi , e mosca del verme del naso , o della caverna della fronte delle pecore , de' montoni , de' castrati , delle capre , de' daini , de' cervi o simili .

.... Ragionamento dell' estro de' poeti , e degli armeni .

.... Notomia dello struzzo .

Nuove osservazioni ed esperienze intorno alla storia medica e naturale .

.... Nuova scoperta dell' ovaja e dell' uova de' vermi tondi de' vitelli e degli uomini .

.... Polipo viperiforme .

.... Lettera a Monsig. della Torre sopra il sistema della generazione de' vermi ordinarij del corpo umano .

.... Prove di questo sistema cavate da' Francesi .

.... Lettera al P. D. Antonio Maria Borromeo intorno al detto sistema .

.... Rara istoria d'una fanciulla nata senza cranio e con un pezzo di carne in luogo di cervello .

.... *Epistola ad Jacobum Mangetum* .

Nuova aggiunta di osservazioni ed esperienze intorno all' Istoria medica naturale non solamente del Sig Vallisnieri, ma di altri celebri autori a lui scritte con annotazioni e riflessioni del medesimo .

.... Lettere fisico-mediche intorno all' origine del morbo detto pedicolare e suoi rimedj .

.... Lettera al Sig. Gaetano Giuseppe Giorgi intorno varie rarità, osservazioni ed esperienze spettanti all' istoria medica e naturale .

.... Lettera di Vittorio Francesco Stancari con annotazioni del Vallisnieri in cui si parla del seme di Gebel-Indi .

.... Notizia d'alcuni semplici portati dal Sig. Spoyeti da Costantinopoli, e come colà si medicino coll' arsenico preparato .

.... *Epistolae Vallisnerii ad componenda dissilia inter Carolum Richam & Bartholomaeum Curtium* .

Istoria del Camaleonte Africano e di varj animali d'Italia .

.... Riflessioni intorno a' ramarri, le rane, botte, ranocchj, e salamandra .

.... Camaleonte del Messico, o Selembi .

.... Quadrupedo del Messico preso per un coccodrillo .

.... Della remora .

In secundo volumine haec continentur.

Nuove osservazioni intorno alla costituzione verminosa dell'

epidemica , seguita nelle cavalle , cavalli e puledri del Mantovano e di questo Serenissimo dominio di Venezia .

— Lettera al Sig. Carlo Francesco Cogrossi , in cui si apportano nuove osservazioni e riflessioni intorno al mal contagioso de' buoi , si cavano nuovi indici , e nuovi rimedj si propongono .

— Giunta I. de' vermi pestilenziali de' buoi .

— Giunta II. de' vermi pestilenziali in generale .

— Parto maraviglioso di vesichette , con un' esatta ricerca che cosa potessero essere , accaduto in Scandiana l' anno 1690 .

— Osservazioni intorno le brume delle navi .

— Descrizione di un vitello mostruoso .

— Fori scoperti nel pungiglione dello scorpione Africano .

— Vita e costumi d' una rasa locusta .

— Difesa di Livio dalle calunnie del cancellor che lo derise , perchè scrisse , che pioveressero sassi .

— Nascimento di funghi da una meninge umana .

— Osservazioni intorno al fiore dell' Alpe Americana ed al sugo stilante dal medesimo .

— Relazione di varj mostri con alcune riflessioni .

— *De arcano lenticulae palustris semine ac admiranda vegetatione . .*

— De' fiori della lenticula palustre .

— Nuova scoperta dell' uova , e nascita delle anguille &c .

— Pietra trovata nella vescica d' un cavallo di figura triangolare ottusa .

— Insetti marini simili alle patelle o ciniici degli agrumi .

.... Scarafaggio notturno marino .

Historia della generation dell' uomo e degli animali con un trattato della sterilità e suoi rimedj, una lezione Accademica intorno all' ordine della progressione, e della connessione che hanno insieme tutte le cose create, ed alcune lettere, istorie, descrizioni, e figure di varj mostri spettanti al trattato della generatione .

De' corpi marini, che su' monti si trovano, della loro origine e dello stato del mondo avanti il diluvio, nel diluvio e dopo il diluvio, lettere critiche colle annotazioni, alle quali si aggiungono tre altre lettere critiche contro l' opera del Sig. Andry Francesq e suoi giornali *Extremo in libro extat* .

... Giunta alla Anatomia del Camaleonte Affricano si intorno alla figura esterna della lingua, come alla sua struttura, e in terzo luogo intorno agl' istrumenti da' quali con tanta velocità viene lanciata .

Raccolta di varie osservazioni spettanti all' istoria medica e naturale scritte agli eruditi .

... Viaggio per i monti di Modena .

... Estratto di notizie intorno l' erba Fumana ed al carbon fossile, ed alcune fontane minerali, di varj legni, e chiocciolole impietrite e di altre curiosità naturali .

... Stato presente della Salsà di Sassuolo, e nuove notizie de' fonti dell' olio di sasso, che scaturiscono al lembo della medesima .

... Giunta alle osservazioni dell' olio di sasso .

... Frammento spettante alla mentovata Salsà di Sassuolo, dove si dà notizia d' una nuova salsà di Querciola .

- Altra nuova falsa di Cassola .
 - Notizie intorno varie acque termali, e in primo luogo delle famose de' colli Euganei .
 - Altre terme descritte .
 - Terme e bagni della Turrina nella Garfaniana .
 - Terme di Quara su' monti di Reggio .
 - Acque termali di Rubiano .
 - Nuove osservazioni intorno l'acque della Pieve di Garfagnana .
 - Fonti limpidi di Vitriola, che tingono in nero .
 - Miracolo falso scoperto del lago di Scafajolo, o Scafajole .
 - Fonti amari, sulfurei, dolci ne' colli vicini a Scandiano .
 - Osservazione dell'acqua di Brandola .
 - Sedimento dell'acqua del Castello di S. Pietro e d'un'altra acqua d'una terra detta di Scravalle, di cui si servono i contadini per estirpare quel tumore, che nasce nel collo detto volgarmente gozzo .
 - Fonte chiamato pronostico o profetico poco lontano da Modena nella pianura vicina al Panaro .
 - Osservazioni intorno alle scaturigini dell'acque termali .
- Dell'uso e dell'abuso delle bevande e bagnature calde, o fredde .

In Vol. III. continentur .

Lezione Accademica intorno l'origine delle fontane colle annotazioni per chiarezza maggiore della medesima, coll'aggiunta di varie lettere dissertatorie, un'altra lezione Accademica, osservazioni, ragioni, ed esperienze nuove .

ve dimostranti la verità del proposto sistema colla risposta alle obiezioni del Sig. N. N. compilata da Gaetano Giuseppe Giorgi medico e fisico Fiorentino.

Raccolta di varie osservazioni spettanti la storia medica e naturale pubblicate già nella Galleria di Minerva, nell'Efemeridi dell' Accademia Cesareo Leopoldina, ne' Giornali d' Italia, ed altri libri, ed alcune non più stampate.

.... Lettera dell' A. per la nuova scoperta dello zucchero di latte.

.... Relazione concernente allo zucchero di latte.

.... Estratto di varie lettere medico-fisiche mandate dall' A. in diversi tempi al Sig. Alessandro Pegolotti.

.... Esperimento felice sopra una sua cagna, cui avea cavata la milza.

.... Notizie sopra la vera patria, ed altre cose spettanti a Monsig. Sebastiano Pighini Cardinale.

.... Estratto d' osservazioni medico-fisiche.

.... Altro estratto di medico-fisiche osservazioni.

.... Estratto di lettera dell' A. al Sig. Bernardino Zandrini.

.... Discorso Accademico, nel quale si cerca, se la digestione dello stomaco si faccia dall' acido.

.... *De chinæ chinæ in febribus utilitate.*

.... *Rectæ rationi non repugnare, quod spiritus vini in febribus usurpetur, & verum ipsarum remedium constituitur.*

.... Due lettere scritte al P. D. Mauro Vallisneri.

.... Discorso accademico sopra il medico problema se si debba, o non si debba cavar sangue nella doglia di costa.

- *Quod sanguis debeat extrahi in febribus tertianis.*
- Lettera nella quale si fa vedere stare nascosto Pacido dentro la bile.
- Novità letterarie medico-fisiche.
- *Varia phaenomena medica.*
- *Februm idea ex Hippocrate.*
- Abbagliamenti medicinali sopra gli effetti della china china, e d'altri febbrifugi.
- Data la circolazione del sangue, se si debbano ammettere i defensivi.
- Lettera sopra il particolare de' defensivi.
- ... Osservazioni fatte nel prescrivere varj rimedj.
- Lettera al Sig. Gio. Batista Davini.
- Risposta ad un avversario sopra i defensivi.
- Lettera al Sig. Giuseppe Lanzoni.
- ... Incertezza d'alcune ragioni intorno all'aria di Venezia.
- Istoria del cadavere aperto del Sig. NN.
- ... Ragione contra i vescicanti.
- ... Se il vino debba concedersi ai febbricitanti ne' nostri paesi.
- *An vapores, an materia aliqua causet epilepsiam.*
- ... Vie dell'aria nella seconda corteccia dell'uova.
- Sputo in una pleuritide verminoso.
- Botte piccole acquaajuole notate nelle acque stagnanti.
- Aggiunta all'osservazioni delle vie dell'aria nell'uova.
- Caso raro d'uno, che non poteva più inghiottire cosa alcuna per l'esofago.
- Estratto d'Osservazioni medico-fisiche.

- Lettera al Sig. Gio. Giacomo Mangeti.
- Lettera a S. E. D. Carlo Filiberto d' Este :
- Lettera in cui si discopre la rara ed astuta maniera di fabbricare un microscopio ingannatore .
- Elogio della Sig. Contessa Beatrice Papafava Cittadella .
- Esperienze intorno la virtù della terra bianca di Malta ec.
- Fonte d'acqua salata supposto nella cima del monte Sciale .
- Memorie ed inserizioni sepolcrali del Conte Matteo Maria Bujardi ec.
- Lettera intorno al Planisferologio inventato dal Sig. Facini .
- Catalogo d'alcune rarità del museo del Sig. Ab. Co. Gio. Antonio Baldini .
- Catalogo de' Re del Mogol, i ritratti de' quali serbanfi nel museo suddetto .
- Che ogni Italiano debba scrivere in lingua purgata Italiana o Toscana .
- *De vomitu mulieris 95. annorum meracae bilis & viscosissimae pituitae, non eodem tempore, sed eadem die .*
- *Hydrops ascites ec.*
- *De abcessu in capite, ac inde morte .*
- *De urina potus diversa ab urina sanguinis .*
- *Alvo styptica, urinae quantitas diminuta, obediens copiosa .*
- *De vi diuretica decocti Sassafras in desperata hydropse .*
- *De chinae chinae vi mira in febre tertiana mali moris .*
- *Examen experimenti Lowveriani .*
- *An ablata plethora per duas v. g. venae sectiones ,*

posse in eadem febris tertio, vel quarto sanguis educi.

.... *De loco Galeni 10. M. M. cap. 10. cc.*

.... *De aqua calida, fomentorum calidorum probatissima.*

... *De loco Galeni de Viâ. ratione in morbis acutis lib. II. cap. 10.*

.... *Hippocrates curans virum in Aeniadis copiosi sanguinis emissionem praecepit se medicum Empyricum, non philosophum.*

.... *Acidas succus sero sanguinis commixtus concretione suam impedit.*

.... *Singularis diarrhoeae cura.*

.... *Alphysia diuturna.*

.... *Venae sectionis usus in mensum defectu.*

.... *Venae sectio frequent innoxie instituta.*

.... *Venae sectio utilitas in puerpera instituta.*

.... *Menstrua a venae sectione maturius erumpunt.*

.... *De venae sectione in lienosa.*

.... *De venae sectione in Erypelate.*

.... *Dolor capitis sanguinis emissionem curatus.*

.... *Diuturnarum febrium cura.*

.... *Indice delle piante che sono attorno Livorno.*

.... *Relazione d' una vipera, che ha partorito i viperini per bocca, e risposta dell' Autore.*

Estratti varj d'osservazioni del nostro Autore con annotazioni sue o di altri a lui mandate.

Saggio d' istoria medica e naturale colla spiegazione de' nomi alla medesima spettanti posti per alfabeto.

Consulti medici.

Raccolta d' alcune lettere scientifiche scritte a' suoi amici, e d' altre miscellanee.

Miglioramenti e correzioni d' alcune esperienze ed osservazioni del Sig. Redi fatte dal Sig. Antonio Vallisneri, e registrate da Girolamo Gaspari Veronese.

ANGELUS FABRONIUS.

NATALI SALICETO

PII VI. PONT. MAX. ARCHIATRO

S. P. D.

CUpio equidem, & jampridem cupio retexere quae antea vulgaveram, & sic eruditorum desiderio in explicandis clarorum hominum vitis satisfacere, ut intelligant quae laus unicuique debeat, quidque a singulis gestum ad scientiarum incrementum, & ad errantes homines deducendos in viam. Profecto nihil tam difficile; nihilque tam longum quam veritatem in omni re, praesertim physica, assequi, & quamvis nulla non tempore homines excoluerint artes, in quibus non jam animi libera quaedam oblectatio, sed utilitas quaeritur necessaria, quod iis generis humani salus proposita sit, mirari tamen subit mediocrem ad veritatem factam esse progressionem, cujus rei non alienum a proposito esse videtur hoc loco, quo de Lancisio medico sane nobilissimo scribendum suscepimus, caussam inquis

*vere. Latet natura obscuris involuta tenebris ;
 neque sine infinita diligentia atque industria quis-
 piam ad ejus latebras accedere potest , magistra
 atque duce observatione atque experientia . Ha-
 ram alterius ope qualitates corporum , quae sub
 sensum aliquem cadunt , morborum cursum , eo-
 rum phaenomena , & remedium effectus novi-
 mus , per alteram intelligimus quae sit structura
 & vis partium , quae compositio , ut vocant , mix-
 torum , quae sint proprietates corporum , quae
 in vasis fluunt . Atque haec duo minimè sejungit
 possunt , separatinque excoli , cum conjurent ami-
 ce , & altera alterius omnino poscat opem atque
 auxilium . Enim vero quis dubitabit observatio-
 nem saepe erroris causam esse , cum videat vel
 eos ipsos , qui mire inter se dissident , magnam
 observationum copiam in medium asserre ad con-
 trarias opiniones comprobandas ? Ex hoc quidem
 fonte infiniti in medicinam dimanarunt errores ,
 quorum adeo altae fuerunt radices , ut nisi sum-
 mo labore ex hominum animis evelli potuerint ,
 Verum ego hanc vim intelligo esse in observa-
 tionibus , ut ceteri qui adhibuerint , non medicorum
 laudem sint consecuturi , nisi physicorum experi-
 mentorum auctoritate & testimonio easdem con-*

firmaverint, cum harum duarum rerum tantummodo, non hominum, quamvis medicinae faciendae scientissimorum, consensum vocem esse naturae existimare debeamus. At non minus physica experimenta observationum subsidio indigent, quod ut exemplo apertum faciamus, postquam Harveus medicis probavit vitalem vitam a sanguinis circuitu pendere, ii inde inferri posse putarunt, frustra remedia ad quasdam corporis partes apponi, cum ad omnes facile per circumfluentem sanguinem traducantur, quod a veritate alienum esse ex multis sapientum hominum observationibus cognovimus. Neque his modo physica experimenta confirmamus, sed etiam ad nova tentanda impellimur, & manu veluti ducimur. Noverant chirurgi ligamenti cohiberi sanguinem, illaque laxanda quoties ex secta vena sanguis esset emittendus. Latuit diu hujus phaenomeni causa. Homines in illa quaerenda toti occupati invenerunt tandem circumeuntis sanguinis motui ipsam tribuendam, neque hoc, neque alia hujusmodi mul-
 ti potuisse unquam aperiri sine observandi & experiendi artibus, quas artes utpote inter se dignitate pares, & ejusdem socias facultatis nunquam non exercendas ab rerum naturalium studio

fis tum maxime docuerunt. Id quidem minime
 difficile esset, si aliud ageretur nihil nisi ut quae-
 dam observationes atque experimenta ratione qua-
 dam componerentur. Sed longum iter ingredientibus
 undique se se difficultates offerunt, neque
 cuiquam licet vel extremis, ut dicitur, digitis ve-
 ritatem attingere, nisi ad summam prudentiam
 magnus usus accedat, quibus maximo labore a se
 collecta disponat, conferat, atque perpendat, co-
 hibeatque a rebus incertis assensionem, & ab om-
 ni lapsu temeritatem. Neque magnopere nostris
 laboribus nos confidere oportet, cum ex consensu
 & conspiratione multarum observationum, atque
 experimentorum, quae per plura saecula habita-
 sunt, existat medicina. Quapropter execrabimur
 illorum impudentiam, qui cum perpauca per se
 teneant, magna profitentur, & ea, quae maxi-
 ma sunt in arte salutari, sine multorum subsidio
 & diuturni temporis usu consequi se posse confi-
 dunt. Is erit perfectus medicus, qui prudentissi-
 morum scientiam, ut ita dicam, sibi assumpse-
 rit, noveritque hominem cum homine, tempus
 cum tempore, rem cum re comparare, & dum fa-
 cta, & de iis doctiorum opiniones sagaciter in-
 vestigat, convertat animum saepe ad observatio-

nes atque experimenta , ut lumen reddat iis , a quibus se accepisse gloriatur . Qui secus feceris sciens insanire , & insignia facultatis ad ludibrium impudentiae usurpare videtur . Magnus ille Boerhaavius , quo neminem in medicina doctiorem nostram tulisse aetatem vere videor posse contendere , hanc sibi proposuerat exercitationem , ut quae a se observata essent in usu & tractatione quotidiana medicinae ad studia doctrinae referret , & non raro a se ipso sciscitaretur non quos aegrotos vidisset curaveritque , sed quos progressus effecisset in morborum cognitione , cuius sane exemplum dignissimum judico , quod omnes medicinae studiosi sibi ad imitandum proponant . Addebat immortalis ille vir , cum causam ageret medicinae , homine acuto sibi opus esse , & natura usuque callido , & in physica praesertim exercitato , qui principia & causas rerum inquirat in remedium natura , in morborum signis & origine , & in oeconomiae , ut loquuntur , animalis legibus , semperque meminerit quantis erroribus praepudicatas opiniones , auctoritas sine ratione , credulitas , facilitas fabricandi systemata , dogmata pronuntiandi , omnesque umbras non jam veritatis , sed probabilitatis & verisimilitudinis consecrandi me-

dicinam inquinaverint. Magno sane in pretio habenda sunt artis praecepta quae ipsa rerum natura lente & patienter interrogata, minime verò hominum ingenia sibi unice silentia pepererunt; & si nimium pauca nobis scire videbimur, licebit interdum uti conjectura atque analogia, quae ad dilatandos eorundem praeceptorum angustos limites plurimum conducere possunt. Sed ratio hoc postulat, ut caute his ducibus utamur, quamvis per eas ad magnarum rerum inventa homines abundanti doctrina pervenerint. Verum si mediocria ingenia, neque multis exculta disciplinis, iis se tradent, & quae ex veri similitudine, & similiarum rerum comparatione inferre se posse credunt ad artis usum statim transferent, multis se homicidiis contaminabunt, & ut Plinii verbis utar, animas aegrotorum negotiari videbuntur. Facile in errorem labimur, neque sine summa difficultate ab eo deduci possumus, ac saepe evenit ut observationes, quae ipsum extorquere, aut saltem infirmare debuissent, mirifice corroborent. Ingenia obtundi nolo, quasi iis vetitum sit rerum causas inquirere & noscere, & in inveniendis theoriis elaborare. Sed antiquorum exempla in huiusmodi inquisitionibus (quis enim ignorat quantum ipsi tribue-

tribuerint acido, alkali, fermentationi sanguinis; ac lymphæ densitati in omnium pene morborum causis explicandis ?) nos cautos, & pene timidos reddere debent, nisi sapientum irrisione illud velimus. Neque veteres modo, sed & recentiores multa fallacibus judiciis conjecerunt, & Augiæ stabulum repurgandum susciperet, qui temerarias & periculosas conjecturas ex eorum libris expungere vellet. Postquam mira vis hydrargyri cognita est in omnibus venereis, & quibusdam aliis morbis, præclarum ac tutum inventum esse remedium plerique existimarunt ad ulcera, ad scorbutum, ad chronicos, atque ad omnes pene sanandos morbos, quo quantum allatum sit detrimenti, malo in aliorum judiciis relinquere, quam in oratione mea ponere. Non contemnamus ea, quæ homines prudentes diuturno usu quasi divinarunt, sed redeamus semper ad illud, unde divertimus, ad observationem scilicet atque experientiam, per quas unice in omnium fallacissima arte fidem, auctoritatem & firmamentum nostris effatis adjungere debemus. Verecundius hæc tecum loquor, quod indigna esse putem ista singulari sapientia tua, ac tuis auribus; sed fortasse non inutile erit adolescentibus ista legere, quod studia nihil profunt.

pervenienti aliquo, nisi illud, quod eo, quod intendas, ferat deducatque cognoris. Praeterquam quod castiganda est segnitie atque inertia quorundam medicorum, qui quamvis haec ignorent aut contemnant, erecti & celsi, alacri & prompto ore ac vultu huc atque illuc intuentes vagantur cum magna caterva discipulorum praesidium aegrotis, & prope cunctis hominibus lucem ingenii & consilii sui porrigentes. Et istam copulationem plurimum artium magnam & difficilem esse oportet, quoniam Lancisius, qui certe usum, & scientiam, & studium singulare ad medicinam attulit, non una in re lapsus est; & certe quae de cordis structura & motu attulit talia sunt, ut interdum ea quae magis animum ejus, quam sensus pepulerunt, probasse videatur. Vale.

Pis. Id. Quint. MDCCLXXX.

JOANNES MARIA LANCISIUS:

Joannes Maria Lancisius natus est Romæ VII. Kal. Novemb. an. MDCLIV. parentibus Bartholomæo Lancisio Biturgienſi & Anna Maria Borgiana Romana. Haec jam e vivis exceſſerat, cum ductus eſt ad Urbem Veterem, ut ibi aleretur ab amita integerrima & optima femina, quæ, virum cum amiſiſſet, ibidem ſedem fixerat ſuam. Manſit eo loco Ioannes ad duodecimum uſque ætatis annum, quo, amita jam ſæto functa, eum pater Romam perduxit. In Urbe nondum egreſſus e pueritia ab hominibus Societatis Jeſu imbutus eſt politiorum litterarum ac philoſophiæ Peripateticæ ſtudiis, in quibus tantos progreſſus fecit, ut non excurrere, ſed evolare videretur. Ad divinarum quoque rerum ſcientiam, iiſdem ducibus, ingreſſus eſt, ſed ea vix dum a limine ſalutata, eo ſe contulit, quo ſuum illum deducebat ingenium. Itaque medicinæ operam navare inſtituit, audivitque Hyacintum Altop-

marium Archigymnasii Romani Lectorem, ut ajunt, primum; ac duodevicesimo aetatis anno post. Kal. Septembris illa doctrinae insignia consecutus est. Hoc tempore coepit ille dies ac noctes in mathematicarum facultatum meditatione versari. Nam acutissimus adolescens vidit medicam artem sine physicarum rerum scientia aut nullam esse, aut in summis tenebris erroris atque inscitiae necessario vagari; nec ad naturae penetralia aditum patere posse nisi iis, qui sint mathematicis rebus (1) ac praesertim geometria instructi. Itaque postquam primos Clavii libros, nemine praeunte, cognovit, totum se dedit Vitali Jordano, qui tum unus maxime excellere in iis doctrinis Romae putabatur. Sic veluti quadam accensa face, potuit facile, quo tendebat, pervenire; exercuitque se praesertim in anatome, chemia, re herbaria atque naturali historia. Quo factum est, ut omnes, quae tunc temporis Romae celebrabantur, nobiliores Academias sive medicinae, sive anatomes, ceterarumque naturalium scientiarum frequentare coepit; in quibus cum strenue ac laboriose im-

genium exerceret, palam omnibus fecit ingenta quadam cupiditate efferri se ad gloriam. Ad quam ut incenderetur quotidie magis. Sapientiae imaginem in tabula vivis expressam coloribus sibi comparavit. Sedebat haec magnifico in templo, quod positum erat, ut Ascræus ille cecinit poeta, in vertice montis: strenuos autem corona donabat, eos omnino despiciens, quos aut labor medio in cursu, aut voluptas, aut otii desiderium procul averterat. Cum in cognitione rerum medicarum haec praeclara fundamenta jecisset, nervos omnes contendit, ut Romanae in publicis nosocomiis eo in studio quotidie exerceret se diligenter. Neque vero, quoties obtulerat se occasio, privatim id agere intermittebat, eos invitens assidue, qui Joannis Tiracordae diligentiae, quem sibi ducem elegerat, & a cujus latere nunquam discedebat, valetudinem suam commendaverant. Qua quidem in re tantum adhibuit industriae, ut cum omnia prudenter animadverteret, omnium etiam morborum historias in ephemerides diligenter referret. His ille rebus cum ad hominum sanam pervenisset,

accidit ut feligendus esset, qui medici, ut vocant, adfidentis munus gerit in S. Spiritus nosocomio. Quamvis plures essent competitores, qui Lancisio aetate plurimum antecedeabant, illud tamen munus facile obtinuit, non alia re commendatus nisi ipsa sua virtute atque opinione doctrinae. Nihilominus tamen minus ille in nosocomiis, quae Romae plurima sunt, saepe aderat; & quod caput est, dum is aegrotos inviseret, etsi detentos variis morborum generibus, ubique idem erat Lancisius, ubique industria sua utebatur, illud assidue contendens, ut quem sibi proposuerat finem, citius omnino assequeretur. Veruntamen cum satis videret quam lato in campo, nullisque limitibus definito versaretur, ut sibi suisque studiis diligentius caveret, alumni locum Piceno in collegio obtinuit: quinquennium vero ipsum, quod eo in loco consumpsit, adeo navavit sedulam operam medicis studiis, ut potuerit viginti duo magna volumina conficere indicum earum rerum, quae ad cognitionem, usumque spectarent. Haec inter anatomes studium, quod ei curae maxime erat, eum quotidie

districtum habebat, quo prope fuit, ut in corporis cujusdam sectione infectus gravissimo morbo vitam finierit. Sed integrae reditus valetudini, cum cooptatus fuisset in eum doctorum hominum coetum, qui *Congressus medicus* appellabatur, quique habebatur apud Hieronymum Brasavolum, illius Antonii Musae nepotem, qui summa cum laude saeculo XVI. publice medicam facultatem fuerat Ferrariae professus, sibi in illo cum scriptis aliis, tum ea praesertim lucubratione, quae est *de Virgine quadam Calliensis mirabili vexata symptomate*, plurimum nominis comparavit. Quà re factum est, ut cum dissecandi magister in Archigymnasio Romano munus dimisisset, quanquam non ita pauci, iiique instructi interioribus litteris provinciam hujusmodi spectarent, Joannem Mariam Lancisium, qui ei succederet, omnibus suffragiis elegerint Moderatores. Quo quidem in munere ita se gessit, ut non modo opinionem vicerit, quae de doctrina ejus erat, sed etiam, si perpaucos exceperis, gloriam superiorum. Adjunxerat ille perfectae rerum anatomicarum scientiae laudem illam, ut satis

polite Latine loqueretur, excellenterque prout nuntiaret; quocirca quoties dicturus erat; magnus ad eum fiebat concursus non modo discere cupientium, sed etiam virorum doctrina insignium, quorum in numero saepe fuerunt (qui quantique viri!) Marcellus Malpighius, & Lucas Tozzius. Neque illud est praetereundum, quod si forte eveniret (evenit autem saepissime) ut inter dicendum aliquis dignitate illustris homo ad eum audiendum accederet, interrupta oratione, eatenus dicta in aptam epitomen variè contrahebat (2) quod quidem nullo negotio praeistabat, cum haberet divinam quamdam memoriam rerum & verborum. Hoc tempore persuasit Archigymnasii Rectori, ut elegantius instauraretur Theatrum Anatomicum, quo facto, idem in ingressu apposuit duo illa hemistichia: **LACEROS JUVAT IRE PER ARTUS: NEC TE QUAESIVERIS EXTRA:** quorum alterum ex Claudiano, alterum e Persio desumpsit. Mansit ille in hoc munere duodecim annorum spatio. Nam anno MDCXCVI. successus est Jacobo Sinibaldo, qui theoreticam medicinam eodem in Lyceo tradebat; ex quo

demum loco venit quinquennio ferme post
ad medicinam practicam docendam. Sed il-
lud in primis gloriosum fuit Lancisio, quod
mortuo Francisco Santuccio, qui Innocentii
XI. valetudini curandae operam dabat, ei
successit, cum nondum quatuor & triginta
compleisset annos, quod nescio an ulli con-
tingerit. Qui provinciae sane gravissimae ille
non modo cumulate satisfecit, sed cum ar-
cana multa ei communia essent cum Ponti-
fice, qui plurimum ejus studiis, ingenio, fi-
dei, ac prudentiae tribuebat, quotiescumque
vellet, ad virum illum sanctissimum patebat
aditus. A quo auctus etiam dignitate (nam
in collegium canonicorum SS. Laurentii &
Damasi cooptatus fuit) ei omnia obsequii &
benevolentiae officia praestabat. At non ita
multo post cum Innocentius ad Superos evo-
lasset, quippe qui facultatem, quam in de-
liciis habebat, Reipublicae bono exercere cu-
piebat, sacrum illud munus dimisit. Fuerat
is jam ab anno MDCLXXXIX. singulari vo-
luntate Moderatorum adlectus in collegium
Archiatrorum Romanorum, quo quidem ho-
nore ita usus est, ut non modo ornamento;

sed magno etiam adjumento eidem Collegio fuerit. Nam praeterquamquod praestitit se acerrimum propugnatorem ejusdem jurium, non destitit, quibuscumque rebus posset, collegas juvare, ut is omnium parens videretur. Cum quotidie magis cresceret Lancisus laude doctrinae, huic non solum his demandatum est munus *Protomedici* Romanae Urbis, totiusque Pontificiae ditionis, sed illum quoque esse voluit Cardinalis Palutius S. R. E. tit. vocant, Camerarius, qui in laureis medicis tribuendis vices gereret suas in Archigymnasio Romano, quod munus, Palutio vita defuncto, ejus successor Joannes Baptista Spinula in Lancisio firmavit; ac tandem Clamens XI. sentiens eundem potius tribuere provinciae suae splendorem, quam ab ea accipere, ne loco amplius moveri posset, edixit. Interim nobiliores, quae Romae extant, ita sibi familias conciliaverat, ut iisdem assidue operam navans, Caesaris etiam Legatos effecerit suos. Cumque nihil praetermitteret eorum, quae ad exercendum ingenium conferre posse viderentur, cooptatus in Arcadum coetum, quem viri interioribus lit-

teris praediti, & poeticis studiis quam quæ maxime addicti instituerant, Ersilii Macariani nomine est appellatus. Neque Romanis solum, sed etiam absentibus erat notus (3). Satis enim multa scripserat, quæ dimanaverant ad existimationem hominum. Ex his quaedam typis impressa sunt, quæ maxime cum sibi; tum studiosorum anatomiae rationibus conducere putavit. Inscribuntur autem: *Humani corporis Anatomica synopsis = Anatomia per uso e intelligenza del disegno, ricercata non solo sugli offi e muscoli del corpo umano, ma dimostrata ancora sulle statue antiche più insigni di Roma*. Illa etiam notiora atque illustriora fuerunt quæ ad Raymundum Vieussenum scripsit, ut probaret sal marinum latenter in sanguine contineri, & extrahi posse; haud posse tamen (haec enim duo ille quaesierat) veris certisque argumentis statui quam proportionem habeant inter se omnes sanguinis partes. His adde *Epistolas duas ad Felicem Adamum Mulebacherium de monstris quibusdam foetibus, deque seminis vermiculis*, in quibus speciem & formam humani corporis adumbratam esse suspicabatur (4). Haec aliaque

hujusmodi dum litteris mandaret, curabat ut de suis studiis & exercitationibus certior fieret ingeniorum fautor mirificus Innocentius XII. qua re factum, ut cum gravissimo morbo is implicitus fuisset, ultro Lancisium ad se se accersiverit. Eodem mortuo, quod non mediocriter valuit ad illius famam augendam, conclavia ingressus est, operam suam medicam Cardinalibus, qui illuc creandi Pontificis causa convenerant, praestiturus. Natus ibi otii plurimum in eo languere noluit; quocirca a primis diebus coepit cogitare, quo posset genere litterarum Reipublicae prodesse. Inter multa, quae ei occurrerunt, argumenta, illud de aneurysmatibus plane dignum existimavit, in quo studium suum poneret. Nam videbat utilissimum hunc scientiae medicae locum multis obstructum esse difficultatibus, & a nemine, nisi leviter admodum, ad eam diem fuisse tractatum. Cum opus in manus sumpsisset, & multa adumbrasset unius mensis spatio, ecce ad summum dignitatis fastigium evehitur Cardinalis Albanus, is qui Clementis XI. nomine appellari voluit, qui cum esset intelligens ingeniorum

existimator, eisque semper debitos habuisset honores, statim Lancisium elegit, cui valetudinis suae curam committeret. Hoc munere auctus ille fore sibi otium existimavit ad ea, quae inchoaverat, brevi perficienda. Sed falso. Nam qui locus quietis & tranquillitatis fore plenus videbatur, in eo maximae moles molestiarum extiterunt. Coepit enim summus Pontifex variis affligi morbis, quem ut medicina reduceret ad salutem, incredibile est quantum diligentiae ac studii adhibuerit Lancisius. Eo accesserunt alii aliis temporibus graves publici casus, qui ut Pontificis animum maxime perculerunt, sic Lancisium occupatum impeditumque tenuerunt. Fuerunt hi magna Romae in primis frequentia repentinorum mortium, contagiones maiorum, quae a palutribus aquis profectae nonnullis praesertim Romani agri oppidis solitudinem fere intulerunt; ac demum bovilla pestis, quae tota Pontificia ditione foede vagata est. Hinc Lancisius jussu Pontificis, qui nihil reliqui faciebat, quod ad prospiciendum Reipublicae saluti pertineret, argumentum sumpsit trium operum, quae singula

breviter, instituti nostri tenendi causa, referemus. Inscrisit primum *De subitaneis moribus*, idque in duos libros divisit. Horum in altero de genere universo agit repentinorum mortium, qui locus a recentioribus desertus lucem docti alicujus scriptoris post detectum praesertim sanguinis circuitum desiderare videbatur; in altero perpendit causas & principia, unde his temporibus tot homines hujusmodi mortium fata peremerunt. Profecto his libris nihil potest esse utilius iis, qui aliquam cupiditatem habent notitiae rerum medicarum. Nam solerter adeo, docte, exquisitaeque enucleat vitae ac mortis causas, omnia ex mechanica solidorum structura, fluidorumque temperatione, alternisque motibus deducens, omniaque accuratissimarum dissectionum experimentis comprobans, ut in illis universam propemodum medicinam contractam esse haud immerito possis dicere. Quam vero ii accepti fuerint, hoc erit indicio, quod statim a summis viris maxima facta est Lancisio gratulatio, e quibus nominasse sufficiat Lucam Tozzium, Dominicum Guilielminum, & Bernardinum Ramazzinium (5).

quibus cum fuisset probatus, non poterat vereri, ne non ab omnibus probaretur. Eo accessit quod brevi duorum annorum spatio quater typis impressi, nec ita multo post in Gallicum sermonem conversi fuerunt. Nec minus homines, qui poterant judicare (6), expletum omnibus suis partibus praedicarunt opus *de Noxiis paludum effluviis*, quod in duos libros pariter tribuit. Demonstrat in primo caelum propter vapores stagnantium aquarum grave ac pestilens fieri; causas quaerit quare hae stagnantes aquae maxime aestivo tempore corrumpantur; diligentissime in naturam inquirens horum ipsorum vaporum duo genera esse statuit, alterum animatum formatumque in figuram animantium, inanimatum alterum, eaque figura carens; simul & ostendit quomodo in humanum corpus perveniant, eique noceant; deinde gradum facit ad remedia, quibus iidem palustres vapores vel omnino tolli, vel saltem temperari, mīui, aut quo minus noceant, intercipi possint. In secundo vero libro historiam persequitur contagionum, quae Romam, Herbanum, seu ut alii malunt, Urbem Veterem;

Balneoregium, Pisaurum, & Ferentinum affixerant, quaeque maxime memorabiles fuerunt, in eaque multa etiam admiscet ex intima medicina. Est locus in primo libro, qui pertinet ad ortum insectorum, ibique Lancisus non dubitanter affirmat ranas & bufones ova in tellure deponere, eaque arida in pulvere sepulta, si sint aestivis pluviis madefacta, improvise foetus fundere. Sed cum ille postea animadvertisset minime id consentire cum iis, quae diligentissimi naturae investigatores Franciscus Redius, & Antonius Vallisnerius observaverant, ex quibus compertum habemus ea animalia ova in aqua deponere, scripta epistola ad eundem Antonium Vallisnerium, quam inseri curavit in XXIX. volumine Ephemeridum Italorum Litteratorum, voluit omnibus patefacere erratum suum. Noverat enim, & saepe in ore habebat praeclaram illam Celsi sententiam, qui laudans Hippocratem, quod ingenue fateri non dubitaverit deceptum se a cranii futuris fuisse, dixit id fecisse: *more magnorum virorum, & fiduciam magnarum rerum habentium: . . . nam. levia. ingenia, quia. nihil. habent, nihil*

nihil sibi detrahunt. Magno ingenio, multaque
 nihilominus habituro, convenis etiam simplex ve-
 ri erroris confessio, praecipueque in eo ministe-
 rio, quod utilitatis causa posteris traditur, ne
 qui decipiantur eadem ratione, qua quis ante de-
 ceptus est. Scripsit de bovilla peste (?) quam
 plenissime scribi res illa potuit. Sic enim o-
 mnia de origine & progressu hujus morbi, de
 illatis detrimentis, de consiliis magistratuum,
 de adhibitis remediis, de naturalibus causis
 & effectibus in hoc libro notata sunt, ut
 nihil in eo non appareat, & facile existima-
 ri possit quam esset Lancisius veterinariae
 quoque medicinae peritus. Antea quaedam
 hac ipsa de re tetigerat, litteris datis ad An-
 tonium Borromeum, quas litteras, cum Lati-
 nas Auctor ipse fecisset, dignas judicavit,
 quae memorato libro de bovilla peste adjun-
 gerentur. In illum quoque intulit opusculum
 de epidemia equorum, quae Romae fuit an-
 MDCCXII. quod sua interesse putaverit &
 quid sentiret ostendere, & quod consilii de-
 derat defendere. Scripto jam opere de no-
 xiis paludum effluviis, in quo perquam bre-
 viter perstrinxerat atque attigerat nonnulla

de caelo Romano, vidit quanta cum utilitate istud argumentum dilatarı posset. Itaque, ceteris omnibus sepositis, in conficiendo libro de *Nativis deque adventitiis Romani caeli qualitatibus* multum elaboravit, in quo omnia quaecumque vel lectione librorum, vel scientiae per investigatione, diuturnoque usu consequi potuit, complexus est. Volens itaque ostendere caelum Romanum naturaliter salubre esse, rem comprobat ab Urbis situ, a ventis, qui in ea dominantur, ab aquis, quibus ipsa Urbs utitur, a telluris fertilitate, ab habitu, & colore diuturnaue vita incolarum. Fieri tamen posse docet, ut propter vehementes septentriones ventos, & interdum etiam australes, ac praesertim propter vapores stagnantium aquarum hanc suam naturalem salubritatem amittat. Quae quidem vir praecelara eruditione & doctrina sic prosequitur, ut ab ultima origine Urbis ad postrema usque tempora historiam, ut ita dicam, contextat vicissitudinum, quas habuit caelum (8) Romanum. Huc quoque intulit historiam epidemiae rheumaticae, quae per hiemem anni MDCCIX. vagata est, quod a re proposita

haud alienum esse duxit. Sane hujus libri confectio perjucunda Lancisio fuit consideranti magnae illum fore utilitati Urbanis praesertim medicis. Scite enim Hippocrates, *necesse eos in tenebris versari, qui probe non noscunt situm, ventos, aquas, cibos, aliaque multa tum naturalia, tum fortuita locorum, in quibus medicinam faciunt.* His de rebus profecto quidquam ad ea usque tempora diligentius & doctius factum minime fuisse existimabatur. Sed non est celandum quaedam in physica peccasse Lancisium, qui si revivisceret, cognitaque praesertim haberet, quae de aeris natura ac miris proprietatibus, varietatibusque per summos philosophos Britannos recenter inventa sunt, libenti animo fateretur quaedam delenda e suis libris, quaedam corrigenda, quamvis ii mirifice homines concitaverint ad studium cognoscendae veritatis. Inter haec Lancisius alia quoque ingenii monumenta litteris mandavit. Scripsit dissertationes quasdam *de lumbrico lato*, quas misit ad medicos praestantissimos Antonium Pacchionium, & Joannem Dominicum Bianciardium. Vetus erat opinio jam usque ab

Hippocrate ducta, eaque medicorum ferme omnium confirmata consensu, corpora illa, quae nunc fasciae instar depressa, nunc cylindri forma figurata intestinis adhaerent, eorumque longitudinem plerumque aequant, inter infecta annumeranda esse. Sed in utramque partem multa differebantur, & ii ipsi, qui sapientiorum iudicio stare videbantur, solebant hae de causa inter se dissentire, quod alii unum esse vermem, aliis plures esse putarent mire inter se colligatos atque implicitos. Quod id insolenter & raro eveniat non audebat Lancisius quidquam pro certo affirmare; demum rem diu & multum sibi inquirenti liquere dixit tum experimentis, tum rationum pondere nil aliud esse huiusmodi corpora nisi polypos quosdam ex succo concretos. Quapropter quemadmodum medicina plurimum debere putatur Malpighio aliisque solertibus viris, qui de cordis poly-po scripserunt, hominesque docuerunt, ne a falsis vasorum sanguinis vermibus fallantur, sic de nobilissima facultate non minus se meritum arbitrabatur, quod hisce dissertationibus effecere, ne amplius medici a vermibus

simillimis intestinorum polypis decipiantur . Verum si ei gloriosum fuit illos convincere erroris , qui lumbricum latum unicum esse vermem credebant , ipse quidem , ex multorum sententia , in eo errasse putatur , quod non agnoverit illum vermium cucurbitorum acervum , de quo post Vallisnerii & Cocchii observationes amplius dubitari non posse arbitror . Post illa Lancisius scripsit epistolam *de humorum secretionibus , ac praecipue de bilis in hepate separatione* ad Joannem Baptistam Blancum hepaticae historiae auctorem , de qua quale iudicium fieri debeat , juvat viri summi Morgagnii verbis referre . *Ex hac epistola* , inquit ille in Adv. Anat. III. animad. XXIX. *quamvis incredibili humanitate scripta , Lectores tamen attenti facile intelligent virum gravissimum , Historia Hepatica perlecta , nihilominus diserte ea ipsa affirmare , quae in illa negantur . Non enim credit nihil in hepate Malpighium nisi nomen glandulae innovasse , sed veras glandulas , veros glandularum folliculos adhuc agnoscit . Non credit lymphaticae vascula in extrema solum superficie capsulae subsistere , sed censet lympham , quae antea bilis particulis inter-*

mixta erat, absorbere. Non credit in primis, id quod in historia maxime inculcatur, ea ratione bilem secerni, quam Auctor proposuerat, sed ipsius diligentiam non obscure desiderat, imo apertissime duo illa, in quibus totam explicandae rei rationem posuit, sibi nullo pacto probari posse dicit, ac minime decere diligentem solertemque anatomicum in rebus haerere hujusmodi. Quid multa? Hominem cogit non modo. . . ut quae demonstrata esse jactaverat, vix pusilla conjecturae face evadere agnoscat, sed ut postquam significavit velle se invios quaterne ulterius recessus, incipiat ab iis ipsis, quae incassum scripserat in historia iterandis. Quibus & talibus rebus exquisitis, hoc vel maxime effecit, ut non amplius dubitaretur quibus ex causis bilis secretio penderet, neque illam sanguine crassiorem esse, quae duo ad medicinam faciendam haud mediocris esse momenti existimavit. Post haec placuit Lancisio abstrusiora quoque inquirere binis editis dissertationibus de physiognomia & de sede cogitantis animae, quas ad Joannem Fantonium virum doctrinis physicis praestantem & secum vetustate amicitiae conjunctissimum misit. (9) Harum in prima, refu-

tata vanitate levitateque eorum, qui futura se praedicere profitentur a manuum & frontis lineis, ex his tamen corporis constitutionem, causasque naturales, & antecedentes nostrarum voluntatum, & appetitionum nosci posse physicis argumentis & rationibus comprobare nititur. Ex qua impressa notione illud nos utilitatis capere debere ait, ut accommodata disciplina atque doctrina ad uniuscujusque naturam, facilius bonam confirmemus, vitiosam corrigamus. Quamvis enim extirpari & funditus tolli nequeant naturales illae causae, ob quas alii in alia propensiores sunt, sic tamen comprimi & edomari studio & diligentia possunt, ut nullum pravitatis vestigium appareat: quare nititur opportune exemplo Socratis, in quem cum multa in conventu, ut narrat Cicero, vitia collegisset Zopyrus physiognomon, derisus est a ceteris, qui illa in Socrate vitia non agnoscerent, ab ipso autem Socrate sublevatus est, cum illa sibi signa inesse, sed ratione a se dejecta diceret. Expōsiturus in secunda Dissertatione quae idem, duce anatomico, de sede & loco cogitantis animae ex

abditis naturae recessibus deprompserat, ait
 versari se in re difficili, ac multum & saepe
 quaesita, profertque dictum Platonis, qui
 in Alcibiade *oculus*, inquit, *se ipsum si videre
 vult, in oculum intueri debet, proinde etiam
 anima, si se ipsam noscere vult, ut animam in-
 tueatur oportet*: deinceps transit ad examen
 sententiae Cartesii, qui animam in glandula
 pineali locavit, aitque praestantissimum hunc
 philosophum ex vero intellexisse domicilium
 perceptionum cogitationumque in ea cerebri
 parte constituendum esse, quae unica sit, &
 in quam gemina externorum sensuum orga-
 na concurrant; non vidisse tamen, ut pote
 observationibus anatomicis destitutum, alium
 in cerebro locum, in quem illa magis con-
 veniant, huncque esse corpus callosum. Quid
 sit porro huiusmodi corpus callosum, ejusque
 partes & formam diligentissime describit. Haud
 pauca etiam explanat ad glandulam pinea-
 lem spectantia, partesque quae circum eam
 sunt, haecque non de medio sumpta, sed
 diuturna observatione a se quaesita; omnino-
 que scripto hoc Lancisium plurimum luminis
 attulisse judicatum est cerebri assequendae na-

aurae, qui locus in anatomica scientia difficillimus existimatur. Ceterum quod ad sedem animae attinet, latet ita ac crassis occultata & circumfusa tenebris, ut nulla acies humani ingenii tanta sit, quae penetrare ad ipsam possit. Corpora nostra non novimus, qui sint situs omnium partium, quam vim quaeque pars habeat ignoramus, & notiora nobis esse putabimus, quae ad animam quomodocumque pertinent? Profecto neque ille, qui dixit habitare ipsam calloso in corpore; jurasset ita se rem habere, neque nos item. Interim Ludovicus Ferdinandus Marsilius, vir non minus doctrina, quam bellica virtute insignis, Dissertationem *de generatione fungorum* sub ipsis pellibus a se confectam ad Lancisium misit. Huic pergratum fuit munus; utque paria paribus responderet, eidem longissimam epistolam scripsit, in qua postquam illud summis laudibus extulit, ostenditque naturae studium amplissimo quoque viro. dignum habitum semper fuisse, suscipit tractandam hanc eandem materiem procreationis fungorum. Pluribus comprobare nititur fungos proprium semen non habere; arbores ex

succo, quo ipsae arbores aluntur, manare; pratonfes, ceterosque ex corio, fruticibus, foliis, frustis libri, aut corticis, ligni, radicum: quae omnia, quamvis corpora mortua dicantur, habent tamen ex illius sententia in se compressum succum, qui cum nactus sit materiam, qua solvi, & ali possit, ita efficiat morbosas hasce plantas. Sic enim auctor fungos appellat, eo quod nunquam non a plantarum morbis principium eos ducere arbitretur. Quo vero modo gignantur, unde illorum conformatio & textura, varia multiplexque natura, eleganter explicat. Quaedam etiam attingit de lapide illo, quem nos dicimus *pictra fungaja*, ut ostenderet haud esse verum lapidem, sed concretionem quamdam radicum, lapillorum, succorum, seminum, terrae, similibusque rerum. Optime porro meritos se fuisse de naturali historia Marsilius & Lancisius iis editis scriptis (10) arbitrabantur, reputantes tanta in obscuritate involutam esse fungorum procreationem, ut Malpighius de illa quaerenti Marsilio respondere minime dubitaverit: *se diu multumque in ea inquisitione elaborasse, sed modicam subesse*

spem deprehendendi hanc naturae methodum. Eo-
dem ferme tempore, quo haec vulgata sunt,
edidit Lancisius opus, quod inscribitur: Ani-
madversiones in Plinianam villam nuper in Lau-
rentino detectam; illud quidem elegans varium-
que, in quo & antiquitatis se litterate pe-
ritum ostendit, multaue retulit ad recondi-
torem physicam, & ad naturalium rerum
historiam pertinentia. Huc illa spectant quae
de multiplici aggestione, ac de crebris aeo-
narum tumulis, qui passim in Tyberis ripis
visuntur, deque stirpium herbarumque in
his ortu disseruit. Haec enim non leve di-
sputandi argumentum praebebant. Elucubra-
vit Lancisius libellum hunc, cum feriatis die-
bus ruri esset in eodem Laurentino. Homo
enim industrius non minus otii quam nego-
tii rationem extare volebat. Inscripsit vero
Marcello Sacchetto Ordinis Hierosolymitani
apud Pontificem M. Oratori, eo quod ipse
rudera hujus celeberrimae Plinianae villae se-
pta undique & vestita terra, vepribus & da-
metis primus omnium detexit. Agri Romani
adspectus impellebat Lancisium, ut plura hu-
jusmodi quaereret, & ipsa illustrium Roma-

Rorum facta non mediocria invitamenta erant ad convolandum ex Urbe in apertos agros. Quo vero gaudio affici necesse erat philosophum indagantem initia & tanquam semina, unde essent omnia orta, generata, conereta; quae cujusque generis vel inanimi vel animantis, vel muti, vel loquentis origo, quae vita, qui interitus, quaeque ex alio in aliud vicissitudo atque mutatio. Sed haec otii, quo cum minime abundaret Lancisus, multorum studium concitabat ad earundem rerum cognitionem, explicationemque naturae, omnibus affirmans haec non solum pulchra, honesta, praeclara esse; sed etiam plena gaudiorum. Sed non verbis solum attingebat ea, quae volebat ostendere. Proponenda quaedam quasi moventia erant, quae adolescentes magis ad cognitionem intelligentiamque converterent. Itaque bono publico dedicavit bibliothecam suam multorum sane nummorum, quam extare voluit apud nosocomium S. Spiritus, ut juvenus, quae eo in loco medicinae dat operam, & in librorum optimorum copia, & in muneribus quibusdam industriae subsidia, atque instrumenta virtutis haberet.

Id evenit an. MDCCXIV. XII. Kal. Janias ,
 quo die narrabat Lancisius cunctis laetatum
 se fuisse laetitiis. Huc enim spectarunt ingen-
 tes curae, quas posuit viginti fere annorum
 spatio in exquisitissimis comparandis libris ,
 ac diligentia (malevoli, qui tanto viro deesse
 non poterant , avaritiam appellabant)
 quam adhibuit , ut esset unde suppeditaren-
 tur eidem bibliothecae sumptus necessarij
 sive ad emendos libros , sive ad stipendia
 Praefecto , ceterisque ministris solvenda . Huic
 dedicationi magnum decus accessit praesentia
 Clementis XI. quem comitabantur viginti Car-
 dinales , ac magnus Praesulum numerus .
 Praesentis numinis voces , & dona quaedam
 miros Sapientiae amores accederunt in studio-
 sis juvenibus ; Nec solum gaudebat Lancisius ,
 sed triumphabat tot beneficentiae argumentis
 factum suum a tanto Pontifice comprobari . Ita-
 que , & ad declarandum gratum animum suum
 & ad sollemnia dedicationis augenda eidem
 vulgatos eo ipso die commentarios suos ad
 tabulas anatomicas Bartholomaei Eustachij
 habens meritoque consecravit . Latuerant haec
 tabulae diuturna in obscuritate ; & quamvis

ia iis perquirendis Malpighius, alique docti homines multum diligentiae posuissent, inveniri tamen nunquam potuerant. Lancisus etiam superioribus annis & Romae & Septempedae, quarum urbium haec patria, illa quasi theatrum fuit ingenii Eustachii, studio illas investigaverat tum sua sponte, tum exhortatione praesertim incitatus amicissimi sui Dominici Guilielmi. Sed frustra. Demum cum incidisset in epistolam quamdam Matthaei Pinii Urbinatis discipuli ejusdem Eustachii, qua declarabat vocatum ipsum fuisse in societatem hujus gloriosi laboris, haec illi suspicionem movit, eas tabulas Urbini latere apud haeredes Pinii. Qua de re cum sermonem habuisset cum Summo Pontifice, ultro hic in se recepit, fore sibi curae, ut perquirerentur. Sic res habuit optatum exitum, inventaeque tabulas cum accepisset Clemens, illas bibliothecae Lancisii donavit. Quo gratissimo munere hic provocatus, alacrior factus est ad easdem explicandas. Sed cum propter multas, quibus destinabatur, occupationes, videret hoc onus haud posse se solum sustinere, adjunxit sibi socios Antonium

Pacchionum, & Franciscum Soldatum viros in rebus anatomicis apprime versatos. Saepe etiam in consilium adhibuit Joannem Fantonium, & Joannem Baptistam Morgagnium, cujus quoque Latinam epistolam operi praeposuit, in qua pluribus differitur, quam bene meritis de anatome sit Eustachius, quaeque propria & peculiaria dicere debeamus ejus inventa, licet ab aliis post illum prodita fuerint (11). Et sane nemo ad hanc rem magis idoneus erat Morgagnio, qui in eo, quod pertinet ad historiam anatomiae, princeps ab omnibus merito judicatur. Postquam res a Lancisio gestas fama divulgavit, agitabatur magis magisque in dies animus propriae gloriae & publicae utilitatis cupidissimus ad majora aggredienda; cum is demum ei vivere & frui anima videretur, qui aliquo negotio intentus, praeclari facinoris aut artis bonae famam quaerit. Ac sibi quidem multa agitati res utilissima visa est, si Academiam institueret, cui unice propositum esset medicinae, chirurgiae, & anatomes studia provehere, eamque apud bibliothecam suam convocaret. Incredibile autem dictu est

quam facile multi juvenes ingenio clari coa-
 luerint, quibus cum suppeditaret Lancisius
 comoda & instrumenta ad eas ipsas artes
 excolendas, efficiebat ut inter illos maximum
 esset gloriae certamen. Quo primum tempo-
 re coetus Academicorum est convocatus (id au-
 tem accidit VII. Kal. Majas an. MDCCXV.)
 ipse orationem dixit *de recta medicorum studio-
 rum ratione*, in qua perfecti medici speciem
 & formam adumbravit (12). Et primo qui-
 dem disserit de artibus, quibus instructus de-
 bet esse medicus, deinde persequitur quae
 in his artibus cavenda ac circumspectienda
 sint, ut facilius ac securius, quo tendit, per-
 venire possit. Hoc eodem tempore ille mul-
 rum operae ponebat in Metallotheca Michael-
 is Mercati, quae cum centum viginti annis
 in tenebris jacuisset, tandem Florentiae re-
 petta, a Clemente XI. comparata, a Lanci-
 sio ejusdem Pontificis jussu notis illustrata an.
 MDCCXVIII. lucem aspexit. Sunt quidem in
 his notis plurima cognitione dignissima, ea-
 que commemorare necesse erat, propterea
 quod Mercatus, vir ceteroquin doctissimus,
 in ea incidit tempora, quibus historia natu-

ralis infinita obſita erat errorum multitudine. Quos ita notavit Lanciſius, ut facile intelligi poſſit, quam multum eſſet in hac facultate verſatus (15). Vocavit vero in ſocietatem huius laboris Petrum Affaltum, doctum virum & multarum linguarum peritum, quocum vivebat conjunctiſſime. Nam ad maximas ejus occupationes acceſſit, quod his temporibus non optima valetudine uteretur, quodque Urbinum anno MDCCXVII. comitatus fuerit Alexandrum Albanium ad lauream in utroque jure accipiendam. Fecerat idem quatuordecim annos ante cum illius fratre Annibale, quod nemini libentius ſuorum curam concrederet Clemens. Illo priori itinere cum Bonoaiam uſque perveniſſet, pro eo quod ejus nomen magna erat apud omnes gloria, invitatus fuit a litteratis viris Bonoaienſibus, ut de aliqua re, quae ad phyſicam pertineret, verba faceret. Cumque ſe non nolle homo moribus facillimis reſpondiſſet, dicitur ea copia orationis, ubertateque doctrinae locutus fuiſſe, ut omnes ad magnam admirationem traduxerit. Vocem quoque illius eruditam audire voluerunt Urbina-

tes, quare duabus recitatis Italicis orationibus in Academia, cui nomen *degli Affordii*, harum altera probavit, *gloriosius ac uilius esse vivere quam mori pro patria*, altera, *vere beatam esse illam civitatem, ad quam amplificandam ornandamque omnes cives conspirent*. Has inter tot occupationes Lancisius nunquam cogitationem studiumque dimisit ad umbilicum perducendi opus *de motu cordis & aneurysmatibus*, quod, ut supra demonstratum est, ab an. MDCC. instituerat, quodque avidissime expectabatur. At postquam multum sudoris ac laboris in eo consumpsit, doluit vitam sibi prius eripi, quam illud edolare atque in vulgus edere potuerit. Neque id tamen luce caruit. Nam commendatum Assalto Romae an. MDCCXXIV. impressum est, deinde Neapoli, Venetiis, Lugduni Batavorum, iterumque Romae an. MDCCXLV. apud Palearinios Fratres recusum. Tanta ac tam praeclara judicia a doctis viris facta sunt de hoc opere, quo maxime anatomia & clinica illustratur, ut ad has laudes quid addi possit non videam. Laudavit & Morgagnius, qui mihi unus instar est omnium, pluribus in

locis scriptorum suorum, hancque attulit
causam (*) quare illud ipsum cum multis
praeclaris pauca quaedam haud omnino pro-
banda contineat, quod scilicet extrema ma-
nus ei minime accesserit. Porro, vel ipso
Hallerio iudice, optime meritus est Lancisius
de universa cordis historia, & quae protu-
lit ad fibrarum ordines, valvulam Eusta-
chii (14) sinus venosus, valvularum situm,
morbos & nervos cordis, vaginas vasorum
pulmonalium describendas nulla non laude
celebrandas esse pronuntiat. Quanquam non
est celandum ex his quaedam esse, quae
vindicare sibi videtur Petrioli (**), & illa
praesertim, quae ad valvularum situm in vi-
vidioribus animalibus pertinent, ut venas tan-
gant. Sed hic a multis reprehensus est, quod
de se minus vera praedicans militem glorio-
sum saepe imitari solet; quare sine certis-
simis argumentis aliquid affirmanti vix fidem
habendam esse censeo. Laudi quoque datum
est Lancisio, quod noverit pericardium in o-

(*) *Epist. XVIII. par. V. de sed. & caus. morbo-
rum* &c.

(**) In suis Eustachianis Tabulis p. 91.

mnibus animalibus reperiri (15) quanquam perpaucorum assensu affirmaverit illud ipsum fibris carneis praeditum esse, & aliquo agitari motu, & pro necessitate naturae tendi atque costringi. Glandulosam quoque tunicam eidem tribuit, ac demum membranaceam, quae exterius illud contegi, quamque communem habere putat cum vasibus sanguineis & aereis. Sunt quaedam alia hujusmodi, quae minus probare videntur recentiores anatomici (16) qui suis porro reprehensionibus effecerunt, ut majori in pretio haberi debeat secunda pars operis, quam Auctor aneurysmatibus tribuit. Inter eas, quas recensuimus, hujusce operis editiones, multum praestat omnibus Palcariniana, quam curavit magni nominis medicus Antonius Leprotus; exornavitque inter cetera duabus dissertationibus Lancisii, quarum una est de *vena sine pari*, altera de *gangliis nervorum*. In priori postquam statum, structuram usumque illius venae exposuit, quatuor quaestiones solvit, quas sibi Morgagnius proposuerat, quid scilicet causae sit, cur quidquid sanguinis ex arteria magna per intercostales pleraque ef-

fuit, id omne non per totidem venulas, quae in cavam pari ordine definant, in hanc refluat? cur non in cavae inferiorem truncum redeat, sed in superiorem? cur istuc non per duas venas, singulas videlicet more institutoque naturae ab singulis lateribus positas, sed per venam sine pari inferatur? cur demum hujus ipsius venae truncus non a sinistris, sed a dextris prorepat. Quae sic praestitit Lancisius, ut non modo obscura praeclare illustraverit, sed etiam tum vetera quaedam ingeniose restituerit, tum nova plura observationibus constantibus & diligentissimis subnixa in medium attulerit. In posteriori vero dissertatione explicatis iis, quae generatim pertinent ad situm, numerum & figuram gangliorum, eorundem structuram, vim, usum, & morbosas affectiones accurate investigat aperitque (17). Omnium profecto primus Lancisius ad harum rerum investigationem acumen & diligentiam, qualem physicum decet, attulit, idque fecit cohortante Morgagnio, cum quo quamdam studiorum societatem inivisse videbatur. Neque silentio praetereunda sunt, quae inter se hi

summi viri amice, erudite, eleganterque disputarunt de morte Cleopatrae. Cauſſa diſputandi haec fuit. Forte animadvertit Morgagnius ad morientis Cleopatrae ſimulacrum, quod Metallothecam Mercati ornabat, haec adnotaſſe Lanciſium: *in brachio aſpis ſpectatur, cujus morſu Cleopatram occubuiſſe vulgaris fert opinio; quamvis alii, epoto veneno, mortem ſibi conſciviſſe contendunt.* Suſpicatus Morgagnius extare fortaſſe aliquem ignotum ſibi ſcriptoris locum, qui hoc tradidiſſet; voluit illum ex Lanciſio elicere. Itaque, ſcriptis ad eum duabus epiſtolis, multa protulit quae vulgarem & communem ſententiam confirmare videbantur. Habuit quae huic ſententiae totidem litteris opponeret Lanciſius, nihilque proſecto omiſit, quod probare poſſet Cleopatram veneno fuiſſe conſumptam. Sicque cum omnia paria ſibi cum Morgagnio eſſe viderentur, ab eo poſtulavit, ne de huiusmodi re amplius inter ſe contenderent. Quod & fecerunt. Placuit vero P. M. Clementi XI., ut quae ab iis diſputata fuerant, in appendicem ad Metallothecam referrentur. Illud quoque honorificentiffimum Lanciſio fuit,

quod Heisterus arbitrum illum statuerit acerrimae sane controversiae ortae inter se, Andrejum, & Volusium de origine cataractae, Antiquissima erat opinio oriri cataractam a membrana in humore aqueo concreta. Ab hac primi desciverunt Brissaeus, & Antonius Metrajanus, viris equisque contendentes, unam esse causam efficientem cataractae humorem crystallinum opacum. Placuit vero Heistero medium quiddam tenere, docuitque, humorem crystallinum esse quidem causam naturalem hujus ocularis morbi, sed non unicam. Fieri enim posse aiebat, ut etiam a pellicula gigneretur, sed id raro evenire, neque evenisse putandum, nisi per experimenta probaretur inesse oculo tales membranas. Sic novam gloriatus est de cataracta in medium attulisse sententiam. Huic bellum indixere Andrejus & Volusius, neque contenti rationibus dimicare, injurii quoque & contumeliosi in adversarium esse voluerunt. Hoc pugnae genus vehementer vituperavit Lancisius. Nihil enim illo mitius fieri poterat. Ut vero Heistero non solum, sed etiam Garcellio morem gereret, varias

observationes habuit, diligenterque descriptas ad eisdem anno MDCCXVIII. misit, ut ex iis intelligi posset, quale iudicium de summa controversiae, duce illa rerum omnium magistra experientia, faceret (18). Novissime Lancisius vulgavit opusculum, quod instituit ad Joannem Olivam *De natura & praefatio Dioscurorum nautis in tempestate apparentium*, in quo duo potissimum inquit, unde ortum habeant hae φάσεις, quae saepe noctu in maximis tempestatibus nunc specie unius flammæ globi, nunc duplicis, aut numero plurium in apice praesertim mali conspiciuntur; & unde fiat ut interdum futuram tranquillitatem ex vero portendant. Cum dixerimus ignorasse Lancisium quid hac in re praestet electricitas, satis de hoc opusculo nobis dixisse videbimur, quod idcirco scribendum suscepit, ut esset sibi levamento in maximo labore, quem in opus de Aneurysmatibus impendebat. His ab eo editis ingenii monumentis, quibus maximam materiem ex rebus per se investigatis ad rerum occultarum cognitionem attulit, omnia praeclaro ordine disponens, omniaque explicans, si non sem-

per plane pura & candida, satis tamen polita litteratataque oratione, cum illud Ciceronis sibi persuasum haberet, *mandare quemquam literis cogitationes suas, qui eas nec disponere, nec illustrare possit, nec delectatione aliqua allicere lectorem, hominis esse intemperanter abutentis otio, & literis, incredibile est* quantam apud nostros homines non solum, sed etiam apud externos consecutus sit famae celebritatem. Augebat hanc cogitatio illa, quod tanta esse solet in tuenda Principis valetudine occupatio, ut non sinat hominem in aliam curam incumbere. Declaravit hoc, qui expertus fuerat, Lucas Tozzius quadam epistola ad ipsum Lancisium, in qua haec sunt: *siquidem tu etiam, vir eximie, nosti quo tempore Pontificiae valetudini tuendae istuc praeeram, non solum nullum mihi fuisse scribendi otium, sed nec ea, quae a me olim inchoata fuerunt, tranquillo animo versandi*; confirmavitque exemplo suo, ut de ceteris taceam, Malpighius, qui ut ab Innocentio XII. ad huiusmodi munus vocatus fuit, omnem cogitationem abiecit aut interrupta contexendi, aut absolvendi instituta. Atque ea cum scriberet Lancisius,

nemo poterat existimare, hunc minus attentum ac diligentem se praebere in conservando Pontifice, cum vere gloriari potuerit, adeo se pro illius valetudine viginti fere annorum spatio excubasse, ut quam aegram accepit, si non firmam, bonam tamen reliquerit. Tali modo cum ille ad aetatis annum sextum & sexagesimum pervenisset, & non minus gratia, fortunaque, quam fama crevisset (multam enim pecuniam praesertim ex curationibus nobilium & divitum fecerat) & quanquam tenui, bona tamen usus esset valetudine, nactus est morbum, quem is statim, aliique Medici esse gravissimum periculosissimumque senserunt. Erat enim febris acuta, quam comitabantur dolor in dextro hypochondrio posticam partem versus, summa faucium, linguae ac palati ariditas, ut vix loqui posset, vomitus biliosi, aliae instantis mortis signa. Cum frustra adhibita essent remedia, & vis morbi magis magisque cresceret, quarto die postquam decubuit; rite, & summa cum religione omnibus iis persolutis, quae divinitus ad expiandos animos, & placandum Deum sunt instituta, naturae

debitum reddidit XIII. Kal. Februarias, hora. XII. ann. MDCCXX. Dicitur non potest quantum ejus discessu dolorem acceperint non modo amici, sed universa civitas. In primis doluit Summus Pontifex, qui, allato sibi nuntio de illius morte, abdidit se in cubiculum, omnibusque per eum diem aditum ad se interclusit. Amiserat enim virum, cujus fide ac prudentia multis maximisque in rebus utebatur, & in cujus suavitate & sermone magnum levamentum reperiēbat. Mortui corpus balsamo perunctum elatum est ad Sancti Spiritus in Saxia, ibique cum pompa funeris sepultum. Tumulo vero hoc elogium inscriptum est.

D. O. M.

JOANNIS MARIAE LANCISII ROMANI
MORTALES EXUVIAE HIC JACENT
CUI PRAETER ILLUSTRE ARCHIATRI MUNUS
APUD INNOCENTIIUM ET CLEMENTEM XI. SVMM,
PONTIFF. XX. ET AMPLIUS ANNOS AB EO
PRAECLARE GESTUM
SCRIPTA INSTITUTA BIBLIOTHECA
ARCHIHOSPIT. S. SPIRITUS HAEREDITATE
DONATUM
AETERNAM PIETATIS ET DOCTRINAE LAUDEM

**Y40 J O A N N E S M A R I A
COMPARARUNT**

OBIIT MERITIS QUAM ANNIS CUMULATIORE

DIE XX. JAN. MDCCXX.

ANNUM AGENS LXV. M. II. D. XXV.

Heredem, ut hic declaratur, testamento reliquit Nosocomium ejusdem S. Spiritus, ea inter ceteras lege, ut novum ibidem excitaretur valetudinarium curandis mulieribus. Id tamen pluribus gravibusque de causis effici haud potuit. Quapropter Benedictus XIII. destinatam huic rei pecuniam Nosodochio S. Gallicani attribuit, ejusque in aedibus statui placuit marmoreum Lancisii simulacrum cum hac inscriptione.

**JOANNES MARIA LANCISIUS ROMANUS
SUMMORUM PONTIFICUM INNOCENTII XI.**

ET CLEMENTIS XI.

**INTIMUS CUBICULARIUS ET ARCHIATER
CUM NOSOCOMIUM S. SPIRITVS IN SAXIA
UBI PUBLICAM BIBLIOTHECAM DEDICAVERAT
TESTAMENTO HAEREDEM SCRIPSISSET
UT NOVUM IBIDEM PRO AEGROTANTIBUS
MULIERIBUS**

L A N C I S I U S 145
 VALETUDINARIUM EXCITARETUR
 PLURIBUS TAMEN GRAVIBUSQUE DE CAUSIS
 SUPREMAE ILLIUS VOLUNTATI LOCUS ESSE
 NON POSSET
 BENEDICTUS XIII. P. M.
 CUNCTIS RITE MATUREQUE DISCUSSIS
 HABITA ETIAM AEGROTANTIUM MULIERUM-
 RATIONE
 NE PIA TESTATORIS VOTA IRRITA ESSENT
 HAEREDITATIS PARTEM TRICIES SESTERTIUM
 HUIC OPERI ADDIXIT
 AC LIBERALITATIS EJUS
 IN HOC PERENNI PONTIFICIAE PROVIDENTIAE
 MONUMENTO
 MEMORIAM EXTARE JUSSIT
 ANNO DOMINI MDCCXXVI.

Corpore fuit paullo graciliori, ac breviori;
 & in senectute etiam agili, oculis vegetis;
 & acuta ac celeri acie, naso paullo eminen-
 tiore, totaque facie miram alacritatem hi-
 laritatemque prae se ferente. In victu post
 quadragesimum praesertim annum magnam
 temperantiam adhibuit, vinoque abstinuit,
 parceque somno indulgit. Sic valetudini suae

consulere existimabat, quam solitus erat dicere sustentari notitia sui corporis, & observatione earum rerum, quae prodesse, & obesse possunt, continentia in victu, fugiendaque illa omnium malorum matre voluptate. Interdum tamen cruditate & insomniis laboravit ob vehementissimam contentionem animi, quam in studiis litterarum adhibebat, ex qua etiam canitiem praematuram contraxit. Senex dentes amisit. Munditiam amavit non odiosam, neque exquisitam nimis, sed quae fugeret agrestem illam negligentiam, quam plerumque, qui se philosophiae dicarunt, affectant. Sed excellentiora alia in eo animi bona elucebant. Erat enim modestus, veritatis diligens, patiens, affabilis, blandusque admirandum in modum: non tamen illum caruisse desiderio honorum, & dibaphum quoque cogitasse, qui ei intimus fuit, mihi testatus est. Idem ad amicos sublevandos fide fuit singulari, & in hoc se maximum existimabat capere fructum gratiae, qua pollebat apud optimates, & maxime apud S. Pontificem, quod pluribus, & litteratis viris praesertim prodesse posset. Erga Patrias aman-

-tissimus fuit. Tres autem Patrias se habere dicebat, primam originis, secundam naturae, tertiam civitatis. Nam cum esset, ut initio docuimus, Biturgia oriundus, Romae vero natus, in populi Urbinatis civitatem an. MDCCIII. susceptus fuerat. Nullas inimicitias habuit, quod neminem laedebat; & si qua de re cum aliquo disputavit, ita se gessit, ut officium semper teneret, nunquam excederet, ac veritatis, non contentionis studiosus (19) cognoscitur. Huic rei sunt indicio quae scripsit adversus medicos Jo. Baptistam Salvadorium, & Joannem Cosmum Bonomum, qui scabiei originem non ab ulla sanguinis contagione, sed a vermiculis unica repetendam esse toto pectore contendebant. Collegit Lancisius omnia, quae ad hanc controverfiam pertinent, in unum libellum, huncque Hieronymo Brasavolo inscripsit. Animo maximo nullis unquam laboribus difficultatibusque ab arduis quibusque aggrediendis se deterreri est passus. Prudentia vero tanta in iis praesertim, quae ad facultatem, quam profitebatur, pertinebant, ut & *de instantibus*, ut ait Thucydides, *verissime judicaret*, & *de*

futuris callidissime conjiçeret. Quod quidem cujus virtutis sit, facile existimabit is qui judicare poterit, quam lubrico periculosoque in loco ille versetur, qui in tanta naturae obscuritate, tantisque tenebris, quibus plerumque diversa morborum ratio continetur, hujusmodi fluctibus se se committere audeat. Sed tamen dici satis non potest, quam hoc esset illi facile factu, ita ut cum rem ipsam investigasset attentius, quod certe, quotiescunque res postularer, usuveniebat, eum raro admodum sententiae suae poeniteret. In quo si quam ipse rationem secutus est cognoscendorum morborum persequi velim, videar magis, quam debeam, mihi tribuere. Non enim solum scrutabatur, quod vitae genus; qui mores, quae etiam ciborum, quae vigiliarum, somnique esset consuetudo, sed oculos ad ea quoque intendebat, ad quae non licet harum artium mediocriter peritis facile adjicere, ut cum ad pronuntiandum descenderet, detectis, ut ita dicam, latebris morbi, videret quid spei sibi propositum esset; quid etiam remedii. Fuit & disertus; nec minus concinnus in brevitate respondendi;

quam

quam in perpetua oratione ornatus. In sermone quotidiano mirum in modum delectabatur joci & facetiis, quae rerum graviorum severitatem & tristitiam mitigarent. Intelligens erat existimator signorum & picturarum, credo, quod plenioram quamdam pulchritudinis speciem animo comprehensam habebat; cumque esset diligentissimus antiquitatis investigator, de veterum aedificiorum splendore, ac magnitudine ex iis, quae superessent, ruderibus sagacissime judicabat. Habuit singularem memoriam, quod ex eo facillime potest judicari, quod cum anno MDCXCI tota quadragesima Casalino concionanti adfuiisset, potuerit ejus orationum aliquas domum reversus iisdem pene verbis exscribere, omnium vero accuratum compendium facere. Tanta autem industria fuit, tantumque vigilavit in studio, ut non maxima summo ejus ingenio gratia habenda videatur. Nul- lum enim tempus illi vacuum a labore erat, quippe qui ne reprehensionem quidem vulgi inanem reformidans, in ipso curru, dum per Urbem veheretur, soletet legere, & interdum etiam stilum prehendere. Quapropter

minime est mirandum, si tot, ac tam praeclara potuerit posteris relinquere ingenii sui monumenta eo tempore, quo occupabatur in conservanda Pontificis valetudine, & in docendi munere, quod nunquam dimisit; quo saepe districtus erat a nobilium praesertim curationibus, scribendisque consiliis, quae undique ab eo requirebantur, quorumque tredecim volumina reliquit; & quo demum nullum litterarum praetermittebat officium erga absentes amicos, quos plurimos, eosque doctrinae laude praestantes habuit. Inter hos fuerunt Laurentius Bellinius, Dominicus Guilielminius, Eustachius Manfredius, Joannes Baptista Morgagnius, Bernardinus Ramazzinius, Antonius Vallisnerius, Guido Grandius, Franciscus Tortus, Joannes Jacobus Mangetus, Nicolaus Cirillus, Joannes Fantonius, Carolus Rica, Jo. Baptista Gastaldus, Pius Nicolaus Garellius, Michael Fridericus Lochnerus, Hermannus Boerhaavius, Guilelmus Kokburnius, Guido Crescentius Fagonius, Joannes Bernardus de Mornes, Joannes Daniel Geizerus, Rosinus Lentilius, quorum pervulgata sunt nomina. Romae vero prae-

sertim coluit Marcellum Malpighium, Guilelmum Rivam, Vitalem Jordanium, Lucam Tozzium, Abbates de Miro & Galianum, Prosperum Lambertinium, Carolum Majellam, & Petrum Affaltum, qui duo postremi ei morienti adfuerunt. Horum plerique praeclara in scriptis suis reliquerunt testimonia de doctrina Lancisi: addiderunt quoque judicia sua eaque honorificentissima Academiae Caesarea Naturae Curiosorum, Regia Londinensis, Physiocraticorum Senensis, Instituti Scientiarum Bononiensis, Incuriosorum Rossanensis, quae sibi gloriae duxerunt inter suos Lancisium censuisse. Et si Principibus placuisse viris non ultima laus est, non est tacendum factum Ludovici XIV., qui cum intellexisset ab eodem libros quosdam rarissimos desiderari, diligenter conquisitos ad illum mitti iussit una cum litteris perhonorificis (40).

[1] *Notatu dignum est, quod in hanc rem scripsit Lancisius in epistola quadam ad Herculem Corazzium. Me quidem, inquit, si haec ignorassem (loquitur de Mathematici facultatibus) nihil profecto in re medica sapere arbitrarer, quanquam me non lateat, si quid sapio, quam sit exiguum; atque idcirco apud discipulos, & amicos meos asseverare solco, illustrem animam, ut aiebat Hippocrates, & quasi per omnia naturae opera ductilem promptamque parare non posse, nisi qui magistram ab ineunte aetate habuerit machesin.*

(2) *Hoc periculum ingenii praesertim fecit incredibile cum auditorum admiratione in ea, quam dixit, oratione de laudibus Anatomiae an. MDCLXXXIV. VIII. Id. Novemb. cum primum ad docendum venit. Multa sunt, inquit ipse Lancisius in epistola ad Joannem Pastorium, qui ab illo hanc orationem requisierat, quae a te veniam merentur: primum enim specimen illud fuit, quo mihi per hanc juventutis immaturitatem in almo Romanae sapientiae Lyceo, hoc est celeberrimo summorum virorum theatro superioribus mensibus prodire contigit. Neque certe inficias ivero, inustatum fuisse & animi & memoriae & ingenii experimentum, quod non modo iterum & tertio, sed etiam quarto illius orationis cursum, aliis atque aliis subinde Praefulibus in conventum supervenientibus, interrumpere coactus fuero, & partes jam recitatas in anaecephalaeosin contrahere, novis semper & verbis & formis efferre; nec infelicitate ad locum, unde recesseram, redire. Quae sane res adeo, te praesente, commovit Auditores, ut clarissimus collega meus D. Paullus Manfredus vocem tenere non potuerit, quin me publice admoneret, ne post tertiam periculi vicem, quartam fortunam tentarem. Sed tunc adfuit*

proculdubio infirmitati meae divinum praesidium . Enim vero formidulosam illius diei aleam mecum ipse reputans , non sine confidentiae nota id fieri potuisse confiteor , nisi improvisa officii necessitate ad audendum me compulisset , inurbanum siquidem videbatur , si in adventu posteriorum Praefulum eas observantiae significationes praetermissem , quas in priorum ingressu non gravate praestiteram . *In margine vero epistolae , qua Pastoritius Lanciso respondet , haec idem Lancisus notavit ,* Haec oratio (utor Plinii verbis ad Svetonium) Auctori , quemadmodum a plerisque accepi , autes hominum , januaque famae patefecit .

(3) *Magnam quoque absentium his temporibus fuisse opinionem de Lancisi doctrina indicant doctorum virorum epistolae ad eam scriptae . Habes hic immortalis viri Laurentii Bellinii epistolam , qua ad ipsum misit sua de Motu Cordis opuscula . Hanc ex multis selegimus & quia brevis , & quia honorificentissima est . Joanni Mariae Lancisio Laurentius Bellinus bene agere . In opusculis meis de Motu cordis , quae ab Eminentissimo Cardinali Spada tibi reddenda curavi , perspicies ,* VIR CELEBERRIME , unde animalium Motionum principia deducam . An vero id assecutus sim , quod consequi erat in animo , tu videris , qui probe nesci , animalium operationes a sola instrumentorum structura motuque pendere . Ut autem haec pro tua humanitate diligenter expendas , simul etiam aequi bonique consulas , non mea solum , sed tua quoque interesse arbitror . Vale Florentiae Kal. Sept. MDCXCV .

(4) *Juvat hoc loco referre verba Vallisnerii , ubi loquitur de Inventoribus vermium spermaticorum tom. 2. p. 104: Nè perchè cito letterati al di là de' monti , e al di là de' mari celebratissimi , credesse già V. S. Illustriss. che nella*

nostra Italia niuno si fosse preso la pena d'assicurarli di un tanto fatto. Il nostro Monsig. Lancisi Medico di S. S. e chiarissimo per tante sue opere degne di cedro, mi mandò, non è guari, alcune sue Dissertazioni Epistolari di scelta erudizione piene, in due delle quali parla anch' esso di questi vermi del seme umano.

(3) *Huc Guglielminius in epistola ad Lancisium data Bononiae prid. non. Aug. MDCCVII.* Bononiae mihi reditus est liber, quem nuper evulgasti de subitaneis mortibus, ejus sectionem, pluribus licet distractus negotiis, avidissime aggressus, in te optima inveni cuncta, cuncta suspicienda. Praetereo styli gravitatem, orationis perspicuitatem, & elegantiam, ordinisque nitorem, quibus undequaque lectoribus te commendas; doctrinam ipsam potius suspicio, in qua tuum cluere judicium & melioribus optima seligens, & omnia suo quaque loco disponens & sistens. Nihil inutrum, nihil puridum [vitia aetatis nostrae] sed cuncta naturali pulchritudine assurgentia ingenii tui masculam virtutem, & gratam amoenitatem redolent. Placuisti in omnibus, sed maxime in sectionibus cadaverum, quas ita examinasti, ut neque in historiis praegressi status, neque in observationibus dissectionum, neque in eorumdem scholiis quidquam desideretur. *In hanc fere sententiam scripsit ad eundem Lancisium Lucas Tortius X. Kal. Apr. MDCCVII. Neapoli.* Eum sane percurri [inquit] nescio majori ne voluptate, an admiratione. Incredibiliter me quidem delectarunt styli elegantia, Romanique sermonis nitore, concinna methodus, solidaque doctrina, non quidem ex fictis hypothesebus, sed ex ipsius naturae observatione, anatomicisque praesertim experimentis deprompta. Accedit argumenti utilitas potissimum hac nostra aetate, qua solito

Sequentius homines hoc lethali genere e medio tolluntur. *Ramazinus* cedro dignum appellavit hunc librum. *Carolus* vero *Rica Junior* significavit *Lancisco* summo in pretio esse apud *Angolos* istud opus de subitaneis mortibus; illudque, tanquam thesaurum, in acta Regiae Societatis contulisse *Henricum Sloane*.

(6) Extant epistolae *Lucae Schroekii Acad. Nat. Curios. Praesidis*, in quibus mirabiliter laudantur singula fere *Lancisci* opera, & istud praesertim de Noxiis paludum effluviis. *Israel* quoque *Coniglianus Haebreus*, Medicus sane doctissimus, qui diu medicinam fecerat *Byzantii*, in epistola ad *Lanciscum* ait, non satis digne hoc opus laudari posse, illudque sibi operuisse diu frustra quaesitam causam morborum contagiosorum, quibus singulis quibusque annis cives illius urbis affliguntur. Ad quae rescripti *Lanciscus*: Quae enim de *Byzantinis* epidemiis potius, quam pestibus identidem recurrentibus olim subobscurè conjeceram, nunc oculatissimo testimonio tuo affirmate statuere minime vercor, scilicet non aliunde quam ex corruptis ob *Turcarum* negligentiam, contemneratque aquis ac linis frequentes illas pestilentias suboriri. Mirum *Byzantium* usque penetrasse *Lancisci* famam, & hunc *Haebream* *Romam* venisse, motum praesertim, ut ipse narrat, desiderio illius noscende.

(7) *Antonius Jasseus Parisiensis* horti Praefes scripsit *Lancisco*, nihil accuratius, nihil sagacius, nihil elegantius se legisse Opere de *Bovilla Peste*; hocque iudicium comprobasse iudicio suo *Guidonem Crescentium Fagonium*. Immortalis hic vir, quoniam ipse per se legere non poterat senio, & oculorum morbo impeditus, auribus accipiebat quidquid edebat *Lanciscus*. Nihil enim ab eo proferri posse existimabat, quod optime ejus famam non sustineret. Sed redeo ad opus

de Bovilla Peste, de quo, sic quoque judicavit Morgagnius in epistola quadam ad Lancisium; Historia diligenter scripta, sedicta utiliter collecta, morbi natura; causae, curatio erudite, subtiliterque tractata, omnia luculenter, copiose, diserte absoluta. Quid multis? Magna cum voluptate legi, eoque majore, quod summam ejus Dissertationis utilitatem inter legendum animadverti. Nam, ut cetera praetermittam, quae nec pauca, nec levis momenti sunt, quid exegitari, quid fieri utilius poterat, quam Pont. O. M. sapientissima ista decreta, ac singularia ac prope divina beneficia litteris mandare, ut ejus regimen optare mortales aeternum debent, sperare autem non possunt, ejus saltem prudentiae, & beneficentiae immortale habeant monumentum, unde Principes in omne tempus sibi ad imitandum exempla cepiant. *De hoc opere sic etiam loquitur.* [ceteros omitto] *Lucas Schroekius*: communem omnium adplausum illud mereri, atque optenturum certus sum; adeo provide & docte circa illam (pestem) cuncta fuere peracta & scripta, ut quam tot meritis jam antea nomen Lancisianum possidet sanae celebritatem, immensum jam adauctam esse sine assentatione dici queat, debeatque. *Scripta haec est epistola anno MDCCXVI.*

(8) *Brevis est epistola Antonii Vallisnerii, quo commendat hunc Lancisi librum, quare juvat integram exscribere.* Illustrissimo & sapientissimo viro Joanni M. Lancisio Italiae decori & ornamento, deque Republica medica optime merito Antonius Vallisnerius S. P. D. Haesi, vir praestantissime, inter admirationem & gaudium, dum tua legerem. Quam alte naturam intras, quam subtiliter indagas, quid venti cogitent, quid agant effluvia per aerem surgentia, Nec minus praeclara scribendi utilitas, Consulis vitae si-

viam, & exemplo Romani caeli totius humani generis causam benigne agitas. Haec me res magnopere recreat; nec enim ambitiosa contemplatione satigas ingenium; sed juvat laborare in publica commoda, juvat a spiritu, quem ducimus, & quo nihil carius, occurrentes noxas repellere. Jam intelligis, vir sapientissime, quanti aestimem librum tuum, quam magnas tibi gratias debeam pro tali munere. Dilecti denique recentes medici, quorum omnis in theorias misus est, non philosophari tantum, sed etiam prodesse. Vale Patavii X. Decembris 1711. *Longiores sunt epistolae Danielis Geijerii Archiatri Regis Poloniae, Rosini Lentilii, Joannis Fantonii, aliorumque, quibus ad caelum effertur hoc idem opus; satisque erit eas nominasse. Narrat quoque Fantonius judicium honorificentissimum, quod de eo fecit Jacobus Mangerus, plurimaeque ipse affert, quae mire confirmant notata in hoc libro a Lanciso. Ceteras res inter ait, magni momenti esse quod ille de combustione herbae Kali prohibenda admonet. Sibi enim compertum esse affirmat, quod ex hac herba eleventur halitus acerrimi, qui diathesim sanguini serenam conciliant, & sulphuri pugnam inferunt. Lentilio vero istud opus occasio fuit, agendi cum Lanciso per litteras de aquarum natura; & multa quidem sunt in his litteris, quae hominum doctrinam, ac diligentiam in observationibus habendis declarant. Minime illud silentio praeteriundum est, quod eodem Lentilio narrat Lancisius, quaedam a se inchoata fuisse de Spargyrice analysi, deque acidulis Romanis, omnique a se notata ad geometricam methodum redigere cogitasse, non tamen praestitisse occupationibus distentum. Epist. dat. est Kal. Odob. MDCCXII.*

(9) *Accepta priori Dissertatione, haec scripsit Fantonius Lanciso: Dissertationem inapi Physiognomicam summa cum*

voluptate perlegi. Tu mirabili ingenii acumine rei causant
ab antiquis ignoratam, despectamque a Neotericis ita in lu-
cem protulisti, ut, quasi dixerim, veritatem in fabula
derexeris. Illud praesertim videtur subtilissime excogitatum,
quod de intima cognatione frontalis musculi cum cerebro,
& meningibus demonstras. Quae enim, re in adulto solum
considerata, nihil ponderis sententia haberet, eadem plane
verisimilis est facta indagare vel in embryone, quemadmo-
dum pulcherrime ostendis. Adeo nihil est in animalium &
hominis fabrica tam incultum tamque obscurum, quod ana-
tomico ac philosophico lumine non splendeat. Sed tua
haec disquisitio non parum etiam universam animalis oeco-
nomiam illustrat, & rationandi normam & methodum
perspicuam aperit. Denique omnia sunt acutissime, jucu-
de, erudite, diligenter, & eximia methodo, qua scripto-
res Medicos facile vincis, exposita.

(10) *Antonius Jessius in epistola quadam ad Lancisium*
ait, ab illo se dissentire in eo quod spectat ad Fungorum
generationem & naturam. Putabat enim illos vegetare, & in-
ter stirpes numerandos esse. Ceterum Lancisii sententiam de-
fendit Antonius Vallisnerius, qui cum illo observationes suas
communicaverat.

(11) *Dici non potest, quanta undique Lancisio facta*
sit a doctis viris gratulatio, quod has Tabulas Eustachianas e
tenebris eruerit, explicaverisque. Jacobus Mangerus, ut e
multis pauca testimonia seligamas, sic scribit quadam in epistola
ad Lancisium: Demitor sane illa omnia, quae summa sua
sagacitate perspexit magnus Eustachius eo tempore, quo
tenebris non parum crassis obvolvebatur tota anatomia. Sed
tuam multo magis demitor solertiam, ac ingeniosissimam
diligentiam, qua ritatus quae obscurius illis erant delia

beata, librum alias mutum, ac paucis inserviturum, eloquentissimum ac preciosiori quacumque anatomica suppellectili quam maxime instructum fecisti. Est propterea quod memoria Eustachiana, est quod tota societas medica maxime amplitudini tuae debeat, non tantum quod hae tabulae per duo prope saecula sepultas Sam. Pont. munificentia de suo, ut ita dicam, tumulo eduxerit, sed etiam quod inde tam multa, tam docta, tamque solida ad curiosioris profectoriae artis ornatum facientia promere voluerit. Eidem Mengeto libuit has Tabulas suum in Theatrum anatomicum referre cum explicationibus Lancisianis ab auctore nonnullis in locis correctis. Ingenue enim hic fassus est partim typographi incuria, partim nostra etiam in scribendo festinatione sphalmata quaedam irrepsisse. Summus vir Hermannus Boerhaavius scribens Jacobo Hay (est inter Lancisianas haec epistola) ait se incredibili voluptate legisse quae adnotaverat Lancisius in Tabulas Eustachii, addiditque: bona fide ago, haecenus nihil simile in anatomicis usquam apparuit. Memorabile est quod in hac epistola idem Boerhaavius fatetur, scilicet multum se profecisse ex operibus Lancisii, idque rursus affirmat ad ipsum Lancisium scribens. Exant & epistolae Hyacinthi Gimmae, & Joannis Fantoni, quibus hi docti viri plena manu in astra extollunt hoc Lancisii opus.

(12) Joannes Baptista Castaldus in quadam epistola ad Lancisium auream appellat hanc Dissertationem. Ait, hoc argumentum imperfecte admodum a Vassio, aliisque fuisse tractatum; Lancisium vero effecisse, ut nihil amplius desiderari possit: Belle enim adeo & solide & pereleganter de illis omnibus, quae ad ipsum quovis modo pertinere possunt, more tuo disseruisti, quod opus ut prae manibus juniorum medicorum versetur, curare debent illi omnes, quibus ar-

tis gloria cordi existit. Antonius quoque Joffeus pluribus verbis commendat hanc Dissertationem.

(13) Antonius Joffeus significavit Lancifio, magnam ei famam comparasse apud Gallos quae ipse adnotavit in Metallothecam Mercati; quas adnotationes laudans quoque Fantonius in epistola ad Lancifium ait: Metallicae scientiae Institutiones dici merentur, nihilque a curiosis non tantum doctissimisque Philosophis, sed à solertissimis etiam Criticis desiderandum relinquitur. Neque minus easdem probavit Mangerius: nam illius est haec epist. ad Lancifium dat. Geneva pridie Kal. Julii MDCCXV. Habemus pro quo amplitudini tuae nos maxime devinctos profiteamur, cujus doctis, & felicibus curis debemus, quod ea omnia nitidissima, innumerisque experientis, ac solidiorem doctrinam quaqua versum spargentibus ratiociniis illustrata nobis tradita fuerint. Loquens vero de Mercato ait, optime se gessisse quod ad rei naturalis partem potissimum se converterit, quippe magis neglecta videbatur. Siquidem in Botanicis praeter Columnam, Penam, Bauhinos &c. prostant inter novissimos clarissimi viri Morisonus, Brenius, Rivinus, Rayus, Turneortius, alique non pauci. In animalibus cum perfectis, tum imperfectis, ut vulgo distinguuntur, Gesnerus, Aldrovandus, Tonstonus, Rayus, Willoughbejus, Listerus, Redi, Swammerdamius, imo etiam aliqua ex parte Lewenhoeckius, Charlevoix, variique curiosi Peregrinatores. In gemmarum & metallorum, metallisque affinitum mineralium historia, tum praedicti Peregrinatores, tum alij plures veteres & Neoterici, qui de iis ex professu & vere prospero cum exitu egerunt.

(14) In actis Acad. Parisiensis, quae sunt de rebus anni 1774., cum loqueretur Sabatierius de circulatione sanguinis in

ferit, haec de Eustachii valvula habes. Sa position est telle, que son borde fixe est en bas, & son borde flottant en haut. Enfin sa largeur est inegale & plus grande en arriere, qu'en avant. Cette circonstance si necessaire pour bien juger de l'usage, au quel elle est destinée, n'a point été remarquée par les Anatomistes, si on excepte Lancisy, qui lui donne la figure d'un saulx, dont la partie la plus large est en haut, & la partie la plus étroite en bas &c.

(15) *Haller. Element. physio. lib. IV. §. 23. Dum gloriatur se invenisse semper pericardium in omnibus a se dissectis animalibus ad convincendas contrarias multorum anatomicorum sententias, ingenue fatetur ante se Lancisium id ipsum novisse.*

(16) *Haller. loc. cit. sect. III. par. 12. Secundum eum (i. e. Lancisium) fibrae cordis extimae a facie externa auricularum oblique, & spirae similes, per exteriora ventriculorum ad mucronem cordis eunt, & dum descendunt, una mole crescunt. Hae fibrae in universum corticem ventriculorum constituunt, aliquae vero recta introrsum penetrant, & spirales fibras revinciunt. Deinde spirales fibrae, quas diximus, quando ad mucronem cordis venerunt, simplici facta advolutione, internam faciem sinistri ventriculi cum valvularum mustulis efficiunt, & inseruntur iterum internae venarum & aurium fabricae. Mediae demum fibrae inter extimas, quae ab iisdem nascuntur principiis, ex circularibus nempe arteriarum tendinibus & ipsis arteriis, multa strata fibrarum efficiunt, in sinistro in primis ventriculo, alia magis inclinata, alia minus, inque easdem arterias redeunt, a quibus primum prodierunt. Quae verò fibrae dextrum ventriculum comprehenderunt, eae in sinistrum transtunt, ad viminum modum in septo cordis de-*

enſitatae. Paulo poſt, id eſt §. 17. haec ſcribit immortalis vir. Lanciſii deſcriptiones & icones omnium maxime & a noſtris, & ab aliorum anatomicorum obſervationibus diſcerunt. Tres nervos viſ ille ab intercoſtalis trunci ſupremo ganglio, valde conſpicuo & plexuoſo nimisque ſere ramis divite, derivat. Alios deducit ab ejuſdem intercoſtalis trunci duobus gangliis cervicalibus imis duo enim ejuſmodi ganglia facit (& omnino non rarum eſt duo eſſe) craſſo funiculo ſubrubro, quaſi anguſtiori iſthmo conjuncta. Ab iſtis gangliis creberrimos nervos ad cordis plexum deducit. Porro a phrenico trunco & ad aurem, & ad ventriculum dextrum ramos derivat, & circulum quemdam nervi phrenici dextri & ſiniſtri circa pericardium depingit, unde rami venam cavam inferiorem adeant. Ejuſmodi nihil unquam vidi, neque quiſquam alius. *Idem infra l. cit. ſect. V. oppugnare videtur Lanciſium, quod per nervorum diſcrimina phaenomena cordis, voluntarios muſculos conſtantia ſuorum motuum ſuperantis explicare ſuſceperit. Plura alibi, quae ſingula nimis longum eſſet exſcribere. Vid. etiam Portalium. hiſtoire de l'anatomie.*

(19) *Nuperrime Antonius Scarpa vir de anatome ſane bene meritus librum edidit de nervorum gangliis & plexibus. In eo par. 14. haec de Lanciſio ſcripſit. Non alienum a re noſtra nunc eſſet ea perpendere quae Lanciſius, vir alioquin praetantiſſimus, de gangliorum ſtructure tradiderat, niſi obſervationes noſtrae eo ordine a nobis fuiſſent recenſitae, ut ſingula quaeque ad Lanciſianam hypotheſim pertinentia reſellerent. Attamen tria potiſſimum addam. Primum funiculos, quos praetantiſſimus auctor tendines nervoſos appellavit, ramos eſſe nervorum partim ad eos, qui ganglion ingrediantur ſpectantium, partim attinentium ad eos, qui*

intra ganglion connixti in ramos ab ejus lateribus erumpunt, quin ad alterutrum apicem pertingant. Secundo longa coctione, ac maceratione in aceto, urina, & similibus praeclarissimum Auctorem perperam ulum fuisse, ut in gangliorum fabricam inquireret; quandoquidem nervea stamina hisce praefidiis in tantum mutari solent atque eam, exteriorem faciem, & internam consistentiam nancisci, ut facile queant muscularium fibrarum specie decipere. Ex sane nervorum stamina sunt, quae pro muscularibus fibris Lancisius habuit atque descripsit. Tertio deteriorem alteram esse methodum, qua ganglia secundum axim unguibus dissectere, & separare consueverat, ut penitiorem ganglionum structuram detegeret, cui porro tribuenda est fictitia illa pinnata fibrarum muscularium dispositio, quam in gangliis ipse comministrat. Certe equinum cervicale ganglion, quod ipse scrutatus est, eandem structuram nobis exhibuit, quam hactenus in homine descripsimus.

(18) *His observationibus locus datus est in secundo volumine operum Lancisii, earumque meminit Heisterus in sua nunquam satis laudato opere de rebus Chirurgicis, alibique. Ceterum quae fuerit Lancisii sententia, facile cognosci poterit ex iis quae scripsit ad Casellum in epist. data Kal. Martii MDCCXIX. Non exiguae autem, inquit iste, mihi voluntati fuit, quod a te quoque confirmari intellexerim, communem amicum clarissimum Heisterum de pristina sententia, si minus discesserit, saltem paululum in rectam viam flexisse, ingenue professum, suffusionem, obducta in aqueo humore membrana, aliquando progigni; & quidem si Romae degeret, crebrisque interesset sectionibus cadaverum eorum, qui cum certis non cujuscumque glaucomatis, sed verae catactae indiciis decesserunt, non infrequentiore ac pra-*

ternaturalem, sed frequentissimam illoque in genere naturalem suffusionem appellaret. Illud etiam dolendum magnopere mihi videtur, quod maxime non raro offensiones inter doctos viros emergant, eo quia nomina a Priscis ad peculiare morbos significandos constituta in alios saepe detorqueant, ut in casu nostro uluvenit, in quo cum hypochymatis suffusionis & cataractae vocabulum inditura fuerit vitio concretionis in humore aqueo, Antonius Metrajanus, Brislaeus, atque Heisterus noster ad crystallini affectionem indicandam traduxerunt. Cum igitur vel ipse Heisterus candide nunc fateatur, concretionem in aqueo & contingere, & per acum deprimi posse, sponte quoque dare videtur, ut nomen, sedes, & medela ipsius cataractae a veteribus inventa apud recentiores quoque accipiantur. Quanquam ultro concedimus, haecenus medicos & chirurgos partim signorum ambiguitate, partim complicatione utriusque mali falsos saepe saepius, glaucoma pro suffusione, vel contra reputasse, quod etiam nobis accidit, quippe qui in denatis viderimus aegrotationem, quam simplicem cataractam censibamus, fuisse cum glaucomate conjunctam. Hinc praecellare magnus Hippocrates, qui minus erraverit, optimus est medicus. Ceterum ego quidem arbitror Heisterum nostrum ideo susceptas partes non deseruisse, quod minus urbane a nonnullis habitus sit.

(19) *Inter epistolas Lancisi multae quidem extant quae ostendunt, quam a contentione ibidem esset aversus. Neque solum has ille vitabat, sed oras inter amicos, ut componeret, omne adhibebat studium. Dicere vero solitus erat, Medicos praesertim ab omni contentione alienos esse debere, memoro, illius dicti Hippocratis, quo admonetur, ut nihil cum perturbatione faciant.*

(20) *Ceteros inter libros erant duo exemplaria operis, quod inscribitur Margarita Antoniana, quorum unum Lancisius dono dedit Cardinali Laurentio Corsinio. Rarissimus sane liber, cujus auctor est Cometius Pereira, & ex quo Cartesius sumpsisse dicitur illud Philosophiae suae dogma, Bruta parere anima, & vera automata esse.*

OPERA EDITA.

In contexendo Indice Operum Lancisii primum referemus ea quae distributa in quatuor volumina Fratres Palcarinii Romae an. MDCCXLV. eleganter sane impresserunt, ordinemque ab iis servatum haud immutabimus; deinde recensebimus reliqua Lancisii opera, quae in lucem quidem sunt edita, sed minime inserta sunt in ea, quae memoravimus, volumina: ac postremo declarabimus quae sint ejusdem Auctoris scripta inedita, quae in Bibliotheca S. Spiritus asservantur.

Tom. I. De Subitaneis Mortibus. libri duo. Romae typis Jo. Francisci Busgni 1707. in 4. Lucae apud Peregrinum Fredianum 1707. in 4. Venetiis apud Andream Poletum 1708. in 4. Lipsiae apud Fridericum Gleditsch 1709. in 8.

Dissertatio de nativis, deque adventitiis Romani Caeli qualitatibus; cui accedit Historia epidemiae rheumaticae; quae per hiemem an. 1709. vagata est. Romae apud Franciscum Gonzagam 1711. in 4.

Tom. II. Dissertatio de recta medicorum studiorum ratione instituenda, habita ad novae Academiae Alumnos, & medicinae Tyrones in Archinochoomio S. Spiritus in Saxia. Romae ex Typographia Jo. Mariae Salvioni 1715.

Tom. VII.

L

in 4. & apud eundem eodem anno in 8. & Avenione apud Joannem Delorme 1716. in 8.

Anatomica Humani Corporis Synopsis. Profusio habita in Almo Rom. Sapientiae Lycaeum cum primum demandatam ab Innocentio XI. P. M. Anatomiae Cathedram susceperet VIII. Id. Novemb. MDCLXXXIV. Primum edita haec Synopsis fuit Genevae an. 1718. cum reliquis Lancisi operibus, quae etiam tum prodierant. Consciant haec opera duo volumina in 4. eaque in ordinem digessit Petrus Assaltus.

Epistola de humorum secretionibus in genere, ac praecipue de bilis in hepate separatione ad eruditissimum virum D. Joannem Baptistam Blancum Medicinæ & Anatomiae Professore. Haec primum impressa fuit in libro ejusdem *Blanci*, qui inscribitur = De hepatis structura, usibus, & morbis ec. Augustae Taurinorum 1711. ac deinde *Mangeus* inseruit in primum volumen sui Theatri Anatomici editi Genevae 1717.

... ad doctissimum & eruditissimum virum D. Raymondum Veinsenium Medicinæ Doctorem, & in Monspelienfi Academia Profess. longe clarissimum, scripta nomine Archiatrorum Collegii Urbis, ut responderet quaestionibus = An acidum ex sanguine extrahi queat; & an inter ejusdem sanguinis principia ulla statui possit universalis proportio? = Primum edita fuit in memorata Genevensi editione; & saepe Auctor retulit quoque in Metallothecam Mercati editam Romae typis Salvini.

Epistolae duae ad Antonium Paechonium una, ad Joannem Blanchardium altera de triplici intestinorum Polypo, quorum longiorem nonnulli hactenus unicum vermem esse crediderunt. Inseruit Antonius Vallisnerius suum in librum, cui titulus = Considerazioni ed esperienze intorno alla ge-

narazione de' vermi ordinarij del corpo umano. In Padova 1710.

Dissertationes duae de Physiognomia, & de Sede cogitantis animae. *Joannes Fantonius, ad quem instituuntur, locum iis dedit in opere quod inscribitur = Joannis Baptistae Fantoni &c Observationes Anatomico-medicae = Venetiis apud Andream Poletum 1713. Mangetus quoque retulit suam in Theatrum Anatomicum.*

Dissertationes duae ad *Ludovicum Ferdinandum Marsium*. Altera est de ortu, vegetatione, ac textura fungorum, altera de Plinianae villae ruderibus, atque Ostiensis litoris incremento. Editae primum fuerunt ad calcem operis ejusdem *Marsii*, cui titulus = *Dissertatio de generatione Fungorum* &c. &c. Romae ex officina Typographica Francisci Gonzagae in via lata 1714. in fol.

Forma ac methodus describendae morborum historiae in gratiam Medicinae Tyronum. Per occasionem Epistolae ab Auctore ad Philippum a Turre Adriensem Episcopum de Excell. viri D. Horatii Albani Clementis XI. P. M. germani fratris morbo, interitu, & funere. *Haec Epistola primum lucem aspexit Norimbergae a. 1715. in Appendice Centur. III. & IV. Ephemerid. Acad. Curios. Germ.*

Epistola Apologetica de generatione metallorum Patri D. Herculi Corazzio in Bononien. Lycae Analytico Professori Pub. *Pertinet ad Prolegomena Metallothecae, ad quae pertinent quoque.*

Epistolae duae de morte Cleopatrae ad *Jo. Baptistam Morgagnium &c.*

Epistola *Ernesto Salamoni Cypriana.*

De Natura & praefigio Diofcurorum nautis in tempestate apparentium. Romae typis Georgii Placho 1720. in 8.

Lucubratio de Virgine quadam Calliensi mirabili vexata symptomate, habita in Congressu Medico Romano in aedibus Hieronymi Brasavoli. Romae apud Cristophorum Pragondellum 1682. in 4.

Consilium Clementi XI. de ratione instituendae rusticationis cum optimo regimine sex rerum nonnaturalium, a cujus negligentia ipsemet secessus omnino noxius evaderet. Cataractae observationes.

Dissertatio historica de bovilla peste ex Campaniae finibus Latio importata, cui accedit Consilium de equorum epidemia. Romae typis Salvioni 1716. in 4.

Tom. III. De Noxiis Paludum effluviis eorumque remediis libri duo. Romae typis Salvioni 1717. in fol. Opus partim huc Lancisus intulit plures doctorum Medicorum epistolae, quibus ipse consultus est de contagionibus, quae aut Pisaurum, aut Ferentinum, aut alias regiones affligerunt. Innotuit quoque

Consilia a se exhibita in coetu aliquot Cardinalium de Sylva Cisternae & Serminetae non nisi per partes excidenda.

Tom. IV. De Motu Cordis & Aneurysmatibus opus posthumum in duos libros divisum. Primum impressum fuit Romae apud Salvionum 1724. in fol. mox Neapoli, Venetiis, & Lugduni Batavorum in 4.

Dissertationes de vena sine pari, & de gangliis nervorum ad Jo. Baptistam Morgagnium: quae quidem antea editae fuerant inter Adversaria ejusdem Morgagnii.

Haec sunt Lancisii opera quae habet Palermitina editio, quae & copia rerum, & elegantia longe superat Genevensem.

Dissertatio, qua probatur vermes in pueris facile suscitari ab insolito aliquo metu, habetur in Congressu Medico Roma-

no habito in aedibus Hieronymi Brasavoli prid. non. Aug. 1687. In his Congressibus (sic enim inscribebantur, quae ab illo doctorum hominum coetu in lucem exibant) saepe appareret nomen Lancisii.

Epistolae duae ad Felicem Adamum Mulebancher de molis & de feminis vermiculis: *Leguntur in secundo volumine operum Antonii Vallisnerii.*

Anatomia per uso e intelligenza del disegno, ricercata non solo sugli ossi, e muscoli del corpo umano, ma dimostrata ancora sulle statue antiche più insigni di Roma, delineata in più tavole, con tutte le figure in varie faccie con le spiegazioni ed indice del Sig. Canonico Gio. Maria Lancisi già Medico Segreto della S. M. d' Innocenzo XI. in Roma per Domenico de' Rossi 1691. in fol.

Dissertatio de ratione philosophandi in arte Medica ad Senensem Physiocraticorum Academiam. *Legitur in quarto volumine part. III. della Galleria di Minerva. Venezia per Girol. Albrizzi 1700. in fol.*

Epistola ad Joannem Fantonum. *Quoniam haec epistola praeclaram dat testimonium judicii, quod fecit Lancisius de opere Fantonii, quod inscribitur = Anatomia corporis humani ad usum theatri accommodata: pars I. in qua infimi & medii ventris historia exponitur: Augustae Taurinorum 1711. in 4. = idem Fantonius operi huic suo praeposuit.*

Dissertazione Epistolare al P. D. Antonio Borromeo intorno all'epidemia de' buoi accaduta l'anno 1711. *Edita fuit cum opusculo ejusdem Borromei, in quo historiam narrat hujus bovillae pestis. Venetiis apud Petrum Orlandum, & Neapoli apud Felicem Moscam 1712. in 8. Liber titulum praefert. = Historia dell' Epidemia de' buoi accaduta l'anno*

no 1711. con l'esame delle cagioni, uso de' remedj, e modo di preservare i buoi sani = *Lancisus in latinum eam convertit, adjunxitque Dissertationi De bovilla peste. Idem fecit de opusculo cui titulus*

Ragionamento intorno all'epidemia de' cavalli svedesi. Justa in Roma nella primavera del 1712. difteso per ordine della Sacra Consulta. *Primum impressum fuit in memorata Neapolitana editione dell'istoria dell'epidemia de' buoi.*

Lettera al Sig. Antonio Vallisnieri sopra il ritrovamento delle Tavole Anatomiche dell' Eustachì. *Legitur ip XI. volumine Ephemeridum Litteratorum Italorum.*

Tabulae Anatomicae cl. v. Bartholomaei Eustachii, quas e tenebris tandem vindicatas, & SS. D. Clementis XI. P. M. munificentia dono acceptas, praefatione, notisque illustravit, ac ipso suae Bibliothecae dedicationis die publici juris fecit Jo. Maria Lancisus ec. Romae ex officina Typogr. Francisci Gonzagae 1714. in fol. *Opus recensum fuit Coloniae Allobrogum, sumptibus Gramer & Perachon 1717., & in fine Theatri Anatomici. Extat quoque in hoc Theatro*

Epistola Lancisii ad Jacobum Mangetum de Eustachii Tabulis iterum recudendis in ejus Theatro Anatomico, cui subnestantur testimonia quaedam Auctorum, qui laudant Eustachium, quaeque omissa fuerunt in editione Romana.

Epistolae duae ad Philippum de Turre: *Extant in vol. 33. p. 2. Ephemeridum Litteratorum Italorum.*

Lettera Risponsiva al medesimo sopra il difetto d'occhi d'un Fanciullo. Tra gli Opuscoli Scientifici. Venezia 1745. tom. 33.

Lettera al Sig. Antonio Vallisnieri, qua homines admonuit esse quaedam in libro De noxiis paludum effluviis,

In quibus lapsus fuerat. Legitur in XXIX. volumine Ephemerid. Lit. Ital.

Michaelis Mereati Samminiatis Metallotheca, opus posthumum auctoritate & munificentia Clementis XI. P. M. e tenebris in lucem educum: opera autem & studio Joannis Mariae Lancisii Archiatri Pontificii illustratum. Romae ex officina Jo. Mariae Salvioni 1717. in fol. *Bien- nio post Lancisius Appendicem quandam operis publicavit is- dem typis Salvioni, qua occasione frontem libri renovandam putavit. Hinc factum est, ut quamvis unica sit Metallotheca editio, duplex tamen videri possit. Nam una frons habet an- num 1717. altera annum 1719.*

Adnotationes ad Historiam morbi Cardinalis Columnae descriptam a Januario Janellio. Romae apud Franciscum Gonzagam 1719. *In his adnotationibus plura explicat Lancisius scita dignissima, quae ad pleuritidem pertinent. Hoc enim morbi genere laboraverat Cardinalis ille.*

Discorso recitato nell' Accademia degli Afforditi solita a radunarsi in casa Veterani alla presenza dell' Eminentiss. Cardinale Tanara Legato d' Urbino. *Ostenditur in eo = Es- sere molto più glorioso, e più profitevole alla Patria il vivere, che il morire per la medesima = In Urbino 1703.*

Voti diversi per la Canonizzazione de' Santi. *Accede- bat ad cetera Lancisii munera illud quoque, ut medica trutinā pendere deberet eorum malorum sanationes, quae praeter- naturam factae esse dicebantur ad probandam alicujus viri sanctitatem.*

Tre Voti consultivi per la ragunanza d' Arcadia in- torno al merito di tre gran Letterati Arcadi Lorenzo Bel- lini, Pirro Maria Gabrielli, e Vitale Giordani.

De' Consulti Italiani di Monsignore Gio. Lancisi ed.

publicati da Filippo de Carolis di Ravenna Tom. I. in
Roma 1761. per Generoso Salomoni.

OPERA INEDITA.

Studia Juvenilia inchoata ab anno 1672. , seu Repertorium Medicum . Vol. XXII.

Diarium Observationum Medicarum Chirurgicarum, & Anatomicarum ab anno 1681. usque ad annum 1693.

Historiae Medicae Variæ .

Repertorium Medicum , in quo sunt notata multa morborum genera , iis adhibita remedia , eorumque exitus , aliæque plura ad rem medicam spectantia .

Miscellanea Anatomica .

Praefationes ad singulas Ostitutiones Anatomicas habitas in Theatro Anatomico Romanae Sapientiae . *In hoc volumine extat quoque .*

Praeclitus habita in maxima Aula Romanae Sapientiae cum caperet possessionem loci Collegialis , non exhibito supplici libello , sed sponte a Collegio electus die 10. Januar. 1682.

Lettere Apolegetiche tra Gio. Battista Salvadori , e Gio. Cesimo Bonomo , e Giovanni Lancisi intorno all' origine della rogna .

Raccolta di 46. Conclusioni Mediche pubblicate in Messina nel 1665. di una Critica contro le medesime , e della famosissima Apologia di Marcello Malpighi allora Lettor primario in Messina , e al presente Medico Segreto della S. di N. S. Innocenzo XI. fatta in ossequio dell' Autore dal D. Gio. Maria Lancisi Medico Collegiale , e Lettor pubblico in Roma nel 1693. *Memoratu digna sunt quae Lanci-*

ſuis praefatus eſt de Malpighii Apologia. Uſcì ella dalla penna (*inquit ille*) di queſto grand' uomo nello ſpazio di ſolli 25. giorni, come egli più volte mi ha confermato, e . . . contiene i ſemi di quaſi tutte le invenzioni Anatomiche pubblicate dopo da lui, e da altri Profeſſori. *Collegit quoque Lanciſus magnam copiam Conſiliorum ejusdem Malpighii, atque ad ea notas quaſdam appoſuit.*

Giornale dell' ultima infermità d' Innocenzo XI. diſteſſo da Gio. Maria Lanciſi, e dedicato al S. P. Clemente XI. *In hac ephemeride multa ſunt quae pertinent ad declarandos mores conſuetudinemque vitae illius Sanctiſſimi Pontificis.*

Praefationes atque Orationes habitae in Archigymnaſio Sapienſiac. Hae quidem ſunt

Proluſio de Laudibus Anatomiae habita cum primum anno 1684. ad hanc facultatem docendam venit.

Praefatio in Chirurgicas de vulneribus capitis Praelectioniones habita an. 1685.

.... ad Praelectiones de externis tumoribus habita an. 1686.

.... ad Praelectiones Anatomicas an. 1687.

.... ad Praelectiones de capitis vulneribus. In hac praefatione dicta an. 1688. oſtendit Lanciſus auctoritatem ſua ratione plerumque obſe.

.... Ad praelectiones de tumoribus an. 1689.

.... Ad Praelectiones Anatomicas an. 1690. In hijs Praefationibus ad Praelectiones Anatomicas ſaepe totus in eo erat Lanciſus, ut oſtenderet Anatomem eſſe vel maxime neceſſariam ad Medicinam faciendam.

.... ad Praelectiones de capitis vulneribus an. 1691. Rediit hoc anno ad capitis vulnera, propterea quod anno

1688. quo tempore instituat commentariis illustrare praedictum Hippocratis librum de capitis vulneribus, jussu Summi Pontificis ad majus opus vocatus non potuerat in incepto permanere.

.... ad Praelectioniones de Tumoribus an. 1692.

.... ad Anatomicas praelectiones an. 1693.

.... ad Praelectioniones de Vulneribus capitis an. 1694.

... ad Praelectioniones de Tumoribus an. 1695.

Prolusio ad Hippocratis Prognostica, habita VI. Id. Novemb. MDCXCVI. cum evehctus fuisset ad Cathedram Theoriae Extraordinariae. *Ait hoc sibi propositum esse, ut ostenderet, Praefagiorum aphorismos accurata, multiplici ac repetita observatione a divino Sene compilatos accessione novarum doctrinarum, Chimiae scilicet, Anatomae, & Mechanicae tantum luminis accepisse, ut qui olim a posteriore, ut ajunt, dumtaxat, vel plerumque minus probabili ratione resolvebantur, modo veram & a priori causam in propatulo nanciscantur.*

.... ad Praelectioniones de urinis, habita in instauratione studiorum an. 1697. prid. id. Novemb.

.... ad Praelectioniones de pulsibus, habita post longam Auditoris aegritudinem VIII Kal. Decemb. 1698.

Oratio Inauguralis ad commentarios in libros Hippocratis, habita V. Idus Novembris 1699. *In hac explicat dictum illud Hippocratis, quod multorum interpretum torset ingenia. Si quid divini in morbis inest, illius quoque ediscere providentiam.*

Prolusio Inauguralis habita nonis Novembris 1701. cum ad ordinariam Practicae Cathedram evehctus fuisset. *Egit eo anno de morbis capitis.*

Prolusio ad Tractatum de Aneurysmatibus, habita VI. Id. Novembris 1702.

Oratio de Laudibus Leonis X. habita in Aede Sacrae
Romani Archigymnasii 1685. *Laudat in ea temperantiam ,
fortitudinem , prudentiam , ac iustitiam illius Pontificis .*

.... de laudibus litterarum , habita in eodem Templo
die 18. Octobris 1688. *Ostendit in ea , litteras vivo homini
breve suavemque mortem , mortuo vero perennem ac gloriosam
vitam largiri .*

Oratio in funere Leonis X. habita in eodem Templo
an. 1696. *Probat non solum utile , sed etiam necessarium esse
Principibus viris litterarum studium .*

Oratiunculæ variæ habitæ in tradendis laureis .

Prælectiones de Tumoribus .

.... De Mythologia .

.... de Universalibus tegumentis , aliisque rebus ana-
tomicis : reperiuntur in memorata Miscellanea Anatomica .

Tractatus de urinis , & commentaria in Hippocratis
libros de Prognosticis sub annis 1696. & sequenti adornata .
*Materiam urinarum in quinque libros dividit , nimirum in
Physiologicum , in Pathologicum , in Semioticum , in Hygie-
cum , & in Therapeuticum .*

.... de Formatione fœtus in utero .

Commentarii in Hippocratis librum de capitis vulne-
ribus . *Sic interpretatur hunc librum Lancisius , ut non tam
interpretis , quam veritatis indagatoris officium præset , utitur-
que opportune dicto illo Galeni . In Hippocrate & aliorum
dictis id observo , ut non temere approbem quæ scripse-
rint , sed experientia , ratione verum ne , an falsum sit
examinem . Sane in his commentariis multa , eaque recondita
doctrina comparet .*

Tractatus de Febris in Romano Lycæo Auditoribus

his exhibitus an. 1703. cum extemporanea ad hunc *Tra-*
ctatum Praelectione.

Consigli e Risposte interno a diverse indisposizioni ,
Italice scripta Vol. X. , Latine Vol. III. Distribuntur haec
Consilia in genera morborum ; saepissime vero adjungitur iis ,
qui fuerit exitus morbi , de quo consultus est . Significavit
aliquando Lancisius per Litteras Morgagnio , velle se adnotare
non modo exitum morbi , sed etiam signa , quae animadversa
sunt in cadaveribus eorum , quos medicina curare non valuit ;
cui respondit Morgagnius , suscipere eum curam & cogitationem
dignissimam virtutis suae , utque stimulos eidem admooveret , po-
fuit ante oculos exemplum doctissimi viri Laetii a Fonte . Ego
tamen raro haec signa notata vidi in iisdem Lancisianis Con-
siliis , saepissime num ii qui convaluerint , in veterem morbum
de lapsi fuerint , aut a novo tentati .

Lettere scritte ne' tre viaggi fatti a Urbino . Vol. III.

I. Volumen continet decem Epistolas scriptas ad Chri-
stophorum Batellium mensibus Octobris & Novembris anni
1703. in iisque describuntur quae observatione digna putavit
Lancisius . Risi eo loco , quo idem narrat , ut solaretur Rhe-
darium , qui in via deterrima ac praecipiti equum amiserat ,
illi promississe suae curae fore , ut monumentum huic equo fieret ,
quod aequaret amplitudinem illius , quo libuit Carolo
VIII. memoriam posteris prodere Morelli sui . Huic enim
sans generosissimo equo celebrem victoriam , quam in Valle Tari
reportavit , referebat acceptam . Haec vero in monumento inscri-
bere se velle aiebat Lancisius .

MORELLO

VELOCISSIMO FULGINATENSI EQUO

STATURA LICET HUMILI EXCARNIQUE CORPORIS

HABITU

SPIRITU TAMEN REDUNDANTI

QUI

SUUM NE PERDERET HERUM

VEL IN IPSO AGONE GENEROSUS STANS

DIEM SUUM OBIIT

GRATI ANIMI MONUMENTUM POSUIT

LANCISIUS.

II. Vol. continet epistolas ad Curtium Origum scriptas anno 1705. Habet & Italicam Orationem dictam a Lancisio in Academia Affordutorum, in qua ostendit, = Non bastare l' opera benefica d' un eccello cittadino, se l'universal corpo de' Cittadini stessi a quella non si studia di cooperare. Habet quoque pastoritiam Orationem a Lancisio duarum horarum spatio compositam, & a quodam Beluzio, Pisauri dictam, cujus argumentum est = Che l' umana felicità non vien turbata, ma più tosto accresciuta dalle usanze che corrono = Per jocum hinc se fecisse orationem ait Lancisius, neque contrarium contrario opponeret. Nobilis enim & erudita femina Theodora Ondedeja protulerat similem Pastoritiam orationem in qua probabat, = Che le mode e le usanze correnti tolgono gran parte dell' umana felicità.

III. Vol. continet varias tum Italicas, tum Latinas epi-

Epistolas ad Familiares. Faetetur Lancisius omnes, quas eria haec volumina complectantur, epistolas, plenas esse sensationis, & pulveris.

Epistolarum Amaebaeorum libri quinque. Unam exurgeret aliquis, qui has epistolas in vulgus ederet. Habere enim viri litterati, ac praesertim rei medicae cultores, quo se utiliter oblectarent, studiosi vero Lancisii, quo magis magisque ejus doctrinam, animi virtutes, ac famae celebritatem hominibus probarent. Profecto si illi diutius vivere contigisset, non tam sua sponte, quam amicorum hortatu incitatus has epistolas typis commississet. Sic enim scribit Joanni Olivae Rhodigino in epist. dat. III. Id. Octobris an. 1719. Porro ut epistolas meas typis edere non reformidem (quanquam propere celesriterque exaratas, sempiternisque potius tenebris demandandas, quam publica luce donandas existimo) non tam facit judicium tuum, quod ab amore extortum atque ad indulgentiam flexum video, quam quod doctissima amicorum vel consulta vel responsa perire iniquum arbitror. Veniam itaque a Lectoribus polliceri licebit litteris meis, si earum saltem occasione eruditissimis amicorum commentariis rem litterariam locupletavero, ut quem voluptatis atque utilitatis fructum ex meis capere non potuerunt, ex alienis, ac tuis quoque laboribus capiant. Praeter haec epistola multa continet, quae ostendunt, quanta fuerit Lancisius industria, quam ei omnia tempora occupata fuerint; adeo ut vere gloriari potueris, nunquam minus se otiosum fuisse, quam cum fuisset otiosus.

Discorso sopra il Salasso. Non auderem pro certo commentariolum hoc tribuere Lancisio.

Giornale intorno alle indisposizioni di S. B. Papa Clemente XI. colla descrizione delle sue villeggiature.

L A N C I S I U S . 175

*Satis multa de Lancisis. Non tamen huic vitae finem
faciam priusquam referam quae ipse scripsit, ut esset quod
incidi posset in Fonte (huic nomen est Lancisianus) saluber-
rimae aquae , quam suo consilio ad Tyberis ripam prope No-
socomium S. Spiritus duxit S. P. Clemens XI.*

CLEMENS XI. P. M.

AQUAM SALUBERRIMAM

TEMPORIS INJURIIS ITA DISPERSAM

UT EJUS VESTIGIUM IN RIPA TIBERIS VIX

EXTARET

NOVO DUCTU PLUMBEISQUE

COERCITAM TUBIS

EXTRACTO PONTE MOLLITO ADITU

PUBLICO USUI COMMODIOREM UBERIOREMQUE

RESTITUIT

ANNO SALUT. MDCCXX. PONTIFIC. XX,

APISTON. MEN. TARP.

ANGELUS FABRONIUS

MASINIO COMITI

S. P. D.

Scribenti mihi de Bacchinio & Valsechio doctissimis hominibus e Benedic̃tina familia perbeati illi videri solent, qui eum studiorum cursum, quem magis exoptarunt, tenere ponere, & qui cum incidissent in ipsam perturbationem rectae institutionis, nihil non egerunt ad excitandos suos ad eas artes, quibus ipsi maxime dediti fuerunt, celebrandas atque inter se recolendas. Quis autem dubitabit fore permultos Monachorum in quoque genere perfectos non mediocrium modo artium, sed etiam maximarum, si nihil aliud alumni suis imponerent oneris, nisi ut operam, curam, industriam, cogitationemque figerent in ea facultate, ad quam se propensiores esse intelligunt, ac naturam optimis praeceptis adjuvarent, neque invitos omnes cogrent alieno potius, quam proprio parere ingenio, & tragaedias in nugis, ut dicitur, agere? Ingenia quidem Italorum,

lorum, ut multis rebus possumus judicare, multum ceteris hominibus omnium fortasse gentium praestant; nihilo tamen minus plures ex una Maurinorum Monachorum familia illustres homines in Gallia prodierunt, quem apud nos ex universis pene Benedictinis familiis, quod non ut ii quaeramus quod genus institutionis sit optimum, quod cujusque appetat ingenium, & quod sit illud quod reipublicae emolumento, litteris utilitati & familiae honori esse possit. Quid porro est tam furiosum quam Scholastica philosophia atque theologia (quae unae in Monachorum claustris diu dominatae sunt) nulla subjecta rerum utilium scientia, ac innumerabilibus propositis quaestiunculis ad torquendos homines contentioni, quam veritatis cupidiores idoneis? At si Monachi antiquissimis temporibus de litteris non male meriti sunt, quin ii omni ope enitentur, ut ad veteres laudes novas addant, praesertim cum ii abundent copiis ad libros emendos edendosque, cacteraque comparanda doctrinae instrumenta, cum ois quoque affluant, neque accurata quadam orationis copia ad cohortandam excitandamque juvenutem suam indigeant, cum nutu atque verbo illam, quo volunt, ducere atque transferre possint? Ac mihi

saepe numero memoria vetera repetenti non sapientes modo, sed etiam divini fuisse ii videntur, qui dum litterae tanquam inscitiae fluctu misere obruebantur, portum morientibus pandere atque aperire potuerunt, quod cum praesertim fieri per Monachos Carolingii Imperatores intellexissent, musarum sacra cum Monasteriis conjuncta semper esse voluerunt. Hinc varia apud eosdem scholarum genera, quarum nonnullae minores idcirco appellabantur, quod praeter rudimenta catholicae Fidei, psallendi ratio, grammatica, & arithmeticae elementa in iis traduntur; aliae majores, quod altioribus explicandis disciplinis essent destinatae; aliae interiores, propterea quia solis ad eas pateret Monachis aditus; exteriores demum aliae, quod laici ad easdem admitterentur. Nota sunt autem barbara illa vocabula trivii & quadrivii ad indicandas binas classes, in quas distributa erat omnis institutio puerilis. Prior clericis cum laicis erat communis, & grammatica, rhetorica, & dialectica continebatur, posterior autem solis clericis relicta musicam, arithmetica, geometriam & astronomiam complectebatur. Vetus autem opinio est noluisse homines sacris addictos laicorum ingenia iis excoli disciplinis, quibus apti

ferent ad indagandam, atque exquisitis argumentis, iustoque concludendi modo demonstrandam veritatem, ut ipsi soli sapere, ac gravissimis rei-publicae muneribus gerendis soli idonei viderentur. Nimis longum foret hoc loco referre insignes doctrina homines, qui media, ut loquimur, aetate e religiosis claustris prodierunt; ipsorumque Caesarum & Regum filii eo consilio ad monasteria mittebantur, ne plane rudes essent in litteris & in rerum civilium cognitione atque prudentia. Quis ignorat quam alte ascenderit Sugerius S. Dionysii in Gallia Abbas, a quo bini Reges Ludovicus VI. & VII. petenda esse duxerunt non ea solum quae statuta essent de Deo, de morum disciplina, de iustitia, de temperantia, de moderum rerum omnium, sed etiam de legibus aut jubendis aut vetandis, de bello, de pace, de sociis, de vectigalibus, de jure civium, ac praesertim nobilium, qui feudis dominarentur. Neque vero hanc suam scientiam vir religiosus inter unius coenobii claustra continuit, sed in orbis lucem pronulit, cum amplissimis functus esset legationibus, & gubernacula totius Galliae regni multis annis tractasset, & quod gloriosius puto, viam quadammodo stravisset sapientissimis illis institutionibus, quae

adeo S. Ludovici Regis nomen illustrarunt. Atque haec non eo dico ut velim Monachum versari in perspiciendis rationibus constituendarum & regendarum rerum publicarum, quāquam haec ipsa adeo propria sint philosophiae, ut a veteribus poliiticorum nomine philosophi appellarentur, sed contendo debere illum pro ratione temporum sic moderari studia sua, ut illa persequatur quae ingenio suo sint accommodata, & quae reipublicae magis expediant; eliminandos malos libros ac malos institutores, qui nil aliud docent nisi disputandae artem; non jejunam atque nudam esse debere Monachorum institutionem, sed adpersam atque distinctam multarum rerum jucunda varietate; si physicam amant, non in Peripateticorum somniis, sed in recentiorum inventis tenendis exercendos; haud interdicens iis versari in chymicis, botanicis, astronomicis, mathematicis, sed aditum ad omnes utiles disciplinas atque artes iis libentissime aperiendum. Equidem te cum in dicendo semper putavi deum ob singularem multarum maximarumque rerum scientiam, tum vero tibi nunquam eloquentiae majorem tribui laudem, quam cum Pisis te audiavi causam agere optimorum studiorum, & adducere in orationem tuam non jam otiosum

aliquem & loquacem, qui ex scholis nil nisi *ca-*
uilenam requirit, sed summos homines ingenio *Joan-*
nem de Miro, & *Benedictum Bacchinium*, qui
 ad sacras litteras multarum linguarum & disci-
 plinarum subsidium attulerunt, quorum vestigia
 persequi eos omnes debere affirmabas, qui in ali-
 quo theologorum numero haberi cupiunt. Sed ve-
 reor, mi doctissime *Masini*, ne dum cupimus no-
 vam studiorum rationem in religiosorum omnium
 hominum claustra inducere, imitari videamur *Pla-*
tonem, cui cum dicendum esset de iustitia & fi-
 de, novam quamdam finxit in scriptis civitatem,
 usque eo illa, quae dicenda putabar, a vitae con-
 suetudine & a civitatum moribus abhorrebant.
 Verum si nostra consilia minime probabuntur ab
 omnibus, gratulabimur tamen nobis, quod ea lo-
 ca incolamus, iisque vivamus temporibus, quibus
 libere licet quae sentimus proferre, quibusque non-
 nisi iis parere & servire cogimur, quibus & possu-
 mus & debemus. Vale eorumque Vitas libenter ex-
 eipe, quos tantopere & quidem jure optimo prae-
 dicabas.

Pifis V. Kal. Quint. MDCCCLXXX.

BENEDICTUS BACCHINIUS.

Benedictus Bacchinius natus est an. MDCLI. prid. Kal. Sept. ea in urbe Mutinensis ditionis, quae Burgum S. Domnini appellatur. Stimulus Parmam a patre ductus est, quam alteram patriam sibi esse dicebat ob studiorum causam, ob donatam familiae paternae civitatem, & quod ejus mater Joanna Martinia ea in urbe natale solum habuerat. Ibi satis liberaliter educatus est, quanquam afortus avus & indiligens pater satis lautum patrimonium dissipasset. Quinquennio Jesuitas audit; sed studia, quae reconditis in artibus versantur, exercuit apud Benedictinos Monachos, quorum familiae nomen dedit, cum ageret aetatis annum decimum & septimum. Mirabantur, seu potius indignabantur, qui ei contigere philosophiae praeceptores, quod non statim crederet eorum dictis gratiae, aut odio eorum subscribens, omniaque alterius opinione, ut tum fiebat, ponderans. Recreabat vero se Benedictus ab moerore perversae institutionis, cum secreto mathematicum

aliquid & physicum per se tentaret, certumque veritatis fontem reperiret. Miserandos vero magis quam damnandos pro infelicissima temporum conditione putabat Scholasticos in nihil agendo quaerendoque totos occupatos, quorum opinionum pravitate ne inficeretur cavit semper, sed eo praesertim tempore, quo rerum divinarum scientiae operam dedit. Juvenis saepe periculum ingenii sui fecit in illis theologicis & philosophicis disputationibus, quibus primas concedere videntur omnium pene religiosarum familiarum magistris; quamvis saepe eveniat, ut per eas vanus animus aura captus frivola arripiat insolentem sibi fiduciam, & ad derisum stulta levitate ducatur. Tum Bacchinius incepit discere, quando ceteri cessare solent, neque mediocriter Norisio & Magliabechio, quos Florentiae noverat, dum ea in urbe sacras ad populum conciones habebat, & Joanni Baptistae de Miro, a quo Graecis litteris instructus fuit, se debere profitebatur, quod rectam studiorum viam fuerit ingressus. Quia ei omnis ferme spes, & ratio, & cogitatio pendere videbatur ex Angeli Mariae Arcio-

nii nutu, a cuius latere vix discedebat, cuius
 que sustinenti insigniora Casinensis familiae
 munera diu ab epistolis fuit, aegre ab eo-
 dem obtinuit, ut illi studio, ad quod magis
 natura & voluntate ferebatur, se dedere pos-
 set. Existimabat enim Arcionius e re Bacchi-
 nii & universae familiae esse, si ab eloquen-
 tia, in qua excellere putabatur, minime se
 disjungeret. Sed facile erat illa aetate non mo-
 do rudibus, verum etiam mediocriter doctis
 illudere. Secus quidem de se iudicavit Bac-
 chinius, quamvis frequenter elaboraverit,
 ut consequeretur artis dicendi rationem. Ita-
 que alium sibi campum, in quo desudaret,
 elegit; & cum esset satis Graecae & Hebrai-
 cae linguae peritus, ad eam laudem, quam
 praesertim quaerebant Maurini Monachi in
 sacra & profana eruditione excolenda, aspira-
 re se posse putavit. Ex iis duo praecellen-
 tissimi Joannes Mabillonius & Michael Ger-
 manius cum forte Parmam an. MDCLXXXVI.
 advenissent, ubi degebat Bacchinius ab Ar-
 cionio Abate coenobii bibliothecae praefe-
 ctus; hunc multis cohortationibus concita-
 runt ad studium cognoscendae omnis anti-

quiritatis . Quid posset interim in theologia viris rerum divinarum scientiae peritissimis voluit ostendere , cum quasi moderator fuisset cujusdam disputationis theologiae ; & quae rum impressae fuerunt Theses Mabillonio dedicavit , & praefatione sane erudita ornavit . Sed nimium saepe coactus garrere in scholis ad omnem animi remissionem descendebat , & cum eruditum aliquid moliretur , imitari volucres sibi videbatur , quae levandi laboris sui causa passim ac libere solutae opere volitare solent . Hac mente edendas suscepit commentationes Helenae Corneliae Piscopiae , de cujus vita ea scripsit , quae satis multa videri potuere ad declarandam miram virginis nobilissimae in Deum pietatem atque eruditionem . Valde etiam illi placuit onus , quod a majoribus accepit ordinandae bibliothecae , quae magnum tum acceperat incrementum a liberalitate Victorii Sirii Galliarum Regis Historiographi . Hic enim Parisiis moriens Parmensi Benedictinorum caenobio , in quo aliquandiu alumnus fuerat , bibliothecam suam , sane multorum nummorum , testamento legaverat . Hac re ut se expediuit Bac-

chinius magnum opus suscepit scribendi ephemerides Litteratorum Italiae, idque suadente Gaudenio Robertio Carmelita, qui libros & pecuniam ad easdem conficiendas atque vulgandas suppeditabat. Dolebat enim vir omnis eruditionis studiosus gloriosum Italiae, atque utilissimum opus, quod per Nazarium & Ciampinium Romae coeptum erat, per eosdem desitum fuisse; quare de hoc renovando idcirco Bacchinium cohortabatur, quod hunc unum ex omnibus ob varietatem & copiam doctrinae & acumen ingenii in judicando ad id maxime aptum se cognovisse dicebat. Nemo vero ignorat, qui munus hujusmodi suscipit, nulla ferme in re tyronem ac rudem, peregrinum atque hospitem esse debere, paratumque ad innumeras pene exorbendas difficultates atque incommoda. Profecto satisfecit Bacchinus hominum expectationi, & quod orsus fuerat anno MDCLXXXI. perduxit ad exitum usque anni MDCXC. Nam hoc tempore cum ei turbulentissimae tempestates impendissent, abesse debuit ex ea urbe, in qua factus theologus Parmensium Ducis, aliisque decoratus muneribus floruerat summa cum

dignitate . Percommode accidit , ut postquam per plures civitates Italicas percurrisset , invitaretur a Francisco Mutinae Duce ad domicilium ea in urbe collocandum , quod causam dedit novis ephemeridibus , quae Mutinensibus typis an. MDCXCII. & eo qui consecutus est , vulgatae fuerunt . Intermittae postea varias gravesque ob causas , post iterum instauratae , easque demum scribere omnino cessavit Bacchinius exeunte an. MDCXCVII. quamvis ex illo omni opere , quod novem constat voluminibus , plurimum utilitatis & famae perceperit . Nemo enim erat , qui easdem superiores non poneret Romanis ephemeridibus , quarum in locum successisse videbantur . Non est vero credibile , quanquam ei semper antiquissima cura fuerit neminem laedere , quantas ferre debuerit querelas , accusationes & injurias hominum nimium gloriae appetentium , qui Bacchinium non narratorem , sed patronum & laudatorem effusum sibi exoptabant . Vehementer quoque vexatus fuit a Fabretto , quod approbator esse noluerit contumeliarum quibus ille lacerabat Gronovium , quasi omnes ejus vo-

luntati parere, ejusque cupiditatibus servire debuissent. Sed haec parvi fuere momenti, si cum iis conferas, quae a suis perpeti debuit. Extincto enim Arcionio, qui in maxima celebritate atque in oculis potentiorum vivebat, quemque omnes boni venerabantur, mali timebant, horum omne odium in Bacchinium, qui ab eo non secus ac filius diligebatur, erupit. Quoniam ipse sic ab hominibus doctis acceperat non solum ex malis eligere minima oportere, sed etiam excerpere ex his ipsis. siquid inesset boni, omnibus se abdicare muneribus, & in aliqua solitudine ad scribendi operam omne studium curamque convertere cogitaverat. Sed conspiratio sceleratorum hominum contra dignitatem suam (nam cum ei cura commissa fuisset cujusdam parthenonis, qui S. Alexandri dicitur, non solum de re male gesta, sed etiam de peculatu accusabatur) coegit eum fortunae se committere. Favet in hoc ei, quod patria expulsus in Padolironense Monasterium, quod tum a Simone Bellinzanio viro omni genere laudis excellenti regebatur, receptus fuerit. Adhibita statim multis magnisque in rebus

ejus opera fuit, frementibus licet adversariis;
 & cum Bononiam, Mediolanum aliasque ad
 urbes accessisset, ubique a doctis nobilissimis-
 que viris singularibus amoris & existimatio-
 nis declarationibus decoratus est. Mirabantur
 vero omnes quod Parmensium Dux minime
 cohibuisset iniquorum calumnias, sineretque
 tantam vim virtutis atque ingenii longius a
 patria peregrinari. Mutinam vero veluti do-
 mum, ut diximus, studio & opera praefer-
 tim Cantellii & Ramazzinii deductus, doloris
 medicinam a philosophia petiit, otii oblecta-
 tionem hanc honestissimam judicans. Tum
 dialogos illos scripsit *de constantia in adversis*;
de dignitate tuenda; *de amore erga rempublicam*,
 qui cum toti sint in virtute laudanda, &
 in omnibus hominibus ad virtutis studium co-
 hortandis, a Socraticorum libris, maximeque
 Platonis fluxisse videbantur. Id maxime effi-
 eit Dialogorum primus, ut nihil sit dandum
 fortunae, omnia liberae voluntati, quod si ita
 minime se haberet, non posset beatam prae-
 stare vitam sapientia. Iniuriae igitur, depor-
 tatio, fatum imminens, & alia hujusmodi,
 quae in nostra potestate minime sunt, & ex

aliena pendent malitia, minime justam nobis dolendi abjctendi animi causam suppeditant. Secundo Dialogorum perpenditur, in quo vera consistat dignitas, quibus de causis ea vere laedatur; an de illius jactura, & quatenus, dolendum, & quo modo illa tuenda sit. Fieri etiam posse docet, ut malorum hominum convicia dignitatem augeant, & quae ignorata delituissent bona, iniquis calumniis appareant. Magnam semper vim esse probat conscientiae, ut nihil timere debeant, qui nihil commiserunt, & suam unicuique pluris esse debere conscientiam, quam hominum, praesertim iniquorum, sermones. Ita vero de republica disputat tertio in Dialogo, ut haec spectetur non in aliqua parte, sed in universitate generis humani, & eum optime suo munere fungi dicat, qui non de privata, sed de publica re sit sollicitus. Miserum autem non esse ob artes malevolorum republica carere, cum saepe fiat ut paucorum aerumnae vicissitudinesque cum universorum utilitate sint conjunctae. Atque his de rebus satis quidem docta, sed non satis splendida est atque illustris oratio Latina. Facile vero

ignoscemus Bacchinio, quod in ejus animum ceciderit aegritudo, cujus solatium a philosophia petebat. Non enim filice nati sumus, & est naturale in animis tenerum quiddam atque molle, quod aegritudine, quasi tempestate, qua tiatur, quare minime assentior iis, qui nescio quam indolentiam magnopere laudant, quae nec potest ulla esse, nec debet. Quamvis vero nota mihi sint nomina eorum, quos latenter mordet in his Dialogis Bacchinius, non commemoranda tamen esse arbitror, quod non sint ex oblivione, in qua jacent, eximenda, & quod abuti lectoris patientia viderer, si exponerem quanta in turba, quantaque in confusione rerum omnium Parmae aliisque in Benedictinorum Monasteriis (quis enim isthaec curat?) tum viveretur. Portum quietis & tranquillitatis plenissimum cum invenisset Bacchinius apud Mutinensium Ducem, multa eodem tempore meditabatur, quae Musis consecraret. Factus historiographus non pauca collogit monumenta, quae ad historiam Atestinorum pertinebant. *De sistorum figuris ac differentiis* ea praeulit, quae satis antiquitatis peritum illum

ostendebant. Probavit praesertim religiosissime cultam a Romanis fuisse Isidem, & Sistrum huic Deae sacrum, & Romae iis temporibus inventum, de quo Leo Strozzius Bacchini sententiam sciscitabatur, non Aegyptium, sed Romanum fuisse opus, elaboratumque circiter Commodi Caesaris tempora. Scriptitavit quoque accurate de aliis antiquitatis monumentis, & extat epistola ejusdem ad Magliabechium de Scipionis numismate quodam, cujus antiquitas merito a nonnullis in dubium vocabatur. Sed velim ut haec, & quae de Benedicto Accolto rogatu Magliabechii ipsius exaravit, cum Parmae ejus *de praestantia virorum sui aevi* Dialogum ederet, sic legas, ut res tenues atque inopes, praesertim si cum iis conferas, quas postea vulgavit Bacchinius. Ipsa singularia beneficia quae pro se & pro fratre Caesare Antonio Jurisconsulto obtinuit a Rainaldo Atestino, qui anno MDCXCIV. ad Mutinensis Ducatus gubernaculum accesserat, magnopere ipsam excitabant ad laborem & laudem; & magna quidem fuerunt, quae biennio post in lucem emisit de rebus Monasterii S. Benedicti Padolironensis. Ne putes jejune unius

unius Monasterii historiam, quam paucos noscere interfit, a Bacchinio narrari. Quoniam Monasterium Padolironense (sic enim appellatur, quod inter Padum & Larionem illud situm sit) an. septimo supra millesimum originem habuit a Tedaldo, qui fuerat avus Matildis Comitissae, auctumque plurimum a Bonifacio illius filio, & divinis beneficiis affectum ab ipsa Matilde, ut in maximis impensii curis id unum spectare videretur, non dubitavit Bacchinus sic conjungere narrationem rerum gestarum hujus heroinae, hominumque insigniorum, quorum opera, & consilio illa uti solebat, cum rebus ad suum Monasterium pertinentibus, ut non multum desideres historiam contextam illorum temporum. Hinc quereberis de horum temporum iniquitate, quibus hominum avaritia atque ambitio miscebat & turbabat omnia, quorumque sordes cum clarissimae feminae splendore permixtas videas, illinc praedicabis miram ejusdem feminae prudentiam, constantiam, atque fortitudinem, & perpetuum studium in sacra, sacrorumque antistites; & in omnibus iis, quae narrantur suspicies Auctoris diligentiam, qui

ex annalium monumentis , atque ex antiquissimis tabulariis , certissimisque chartis materiam operis conquisivit . Quanquam multarum opinionum levitatem confutare potuisset (erant enim qui aut originem , aut jura trahere se arbitrabantur a Matildis stirpe , aut ab iis , quorum summa , illa Imperante , fuit potestas , & nemo ignorat assentatorum laudationibus historiam rerum nostrarum factam esse mendosiorē) maluit tamen esse propriae sententiae narrator , quam alienae corrector , quod quidem valere debebat ad ipsum liberandum ab omni odio atque molestia . Sed extitere potentiores quidam , qui offensi animi signa Bacchinio dederunt , & qui gravius minari ipsi visi sunt , si porro in incepto persisteret . At homo veritatis amantissimus , qui nunquam aspersus fuit vel minima assentationis suspitione , minime a se impetrare potuit ut ad aliorum voluntatem scriberet . Itaque de perficiendo opere omnem cogitationem abiecit , jure meritoque sibi plaudens , quod in prima , quae extabat , ejusdem parte plura aut incognita aut obscura de Matildis vita optimo in lumine collocasset .

set. Quod studium rerum ad historiam, ut dicitur, medii aevi etsi serius arripuerat, tamen tantum in eo progressum fecit, ut non facile reperire possis quod ei fuerit incognitum. Quare his ipsis de rebus saepe consultabatur, cumque invitaretur ad historiam Atesinorum conscribendam, multis, uti supra commemoravimus, collectis monumentis, sic nobilissimae Italarum familiae originem subtexuit, ut ex iis clarorum Principum propagines possemus cognoscere. Quanto haec usui fuerunt Muratorio dum magnum sane opus conficeret de Atesinis antiquitatibus, grate ac lubens ipse declaravit. Aliquid etiam huiusmodi antea concinnaverat Bacchinius de Farnesiorum familia ad confutandum magis Theodorum de Amadeno assentatorum impudentissimum, & ad dirimendam controversiam ea de re ortam inter ipsum & hominem Jesuitam, quam ad ejus familiae historiam contexendam. Sed majora etiam aggrediendi cogitationem suscepit postquam Casinense tabularium invisit, invitante, qui illi Monasterio praeerat, Hippolyto Penna, & pecuniam ad iter faciendum suppeditante Erasmo Gottola.

Diu illum pene stupidum detinuit magna antiquissimarum chartarum vis, per quas, ut ille ad Magliabechium scribit (1) historiam medii aevi plurimum a se illustratum iri sperabat. Magni pretii etiam codices in Bibliotheca invenit, atque toto illo tempore, quo Casini commoratus est, multorum non modo discendi, sed etiam scribendi studia commovit. Praetereo, quae itinere illo, & praesertim dum Romae & Neapoli fuit, inter ipsum & summos viros familiarissime dicta,

(1) *Del resto è stata tanta la soddisfazione da me provata nel passato mio viaggio, che mi pare di 46. anni che tengo d'età, d'aver vissuto i soli cinque mesi passati. In Monte Casino ho rivoltato quell'Archivio veramente venerabilissimo, nel quale quando non vi fosse altro che i Diplomi spettanti ai Principi Longobardi coi quali il Pellegrini stampò la loro serie, questi basterebbero per renderlo stimabilissimo: ma quanto più lo rendono tale gli originali di tanti Imperatori e Pontefici, oltre il transunto di altri che si leggono nel registro di Piciro Diacono! Ho veduto inoltre carte di Conti e minori Signori di parti diverse, dell'Apulia, della Campagna, della Calabria, d'alcuni Re di Sardegna, come ancora d'alcuni Prefetti per gli Imperatori Costantinopolitani da recar lume alla politica ed all'istoria de' tempi bassi. Di tutto ciò spero se ne darà presto il saggio, quando comparirà ciò che deve esser il frutto di questo mio viaggio. Epist. dat. Non. April. 1697.*

scripta, communicata sunt, de quibus referre solebat ad Magliabechium, cujus amicitiae vel occultiora credebat. At illud minime omittendum puto nihil non egisse Aguirium Cardinalem, ut Romae & apud se retineret hominem, cujus miram doctrinam eruditionemque suspicere, humanitatemque amare omnes debere palam praedicabat. Cumque ei persuasisset, ut ad munus quoddam (custodem vocant Vaticanae Bibliothecae) aspiraret, decedenti de stadio pene iratus est, quod diceret sic esse currendum, ut vincamus eos quibuscum certamus, praesertim si valemus viribus ad eosdem supplantandos vel manu depellendos. Sed Bacchiniùs otium tranquillitatemque spectans Mutinam rediit, magno sane praemio donatus ab illius civitatis Duce, quod competitricem scenam Romae habere recusaverit. Nam illum bibliothecae, quam in ipsis suis aedibus Musis dedicare voluit, praefecit. Magni sane laboris ac temporis fuit ex inordinato in ordinem immensam prope librorum copiam adigere, atque hanc causam fuisse arbitror, quare e manibus deposuerit inchoatum hodoeporicon,

quod imitatus Mabillonium sapientissimus rerum inquisitor in vulgus edere meditabatur. Omnino Bacchinius sibi beatus esse videbatur, quod abdere se posset in bibliothecam rarissimorum codicum refertissimam, cumque unum aut alterum in manus sumeret, veniebat in cogitationem aliquid cudendi quod praeterrarum rerum historiam illustraret. Constat demum in *libro Pontificali Agnelli*, qui vitas continet Pontificum Ravennatum. Vixerat scriptor ille saeculo IX. & quamvis barbare loquatur, nec delectu aliquo nec sapientia iudicet, sed impetu nonnunquam & quadam temeritate (favebat enim Schismaticis eorumque infectus erat erroribus) & non pauca etiam aniliter & superstitiose dicat, & inerudita atque absurda respondeat cum sacrarum litterarum interpretem agit, & saepe etiam ad maledicta sui perpetuus laudator dilabatur, nihilo tamen minus dignum illum putavit, cui multum studiorum suorum impertiret. Porro magnum onus suscepit, cum omnia non solum ab Agnello prolata, sed etiam illustrium Scriptorum de Rubeis, Baronii, Ughellii, Vossii, Papebrochii, aliorumque sen-

téntias, quæ ad Ravennates Episcopos pertinent, perpendere sibi proposuisset; quod quanti faciendum, sit ii judicabunt qui norunt latissime patuisse historiam Ravennatis Ecclesiæ; & ad multas ac præsertim Romanam pertinuisse. Ipsa præfatio libri declarat quod jus esset Romanorum Imperatorum in Ecclesiis sacrorumque antistites, fontesque multarum disputationum aperit, qui jure Pontificio & legibus continentur. Ordo seriesque Episcoporum, eorum gesta insigniora, habita ab iis concilia, templa lautius aedificata; peculiare quidam ritus; superiorum temporum consuetudines; verborum Gothicorum quorundam explicatio, omnia denique illa quæ spectant ad Gallam Placidiam, & ad Longobardorum in Italiam introitum, & innumera hujusmodi alia ita opportune atque eruditè notantur a Bacchinio, ut nihil possit esse dulcius ejus opere antiquitatis amatoribus. Quot errores emendantur! quot res, quæ erant aut obscuræ aut incertæ, aperiuntur atque confirmantur! Difficile est quod cum spe magna sis ingressus id non exequi usque ad extremum. Itaque cum intellexisset Bacchinus,

ubi primum accessit ad illustrandum Agnel-
lum, vix fieri posse ut Ravennatis Metropo-
lis originem inveniret, nisi de universa Eccle-
siae hierarchia ejusque initiis separatim tra-
ctasset, omni studio ad hujusmodi opus con-
ficiendum incubuit. Nemo vero ignorat hac
de re summa adhuc eruditorum hominum
dissensione certari, ut eorum molestum sit di-
numerare sententias. Plerique arbitrantur ad
imperii Romani normam constitutam hierar-
chiam, & Apostolos ipsos in condendis Eccle-
siis civilium provinciarum, magistratuumque,
qui ipsas gubernabant, rationem habuisse;
sunt qui putant spectatam etiam urbium ce-
lebritatem atque frequentiam, quorum alio-
rumque sententias cum ad examen revocaret
Bacchinius, in tot incurrere difficultates sen-
sit, ut ipsas deferendas, ac novam quamdam
in medium proferendam judicaverit. Tripar-
tita est divisio operis. In altera quidem de
statu, in quo Apostolorum aetate Romanum
erat imperium, sic differit, ut nec aptum nec
congruens illud fuisse probet condendis Ec-
clesiis, quemadmodum conditas ab iisdem A-
postolis fuisse scimus. In altera persequitur

Italicorum Metropolitaram origines, de Ravennati separatim disputaturus in tertia. Pro certo habet Bacchinius Apostolos in instituendis Ecclesiis jurisdictionem spectasse tribunalium Hebraeorum, quae *synedria* appellabantur, sic ut ubi frequentiora atque illustriora eadem erant, principes ibidem condiderint Metropoles, quae in eorum locum successisse videntur. Hinc rationem reddit, quare Alexandrina Ecclesia ceteras Orientis omnes, & vel Antiochenam ipsam, quamvis antiquiorem, dignitate superaverit. Quoniam vero ad suam bene constabiliendam sententiam necesse esse putavit non formam modo exponere rei publicae Hebraeorum, huiusque administrationis eo maxime tempore, quo vivebant Apostoli, sed ad fontes usque eorum juris ac legum pervenire, & rem a capite, ut dicitur, arcessere, tanta eruditionis copia argumentum hoc tractavit, tantoque acumine quaesita ad rem suam accommodavit, ut si ex iis, quod vult, plane non efficiat & cogat, delectet tamen ipsa varietate rerum, seque plurimum arte valere ostendat ad id, quod in quoque verisimile est, eliciendum. Nume-

fandi ei , ut ita dicam , fuerunt Hebraei , quibus
diversas Romani Imperii Urbes frequentabant ,
ut ex eorum majori minorique numero quasi
gradus dignitatis celebriorum Metropoleon
conjiceret . Hinc principem locum tenuisse ait
Alexandriam , secundum Antiochiam , tertium
Hierosolymam , quartum Ephesum , & sic de
ceteris , ut tandem gradum faciat ad Occi-
dents Ecclesias . Romanam quidem ceteris
praeferri debuisse ait , quod in Urbe tan-
tummodo magna vis esset Judaeorum , qui
suis regebantur legibus ; idcirco vero factam
illam fuisse universarum caput & matrem ,
quod ad repraesentandam Judaeorum & Gen-
tium conjunctionem omnium esset aptissi-
ma (1). Sic condita Romana Ecclesia , se-

(1) Rem Lectori gratam me facturum arbitror si ipsis
Bacchinii verbis summam totius operis hoc loco exponam.
*Fu da S. Pietro , ait ille , eletta Roma per mettervi la pri-
ma Cattedra , poichè ella sola era proporzionata a congiungere
l'Occidente Cristiano di soli Gentili , con l'Oriente misto di
Giudei , e di Gentili . Non l'era e per ragion del sito , e
per ragione della suddetta missione nè Antiochia ; nè Alef-
sandria , nè l'altre dell' Asia , o dell' Europa Orientale , e
meno di tutte l'era Gerusalemme , Chiesa con le a lei for-
tissime della Giudea , composta di soli Giudei erediti . Gli*

rius in Italia esse coeperunt Metropoles, & vel antiquissimae, ut sunt Mediolanensis, Aquilejensis, & Ravennas ortae putantur Constantini Magni aetate, quo quidem tempore

editti di Claudio, e la prodigiosa moltitudine d'Ebrei col loro Sinedrio in Alessandria furono cagione, che quella Chiesa fosse anteposta a tutte le altre Giudaico-Gentili. A tale sistema si conformò Pietro, e con lui gli Apostoli fondando le prime Chiese. L'Occidente non poteva unirsi in una sola Chiesa coll' Oriente, con la stessa regola, poichè in esso nè erano frequenti i Giudei fuori di Roma, nè in Roma avevano i privilegi conceduti ad Alessandria, & ad instar d'Alessandria, alle Province Orientali. Fondandosi dunque Gerusalemme si fondò la Metropoli delle Chiese Giudaiche. Fondandosi Antiochia si fondò la Metropoli prima per ragion di tempo, di Chiese, in cui i Gentili convertendosi, passavano nel Giudaismo Cristiano. Fondandosi Alessandria si fondò la Metropoli prima per ragion di privilegi Giudaici conceduti da Claudio. In Antiochia creossi il Sinedrio Cristiano differente dal Gerolimitano primo di tempo, e però Pietro ne fu l'Autore immediato in persona: in Alessandria si fondò il Sinedrio Cristiano primo di dignità Giudaico-Gentile, e però anche questo riconobbe da Pietro i suoi principj. L'altre Chiese dell'Asia, della Macedonia, e dell'Acaja, e di Creta sullo stesso sistema Giudaico de' Sinedri Provinciali, ad esempio de' fondati da Pietro, furono colla loro Metropoli fondate, e se ne hanno i riscontri nella Scrittura. La Chiesa di Roma non poteva fondarsi da altri, che da quell'Apostolo, che fosse il principio dell'anità Giudaico-Gentile, e questi fu il solo S.

ad civilis reipublicae formam illae institutae videntur. Quamvis ex multarum reconditarumque rerum cognitione effloruerit ac redundaverit totum hoc Bacchini opus, adeo tamen illud Dupinio displicuit, ut ab eodem exagitando minime abstinuerit (1). Se quidem contemni & despici minime passus est Bacchinius, quamvis averso animo esset a contentionibus; quare facile a scriptoribus ephemeridum litteratorum Italiae obtinuit, ut sui defensionem arriperent (2). Sed eorum oratio in explicanda magis confirmandaque Bacchini sententia, ponendisque ratione atque ordine sub uno adpectu iis, quae dispersa atque infinita erant, quam in refellendo Dupinio versatur. Hic enim ridendi magis quam pugnandi argumentis ac rationibus

Pietro . S. Paolo come Apostolo speciale de' Gentili concorse alla grand' Opera, ma non fondò l' unità , che era come il centro nel solo Pietro , e da lui derivabile ne' successori . Ed eccovi in ristretto ciò , che più ampiamente troverete provato nella mia già citata Dissertazione delle Origini dell' Ecclesiastica Gerarchia , a cui mi riporto , e che dovrà confutare chi vorrà impugnarmi .

(1) In postremo vol. Biblioth. Eccles.

(2) Vid. vol. 22. p. 27. & 23. p. 181.

occasionem sibi dedisse Bacchinium impudenter sane dictitabat. Habebat etiam Bacchinus aliorum doctorum hominum praesidium, quod opposeret Dupinii auctoritati, & maximi quidem momenti ac ponderis esse videbantur laudes, quas eidem operi impertivere Jo. Albertus Fabricius, & Actorum Lipsientium, ut de nostris fileam, scriptores (1). Ex quo evenit ut tum multi eruditorum in diversas abierint sententias. Paulo post quam haec ediderat Bacchinus, imprimendas curavit ineditas epistolas & opuscula quaedam Isidori Clarii Episcopi Fulginatis, cui tamen operi suum nomen minime adscribendum putavit: posuit autem illud Mauri Piazzii Abatis Parmensis, ut amicum, qui quondam sibi afflicto & jacenti fidem & dextram porrexerat, gloriolae insignibus ornaret. Eodem tempore multa alia excudebat, quae latebant in thesauris suis; ex quibus aliquid aegre deprompsit, ut concederet Josepho Olgiato Episcopo Novocomensi, cui nihil negare posse videbatur. Dolens Bacchinus impudentiam haere-

(1) Act. an. 1705. p. 334.

ticorum , qui ea , quae maxima sunt in theologia , tractare auderent , cum ipsa nescirent , aut perversè didicissent , evellendam , si fieri potuisset , importunitatem ex intimis eorum mentibus suscepit libro , qui confutaret , *pessimas* sane , Jacobi Piceninii adversus Romanam Ecclesiam lucubrationes . Ajebant enim auctorem hunc , cum amentatas hastas a peritissimis suorum accepisset , tanta vi atque arte illas torquere , ut adversariis de victoria omnino esset desperandum . Multa profecto , & magna , & difficilia sunt ea , quae sunt theologo necessaria , qui dolos & fallacias haereticorum patefacere aggreditur , sed abunde satisfactum a Bacchinio fuit toti huic disputationi , ut qui ejus *epistolas polemicas* legerit (sic enim liber inscribitur) illum unum ex omnibus maxime fuisse aptum ad convincendos errores facile sit judicaturus . Sed ut propius ad epistolarum argumenta accedamus , exponit Bacchinus in prima , quomodo haeretici de fidei controversiis disputare soleant , quod ad eorum malas artes noscendas opportunissimum videbatur . Hinc exempli causa contorta & aculeata sophisma-

ta, fallacesque conclusiunculas Piceninii in aperto ponit, ac satis declarat sibi in animo esse omnes illius scrutari sordes; & eidem suisque excutere illam superbam jactationem. Ab hoc quasi aditu januaque patefacta reconditiōes theologiae recessus penetrat; deque sacrarum litterarum ac Traditionum auctoritate sic disputat, ut qui has respuunt in definiendis Fidei controversiis, ad veritatem caeci videantur; cum vero iudicium de his omnibus controversiis esse probet penes Ecclesiam, signa & notas ostendit, quibus vera a falsa queat internosci. Hinc mira doctrina & acumine solvit captiosa argumenta haereticorum ad divini iudicis vim auctoritatemque declinandam. Postquam haec scripserat, quae tribus continentur epistolis, moritur Piceninius, quare alium adversarium refutandum suscepit, qui Piceninium ipsum fama dignitateque aequare dicebatur. Binae, quas ad hunc dedit, epistolae spectant praesertim ad *Primatum* Romanorum Pontificum, quem necesse fuisse a Petro in ejus successores propagari certissimis argumentis probat. Multa alia hujusmodi inchoaverat, quae e manibus

deposuit non ad laborem (animus enim illius se exercendo levare videbatur) sed ad molestias vitandas. Haecenus de Bacchiniis editis scriptis. Plura sunt inedita, quorum indicem ad calcem rejicimus. Profecto multo maiora ipse vulgasset, ni semper illi fuisset quaedam fortuna fatalis, ut non tam gloriae, quam famae causa dimicare debuerit. Romam venit an. MDCCV. ut defenderet suum de Agnello Ravennate opus adversus censorum calumnias; & ni palam & acerrime pro eo pugnassent illa duo Cardinalium Collegii lumina Thomaeus & Ferrarius, & homines doctrinae laude excellentes Fontaninus & Passioneus illius imprimendi praecisa eidem facultas fuisset (1). Deseruit postea Fontaninus clientem suum (nemo enim illo proclivior erat non modo ad dissuendas, sed etiam

(1) Haec ad Magliabechium. *Il libro che le fu trasmesso è stato per me un gran tormento: la fatica in farlo, le spese, i viaggi, le contradizioni mi hanno disingannato, e di qui avanti non penso più di mettermi negli affari passati. Epi. dat. VII. Id. Jun. 1709. Per mia trattenimento ho fatte alcune riflessioni sopra la controversia fra' Padri Laderchi e Caspali, ma per l'esperienza passata non penso stamparlo.*

etiam ad diffecandas amicitias) quod plures deditse sibi tanquam anfas ad reprehendendum diceret in iis, quas adversus Picenium scripsit epistolas. Fontaninii partes secutus est homo e Dominicana familia, & ut ex Bacchini litteris conjici potest, uterque egisse graviter, auctoritate, & offensione animi acerbata videntur, ne in lucem hominum opus illud exiret. In oblatiis criminationibus depellendis tantum tribuit Bacchinius adversariis suis, quantum hominibus doctis, qui interdum praejudicatis opinionibus judicant, tribuere necesse est. Itaque cum se minime peccasse gauderet, plurimum etiam gloriari videbatur, quod ab assentatione quadam esset alienus, quae non potest non nocere iis, qui illam allecant atque iuvant. Quod si in scena, in qua rebus fictis & adumbratis loci plurimum est, tamen verum valet, si modo id patefactum est atque illustratum, quid in rebus ad religionem pertinentibus fieri oporteret, quae totae veritate sunt perpendendae? Est in manibus Bacchini liber, ex quo quisque facile judicare poterit quid ipse senserit de amplissima Romanorum Pontificum

potestate ac juribus. Quoniam mos ei erat quoties sententiam rogabatur, nec temere dicere, nec astute reticere, facile ab ipso Magliabechius responsum tulit, quid de tota illa quaestione sentiret, quae erat inter Laderchium, Moppium & Capassium de SS. Crescentii & Sociorum Martyrum actis. Ex hac inquisitione crevit *Hypericis* quaedam, quae ad dirimendam controversiam plurimum conducere potuisset. Sed obstitit illius impressioni Cosmus III. Magnus Etruriae Dux, qui se libenter praebebat credulum Laderchii somniis, & verba sibi dari in hujusmodi rebus facile patiebatur. Quae idcirco referre libuit ut intelligatur studium cognoscendi semper aliquid atque discendi, quod ceteris asserre solet requiem plenam oblectationis, causam saepe fuisse Bacchinio molestiarum atque sollicitudinum. Miraberis vero hominem totum occupatum in studiis, quae admirabilem utilitatem reipublicae, & familiae, sibi que dignitatem parere debebant, cujusque operam quotidie requirebat ipsa Ducis bibliotheca, coactum a suis fuisse procuracionem rerum Monasterii, in quo degebat, suscipere. Cum igi-

tur ei fundus esset inspiciendus, aut mandan-
 dum aliquid procuratori de agricultura, aut
 imperandum villico, aut paranda ea, quae
 ad victum familiae essent necessaria, aegre
 distrahebatur a libris deliciis & amoribus suis.
 Sed quidvis perpeti malebat, quam conqueri
 de majorum iniquitate; itaque deliberavit bi-
 bliotheca se abdicare, ne quid de sua opera
 Monasterio detraheret. In maximo autem do-
 lore hoc solatio utebatur, quod viam quod-
 ammodo sterneret futurae gloriae Ludovici
 Muratorii, quem vel ab an. MDCC. sibi suc-
 cessorem in hoc honorificentissimo munere de-
 finasse videbatur. Litterarii quoque conven-
 tus, qui apud se celebrabantur, eadem de
 causa fieri desierunt, quamvis ejus cubicu-
 lum quasi ludus quidam & officina multarum
 disciplinarum patuerit semper industriis ado-
 lescentibus. *Hic tu ostendas oportet patriae lu-
 men ingenii consiliique tui* (ita aliquando Rai-
 naldus Dux allocutus est ipsum Bacchinium
 Bononiam cogitantem, a cujus civitatis Senatu
 anno MDXCII. declaratus fuerat sacrarum
 litterarum magister) & *consulas litterarum di-
 gnitati, quam perversa institutione plurimum im-*

minutam dolemus. Tum Bacchinius condidit *Manuductionem* quamdam *ad philologiam Ecclesiasticam*, quae quamvis typis minime impressa fuerit, plura tamen ejus extant exemplaria, quae usui esse potuere verae gloriae cupidis adolescentibus, quanquam innumerabiles fere de his rebus sint libri neque additi, neque obscuri. Sed ut plerumque mutabiles sunt potentiorum voluntates, Rainaldus qui antea mirum in modum favere studiis dignitati, ac gloriae Bacchini videbatur, alienati ei animi signa dedit, cujus rei haec una potuit reperiri causa, quod Bacchinius ipse eo tempore, quo Abas rexit (& hac quidem dignitate decoratus fuit anno MDCCVIII. in majoribus comitiis, quae Patavii habita fuere) Monasteria Mutinense & Regiense, multis in rebus se acerrimum defensores jurium suae familiae praestiterit. Tum Parmam cogitare coepit, sed eo redeundi negata eidem fuit potestas, quod illius civitatis Dux ipsum auctorem fuisse suspicabatur cujusdam operis, in quo erat refutatio fabularum quarumdam de origine & antiquitate ordinis Constantiniani. Tum ad gubernaculum Monasterii Bobbiensis

accessit, ex quo cum discessisset valetudinis causa (aer enim crassus & humidus offunditur loco illi) ad ipsum amplius redire non potuit, quod Sardiniae Rex, ejus imperio subiicitur, alienigenas ab hujusmodi gubernaculis removendos existimaverit. His casibus non potuit non commoveri Bacchinius; nec fuisset id humanitatis illius. Sed non egebat medicina; se ipsum consolabatur, & maxime illo solatio, quod studia praebere solent. Itaque quamvis aeger Patavii diu fuerit, ita distinebatur continua doctorum virorum consuetudine, cura ordinandi tabularium Monasterii ad S. Justinae, multisque ostendendi antiquitatis iter, ut nunquam minus otiosus fuisset videretur. Cum consiliis Vallisnerii, in quo acquiescebat, plurimum levatus fuisset, ut Deus aliquis Medicinam sibi fecisse videretur, Ferrariam venit, mox Bononiam ad exercendum Doctoris munus, quod magna cum prece ab eo petierant Bononienses, plurimum etiam aucto stipendio, quod initio ei fuerat decretum. Sed illa incommoda valetudinis, quae consanuisse videbantur, recruderunt (1) &

(1) In epistola quadam ad Jo. Baptistam Recanatam

eum animus ejus se collegisset, tum agnovit nil nisi de morte sibi cogitandum esse. Cui censemus cursum ad Deum faciliorem fuisse, quam homini, qui cum continuis jactatus fuisset fluctibus, gravitatem suam perpetua cōstantia aequabilitateque roboravit, qui honores & vel amplissimos oblatos a Rom. Pont. recusavit, & qui omnes actiones suas sic moderabatur, ut quidquid in eo perspectum sit, hoc dignum spectatu arbitremur? Utinam plures Baccinii similes haberemus, in quibus minus omnium doctrinarum atque virtutum quasi concentus atque consensus esset, & ex quibus ceteri exemplum, nos uberem scribendi laudandique materiem capere possemus. Obiit vir immortalitate dignissimus Kal. Septēbris an. MDCCXXI. & in Bononiensi templo, quod S. Proculi dicitur, sepulcri monumento donatus.

dat. Kal. Sext. an. MDCCXXI. ait. Sarà un mese io circa che io passai da Ferrara quà per fissarvi la mia dimora, servendo questa Università nella cattedra di sacra scrittura. In questo tempo però sono sempre stato ammalato; e benchè ora mi trovi con qualche miglioramento, lo sono tuttavia.

OPERA EDITA.

Orazione Epicedia per Madama Serenissima Margherita Medici Farnese nel solenne funerale celebrato in S. Sisto di Piacenza composta e detta da D. Benedetto Bacchini Casimense. *Piacenza 1679.*

Le cagioni e gli effetti dell' unione di S. Nicola di Tolentino con Dio. In Pavia 1682.

Giornale de' Letterati Tom. IX. *Sex priores editi sunt Parmæ, reliqui tres Mutinæ; omnes vero in 4.*

Heleneæ Lucretiæ, quæ & Scholastiæ, Corneliæ Piscepiæ Virginis pietate & eruditione admirabilis Ordini D. Benedicti privatis votis adscriptæ opera quæ quidem haberi potuerunt &c. Parmæ typis Hippolyti Rosat. 1688. in 8.

Saggi d' Anatomia; ne quali chiaramente si spiega la struttura degli organi del corpo animato, e le loro operazioni meccaniche secondo le ipotesi nuove di N. Dottore di medicina tradotte dal Francese nella lingua Italiana dagli Autori del Giornale di Parma. Parma 1688. *Vetustius quoque & Parmæ sæpius milissimum opus recusum; ejus interpretationem fecit Bacchinius invitante Roberto Carmelita.*

Dissertatio in numisma Scipionis Africani. *Exiit in Vol. III. Ephemerid. Parmensium. Inscribitur Magistro bechio, ejus laudandi nominandique nullam prætermissibat occasionem Bacchinius, qua de re a nonnullis reprehensus est.*

De fistorum figuris ac differentia ad Illustriss. D. D. Leonem Strozza ob Sistri Romani effigiem communicatam dissertatio Auctore D. Benedicto Bacchino Monacho S.

Benedicti apud Divum Jo. Evangelistam S. Officii Consultore, ac Serenissimi Raynucii II. Parmae Placentiae ec. Ducis Theologo. Bononiae 1691. ex typographia Pisartiana in 4. *Recusa una cum dissertationum ac novis Jacobi Tollii Trajecti ad Rhenum 1696. ac demum in Vol. VIII. Theatri antiquitatum Romanarum pag. 407.*

Anonymi Dialogi tres. I. De Constantia in adversis. II. De dignitate tuenda. III. De amore erga Rempublicam: Mutinae 1692. typis haeredum Cassiani in 22. iterum Parmae typis Josephi Rosati 1728. in 12. A Jacobo Cantellio Ducis Mutinensium Geographo, inter quem & Bacchinium summa erat voluntatum, studiorum, sententiarumque consensus, inscribitur liber hic Marcello Malpighio tum S. P. Archiatro.

Dell' Istoria del Monastero di S. Benedetto di Polirone nello stato di Mantova lib. V. All' Eminentiss. Sig. Card. Celestino Sfondrati ec. Modena 1696. in 4.

De Ecclesiasticae Hierarchiae originibus Dissertatio Mutinae an. 1703. typis Antonii Capponi in 4.

Isidori Clarii ex Monacho Episcopi Fulginatis Epistolae ad amicos haecenus ineditae ex autographo descriptae ec. una cum aliis duobus ejusdem Isidori opusculis alias seorsim editis, idest: de modo divitiis adhibendo, & ad eos, qui a communiori Ecclesiae sententia discessere, adhortatio ad concordiam. Mutinae an. 1705.

Agnelli, qui & Andreas Abbatis S. Mariae ad Blanchesnas, & S. Bartholomaei Ravennatis liber Pontificalis, sive vitae Pontificum Ravennatum, quas Bened. Bacchinius Abbas S. Mariae de Lacroma Ord. S. Bened. Cong. Casin. ex bibliotheca Estensi eruit, dissertationibus & observatio-

nibus, nec non appendice monumentorum illustravit & auxit: Mutinae 1708. typis Antonii Capponi T. II. in 4. & iterum Mediolani 1723. in fol. apud Muratorium.

Epistola de actis SS. Crescii & Sociorum Martyrum Scripta an. 1710. ad Eumenem Parthenium, sub quo nomine aere putatur Virginius Valsechius collega & amicus Bacchini.

Cum edidisset Bacchinus Benedicti Accolti Aretini opus de prestantia virorum sui aevi, quaedam eidem addidit de suo Editor etiam fuit quorundam scriptorum Aprosii, idque hortante Magliabechio.

Dissertatio in chartam donationis Opilionis quae adservatur Patavii in Archivio S. Justinæ. Extat in vol. III. collectionis Calogerianæ.

De tollenda a Catholicorum scriptis hybrizomachia. Extat in opere Josephi Ursii quod inscribitur. Considerazioni &c. Modena 1735.

Epistola ad Antonium Magliabechium de veterum membranarum autenticitate adversus scriptores Aetorum Trevolientium. Multi dubitare videntur num Bacchinio hæc epistola sit tribuenda. Vid. Mazzuchellium.

Lettere Polemiche contro il Sig. Giacomo Picenino ministro in foglio opera postuma del R. P. D. Benedetto Bacchini Ab. Cassinense con le censure alle medesime, e le osservazioni su di esse dello stesso A. ec. in Altorf 1738. T. II. in 4. Opus Mediolani typis impressum fuit cura Sixti Rocci Abatis Cassinensis, qui honoribus & doctrinae gloriæ apud suos floruit, quique omnia studia & officia Bacchinio se debere proficiebatur. Quoniam singulari ipse fuit diligentia in recensendis ineditis Bacchini ipsius scriptis, ne actum agamus, quod vetatur veteri proverbio, ejus verba exscribemus.

OPERA INEDITA.

Manuductio ad philologiam Ecclesiasticam, tom. 2. in fol. in qua præmittuntur necessaria ad Chronologiam, inde

singulis annis Aerae Christianae, Chrisis philologica exercitii causa adhibetur, per tria priora saecula. Utebatur Auctor hac Manuductione ad instituendos Ecclesiasticae Philologiae Candidatos, apud quos ejusdem Manuductionis plura exemplaria inveniuntur.

Dissertatio de Motionibus Mercurii in Barometro, in qua causa ascensus & descensus Mercurii in fistula physice explicatur, reddita ejus rei ratione, & de aeris pondere ad tempestatum mutationem disputatur.

Ad nodum praedestinationis Cardinalis Sfondrati dissertatio sub nomine Barachiae Scutenfis, idest Benedicti Parmensis, in qua ostenditur, quae minus Theologica in eo opere videntur, tentamina potius imperfecta, & adversaria ejus eruditissimi viri esse, eaque temero nimis ab aliis edita, multis adjectis, multis deletis, & imputatis, ipse prae aegritudine, qua extinctus est, ante finitam editionem, vix de ea re cogitante. Plura idcirco in eo opere esse, quae contradictiones efficiunt, alia imperfecta relicta, nonnulla repetita, quae quidem non admisisset vir tantus si prae valetudine licuisset, ideoque rite non posse opus illud Eminentissimo Sfondrato tribui.

Hypererisis ad Crisim P. Magistri Gherardi Capassii, & Anticrisim Patroni Eadarchiani super Acta Sanctorum Crescentii, & Sociorum MM., in qua absque studio partium, quid uterque rite, quid secus dicat perpenditur, & perstringitur abusus, qui nimium invaluit, quo in litterariis & maxime sacris quaestionibus res agitur inter doctos Catholicos convitiis, sarcasmatibus, & calumniis, ut a summo Pontifice remedium opportunum impleretur pro publica Catholicorum Scriptorum dignitate. In fine referuntur Acta ipsa cum notulis, 1709. Hanc etiam Bac-

chini lucubrat. referunt, & laudant iidem Auctores Eph. Venet. tom. 3. p. 191. & pag. 221. usque ad 251. tamquam insignem, ac luce dignissimam, cum in ea Bacchini non minus doctrinam, quam acuitatem, ac modestiam, ut ei semper in more fuit, ostendat.

De Viis antiquorum Romanorum per Italiam, quod tamen opus cum Bacchinius primaeva aetate scribere coepisset, aliis postea operibus intentus minime absolvit.

Epistola sub nomine Eleutherii Illicini a S. Irene, ad Illustrissimum D. N. contra librum Patris Germonii de Haereticis veterum MSS. corruptoribus pro D. Petro Coustant Monaco Ordinis S. Benedicti Congregationis S. Mauri. Auctores Ephem. Venet. Literat. Ital. tom. 35. p. 371. Il Sig. Marchese Maffei aveva donato all' Amico Bacchini il libro del P. Germon, e questi ne scrisse quest' Opera, ampiamente, e dottamente confutandolo; ma veduta la risposta del P. Coustant, ne sospese la pubblicazione, e mandolla al suddetto Sig. Marchese che la se passare in Francia, e n' ebbe l'approvazione sì dallo stesso P. Coustant, che d'altri Letterati di Parigi, e credesi, che ancora ella sia in Francia.

Observationes in Regulam S. P. Benedicti; & in Constitutiones Congregationis Casinensis, est liber in fol.

Ad Censuram, ob quas Romae non fuerunt approbatas litterae quinque contra Piccinum Calvinistam scriptae, Observationes.

De propositionum, & Doctrinarum Dogmaticarum qualificationibus, & recta qualificandi ratione, partes tres: Prima generalia argumenti principia explicat. Secunda, singulas quaelibet Concilii Constantiensis, in Wicleffi, & Has

atticulos censaras, & quasdam a recentioribus adjunctas regulas excutit. *Tertio*, quibus subsidiis Qualificatore munitionem esse oporteat, exponit.

Has praeterea Bacchini MSS. lucubrationes referunt & expendunt praeclaudati Auctores Ephem. Venet. Literat. Ital. saepe allegato tom. 25. artic. XIV. pag. 269. & seq. quas ipsis eorundem verbis hic transcribimus.

Scrittura sopra la Genealogia della Serenissima casa Farnese descritta dall' Abate Teodoro di Amaydeno. Demadeno el num. 12. (tom. XXXIV. pag. 308. Della sua vita narransi i motivi di formare questa Scrittura, dove anche l' Autore afferma di averne serbato copia appresso di se; altronde però intendiamo, che l' originale conservasi appresso il Serenissimo di Parma. Per altro certissimo egli è, che l' Amaydeno in quelle sue Istorie genealogiche afferma cose, che non hanno, nè aver possono fondamento veruno nè su racconti d' Istoric accreditati, nè su antichi documenti.

Victorii Presbyteri Antiocheni Interpretatio in Evangelium Marci e Graeco in Latinum sermonem translata.

Diario del Viaggio a Monte Casino: di queste tre Opere dal Sig. Muratori ce n' è stata comunicata la notizia.

Scritture due in risposta ad altre del P. Wolff Gesuita sopra affari politici allor vertenti, a richiesta del Serenissimo di Modena, appresso il quale anche si conservano.

Altra dotta e lunga Scrittura a difesa di un Principe d' Italia, a cui era conteso il possesso di Feudo nobilissimo e riguardevole: passò sotto il nome d' un gran Ministro, ora defunto, e ottenne il suo intento.

Tom. II. dell' Istoria del Monastero di S. Benedeto

di Polirone. L'Autore stesso l'accenna al num. XVII. della sua vita (tom. XXXIV. pag. 312.) come anche produce i motivi del non averlo dato alle stampe dopo il primo.

Annotazioni sopra l'Italia Sacra dell'Ughello. Essendo queste scritte in varj fogli, quà e là dispersi, non si sà come con gran rincrescimento del loro Autore, e danno della Letteraria Repubblica, si smarrirono.

Osservazioni in proposito della Giurisprudenza de' Secoli bassi, cavate dall'attenta lezione degli antichi Documenti, de' quali era il Bacchini avido ricercatore, anche queste si perdettero con grave suo spiacere.

Trattato della sincerità, e falsità de' Diplomi. Questo trattato è latinamente scritto, ed è indiritto al prelato Sig. Marchese Maffei, che serbalo, come cosa singolare, e di cui non v'ha forse altra copia, e come memoria carissima dell'Amico defunto.

Lasciò finalmente il P. Abate Bacchini molte Dissertazioni, e Diplomi, ed Atti, che trascriffe da varj Archivi... ed alcune raccolte di Documenti spettanti all'Istoria Monastica... e di questi preziosi tesori, egli n'era liberalissimo a' studiosi, ed amici, molti de' quali ne hanno fatto un assai buon uso, ma non tutti l'han corrisposto colla dovuta gratitudine, mentre neppur lo nominano, dove, e come dovrebbero per giustizia. Questi Documenti con molti suoi scritti dopo la sua morte portati a Roma sono stati riposti tra le cose di molto prezzo nella Biblioteca Vaticana. Ita illis sed haec Bacchini documenta, & lucubrationes, non utique omnia in Vaticana Bibliotheca, sed magna ex parte alibi nunc reperiuntur.

Inter ea autem, quae in lucem emittere cogitaverat

Bacchiniis, sed postea aliis emittenda concessit, sunt duo
haec egregia Opera :

Opus Historico-Dogmaticum contra Historiam Ecclesiasticam Basnagii .

Opus Dogmaticum contra nonnullos sui temporis Negatores .

Reliquit praeterea Bacchiniis sequentia opera MSS.

Quaestiones Politico-Morales .

Scriptum triplex, Italica lingua, quo demonstratur, Italiae Principes non potuisse, salva conscientia, contributionibus, multoque minus debuisse tot, tantisque, ab Imperatore, neve a Principum Germaniae Conventu anno 1692. gravari ad Caesareum Exercitum in Hibernis alendum; est in fol. pag. integr. 20.

In Epistolas Divi Hyeronimi notae. Sunt notae admodum eruditae, & ut plurimum historicae in omnes Epistolas primi tomi, quae sunt num. 49. secundum Mariani Victorini collectionem: & in 4. alias secundi tomi, quarum ultima est ad *Reperium*, sed imperfecta, quia aliquot hujusce lucubrationis paginae perierunt: superstites autem sunt num. 32. in fol. parvo; breves quidem plerumque sunt notae istae, utpote a Bacchinio tunc juvene exercitationis gratia compositae: sed postea amplissimum, itemque doctissimum Commentarium seorsum scripsit in Epistolam III. laudati primi tomi ad *Heliodorum*, quae est *Epitaphium Nepotiani*, & continetur paginis integris num. 16. in fol. magno: sed nec ista Commentatio est absoluta, pervenit enim tantum ad illa Hyeronimi verba: *Hoc idem possumus, & de isto dicere, qui Basilicas &c.*

Series Consulium, Pontificum, & Imperatorum, ad ve-

ram Ecclesiasticam Chronologiam, cum nonnullis notis historicis, usque ad annum 1198. quo Baronius Annales perdidit: est opus pag. integr. num. 50. Haec tria Bacchini MSS. ipsiusque calamo exarata, sunt apud me ex dono D. Hyppoliti Pugnetti, primi ejusdem Bacchini, ex Monachis, discipuli, cui ille olim dono dederat, omni aure cunctisque gemmis pretiosiora.

FRANCISCO RAYMUNDO ADAMIO

Servorum Beatae Mariae Virginis
Praeposito Generali

ANGELUS FABRONIUS,

S. P. D.

Quod tibi per amicum nostrum Philippum
Tozzium receperam, in eo nunc fidem li-
bero. Habes enim cum his litteris vitam Ge-
rardi Capassii Sodalis & Praeceptoris tui, in
qua contexenda eo libentius elaboravi, quod ar-
bitratus sum viri ingenio & doctrina summi lau-
dem fere senescentem ab oblivione hominum at-
que silentio esse vindicandam. Cum enim non
multum (quod quidem extet) scripti relique-
rit, ex quo cognosci possit, quantus vir ille
fuerit, vix ad ea, quae quondam de ipsius do-
ctrina omnium sermone & fama celebrabantur,
recordanda relictus esse locus videretur, nisi hi-
storiae monumentis illa essent cognita. Refugit
autem Capassius a prodeundo in publicum sive
iudicio, ut solebat dicere, sive modestia & qua-
dam ingenua timilitate, sive necessitate, quod,
ejus

ejus vita perpetuis fluctibus objecta, non satis otii tranquillitatisque magnis. conficiendis. operibus suppeditare potuerit. Praeter quam quod in ea erat sententia, magnam, qua nunc premimur, librorum copiam officere potius quam prodesse literis, quod homines a sapientiae fontibus avocet; & audacter, impudenterque eos facere, qui in hac infinita librorum cujuscumque generis abundantia aliquid in publico proponunt, quod minime sit in suo genere perfectum, quodque novitate sua utilitateque singulari non valeat doctrinarum amatores ad legendum allicere. Ridebat vero (& merito quidem ridebat.) homines quosdam, qui toti sunt in magnis contexendis voluminibus sine rerum delectu, sine ordine, & sine prudenti judicio; & qui gloriantes alienis surreptis bonis per illa se doctorum charo immiscere posse confidunt. Hujus generis hominibus, quibus pessima litterarum fato omnis aetas abundavit, solitus erat Capassius objicere Callimachi Grammatici sententiam, qui magnum librum magno malo esse parem dicebat (1) Aesopicaeque de graculo superbo fabellam narrare. At nemo fortasse illi

Tom. VII.

P.

(1) Athenaei Epit. 1. 3. in princ.

maiores ad irridendum materiem dedit quam Nicolaus Mortierius, de cujus opere quod inscribitur: *Etymologiae Sacrae Graeco-Latinae*, Capassius suum iudicium exposuit in XIII. volumine *Ephemeridum Litterarum Italiae*. Quam acute, quam false, quam ἐπιποινικῶς illius scriptoris confidentiam insulsiatatemque perstringit! Optandum sane esset, ut multos censores Capassii similes haberemus. At qui nunc se magnifice jactant, atque ostentant tanquam Deos averuncos malorum & inutilium librorum, nil aliud agere videntur, nisi ut plurimos testes colligant miserabilis inscitiae suae. Adeone doctissimi viri summis laboribus atque vigiliis artem Criticam excoluerunt, ut illam sibi arrogent homines ab omnibus disciplinis imparati, sine sensu, sine sapore, sine linguarum notitia, ut apud nos idem mirari liceat, quod apud Graecos mirari se Anacharsis (1) ajebat, artifices certant, judicant vero qui minime sunt artifices. Annus & amplius est cum hujusmodi censores severe me reprehenderunt, quod aliquando scribam ea, quae alii. Hi profecto veteres accusationes renovabunt

(1) Laert. lib. I. in Anacharsi.

(non enim lege Aemilia vetantur ultra sex menses & annum censoriam potestatem prorogare) quando intelligent me in Capassii vita declaranda elaborasse , postquam Lamius id ipsum praestitit in vol. 1. Memorabilium Itatorum eruditione praestantium . Quid , quaeso , hoc reprehensionis est ? Scripsit Polybius quae Romani sua majorumque memoria , Livius quae ille , Dionysius Halicarnassaeus quae Livius , & sic consequentium historicorum plerique . Cornelius quoque Nepos , ut ipse fassus est , nihil aliud egit , nisi ut uno volumine vitas excellentium virorum complurium concluderet , quas . separatim multis millibus versuum complures scriptores ante eum explicarunt . Ceterum quod ad Lamium pertinet , plurimi sane facio quidquid ex ejus officina prodit ; nihilo tamen minus videor posse in eo gloriari , me inscribenda vita Capassii minime actum ab illo egisse ut pote qui aliud scribendi genus sibi secutus , nova multa protulerim , nonnulla mutaverim emendaverimque ; & , ut uno verbo omnia complectar , totum aliud opus . effecerim . Quibus vero ex fontibus , & quam puris liquidisque hujusce materiem hauserim tunc ipse probe nosti , Vir praestantissime , tuque insignis ceteros inter restis esse po-

teris, quam iniuste Lamius arguerit Capassium fuisse ad assentationem, voluptatemque procliviorē, nisi dicere velimus fecisse Lamium, quod Zopyrus, qui cum multa, ut ait Cicero (1) in conventu vitia collegisset in Socratem, quae ex ejus forma se perspicere profuebatur, derisus est a ceteris, qui illa in Socrate vitia non agnoscerent; ab ipso autem Socrate sublevatus est, cum illa sibi vitia inesse, sed ratione a se dejecta diceret. Vale.

Pifis Kal. Januarii MDCCLXXIII.

(1) In fin. lib. IV. Tuscul. Quæst.

GERARDUS CAPASSIUS

Gerardus Capassius natus est Florentiae
 XI. Kal. Februarias anno MDCLIII. Huic
 contigit ut eos parentes haberet Bernardum
 Capassium, & Catharinam Zuccagniam, quæ
 quamvis fortunæ bonis minime pollerent,
 fuerunt tamen diligentissimi, ut filio in vir-
 tute, doctrina, humanitateque percipienda
 plurimum vel a pueritia studii esset, & tem-
 potis. Inter bonas artes praeclarum ingenium
 brevi adolevit. Ex quo factum est ut cum
 ille ineunte anno MDCLXIX. nomen dederit
 in sodalitatem Servorum B. M. V. non post
 multo electus fuerit ad tradendam suis Phi-
 losophiam; quod ipsum munus, fama jam
 excellentis Peripatetici sibi comparata, Senis
 quoque sustinere debuit. Magnus & clarus
 antea Gerardus, major & clarior haberi coe-
 pit postquam demandatum est illi magisterium
 Theologiae, in qua facultate quantum vale-
 ret, tum praesertim ostenderat, cum theolo-
 gicas theses (dedicavit has Ludovico XIV.
 Galliarum Regi) in generalibus Ordinibus sui

Comitiis publice Romae propugnauerat. Cumque ejus fama egressa jam domestica claustra ad aures usque Cosmi III. Magni Etruriae Ducis pervenisset, facile ab hoc impetravit, ut vices gereret collegae sui Petri Antonii Rossii in munere Theologiae Doctoris, quod sustinebat in Academia Pisana, & a quo illum abstraxit demandata ipsi totius Familiae procuratio. Profuit quidem Cappasio commoratio Pisana. Nam summorum virorum, inter quos quotidie versabatur, auctoritate & exemplo sejunxit se a Peripateticis, cum quibus temporum potius vinculis, quam suo judicio se conjunctum esse dicebat; & in optimo Philosophiae genere cognoscendo, maximeque in profana & sacra eruditione ex fontibus haurienda, cum antea sibi subsidia comparasset linguarum Hebraicae, Graecae, & Gallicae, omne suum studium collocavit. Huic Pisis commoranti commendare solitus fuit Antonius Magliabechius exteros homines doctrina illustres, qui illuc visendae urbis gratia concederent; cujus rei praeclara sunt testimonia, quae de se ipso

scripsit Mabillonius in suo Museo Italico (1). Postquam Capassius quadriennium operam suam vicariam in Academia Pisana praestitit, rediit anno MDCLXXXVII. ad domesticam scholam, quam praestantissimis artibus, quibus se instruxerat, suscepit exornare. Sed dum eas in publicum proferre voluit, iniquitate magis temporum, quae omnem averfabantur novitatem, quam sua culpa in maximas molestias, turbulentissimasque tempestates incidit. Est hoc in more positum, ut qui in Florentino Coenobio Servorum B. M. V. Theologiam docet quotannis per discipulum publice defendendas proponat Theologicas theses. Proposuit autem Gerardus, ediditque approbantibus iis, quorum munus est providere nequid ex malis libris Christiana Respublica detrimenti capiat, non theses modo theologicas, sed & historicas, criticas, atque philosophicas. In quibus defendendis homo peracutus non quaesivit rationes eas, quae ex conjectura pendent, & quae huc & illuc trahuntur, sed quae persuadendi ne-

P 4

(1) Tom. I. pag. 185.

ceſſitatem habere videbantur. Et quidem magna fuit admiratione animique perturbatione commotus, poſtquam intellexit ab Antonino Clochio Dominicanæ Familiæ Magiſtro quatuor illarum theſium, quas infra exſcribemus (1) accuſatas fuiſſe erroris apud

(1) *I. Auxiliũ a Theologis lumen Gloriæ appellatam nequaquam aliquid a Deo diſtinctum eſt, ſed Deus ipſe.*

II. Symbolum quod ſub nomine Athanaſii circumſeritur, an vere Athanaſii ſit, nedum dubitamus, verum & negativam partem ut probabiliorem amplectimur.

III. Cum omnium & ſingulorum Sacramentorum materiæ & formæ nequaquam fuerint a Chriſto Domino determinate inſtitutæ, penes Eccleſiam eas determinandi ac immutandi auctoritatem eſſe cenſemus.

IV. Cum fere omnes Eccleſiæ Patres uſque ad Chriſti ſæculum XII. nullam accidentium phyſicorum, ſed ſpecierum ſuntaxat in Euchariftia mentionem faciant; imo cum Aug. l. 2. Solidog. c. 12. habeat: cui poſſe fieri videatur, ut id quod in ſubjecto eſt, maneat ipſo pereunte ſubjecto? Monſtruolum enim & a veritate alieniſſimum eſt, ut id quod non eſſet, niſi in ipſo eſſet, etiam cum ipſum non fuerit, poſſit eſſe. Quæ verba licet laudatus Pater nequaquam de Euchariftia determinate edifferens fuerit locutus, tamen ſui temporis mentem ſatis oſtendunt. Quare melius hoc myſterium abſiſſimum Euchariftiæ juxta SS. PP. placita abſque accidentibus a Peripateticis Scholis explicatis defendendum ſuſcipimus: imo ſtante divina tranſubſtantiatione, ac ſpecierum panis, &

Romanos de Religione Quaesitores, auxilique dolorem horum damnatorum judicium, & quae inde sibi proponebantur minae atque terrores. Ad hos propulsandos (neque sane in tanta re erat reticendum, ne quis silentium in conscientiam duceret) docte & copiose causae suae defensionem scripsit, quam cum suis ponderibus, severis illis quidem, Quaesitores examinassent, rationum & veritatis vi illos convictos fuisse oportet, quoniam sine poena, & sine objurgatione ulla Capassium judicio liberarunt. Neque est reticendum Antonium Clochium postquam rationum momenta perpendit, quibus Capassius theses suas defendebat, accusatoris personam deposuisse, ut caperet deprecatoris. At quamquam ea fuerit causa Capassii, ut aequorum hominum judicio de fama doctrinae, dignitate, honestateque illius quidpiam minime derogaverit, tanta tamen fuit inimicorum ejusdem perfidia, ut nunquam veteres accusationes prorsus deferbuisse viderentur. Quas

vinum in Sacramento permanentia, haereticorum cavillationes contra hoc mysterium a ratione deductae Platoniciis magis, quam Peripateticis principibus facilius enervantur.

dolens pro sua singulari in Capassium bene-
 volentia & aequitatis amore Prosper Cardi-
 nalis Lambertinius ajebat, illum parum cau-
 tum providumque fuisse in defendendis iis
 rebus, quae Italiae illis temporibus inaudi-
 tae erant, & quae triginta annis serius non
 solum sine periculo, sed etiam cum aliqua
 laude defendi potuissent. Nihilo tamen mi-
 nus, quod mireris, nunquam ex albo da-
 mnatorum librorum erasus fuit Capassii libel-
 lus, qui supra relatas theses continet, qui-
 que ita inscribitur = *Conclusiones ex Theolo-*
gia, ac Philosophia selectae pro solemnibus D.
Dominici propugnandae a F. Henrico Ant. Ver-
xelli Servita in Conventu SS. Annuntiatae de Flo-
rentia praefide D. M. Gerardo Capassii Florentino
in eodem Coenobio Studii Regente, Florentiae
 1687. Sed, ut diximus, haec omnia accide-
 runt sine ulla imminutione famae existima-
 tionisque Capassii; & quamvis Lycei luce per
 id temporis caruerit, intra parietes tamen
 aluit eam gloriam, quam meo judicio per-
 pauci sunt postea consecuti. Ut autem ille
 magno ingenio suo, magnoque optimatum
 artium studio scholae dignitatem sustinuit, ita

prudencia dexteritate & consilio res familiae bene & utiliter gessit. Factus an. MDCXC. scriba Magistri Generalis Jo. Francisci Poggii cum eo Coenobia non Italiae solum, sed & Germaniae lustravit. Datus & vicarius ejusdem Magistri Generalis nonnullis Provinciis fuit. Etruscum rexit, Florentinum Coenobium biennio gubernavit, & in eodem Coenobio curam tyronum sustinuit. Tantam de Capassio opinionem imbiberant animo Germani Coenobitae, ut cum vellent familiae instituta & leges, quae in Italia vigeant, ad suas rationes & mores accommodare, illum potissimum expetierint, atque depoposcerint, qui hanc rem praestaret. Illorum postulationi satisfecit Jo. Petrus Bertazzolius, qui tum clavum familiae tenebat, & in Capassio tanta prudentia fuit in constituendis, temperandisque rebus, tantaque aequitas, ut hodie etiam stent Germanica Coenobia Capassii institutis servandis. Paulo ante quam is in Germaniam proficisceretur, coeperat jam acerrima pugna, quae inter ipsum & Jacobum Laderchium Congregationis Romani Oratorum, ut vocant, Presbyterum fuit, cujus-

que causam ab ultima origine nobis explicandam putamus. Gratiae magis quam veritatis amans Laderchius scripto susceperat conciliare auctoritatem & fidem commentitiis, quae habemus, actis SS. Martyrum Crescii & sociorum. Nam Cosmus III. Magnus Etruriae Dux praecipuo cultu illos venerabatur, quem in aliis quoque studens excitare eorundem Sanctorum Aedem in Mucellano agro refecerat, atque exornaverat. Nihil erat sane quod Laderchius, qui verum invenire nolebat, sententiam Capassii de iisdem actis requireret. Requisivit tamen cum Florentiae esset autumno anno MDCCVI. credo ut cognitam praeter desiderium suum (& sane Capassius candide pro sua consuetudine respondit plurimas falsi notas in iisdem actis se videre.) malis artibus, si fieri potuisset, infringeret atque labefactaret. Relatum interea ad Capassium fuit injuriosos de se rumores sparsos a Laderchio fuisse, quod scilicet omnia SS. Martyrum acta rejiceret atque contemneret. Id postquam rescit excaudit ira, graviterque cum amicissimo suo Laurentio Magalottio homine in rebus judican-

dis spectato & cognito questus est, Laderchium violare existimationem suam, causamque inimicitarum quaerere. At justam Capassii offensionem non parum mitigarunt Magalottii consilia, & Laderchii ab Etruria discessus, qui omnem hac de re fermunculum aut sedavit, aut plane restinxit. Brevi tamen & acerbius refricatum est vulnus, cum ex litteris a Justo Fontaninio ad Antonium Magliabechium datis Capassius intellexisset, Laderchium Romae in sermonibus ea de se jactare, quae, ut falsa, ita prorsus sibi erant indecora. Cetera inter affirmabat Laderchius se a Capassio incitatum fuisse ad accusationem, oppugnationemque suscipiendam operum Tillemontii, quam rem idem Capassius plenam inconsideratissimae ac dementissimae temeritatis semper judicaverat. Ita exacerbati erant utriusque animi, cum anno MDCCVII. prodierunt in lucem *Acta Passionis SS. Crescentii & Sociorum Martyrum ex MMSS. Codd. Bibliothecae Mediceo-Laurentianae, Metropolitanae Ecclesiae Florentinae, & Sapientiae Romanae nunc primum edita, & a Jacobo Laderchio Congregationis Oratorii Urbis Presbytero asserta & illu-*

strata. De quo libro quid sentiret Capassius non dubitavit aperire Iusto Fontaninio, qui sententiae & opinionis illius, sua prius exposita, particeps esse voluerat. Capassii epistola sane longa ad Fontaninium, quae ut occultaretur ipse petierat, nescio quomodo in manus Laderchii pervenit. Edidit illam in vulgus, propterea quod ad singula, quae objecta fuerant, se respondere posse putabat. Scripsit itaque epistolam ad Equitem quemdam Florentinum, qua non tam seipsum defendere voluit, quam contumeliosissime Capassium provocare; utque liberius & tristius ei, cui iratus erat, respondere posset, finxit eandem epistolam Petrum Donatum Polidonium exarasse. Hujus epistolae probra & errores ultus est Thomas Maria Minorellus doctus vir Dominicanæ familiae, qui sub nomine Joannis Storchii latere voluit: & Leander Porzia, qui commendatione doctrinae ad Cardinalatum postea pervenit, & prae ceteris Benedictus Bacchini, cui neminem praefero cognitione sacrae antiquitatis, affuerunt etiam Capassio scriptis suis, quae tamen lucem minime aspexerunt. Sed qui fue-

rint Bacchini sensus intelligi potest ex III. Volumine Ephemeridum Litteratorum Italiae, quo in libro tota hujus controversiae historia, rerumque, quae occasione ipsius scriptis mandatae sunt, materies copiose apteque explicantur. Poterat quidem Capassius his defensoribus contentus esse. Sed is cui facile concalescebat stomachus, nec facile in insolentium hominum indignitate mitigabatur, suis magis quam alienis armis adversarii audaciam contundere, seque vindicare existimationi hominum posse putavit. Itaque librum exaravit vulgavitque, qui inscribitur *Nugae Laderchianae in epistola ad Equitem Florentinum*, in quo nescias majorne sit vis recti judicii & copia doctrinae, an argutiarum & salium. Et si certis quibusdam finibus se continuisset (non enim semper acu, sed etiam ictu gladiatoris ferit Laderchium) majores profecto laudes consecutus fuisset a sapientibus viris, quibus, ut ait Hesiodus (1) improbata semper fuit contentio illa, quae alienis gaudens malis animos in diversa distrahit,

(1) In princip. Operae & diei.

& discordiam auget, quamque noctem obscuram, adeo ipsam indignam homine putat, genuisse dicit. Liber hic magnam offensionem excitavit in Cosmo III., qui non satis severe pro rei indignitate se decrevisse agebat, quod illum flammis damnaasset. Ex qua summa Principis offensione labes etiam aliqua dignitati Capassii aspersa fuisset, si certo testimonio comprobari potuisset opus ab illo exiisse. Hoc enim Antonii Gatti nomen praeferibat. Nihilo tamen minus multas hujus rei causa habuit Capassius molestias, neque fortasse S. Officii censoriam severitatem, quod potissimum molitus fuerat Laderchius, declinasset, nisi in aequitate Clementis XI. & Cardinalis Petri Ottobonii, cui in primis idem Pontifex causam hanc mandaverat, magnū praesidium innocentiae suae reperisset. Nihil vero in tota hac controversia mirabilius fuit Capassii firmitate, quam ostendit praesertim quando oblati sibi a Romanis Quaestoribus capitibus quibusdam, in quibus omnis spes salutis posita esse videbatur, subscribere recusavit. Id enim si fecisset vix a sese criminis suspensionem propulsare

sare posse intellexit. Sedatis paullulum fluctibus, calamus iterum in manus sumpsit poenas. repetiturus a Laderchio novarum injuriarum. Sed abjecit postea, quam magna ex parte confecerat, II. *Centuriam nugarum Laderchianarum*, sequens illorum consilium, qui tragoedias in nugis minime agendas esse dicebant. Plurimum etiam valere ad mitigandum Capassii animum, quae ipso Magno Duce approbante, de historia SS. Crescii & Sociorum scripsit vulgavitque M. Antonius Mozzius Canonicus Florentinus. Quanquam enim a Capassio nonnullis in rebus dissentiret, tantum attamen hic dedit veritati, ut justam Capassii causam judicaverit. Id enim praecipue Capassius adversus Laderchium probandum susceperat, S. Crescium, hujusque Socios minime martyrium subisse anno I. Imperii Decii Augusti; illorum, quae extant, acta perspicue in eo mentiri, quod Decium a mense Octobris an. CCXLIX. ad Majum usque insequentis anni Florentiae fuisse affirmant; eademque minime ante Nicaenum Concilium, sed multis post saeculis conscripta fuisse, ut in primis indicant varii dicendi modi.

ac formulae, consuetudinesque, quae in ipsis
occurrunt, longe ab antiquitate abhorrentes.
Praeteritis commonesactus periculis ac malis
otium tranquillitatemque vitae spectare coe-
pit Capassius, idque ut facilius obtineret eri-
pere se e conspectu Cosmi III. constituit, ejus
gratiam, & amissa munera (fuerat enim
tum ipsius Cosmi, tum Card. Francisci Me-
dicei Theologus) recuperare se posse plane
desperans. Romam itaque venit exeunte an-
no MDCCIX. cum plurimum spei haberet in
perspecta jam erga se Card. Renati Imperia-
lis benevolentia. Et quidem benigne libera-
literque fecit Cardinalis, cum sibi Capassium
Theologum delegerit, & comitem habere vo-
luerit in itinere, quod Mediolanum fecit,
cum Legatus a Clemente XI. ad Carolum III.
Hispaniarum Regem mitteretur. Neque mi-
norem erga se benevolentiam Capassius ex-
pertus est Card. Michaelis Angeli de Comi-
tibus, a quo, ut ab Imperiali, in omnibus
consiliis & deliberationibus ad res theologi-
cās pertinentibus adhibebatur. Ipse vero nun-
quam iis non praestitit fidem & diligentiam
singularem, ac patem ingenuitatem, libera-

temque dicendi. Cujus quidem libertatis si semper moderatricem habuisset prudentiam, cumulatius satisfecisset iisdem Cardinalibus, neque se novis implicuisset malis. Sed ita erat natura comparatus, ut non solum fingere & dissimulare, sed etiam obtegere sententiam suam, ejusque acerbam severitatem blandi sermonis artificio mitigare nesciret. Audierant ex eo multi quid sentiret de *Constitutione Unigenitus*, quam per illa tempora Clemens XI. condiderat atque promulgaverat; nec voce tantum, sed etiam scripto Capassius sensus suos aperuerat, cum saepe hac de re litteras ad amicos suos praesertim Gallos dedisset. Interim Romae apparuit epistola quaedam Gallice scripta, quae persuadere conabatur Clementi XI. esse illius sapientiae & aequitatis definite distincteque declarare quo sensu intelligi deberent damnatae quaedam propositiones Quaesnellii, propterea quod illae in utramque partem, bonam scilicet & malam, accipi posse videbantur. Quoniam haec congruebant cum iis, quae valde solebant esse in ore Capassii, nemo non dubitavit ex hujus officina, quae circumferebatur, epi-

folam prodiiſſe. Quae epiſtola cum in manus quoque Pontificis perveniſſet, magna is ſigna dedit Cardinali Imperiali doloris, offeſſique in Auctorem animi. Cupiens vero Imperialis periculum, quod impendebat, a Capaſſio propulſare, ei perſuaſit, ut ſcriptores contentas in epiſtola confutaret, atque redargueret. Id cum praefitiſſet Capaſſius potuit ſe quidem metu, non tamen ſuſpicionem liberare nimis favendi iis, qui Pontificis Conſtitutioni adverſabantur. Hi proſecto tantum in Capaſſio confidebant, ut cum rumor ſparſus fuiſſet Innocentium XIII. illum ſibi adſciſſiſſe Theologum, omnes una mente & voce conſclamare coeperint per illum tranquillitatem Chriſtianae Reipublicae reſtitutum iri (1). Declaravit quidem Innocentius cum primum Pontifex creatus eſt, velle apud ſe oſſe Capaſſium, ſequi illius opera & conſilio, ſicuti antea fecerat, in rebus Theologicis uti. Sed cum id cognoviſſent inimici il-

(1) Ex multis unam eligemus Dominici Lazzarini epiſtolam ad Capaſſium, ut ejus exemplum in fine hujus commentarioli referamus.

lius, qui erant potentissimi & plurimi, tot adhibuerunt machinas ad convellendum Pontificis animum, ut majori vi oppugnari non potuerit. Clamabant etiam plerique Cardinalium injuriam fieri universo ordini, si tanta fuisset auctoritas unius privati hominis in consiliis de rebus gravioribus dandis, quanta esse solet *Congregationum* ipsorum Cardinalium. Neque hoc solum fecerunt inimici Capassii, sed etiam renovarunt accusationes de thesibus, quas in principio hujus commentarioli exposuimus, quarumque memoria propter vetustatem extincta esse videbatur. Et profecto nisi auctoritas Prosperi Lambertinii, & metus offendendi Pontificis animum obtitissent, Capassius contrusus fuisset in carceres nefariorum scelerum adversus Religionem vindices; quam poenam ab ipso non solum admurmuratione, sed etiam voce & clamore in primis exostulabant Cardinales Laurentius Corsinius, & Franciscus de Judice. Et dolendum hoc maxime fuit Capassio in tam gravi vulnere, quod Petrus Maria Pierius secum sodalitatis vinculis conjunctus, qui sedare Corsinium debuisset pro summa, qua apud eum

pollebat, auctoritate in consiliis dandis, ipsum in se se inflammaverit. Quam ob rem de commutando vitae statu, deque transitione ad Dominicanos coepit aliquando cogitare. Sed hujusmodi mentem brevi mutavit, quod res aliquid offensionis habitura, & indicia fracti animi allatura esse videbatur. In hoc vero satis gloriose de inimicis suis triumphavit, quod Innocentius XIII. non solum voce, sed multo magis etiam factis declaravit, mala, quae ipsi impenderunt, non ulla ejusdem culpa, sed occultorum quorundam hominum studiis & machinationibus excitata fuisse. Nam quamvis Theologi munus ei minime assignavit, ejus tamen consilium multis in rebus exquisivit, ipsique mandavit, ut scripto exponeret, quae praesentibus Christianae reipublicae temporibus & concordiae convenire judicasset. Opus itaque excudit, cujus est titulus: *Riflessioni d'un Religioso devotissimo della Santa Sede sopra un modo di levare li occorrenti dissidii per la Costituzione Unigenitus*; quod quidem opus non latuisset semper in thesauris Capassii (1) si is occultius

(1) Tom. I. Manuscript. Capassii, quae extant in Florentina Bibliotheca SS. Annuntiationis.

rem egisset, neque divulgasset de Gallicis negotiis jam esse confectum. At ne quid conficeretur, obstitit etiam immaturus Innocentii interitus, quem omnes boni, & Capassius in primis vehementissime doluerunt, quasi cum eo extincta fuisset omnis spes publicae tranquillitatis. Brevi haec revixit cum in locum Innocentii successisset Benedictus XIII., recreatusque etiam Capassius fuit, quod ab hoc Pontifice non mediocria sibi amoris existimationisque signa impertita fuerunt. Quia tamen desperabat fore ut mansuetioribus Romae uteretur inimicis; postquam Pontifici ad Romanum Concilium adfuisset, Florentiam ad suum coenobium rediit. Acceptus humaniter fuit a Jo. Gastone Magno Etruriae Duce, quod hic paterni odii in Capassium minime haeres esset, planeque cognitam haberet illius singularem doctrinam. Cujus judicii sui illustrius quoque testimonium dedit, cum Capassium Stephaniani Ordinis Theologum, & Theologiae Doctorem in Academia Pisana creasset. Nunquam tamen ipse operam suam navavit Academiae, utens potestate, quae sibi data fuerat, quem voluisset, in locum suum

substituendi. Substituit autem Joannem Petrum Fancellium, quem multi summis parem Theologis judicarunt. Tandem Capassius, cujus vita perpetuis fluctibus fuerat objecta, pacatis ventis coepit uti, & quo propius ad mortem accedebat, quasi terram sibi videbatur videre, aliquandoque in portum ex longa navigatione esse venturus. Sic quidem reliquum vitae tempus traduxit, ut ad placandum unice Deum illud sibi relictum esse judicaverit. Apoplexis, qua semel iterumque correptus fuit, eum vita privavit anno MDCCXXXVII. X. Kal. Decembres paullo post mediam noctem. Illam vero multo antea praenuntiaverant frequentissima animi deliquia, quibus ut primum tentatus est Capassius, illa mentis acies, quae semper in eo fuerat summa, coepit hebescere. Triduo post mortem solemnes exequiae eidem persolutae fuerunt, habuitque orationem de illius laudibus Julianus Sallerius, qui hoc se debere putavit & gradui dignitatis, quem in sodalitate tenebat Capassius (nam Innocentius XIII. illum Ex-generalem, ut vocant, declaraverat) decori & laudi civitatis & Academiae Pisanae, suae

necessitudini, gratoque totius sodalitatis desiderio propter summa, quae a Capassio omni tempore acceperat beneficia. Nemo enim inter alumnos illius erat illustris doctrinae nomine, cui Capassius lucem ingenii, & consilii sui minime porrexerit; & quo posteritati etiam serviret, auxit suum Florentinum coenobium eximia librorum supellectile, effecitque ut soror sua Flammetta huic bibliothecae haereditatem suam, ex qua redeunt quotannis LXIV. centusses (scutata appellant) testamento legaret. Donavit etiam Capassius Templo sui coenobii non mediocrem supellectilem opere eleganti perfectam, quod non minus ejus pietatem quam liberalitatem demonstrat. Ut vero his largitatibus copiolae suae satis esse possent, has magna parsimonia ac diligentia colligebat. Neque solum liberalitas & parsimonia, sed & aliae virtutes specie dispares prudentia conjungebantur in Capassio. Quis enim illo severior & dulcior, gravior & comior habitus est? Amicitias coluit tum nostratum, inter quos maxime dilexit Laurentium Magalottium, Antonium Mariam Salvinium, & Guidonem Gran-

dium, tum exterorum, maximeque Gallo-
rum, apud quos tanto in honore erat Ca-
passii nomen, ut nemo ei superior doctrina
divinarum rerum poneretur. Quod iudicium
ferebant quoque Itali omnes, qui summa
malevolentia & livore minime impediabantur;
numerabanturque iis temporibus Theologo-
rum principes Benedictus Baechinius, Joa-
nes de Miro, & Gerardus Capassius. Ex mul-
tis, quae afferre possem; testimoniis unum
eligam Card. Prosperi Lambertinii, ejus ex-
tant litterae ad Antonium Niccolinium in hanc
sententiam scriptae. *Quaeso confer te sub vespere
ad Templum Virginis ab Angelo salutatae: ibi-
dem tantisper opperire Capassium, dum ipse divinis
precationibus satisfecerit. Quando tibi obversatur
ante oculos homo, qui statura omnes collegas suos
multum superat, cogita hunc studio, ingenio, &
doctrina non solum iis esse superiorem, sed sum-
mis quoque viris ceterarum omnium sodalium,
quae cis, & ultra montes sint, parem haberi
posse: hunc in cubiculum persequere, meoque no-
mine amicissime amplexare. Hoc iudicii non so-
lum, sed etiam benevolentiae Lambertinii in
se testimonium merito quidem Capassius mul-*

terum elogiis anteponebat, similis illi Hecitori Naeviano, qui, ut est apud Ciceronem, non tantum laudari se laetabatur, sed addebat etiam a laudato viro.

OPERA EDITA.

Intellectus triumphans, in Dogmaticis captivus, in Scholasticis liber. Florentiae apud Vincentium Vangelisti 1683.

Conclusiones ex Theologia, ac Philosophia selectae pro Joannis D. Dominici propugnandae a F. Henrico Aut. Verzelli Servita in Conventu SS. Annuntiatae de Florentia praefata D. M. Gerardo Capassi Florentino in eodem Coenobio Studii Regente. Florentiae 1687.

Lettera all' Abate Giusto Fontanini sopra gli Atti di S. Cresci. Extat in libro, cui titulus: *Lettera ad un Cavaliere Fiorentino devoto de' Santi Martiri Cresci, e Compagni* in risposta di quella scritta dal P. Fr. Gherardo Capassi dell' Ordine de' Servi di Maria a Giusto Fontanini contro gli Atti de' medesimi Santi, dati alla luce da Giacomo Laderchi Prete della Congregazione dell' Oratorio di Roma in 4.

Nugae Ladetichianae in Epistola ad Equitem Florentinum pub nomine, & sine nomine Petri Donati Polidori vulgata. Centuria prima. Accurante M. Antonio Gatto J. C. Genuae Typis Jo. Mariae Ferroni 1709. in 8.

Avviso alla S. Chiesa Cattolica intorno a due libretti della Lettera Apologetica, e della Giunta del P. Gio. Grisofono Searfo convinto come sospetto de' vehementi di Gianfornismo da un Religioso zelante. In Cosenza per Alfonso Belli 1712. in 8.

232 C A P A S S I V S I

*Risposta del Cavaliere erudito alla Lettera seconda scritta
tagli dal P. Gio. Antonio Bernardi della Compagnia di
Gesù sopra i due primi Tometti del nuovo Giornale de' Let-
terati d' Italia . In Mantova per gli Eredi dell' Ofanna
1712. in 8.*

*Estratto e giudizio dell'Opera del P. Niccolò Morier
intitolata: Etymologiae sacrae Graeco-Latinae. Extat in vol.
XIII. del Giornale de' Letterati d' Italia.*

OPERA INEDITA:

*Duo magna Volumina , quorum tituli
Collectanea Variorum .
Scripta Capassiana .*

DOMINICUS LAZZARINUS

GHERARDO CAPASSIO

INNOCEN. XIII. THEOLOGO

S. P. D.

Maximam mihi spem iniecerat Innoc. XIII., ubi primum Pontifex renunciatus fuit, ab illius probitate, atque constantia eos motus, quibus Ecclesia jamdiu conficitur, sedatum ita: sed tuæ ad Jacobum nostrum litteræ eam spem ita confirmarunt, ut dubium esse non possit, quin D. O. M. Populo suo tam necessario tempore consuluerit, eumque Pontificem praeferret, qualem hæc ipsa tempora flagitabant. Ex illius enim litteris accepi, te ab eodem in illud consilium advocatum fuisse, in quo de rebus ad Christianam persuasionem spectantibus agitur, atque ita advocatum, ut summi Pontificis Theologus audias. Equis autem nunc non confidat fore ut ea dissidia, quæ nuper in Gallia quorundam hominum fraude, atque dolo malo exorta sunt, omnino componantur? Accessit ad hanc proborum hominum lætitiæ rumor, idemque constans, adhiberi a Sapientissimo Pontifice ad consilia illius ejusdem dissidii componendi Cardinalem de Via; quo viro cave putes, alium in eo amplissimo ordine esse hac ætate vel doctiorem, vel sanctiorem, tum qui melius intelligat turbulentiam illorum hominum calliditatem. Te vero illud præ tua cum doctrina, tum probitate conaturum confido, ut tanti Pontificis gloriæ, ut nobis omnibus, qui Jesu Chri-

sui Servatoris gloriam, quae una illius erga nos invicta charitate nititur, factam testam esse volumus, ut deinum tibi ipsi consulas. Habet autem Innoc. XIII. domesticum Innocentii III. exemplum, qui consulentibus eundem Galis, ea verò animi demissione, qua summum Ecclesiae Caput consuli par erat, ita respondit, ut nullum seditiosis hominibus cavillandi locum reliquerit.

Vellem autem ceteriorem laeeres Pontificem, in his locis ita quosdam abuti Clement. XI. constitutione illa percelebri, ut sanctissimam illius Pontificis mentem eo traducant, quo traduci nefas omnino, & impietas est. Hisce ergo auribus audiavi Venetiis, ego autem? Imo Veneti propemodum omnes quendam e summo loco suae orationis scopum esse voluisse, ut diceret, Christi opem, ut possumus quidem, minime vero ut velimus, necessariam esse. Quo quid magis impium dici possit, omnino non video. Ille idem Patavii ita in Sanctum Augustinum est invehens, ut audaciorum hominem nunquam audiverim; eo vero est prolapsus, ut diceret peccati poenam esse ubi quis in uno Christo spem ponat; aequè contra nostris viribus, atque Christi opi, auxilioque esse fidendum. Sed quae monstra solidae munitudini clanculum atque insidiosè insularant Sanctorum Augustini, atque Thomae doctrinam ex constitutione abrogatam esse; eos qui commentum illud funestissimum scientiae mediae oppugnant, causa cecidisse, haereticosque esse. Demum ea spargunt, quae ab illius Pontificis mente omnino sunt aliena. Quae nisi & certa & exprompta mihi essent, religioni ducerem illud efficere, ut ea Ecclesiae Capiti falsa diceret. Sed tute ipse illorum hominum studia optime nosti. Vides igitur quo loco sis; quid de te optimi quique sperent; quanta sint, quae ad

officium tuum pertineant. Sed nae ego imprudens, qui cum gratulari tibi deberem, ut certe vehementer, & ex animo gratulor, ita scribam quasi te admoneam officii tui. Neque enim timendum est, ne tua innocentia, atque virtus, ut bene multis contigisse compertum est, honoribus aucta frangatur, atque debilitetur, ut pote qui probe intelligas eam tibi homines dignitatem tum gloriae daturus, cum eandem christianae Reipublicae emolumento fuisse viderint. Nunc illud abs te etiam atque etiam peto, ut mihi in ea te gratificari velis, unde & ego uberrimum capiam amicitiae nostrae fructum, tu vero amoris erga me tuo jamdiu mihi perspecto satisfacias. Tibi non obscura est crudelis quorundam hominum erga me malevolentia, quod optimorum studiorum causam susceperim; quod veterem eloquentiam, eruditionemque in Italiam revocem; quod bonas artes ab eisdem corrumpi quam vere, quam constanter dicam. Hi me homines iis calumniis proscindunt, ut nihil eorum quicquam omittant, quae ad foedandam hominis dignitatem opportuna esse judicent. Quare mihi maximopere conducet, si sanctissimus Pontifex, quis ego sim, ex te audiverit. Nolo tamen quicquam amoris erga me tuo tribuas. Quae illi abs te dici velim, haec omnino sunt. Me a primis annis optimis artibus operam dedisse, in iisdemque fuisse, non felicem quidem, diligentem tamen. Iis autem moribus esse, ut laeserim neminem; nemini probò, honestoque displicerim. Testes isthic esse certissimos, amplissimosque quemadmodum vitam egerim, inter quos ipse Georgius Spinula, vir amplissimus, & idem Cardinalis de Via principem locum obtinent. Utinam vero viveret Cardinalis Casonus. Quantum in illius testimonio de me acquiescerem! Demum me esse natum in amplissimae illius

gentis clientela. Etenim Sanctissimi Pontificis Patruus cum Piceno praeesset patrem meum non ornavit modo, sed promodum amavit. Saepe Murri (oppidum id est in Piceno agro) in patris domibus a curis animum remittebat. Fratrem meum sacro fonte suscepit. Pater contra nihil quicquam omisit, quo suam erga eundem observantiam, cultumque testaretur. Illius iconem una cum avunculo meo in aula Palatii Maceratenfis collocandam curarunt. Etiamnum in meis domibus extant publica patris erga eundem cultus monumenta. Quae nisi a nobis filiis clientela culta litteris est, culta semper animo certe fuit; ne vero conleremus litteris, una verecundia impedimento fuit. Haec autem omnia ita illi a te dici velim, non quasi aliquid expectam, nulla enim vel dignitatum vel opum cupiditate angor; sed ut sibi Sanctissimus Pontifex persuadeat, me & pro illius dignitate, probitate, sanctitate, nobilitate, quarum rerum nulla in eodem non summa est, & haereditario quodam jure, fausta omnia cupere, atque adeo illud unum flagitare, ut me suis sanctissimis pedibus obvolutum, non ornandum quidem, sed fovendum tamen, tuendumque suscipiat. Id si feceris, maximo beneficio me tibi devinxeris. Vale.

Patavio 20. Jun. 1722.

ANGELUS FABRONIUS

PAGNINIO SUO

S. P. D.

V *Eius fuit quidem semper opinio non posse
admoventi orationem ad sensus animorum
excitandos sine diligentissima earum omnium rerum
pervestigatione, quae de naturis humani generis
ac moribus solent a philosophis explicari, nihil-
que insulsius esse inani volubilitate verborum pul-
la subjecta sententia. Sed in ea nunc devenimus
tempora, quibus nullis circumscripta cancellis phi-
losophiae jura videntur; hanc in omni re & vel
in iis artibus, quae ad oblectandos animos sunt
inventae, dominari debere, & poetam, qui nesciat
miscere utile dulci, omnium irrisione ludendum es-
se praecipitur. Ac mea quidem sententia nemo
poterit esse omni laude cumulatus scriptor, nisi
ex multarum rerum cognitione efflorescat & re-
dundet illius oratio; sed tantum oneris minime
imponam poetis, nihil prope ut iis putem licere
nescire; & si primas dederò sententiis, haec pro-*

Tom. VII.

R

fecto, quamvis nobilissimae, obscurarentur ac pene obruerentur nisi verborum imaginibus, pictoris cujusdam summi ratione, formarum varietate locos distinguentis, informarentur. Philosophiam quidem in poesi admiror, sed ea sordescet mihi, si non sit illuminata imaginibus agentibus, acribus, insignitis, quae celeriter percutere animum possint; si suspicabor non hanc esse propriam poetae, ei-que necesse fuisse aliena scrinia expilare; vel demum si carminum materiem ex obscuriore aliqua scientia desumpserit. Porro Lucretium vix dignum nomine poetae judico cum totus est in explicandis Epicuri dogmatibus; neminem vero ei superiorem pono cum ex se ipso, non ex philosophorum libris, ea promit atque haurit, quae ad illuminandam, & ut ita dicam, vivis pingendam coloribus Epicureorum philosophiam pertinent. Omnino vero ex poetarum albo excludendum Aratum censuerim, etsi optimis atque ornatissimis versibus, ut ait Crassus apud Ciceronem, de caelo stellisque dixerit. Nam cum Arati, ut est Quintiliani judicium, materia motu careat, ut in qua nulla varietas, nullus affectus, nulla persona, cui usquam sit oratio, ipsum quidem astrologiae, minime vero poesi satisfacisse judica-

bimus. Quamvis igitur nullae sint artes, nullae doctrinae, quae comites & ministrae esse non possint poetae, cui summopere elaborandum est, ut pectus oneret multarum rerum cognitione, si tamen ipse philosophari nimium volet, neque multum delectabit, neque admodum instruet; quare quoties ei opus erit versibus exponere quae sunt propria reconditorum doctrinarum, imitabitur saltem eos qui aliquid fingunt; etsi enim picturarum nihil utantur, tamen utrum sciant pingere an nesciant non obscurum est. Quid, quaeso, Filicaja, Menzinius, Guidius, quos nemo sane in principibus lyricorum poetarum numerare dubitabit, didicerunt de physicis & mathematicis, ceterisque huiusmodi rebus, quae philosophiae nomine continentur? Verum si isthaec doctrina iis defuit, non defuit certe ingenium ad magna cogitanda, & haec quasi luminibus verborum distinguenda; in quo quidem licet multa sit vis incredibilisque naturae, plurimum etiam ars & iudicium potest, in numerorum praesertim & formarum delectu, quare maxime animari poesis videtur. Nihil est enim tam cognatum mentibus nostris, quam numeri atque voces, quibus & excitamur & incendimur, & lenimur & languesci-

mus, & ad hilaritatem & ad tristitiam saepe deducimur. Quare minime est mirandum si vel hominum vulgus tacito quodam sensu sine ulla arte ac ratione, quae sunt prava in carminibus recte interdum judicat, & qui oratoribus facile concedit, si quid in oratione claudicat, poetae, si quid est peccatum, minime ignoscit. Ex omnibus autem breviorum poematum generibus lyrica difficillima jure meritoque putantur, quia dicendi genus est eligendum grave, elatum, numerosum, verborum sententiarumque floribus conspersum, quod sensus habeat, & quod non solum delectet, sed etiam sine fastidie delectet. Saepe enim fastidiis adhaerescunt, quae sensus impellunt acerrime; praeter quam quod finitima sunt virtutibus vitia, & dum ornamentis oblectamur, cincinnis & fuco offendimur, & dum sublime consecramur, facile in inflatum delabimur; adde quod ipsa perfectio debet habere quamdam varietatem, ita tamen ut nihil sit discors & humile, & umbram etiam aliquam & recessum, quo magis id, quod est illuminatum, extare & eminere videatur. Etiam majus est illud, quod a lyrico poeta exigimus, ut porro ejus carmina cum animi inflatione & cum quodam afflatu quasi furoris fusa videantur,

& non aurium solum sed & animi acri judicio, quae duo contraria serme dixeris, sint perpolita. Multa alia persequi possem, quibus veluti vinculis adstringitur lyricus poeta, quibusque frustra exolvi se postulabit. Solent nonnulli saepe materiam carminum ex heroum veteribus casibus fictisque fabulis sumere; sed meo consilio, qui his indiget (quanquam & hae quoque magno esse possint usui poetae si ipsis parce utatur praesertim ad similitudinem faciendam) ad aliud studium convertet animum, cum munus poetae sit non aliena, sed propria sensa atque cogitata exprimere atque ornare dicendo. Quid magnificentius atque mirabilius lyricis carminibus Filicajae? Quanquam ipse, ut pote qui plurimum in scriptis veterum erat exercitatus, omnia, quae ad mythologiam pertinent, animo ac memoria contineret, hujus tamen scientiae vix in illius scriptis vestigia agnoveris, cum totus in eo esset, ut, quod volebat, magniloquentia, nobilissimisque figuris, quae non conquisitae, sed obviae fuisse scriptori videntur, non illustraret modo atque augetet, sed etiam pene oculis subjiceret: miraberis vero ex uno eodemque fonte tantam copiam, novitatem, varietatemque imaginum manare potuisse; & quamvis eminentia

bore confectum recitant, minime intelligentes quod dum inertiae vituperationem fugiunt, assequuntur illam, quae major est, tarditatis. Vale, & cum in multis ingenuis artibus discipulos tuos exerceas, fac in poesi, in qua te acquiescere scribis, eos ita versari, ut excellant.

Pifis IV. Kal. Novemb. MDCCLXXX.

BENEDICTUS MENZINIUS.

Venio nunc ad Benedictum Menzinium, cui maxime Phoebus spiritum & artem carminis & nomen poetae dedisse videtur. Ortus Florentiae humilibus & pauperrimis parentibus an. MDCXLVI. IV. Kal. April. non caruit, ut ipse de se ajebat, obsoleti sordibus tecti (1) & in omnium pene rerum angustia aegre a patre obtinuit, ut litteris operam dare posset. Cum quantum generi dempsit fortuna, tantum ipse addere virtutibus sibi proposuisset, non dubitabat fore aliquando ut injuriae suae etiam fortunam poeniteret. Itaque ad bene dicendum, Miglioruccio duce, convertit animum, & litterulis etiam Graecis & philosophia imbutus est, Deo se gratias agere affirmans, quod sibi contigerit Florentiae nutriri, quae semper abundavit optimis praeceptoribus, qui ad dicendi artem ea quoque adjungerent, quae ad re-

(1) — *Fra tre mattoni in Rubaconte*

Nacque. (Sat. VII.)

Hoc vero nomine vocabatur pons Florentinus, quem nunc dicimus *Ponte alle Grazie*.

rum omnium vim naturamque noscendam pertinent. Admiratus juvenis singulare ingenium Vincentius Salviatus, vir nobilitate & amore in litteras praestans, ipsum egere vetuit cum domum suam invitasset, & scribere coegit. Primas tulit laudes Menzinius ab eloquentia, sed cum verbis effervescentibus & paullo nimium redundantibus uteretur, laudabatur fortasse hac ipsa de causa, quod non sit aspernanda in adolescente foecunditas. Nam sicuti facilius in viribus revocantur ea, quae se se nimium profuderunt, quam si nova sarmenta cultura excitanda sint, ita volumus esse in adolescentibus, unde aliquid amputemus. Sed in eo praesertim genere se exercuit Menzinius, quod versatur in cohortandis hominibus ad virtutem, nec dubitavit aliquando partes suscipere Paulli Segnerii, cum is valetudine impediretur ne verba faceret in quodam sodalizio; quodque mirabilius est, pauci tum visi sunt desiderare hominis eloquentissimi vocem, Menzinio ipso dicente. Laudationes quoque scriptitavit, & quod ethica praesertim delectabatur, singularum virtutum officia & munera libenter

explicabat, resque gestas ad cuiusque virtutis genus & vim & nomen sapienter accommodabat, quae quidem iucunda erant auditu. Coegit vero eundem pauperies aliis tradere quae ipse didicerat, & quae ceteri ludimagistri tenui quodam exanguique sermone exponere solent, ille cum quadam gravitate atque iucunditate discipulis suis explicabat. Florebat tum Reditus, qui in hoc maxime gloriari videbatur, quod faveret ac plauderet sepultis ingeniis. Itaque cum de Menzinio audivisset, ipsum adivit, & coepit hortari verbis, quae addere quoque animos timido potuissent, totum ut se Italicae dederet poesi. Ex paucis enim carminibus conjecturam fecerat (1) magnus ille ingeniorum

(1) *Disi lode al mio Redi: agli promise
Che un giorno avrei corona,
Se all' Argivo Elicon
Il piè volgea, dove a me il cielo arrise.
Nel tempio del mio cuor sacrai suo detto:
Che sembreria sciocchezza
Di ciò che più s'apprezza
Non averne quaggiù fervido il petto.
Io prestai fede al vero
Poi mossi al gran sentiero.* (Menzin. Od. I. lib. II.)

æstimator divinam in eo esse mentem & os magna sonaturum, & quodcumque chartis Menzinius illeverat, gestiebat in adolescentium corona recitare ob hanc rem, quod sciebat plures ex iis esse, qui hoc studiorum genus contemnerent ac pene irriderent. Invitavit quoque ipsum ad laudes celebrandas Cosmi III., sed raro hic poetarum laudibus aures commodabat amicas, quamvis de eo talia prædicaret Menzinius, quasi ipso regnante, aureum illud a poetis confectum sæculum in Etruria ageretur. Ambitiosi quoque Principis suffragia & patrocinium venari se posse putavit, si integrum carminum volumen, quod anno MDCLXXIV. typis vulgavit, ejus inscripsisset nomini. Sed hæc quoque leviter curare visus est Cosmus, quod plurimum gratia apud illum possent qui nil rectum, nisi quod sibi placebat, ducerent, & lividi averfarentur impugnarentque quidquid magni ingenii homines litteris consignabant, ut ipsi soli sapere viderentur. Ex iis carminibus intelligi poterat magna esse in Menzinio ad poesim dona naturæ: sed inseri quidem & donari ab hac non possunt omnia. Accedat

rum vel magnitudine vel utilitate, judicabit fortasse aliquid perfectius & uberius a Menzino proferri potuisse; sed haec ipsa, quae ex commentariolis suis inchoata sibi excidisse dicebat, declarant quantopere in scriptis veterum esset vertatus. Cum vero jam a se expectari putaret, ut ipse exempla suppeditaret recte scribendi rationis, an. MDCLXXX. volumen typis commisit, quod magna ex parte constat lyricis carminibus, atque idcirco inscripsit; *Poesie liriche di Benedetto Fiorentino*. Ornantur illa quasi colore quodam & succo suo, & quamvis conspersa sint omni verborum sententiarumque flore, id tamen non est fusum aequabiliter, sed ita distinctum, ut sint quasi in ornatu disposita quaedam insignia & lumina. Sive gravis, sive grandiloqua, sive mollis sit oratio pro varietate argumentorum, semper tamen a te extorquere velle Poeta videtur illam exclamationem, *non potuit melius*; neque solum *bene & praeclare*, sed *belle & festivo* sibi dici postulabat, cum aliquid Anacreonticum in lucem hominum proferret: nam ad laudem divini senis, qui hujusce poësis generis princeps

& inventor fuit, aspirare se posse arbitrabatur (1). Hic aemulus & imitator magnorum exemplorum, ut neminem superiorem ponebat Gabrieli Chiabrerae in lyrica & anacreontica poesi, sic illius praesertim persequi vestigia sibi proposuit. Neque metuebat ne dum vitiosum vitaret, etiam verum sanguinem perderet. Ars enim, iudicium, & prudentia summa mentis illius vim atque impetus moderabantur, & dum libere spatiabatur (prudenti enim libertate non modo gaudere, sed pene sustentari poesim dicebat) cavebat ne licenter errare videretur. Licet hoc videre multis in carminibus Menzini, sed praesertim in iis, quibus se ipsum vel ad invidorum vocus contemnendas vel ad virtutem colendam excitavit, vel Florentinorum Principum aliorumque heroum laudes celebravit, vel victicia Christianorum arma lauro redimivit, vel demum sanguineas Re-

(1) Ita de se Menzinius in quadam Dissertatione Academica. *Rivolgendomi al canaro Anacreonte io posso con non paurosa voce dir lui.*

*Me pure han visto le Toscane spose
Cirmene inghirlandato in lungo ammanto
Sul chiaro esempio che 'l tuo stil propose.*

gum rixas, atque aeterna odia est detestatus. Dum Menzinius libere alacriterque indulgebat poesi, fore sperabat, ut per illam aliquando egestatem suam sustentare posset. Sed cum repulsam a nobilioribus quibusdam tulisset, quibus liberorum se institutorem obtulerat, quasi poesis ad elidendos omnes virtutis nervos inventa fuisset, & cum praecisam sibi spem videret docendi in Academia Pisana, quod vehementer efflagitaverat, discruciarī coepit, & omnibus iis irasci, quos adversarios & obrectatores se habere suspicabatur. Scripsit ergo duodecim satyras Italicas, ut verissimis maledictorum notis iniusta traderet hominum memoriae sempiternae nomina Curculionis, Gargilii, Malturi, Sgobbiae, aliorumque, quos oderat odio plusquam Vatiniano. Sed praesertim suam insatiabilem crudelitatem exercuit in Curculionem seu Moneliam, quod ejus vitae nulla non iniusta esset turpitudinis nota, & qui ad irridendum Menzinium hujus ore non loqui, sed mingere Musas dicere solebat. Saepe etiam mordet saeculi vitia, aut ventosos homines, aut malos poetas, aut eos, qui

cum starent in ganearum nidore ac fumo; se tamen castimoniae virtutique servire simulabant, aut illos, qui, ut putentur sapere, caelum vituperant, vel eos denique qui perversa Principi consilia dabant. Acerbissimis enim tum oppressa erat vectigalibus Etruria, erantque leges, quæ earum rerum, quibus abundaremus, exportatio, & earum, quas egeremus, invectio prohibebatur. Quæ dum recordamur, gratulari ætati nostræ cogimur, quod nobis sub optimo Principe liceat esse beatissimis. Sed ad Menzinium revertor, cui cum fuisset in animo Dantem imitari, vim quidem hujus expressit, sed ejus oratio non modo nervos & aculeos habet, sed etiam quaedam petulantia & popularia dicta, & cum maledictio petulantius jactatur, convicium nominari debet. Interdum etiam desiderari posse videtur quaedam continuatio seriesque rerum, ut omnes inter se aptae colligataeque appareant, & sane vires satyra acquirit, si uno in argumento, unaque in persona, ut exemplo esse potest satyra x., tota versetur. Nihilo tamen minus principatum in hoc poësis genere, ne Areosto quidem

dem excepto, qui naturali quadam pulchritudine excellit, Menzinius petebat, adeoque aberat, ut damno atque dedecori sibi fore putaret, quod multos Italo aceto ac sale nigro perfricuisset, ut hoc in primis homo fervido ingenio gloriari videretur. Quare facile satyrarum exemplaria amicis concedebat, & harum autographon Paulo Falconerio, quo multum alienarum opum indigens utebatur, dono dedit, ab eo tamen vehementer petens, ne eas typis committi sineret. Quater usque impressae fuere post Auctoris mortem, unde colligitur easdem fuisse gratissimas iis, qui hoc poësis genere maxime delectantur, & qui vitiorum emendatricem poësim esse debere contendunt (1). Ceterum

Tom. VII.

S

(1) Miraberis fortasse hominem natura lenissimum, qualis profecto erat Reditus, ex Menzini quoque satyris ipsum laudandi occasionem sumpsisse: *Duir.*

*E quei che in prima in leggiadretti versi
 Ebbe le grazie lusinghiere al fianco,
 E poi pel suo gran cuore ardito e franco
 Vibrò suoi detti in fulmine conversi,
 Il grande anacreontico ammirabile
 Menzin, che splende per Febea ghirlanda,
 Di satirico fiele atra bevanda
 Mi porga osfica, acerbà, e inevitabile...*

quod non de his modo, sed etiam de omnibus Menzinii carminibus facile judicaveris, verbis magis, quam rebus acrem spiritum ac vim inesse dixeris, omnesque eundem superasse facilitate concludendi versus illo similiter desinente, & dictione omnino poetica & ipsis Musis dignissima. Quare aut per audaces dithyrambos nova devolvit verba, aut epicum canit, aut mores aureos & dignos Heroas educit in astra, aut apium more grata legens thyma circa nemus & prata, vel in montibus pastoritia fingit carmina (& quae sunt hujus generis, mea quidem sententia, ceteris sunt praeferenda) ipsum laurea Apollinari donandum judicaveris. Solent plerique, cum de lyricis Menzinii carminibus sermonem instituunt, curiose inquirere conferri ne ipse possit cum Filicaja & Guidio. Tantum est in Filicaja flumen gravissimorum optimorumque verborum, tam integrae sententiae, tam verae, tam novae, tam sine pigmentis fucoque puerili, ut ille non solum ardere sed & incendere lectorem mihi videatur. Cum vero hujus animum raro relaxet, & novis incrementis

ejus semper augeſcat oratio, & omnia exco-
gitata & omnia diſtributa optime ab illo ſint,
nimis fortasſe artificioſum in opere tamen di-
vino apparet. Parum artis habet Guidius,
plurimum naturae, & velut amnis monte
decurrens nulla contineri poſſe ripa, & ſe-
cum omnia, quae offendit, trahere videtur.
Moderatius fluit Menzinius, & abundare co-
pia & ſuavitate illa voluiſſe videtur, qua
perfundere animos, non qua perfringeret.
Erant iniqui, qui canoras nugae fundere
ipſum dicerent, quod ejus ars praefertim
appareret in verborum delectu, ſed ipſe quo-
que ſua vi quadam ſublevatur, & quamvis
altos nubium tractus, ut Guidius, cum caſus
periculo minime praetervolet, neque rerum
copia, ut Filicaja, abundet, quos tamen do-
nat carminibus ſuis, munere ſane donat ſi-
gnis potiore. Quin ergo beatiffimam praedi-
cabitur Chriſtinam illam Svecorum Reginam,
quod cum laudum eſſet percupida ab his po-
tiſſimum poetis ornata ac celebrata fuerit,
eoſdemque ſummis beneficiis ad ſuam neceſ-
ſitudinem adjunxerit? Stephani Pignatellii,
& Decii Azzolinii Cardinalis ſtudio emerſit in.

illa desiderium vocandi ad se Menzinium, ipsique Romam accedenti, quod evenit anno MDCLXXXV., obviam misit rhedam cum hominibus, qui suo in famulatu erant. Quam igitur expectationem, quod studium, quem favorem secum in orbis terrarum nobilissimum theatrum attulisse Menzinium putamus, insignibus non solum existimationis, sed etiam amoris declarationibus a tanta femina decoratum? Is nihil omisit quod ad ostendendum gratum animum suum pertineret; & miror equidem Latinas potius Musas quam Italicas ipsum statim advocasse ad Reginae laudes celebrandas. Valebat quidem Latina poesi, sed multos in hac arte habebat superiores, & quam condidit panegyris in varias incurrit aut doctorum aut invidorum reprehensiones. Sed ita plerumque sumus natura comparati, ut qua facultate minus possumus, ea praesertim mali virium nostrarum existimatores gloriari videamur. Laudationem aliam postea Menzinius emisit, in qua condenda Italas Musas adeo propitias ha-

buit (1) ut illam cum legeris, inideas Reginae multarum virtutum comitatum, sed maxime rerum humanarum contemptum, & neminem fore tam aversum a Musis affirmes, qui non mandari versibus aeternum suorum laborum praeconium facile patiatur. Nullum porro fuit tempus in vita Menzinii quod minus debuerit mutum esse a litteris, quam dum gratia & beneficiis afficiebatur singularibus Christinae. Otium quo fruebatur, urbs ubi degebat, spes quibus sustentabatur, voces ipsae Reginae, homines quibuscum vivebat, & praemia quibus donabatur, magna erant incitamenta laborum. Itaque saepe prodibat in publicum multum sibi appetens de arte scribendi Etrusce & Latine, & numeris adstricta atque soluta oratione. Quod iudicium vero faceret de optimo poesis genere, & quae essent praecepta & viae ad illud assequendum scripto exposuit, quo nihil elegantius sententiis & verbis fieri potuit. Illud inscribitur *Poetica*, & fama est duorum men-

(1) Hujus initium est:

Sovra carro di gloria

Vider dolci rapiti i sensi interni

Alla levassi l'immortal Cristina.

sum spatio conditum illud ipsum fuisse. Quae in hoc sparsit quasi semina sapientiae, quae tulit iudicia de nobilioribus Italicis poetis, qui quod in dissimili scribendi genere sunt versati propriam quamdam laudem habere videntur, quidquid praecepit ad eluendas saeculi, in quo vivebat, sordes, restituendamque poesi pristinam dignitatem, elegantia iudiciumque in rebus eligendis exponendisque declarant quidem non minus arte quam natura valuisse Menzinium. Instituit hanc suam Poeticam ad Azzolinium Cardinalem, ut gratus erga eum praeteritorum beneficiorum cognosceretur, & ad nova sibi deferenda ipsum invitaret. Saepe enim egebat, quod non tam adversae fortunae, de qua nunquam non ipse querebatur, quam ejus moribus (gloriarì enim videbatur quod esset homo largitor ac pene prodigus, mensae ceterorumque hujusmodi oblectamentorum amans (1) tribuendum. Hac ipsa de caus-

(1) *Nudo e solo ho saputo far fronte alle cose avverse; nelle angustie domestiche ho saputo soccorrere chi aveva meno di me; in mezzo all' tempeste non ho lasciato mai di scrivere, di comporre e anche di darmi bel tempo. Questo a me pare che sappia dell' eroico.* In epist. ad Tegliam, dat. Romae VIII. Kal. Jun. an. 1691.

sa studuit sibi aliorum divitiis affluentium hominum benevolentiam ac patrocinium conciliare ; nec mediocri donatus fuit pecunia cum volumen carminum suorum Laurentio Corsinio Cardinali dedicasset . Non tam liberaliter egit cum eo Rainaldus Atestinus , cui poema illud suum , quod inscribitur *il Paradiso terrestre* , nuncupavit . Hoc vitium enim commune fuisse videtur omnibus Atestinis Cardinalibus , ut poematum conditores nec laudibus nec praemiis afficerent , atque eo magis dolebat Menzinius , quod tale se condidisse poema arbitrabatur , quod posset Areosto atque Tasso invidiam movere . Multum splendoris habent ejus carmina , & honore digna ipsa judicaveris , aptumque poetam non solum ad juvenum curas , & pastoritia oblectamenta referenda , aut ad exiguos elegos , Bioneosque sermones condendos , sed etiam ad epicum canendum . Sed quis cum Areosti vel Tassi laudibus certare possit ? Et quamvis Bellinius affirmaverit nihil jucundius unquam accidisse auribus suis hoc poemate , illud tamen ex hominum memoria pene excidisse videtur . Memor Men-

zinius Horatiani praecepti, quo monemur Socraticas chartas diurna nocturnaue manu versandas, propterea quod

Scribendi recte sapere est principium & fons;

studuit semper non tam delectare quam prodesse, suisque carminibus simul & jucunda & idonea praecipere vitae. Respicens ergo grandiorum exempla virtutum hinc veras deduxit voces ad moralem philosophiam solutis versibus exponendam, nec quisquam dubitaverit quin ipse valuerit magis ad tradenda quam ad exequenda morum praecepta. Quis enim credat hominem aleae deditum declamationes vulgasse, quibus vehementissime in hujusmodi ludos invehctus est? Verum si ejus actiones non semper cum oratione consentiebant, laudabatur tamen hoc ipso quod a versutiloqua malitia abeset, & iis, quibuscum versabatur, qualis esset se proderet; cumque aliis animi bonis excelleret, omnes admirabantur in uno homine tantam inesse dissimilitudinem tamque diversam naturam. Idem, cum tempus posceret, labo-

rius, patiens, affabilis, blandus, & beneficiorum memor, & cum amicorum in se tuendo facultatibus minime caruisset, & fide ad alios sublevandos saepe usus esset, conjici ex eo potest omnia sibi cum amicis esse voluisse communia. Fuit & disertus, neque minus concinnus in brevitate respondendi, quam in perpetua oratione ornatus. Habuit non solum aemulum, sed etiam obrectatorem Alexandrum Guidium, quocum saepe conviciis certavit, videbaturque omnes invitare ac pene cogere ad aliorum laudes deprimendas, suas extollendas. Derisum credo fuisse hominem gloriae percupidum, & interdum etiam arrogantem, cum distitaret ceteros vix tolerabilia, se vero nunquam interitura carmina committere chartis, quare saepe illud Horatianum usurpabat

Carmina possumus

Donare, & pretium dicere muneris:

Quae cum de se sentiret, erat cur vereretur ne a Sæctano, cujus satyrae tum omnium sermone celebrabantur, exagitaretur. Itaque

Pontifex Maximus creatus est Innocentius XII. venerat. Hunc Roma discedentem cum sequi recusasset, quod spes ei aliqua ostendebatur fore ut in Academia Patavina doctoris munus obtineret, non multo post ab ipso Pontifice inter familiares suos, quos ab officio dixeris, adscribitur, & S. Angeli in Piscina Canonici creatur. Quod haec commendatione maxime impetravit Joannis Francisci Albanii Cardinalis, adversantibus licet Jesuitis, qui durius acceperant, quam homines innocentes solent, quae de iis quibusdam in satyris scripserat (1) coepit majori quoque spe sustentari quando ipse ad Catholicæ Ecclesiæ gubernaculum accessit. Nemo enim illo erat propensior ad benignitatem incalamitosos litterisque deditos exercendam. Certe hoc non mediocre fuit amoris Pontificis in Menzinium testimonium, quod eum adiutorem dederit Michaeli Brugueresio in Romano Archigymnasio eloquentiæ magistro.

(1) Sat. I. & IX. Vel antea concitasse in se iram Jesuitarum putatur Menzinius, cum imitatus carmen illud sacrum, cujus initium *Dies irae dies illa*, quaedam injuriosa illis hominibus in vulgus sparsisset.

Munere ipso, quod Laetus, Calderinius, Parrasius, Amaseus, Antonianus, aliique homines doctrina summi sustinuerant, admonebatur Menzinius ad eorum gloriam aemulandam; & in eo laudem non mediocrem colligere se posse putavit, si ad Latinas litteras totum se converteret. Vulgavit itaque orationes *de morum philosophiae, humanarumque litterarum studiis, & de Leonis X. P. M. laudibus*; sed quamvis haec ceteraque ejus Latina scripta non vulgari tincta sint elegantia, non complevisse tamen illa arbitrator aures sapientum judicum, qui non tam puro sermone, quam colore quodam & succo optimorum scriptorum se assuefecerant. Ubi vero praecepta tradit *de poesis innocentia & de litteratorum hominum invidia* agens, pervulgata praecepta decantare mihi videtur, quapropter minime iis assentior, qui Menzino alias tribuendas esse laudes censent praeter illas, quae a poetica derivantur. Ne primoribus quidem labris gustaverat severiores disciplinas, & turpiter lapsus est quoties a geometria trahere voluit similitudines (1)

(1) *V. Sat. IV, v. 45, & lib. IV. Poet. v. 128;*

Nihil dico de illa philosophia, quae rerum divinarum humanarumque naturam causasque se tradere profitetur, quod hanc vix primo a limine salutaverat. Quod teneret ac persequeretur partem illam, quae ad vivendi rationem pertinet, non adeo admiratione dignum puto, ut in hoc laudando multus esse velim. Laudaverim libentius interpretationem, quam Italicis versibus fecit Threnorum Jeremiae Prophetæ, quae adeo accepta fuit Clementi XI. ut typis impressam distribui jufferit Cardinalibus, illis majoris hebdomadae solemnibus diebus. Ajebat enim existimator ille doctus & intelligens nihil fieri potuisse perfectius ad commovendos animos, & ad lamenta atque lacrimas exciendas. Haec perfecta a se fuisse gaudebat Menzinius eo tempore, quo valetudine non bona utebatur, cujus causa cum in Tusculanum venisset, ad sublevanda valetudinis incommoda *Academiam Tusculanam* scribendam suscepit. Imitatus est Sannazarium, qui juvenis *Arcadiam* ediderat, dans sermonem pastoribus, qui saepe se ad recitanda carmina laceffunt. Multa igitur in hoc pa-

floritis opere sparsit carmina Menzinius, sed eorum pleraque jam lucem adspexerant; & quos tribuit sermones aut Euganio, quod ipse ab Arcadam Academia obtinuerat nomen, aut Aristeo, aut Licidae, aut Nearco, aut denique, ut de ceteris fileam, Eumolpo, habent quidem non parum elegantiae & sententiarum, sed aegre iis aures secundo dederis. Satis mihi videbor de Menzini scriptis dixisse, si illud unum addidero, vehementer ipsum concupivisse ex eo praesertim tempore, quo cooptatus est in Florentinam Academiam Furfureorum, penes quam arbitrium esse videtur & jus & norma recte scribendi, ut sua carmina a conditoribus Etrusci lexici nominatim citarentur. Sed sapientissimi Academici

*Grandia quos magni formidant carmina Tassi,
Carmina divino proxima Virgilio,*

quamvis laudem elegantissimi scriptoris facile Menzino tribuerent, non hunc tamen sic ditasse patrium sermonem iudicarunt, ut ejus voluntati mos esset gerendus. Adscitae po-

stea ab Academicis fuerunt ejus satyrae; quod in iis multa sint verba dicendique modi, qui postquam vetustate pene interierant, auctore Menzinio, iterum nati florere ac vigere videbantur. Nemo vero ignorat satyrarum scriptorem non dominantia solum verba usurpare debere, sed etiam interdum inusitata, aut parce detorta. Demum cum anno MDCCXXXI. quarto editum fuisset Etruscum lexicon, omnia Menzini carmina eam auctoritatem obtinuerunt, quae esset aureae aetatis scriptorum. Quis vero non accusabit arrogantiam hominis, qui malum minitari visus est suis civibus, nisi ab iis, quod concupierat, obtinuisset? *Noli aculeos orationis meae*, scribebat hac de re ad amicum, *qui reconditi sunt, excussos arbitrari*. Porro magnus animus in homine nec perfecto nec sapiente ferventior plerumque est, & facit φιλαυτία non amantem suorum, ferocem etiam, arrogantem atque infestum (1). *Moriar si praeter se* (affirmabat ei ali-

(1) Haec ad amicum scripsit. In quanto agli Accademici io credo che avrenno tanto lume da conoscere che un poeta della loro patria, quando è buono, deb-

quando Crescimbenius vel ad leniendum animum vel ad solandum dolorem ejusdem quemquam reliquum habeo, in quo possim imaginem perfecti poetae agnoscere. Nullum est poesis genus quod a te non sic tentatum fuerit, ut qui tua scripta intueatur, tanquam exemplar optimi non possit intueri. Quo praeconio laetus nihil non concedebat Menzinius postulationibus Crescimbenii, cujus omnes curae dignitatem, gloriam & famam Arcadum coetus,

ha andare inanzi a quegli stranieri profatori, che e' citano, tanto quanto un nobil poeta è di lunga mano anteriore ad ogni profatico nelle eloquenti sue forme e nella invenzione. Che se egli han lasciato di citare quei due di Lombardia (Maggi e Lemene) io al certo non son loro, e se questa giustizia non me la fa il secolo presente, se spirito al ver presago il cuor m' accende, me la farà l' avventure. Ep. dat. Romae prid. Kal. April: 1691. Paulo post haec quoque scripsit. Io ho detto e dico che non mi curo nè punto nè poco nè di esser citato nel vocabolario, nè di esser nel numero degli Accademici. Onde non occorre faticarvisi. Io ho detto che non facendo codestoro l' onor che dovrebbero ai buoni Scrittori della lor patria, mi pajono gentiluomini assai assai villani: nè io ho bisogno del lor presidio per mantenimento e del mio nome e della mia fama. E quando io volessi risentirmi, ho l' unghie tanto lunghe da metter loro paura più che se vedessero l' ipogrippo &c.

tus, cui praeerat, spectare videbantur. Sed homini, quem tantopere gloria titillaverat, coepit haec fordere, cum ab hydropse, qui ficcus dicitur, ad mortem se rapi videret. Non communia hoc praesertim tempore dedit constantiae & pietatis signa, neque tum quoque suas filere Musas sivit, harum voces non injucundas fore sperans Deo, quem sibi placabilem & aequum exoptabat (1). Obiit Romae VII. id. Sept. an. MDCCIV., sepultusque fuit ad S. Angeli in Piscina cum hac inscriptione:

BENEDICTUS MENZINIUS
FLORENTINUS
HUIUS ECCLESIAE CANONICUS
POETA ET ORATOR
OB. SEPT. ID. SEPTEMB.
AN. REP. SAL. MDCCIV.

Nudus nummis & agris libros suos Philippo Leerio, scripta vero sua Francisco Tegliae

Tom. VII.

T

(1) Vid. Vol. IV. ejus carminum p. 35. quo in loco extat ode, quam morbo oppressus condidit, vel potius fudit. Hujus est initium;

Mio Gesù, mio Signor, vedi il meschino,

testamento legavit. Utrumque enim maximis amicitiae vinculis conjunctum semper habuerat. Visus est Leersius aliquid addidisse famae Menzinii suis carminibus, & illo praefertim epigrammate, cujus initium;

Quando la giovanetta d' Oriente:

Nihil vero non egit Teglia ut omnia Menzinii scripta, & vel ea quibus facile caruifsemus, simul collecta typis imprimerentur, doluitque se invenire non potuisse neque Latinam satyram, quam Menzinius condiderat ad diluendam opinionem eorum, qui ex officina sua Sectani satyras prodiisse dictitabant, neque pastoritias Eclogas, quarum autographon Redio concefferat, neque alia hujusmodi pauca, quorum jacturam dolere quoque debent ceteri omnes poësis amatores. Quae vero praefatus est Teglia pietatem magis suam in mortuum, quam rectum judicium ostendunt, cum effusus fuerit in omni eo, quod suffragari posse Menzinii laudi existimavit. Nos quidem parciores erimus, & cum homines doctos in illud con-

tenſiſſe elogium dixerimus , in principibus
Italicis poetis numerandum Menzinium , ne-
minemque fortasse extitiſſe , qui varia adeo
poeſis genera , atque ille , tractare potuerit ,
ſatis illius faſiſſe laudi arbitrabimur .

OPERA EDITA

Quatuor in Tomos diſtributa

- Tom. I. Poetie liriche , lib. XII.*
*Tom. II. Poetie varie , cioè l'Etopedia , ovvero Iſtitu-
zione Morale , lib. IV. : il Paradiso terreſtre
lib. III. : Arte poetica lib. V. : Elegie XVII. :
Trenodie di Geremia , Profeta IX. . Extremo
in libro extant quae Laurentius Bellinius cecinit
ad celebrandas laudes Menzini .*
*Tom. III. Proſe volgari , cioè Lezione Accademica recita-
ta nell' Arcadia di Roma : Lezione paſtorale
agli Arcadi : Diſcorſo Accademico della Bellezza
recitato nell' Accademia di Criſtina Regina di
Svezia : Prego alla Croce : Diſcorſo nel quale
ſi prova che le lettere devono eſſeſſe congiunte
alle morali diſcipline : Declamazioni II. con-
tro de' giuocatori : il Miſantropo : l' Accade-
mia Tuſculana : della coſtruzione irregolare della
lingua Toſcana : e le lettere ad Uomini il-
luſtri .*
*Tom. IV. Latine ſcripta tum verſibus tum ſoluta ora-
tione : Oratio de morum philoſophia literarum .*

Studiis adjungenda : Oratio ad S. R. E. Cardinales pro eligendo Pontifice Conclave ingressuros : Oratio cum libros Aristotelis de arte Rhetorica esset explicaturus : Oratio cum duos juvenes jurisconsultorum laurea Romae insigniret : Oratio in funere Leonis X. : Calumnia vindicata pro se ipso : Opuscula de poesis innocentia, de litteratorum hominum invidia, & de inani gloriae studio : Latinae epistolae : Latina carmina. Claudunt volumen quae Joseph Paoluccius scripsit de vita Menzinii, & quae Josephus Blanchinius exaravit in disputatione & dialogo, cum orta controversia fuisset, an Menzino Alexander Guidius in lyrica poesi praefectendus esset. Multis enim argumentis se probare posse putat penes illum principatum esse.

Satire.

VINCENTIUS A FILICAJA.

Vincentius a Filicaja Florentinus. Huic homini vix similem invenies tum bonitate morum, quos neque desidia, neque luxuria unquam vitiarunt, tum praestantia in poesi, cui perparum officit mala, quae tum vigeat undique, scribendi consuetudo. Natus est enim an. MDCXLII. III. Kal. Decembris, quae tempora mitioribus litteris tenebricosissima & prope fatalia scimus fuisse; tantus erat error, & offusa caligo illorum animis, qui aliquod cum Musis commercium habere cupiebant. Bimulus matrem Catharinam Spiniam amisit, feminam, quae de nobilitate cum nobilissimis Florentinorum familiis, inter quas Filicaja numeratur, poterat sane contendere. Puer a Jesuitis didicit quae disci tum poterant. Apud eos se dilutius potasse dicebat; explevisse vero quasi diuturnam sitim, cum ad Academiam Pisanam venisset, quo in loco & Latinis litteris & philosophiae & rerum divinarum doctrinae & jurisprudentiae, quae discipli-

na, ut pote quaestiuosa, ei praesertim a patre fuerat destinata, operam dedit. Rarum domo prodibat, nisi studiorum & religionis causa, quam impensissime tota vita coluit, & mirari, vel potius dolere eos videbatur, qui hominem in solitudine, quasi haec omnem voluptatum fructum auferat, beatum esse posse negabant. Erant illi oblectamenta & solatia majorum studiorum poeticae exercitationes, per quas brevi ad hominum famam pervenit; & quoniam arte valebat in legendis verbis benesonantibus, etiam eos delectabat, qui turgidum & inflatum dicendi genus sequebantur. Nunquam ille plus solatii a Musis accepit, quam dum nobilissimae & castissimae puellae, quae prope ejus domum habitabat, amore sane improbo captus est. Canebat saepe amatoria, quo uno levare sibi videbatur: postea cum e vivis illa jam nupta erepta fuisset, cum gemitu & lamentatione fundebat: carmina, quae Orcum commovere potuissent. Animi plaga, quam nec diuturnitate vaneſcere, nec ullis amnibus elui posse putabat, tandem, ut fit, evanuit, tantaque vis fuit poe-

nitendi, ut flammis tradiderit, quae con-
 derat, amatoria, seque sacramento obliga-
 verit non canendi Musis nisi sacra & heroi-
 ca. Quod & fecit. Imitari prophetas, quin
 immo prophetico spiritu totus accendi atque
 animari videbatur, cum de rebus divinis di-
 ceret. Servabat ad extremum usque carmi-
 nis, magniloquentiam omnino singularem,
 ferebaturque huc illuc, tanquam plenus Deo,
 potuitque efficere, ut nihil majus melius-
 que ejus lyricis, carminibus conditum fuisse
 existimatores docti & intelligentes judicave-
 rint. Porro quid nobilius & grandius exco-
 gitari potest iis odis, quas confecit, cum
 Vindobona, dira Turcarum obsidione liberata
 est? Videberis tibi, cum eas legeris, in a-
 ciem dimicationemque venisse, & cum po-
 tenti Deo, sine cujus numine nulla sunt
 arma hominumque consilia, audenter lo-
 qui, & id quod cupis, exigere magis quam
 petere aut contendere. Decuit quoque se-
 paratim consecrari Musis nomina & gesta
 eorum, quorum virtus in bello enituit,
 nec miraberis magis aut Joannem Poloniae
 Regem, aut Carolum V. Lotharingiae Du-

cem Barbarorum agmina vasto diruentes impetu sine clade victores, aut Leopoldum, qui copias & suos praebens Divos, & vota ad caelum assidue fundens; belli secundos reddidit exitus, quam artem poetae, qui potentior vel ipsis strenuissimis ducibus videtur, dum fervet, & *immensus ruit*, ut aiebat poeta ille, *ore profundo* novis suorum heroum tempora vinciturus coronis. Sunt qui putant esse in his carminibus pauca quaedam, in quibus nimis ingenium emicat; & sane in omni re lyrica indignamur non modo si quid sit humile aut inlepidum, sed etiam si quid sit nimium attenuatum, quod omnia instinctu, inflatuque divino fusa apparere debeant. Verum ego minime paucis offendar maculis, praesertim cum aliquid dandum sit ipsi, in quo poeta vivebat, saeculo. Iste *vates magnorum maximus Regum* cecinit quoque laudes Christinae Svecorum Reginae, cui nihil magis laetabile in orbitate Regni videri solebat, quam celebrari a magni nominis poetis. Praeter ceteras enim *φλαυτή* & erat & habebatur. Sed quem non tiullasset ode illa Filicajae, cujus initium; *Alta*

Reina, i cui gran fatti egregj, in qua tanta est copia ornatissimorum verborum ac sententiarum, tam belle multae & variae res inter se junctae, adeoque ab initio usque ad imum servata vis, magniloquentia, omneque id quod ad sublime pertinet, ut nunquam melius & ornatius virtutem celebratam fuisse facile affirmes? Nec verebatur Filicaja ne sua praedicatio non grata potius quam blanda videretur, postquam magnis coepit Reginae obstringi beneficiis. Litteras ab ea frequenter accipiebat amoris plenissimas, & hoc praesertim illa se gloriari dicebat, quod quae optima erant degustaret, atque sciret Filicajae meritas tribuere laudes, cum ei primas in lyrica poesi deferret (1). Hunc quoque, quamvis absentem, privatae suae Academiae adscriptum voluit; saepe ad se invitavit; auctumque filiis (nam anno MDCLXXII. Annam Capponiam uxorem da-

(1) *Io mi prego che si dica un dì: Cristina benedice strenuamente e gioisce le opere del gran Filicaja.* Vid. ejusdem Reginae epistolas quasdam, quas Thomas Bonaventurinus retulit in commentarium Italicum de vita Filicajae. Legenda etiam Latina ode ejusdem Filicajae, cujus initium: *Regum maxima grandiorque regno &c.*

xerat) hos in liberorum suorum loco se habituram sancte pollicita est. Atque illa, quae postea gessit ad fidem suam solvendam, omnibus occulta esse voluit, quae quidem & alia hujusmodi, & domesticarum sollicitudinum aculeos omnes & scrupulos innuit Filicaja iis in nobilissimis carminibus, quae *sacrificia* inscripsit; nec fateri ipse dubitabat, quoties liberos ipsos, quoties conjugem, quoties domum videret, toties se beneficia Reginae videre. Ipse vero animo recogitans haec aliaque bona, & magnam, qua fruebatur, famam sibi a poetis dimanare, in hac excolenda sibi magis magisque elaborandum esse putavit, ita tamen, ut quid quid conderet, id totum esse a Deo, quo praesertim ex fonte (1), minime vero ex obscuriore aliqua scientia, neque ex mythologiae, fabulis promenda atque fumentum nobilissimorum carminum argumenta esse dicebat. Hosce religiosi animi sensus praeser-

(1) *Non io l' Ascreo ,
Che già la sete giovanil m' accese ,
Torbido fonte beo ,
Ma Clio la croce , e mio Parnaso è il monte ,
Quel monte in cui la grand' Ossia cadeo .*

tim exposuit in ode illa, cujus initium : *Padre del Ciel che il gemino Emisfero* : in qua licet eluceat magna copia nobilissimarum sententiarum cum elatione atque altitudine orationis, non meditata tamen, sed coacta dicere Poeta videtur. Deploravit autem eos, qui genus invehunt injustae servitutis, cum poesim famulari cogunt amatoris ineptiis; & cum ipsam poesim lamentantem induxisset pristinas calamitates suas, atque impia detestantem saecula, gratulari aetati suae videtur, quod factum Christinae Svecorum Reginae opera fuerit, ut Italicae fidicines lyrae tot essent aut in divinis hymnis aut in Heroum laudibus canendis. Atque hujus carminis eo libentius mentionem feci (1) quod in eo insit vera sublimitas, magnificentia & nitor, & quod ex eo maxime intelligi possit novisse Filicajam artem distribuendi ornamenta, moderandique sibi ipsi in maxima copia imaginum, memorae sententiae Apellis, qui pictores eos, ut est apud Tullium, aberrare

(1) Incipit illud :

Nel più alto silenzio, allorchè amico

Sonno sol dolce venisse dell' ale .

dicebat, qui non sentiret quid esset satis. Dicenti vero de poesis fortuna, vicissitudinibusque opportuna occasio videri poterat, ut est in more positum poetis, suas quoque laudes praedicandi; sed cave putes hominem fuisse modestiorem Filicaja, qui ita solebat ad scribendum accedere, ut aliquid tentaret magis, quam perficeret. Quamquam minime ei opus erat mentem concalefacere, imitarique eos, qui primas hastas ita leniter jactare solent, ut & venustati serviant, & reliquis viribus consulant. Continuo videbatur se universum profundere; & cum plane ipsum satisfecisse argumento, & inopem & exhaustam jam factam fuisse poetae pharetram existimasset, novis iisque validioribus ipsa pollebat armis, non extrinsecus quaesitis, sed ex ipsis rerum visceribus depromptis. Quare minime est mirandum si a sapientissimis judicibus lyricae poesis principatus ei datus fuerit (1). Neque minus feliciter

(1) Ex multis unam Redii epistolam exscribere libebit.

E' già qualche tempo che nell' interno più segreto del mio cuore ho sempre meditato di dare una tacita sentenza intorno al primato de' poeti lirici Toscani del

ipse expertus est quid posset in minoribus carminibus, & quaedam hujus generis reliquit, quae memoriter ab omnibus Musarum cultoribus recitari solent. Nemo vero ignorat quantae difficultatis sit aliquid in hoc genere condere, quod perfectum expletumque sit omnibus suis partibus, quod iis satisfaciendum sit, qui cum gaudeant perfecto completoque verborum ambitu, vim eti-

nostro corrente secolo: ma non son mai venuto all' opera, ancorchè potentissimi ed incontrastabili motivi avessi di farlo a favore di un Cav. mio riveritissimo padrone ed amico. Veramente non l'ho mai fatto, perchè uno scrupolo superstizioso di amore m'ingombra-va tal volta l'animo con certo apparente dubbio di giudice amoroso ed appassionato, e per conseguenza abile a commettere qualche involontaria ingiustizia. Ma jeri dopo aver letta più volte la Canzone di V. S. Illustrissima per la beata Umiliana de' Cerchi, svanìammi ogni superstizione di scrupolo, non solamente pronunziai la sentenza nel segreto del cuore, ma la falsai altamente in presenza di numeroso popolo, e volli che ne fosse presa una giuridica testimonianza da molti valent' uomini, tra' quali numererò solamente il Sig. Conte Lorenzo Magalotti, ed il Sig. Priore Luigi Rucellai, che per fortuna si trovarono presenti nel solito tribunale della mia casa. La sentenza è data e data con giustizia, nè m'importa se qualche spirito di contraddizione vorrà sgridarmi con dire:

am gravitatemque sententiarum desiderant;
 & qui ex poeta exigunt, ut brevi quatuor-
 decim hendecasyllaborum circuitu multa com-
 prehendat, quae nulla ex parte claudicent,
 & quae non solum apte, sed etiam perspi-
 cue & eleganter juncta sint, perinde ac si spon-
 te fluerent, & quae demum non voluptate
 solum, sed etiam admiratione quadam au-
 dientium animos perfundant. Quapropter
 multorum poetarum voluminibus anteposue-

*Or tu chi sc' che vuoi sedere a scranna ,
 Per giudicar da lungi mille miglia
 Con la veduta corta d' una spanna ?*

*perchè non ne farò conto, e se vorrà sapere i motivi,
 gli darò molto volentieri. Mi rallegro dunque con V. S.
 della bella canzone, e supplico la sua modestia a non in-
 sdegnarsi meco, se invece della critica impostami io
 gli mando una giustissima favorevole sentenza. Haec
 Reditus epistola data VIII. Kal. Sext. MDCLXXXVI.
 Vel antea Reditus cum legisset quae Filicaja cecinerat
 de Leopoldo Caesare, deque aliis heroibus, qui Viennam
 a Turcarum obsidione liberarunt, haec scripserat:*
che nell' artificio, nella nobiltà e nell' altezza giudi-
ziosissima delle sue canzoni V. S. Illustrissima è supe-
riore

τοῖς, οἱ νῦν γεγῶσσι, καὶ οἱ μετ' ὀπίσθεν ἔσονται.

rim illa Filicajae epigrammata, quae veluti laetissimos flores cineri consecrat amitae carissimae Camillae Filicajae (1); aut illa, quibus lamentatur sortem Italiae, quod in ea acerbissima & continua bella versarentur, ipsamque a desidia & languore ad industriam virtutemque avocat (2); aut ea, quibus miras divinae Providentiae artes celebrat (3) & ex aliorum calamitatibus nos iram Dei timere docet (4); aut illa demum (infinitum enim esset singula commemorare) quibus omnes ad virtutis amorem, ac praeclara mortuorum exempla imitanda, seque ipsum ad retineendam perseverantiam in bonis atque constantiam in adversis excitabat. Raro enim prospero fortunae flatu usus est. Siqui-

(1) Est quaedam veluti catena novem epigrammatum, quae sic juncta poema propriae cujusdam naturae efficiunt. Visus est Bellinius, cum laudes caneret Benedicti Menzini, hunc morem induxisse: nam qui ante eum florere poetae ad summum bina, & quidem raro, jungebant epigrammata.

(2) *Italia, Italia, o tu cui feci la sorte &c.*

Dev'è Italia il tuo braccio? A che ti servi &c.

(3) *Qual madre i figli con pietoso affetto &c.*

(4) *Qui pur fosse, o Città, né in voi più resta &c.*

dem gravi & periculoso morbo semel iterumque affectus est, filium magnae spei, qui Magno Duci erat ab ephoebis, amisit; premebatur angustiis rei familiaris, & jure dolebat spes omnes illas, quas in liberalitate Christinae Svecorum Reginae (obierat enim illa an. MDCLXXXIX.) posuerat, omnino evanuisse. Actum a Paulo Falconerio, quo neminem cariores habebat, de addicendo Filicaja Rospilioforum familiae. Sed cum conditiones non convenissent, neque libenter ipse educationis taedium laboremque susciperet, excogitavit tandem Cosmus III. quemadmodum calamitatem ejusdem non modo levaret, sed etiam honestaret. Delatam itaque Volaterrarum Praeturam Vincetius sic accepit, ut de aliorum utilitatibus & commodis unice sibi esset excogitandum. Quare non rugis supercilioque quemquam terrebatur, sed clementia, mansuetudine, facilitate humanitateque omnino singulari omnes ad se amandum cogebar, ut nihil tam populare, quam ejus nomen, nihil tam omnibus carum, quam ejus auctoritas videretur. Non injucundum fore lectoribus puto, si hoc loco exscri-

exscripsero , quae Filicaja ipse de sua Vola-
terrana Praetura ad Franciscum Montanium
scripsit , ex quibus etiam intelligi poterit
hominem religiosissimum , si auctus honori-
bus , aut re familiari fuit , aut si aliud quid-
piam nactus est boni , aut malum depulit ,
tum Deo gratias se agere , tum nihil suae
laudi assumptum arbitrari .

ME Praetore , quater gelidi rediere Decembres,
Quaterque arista floruit .

Quid, Montane, actum ? dices; magna, aedepol, egi
Magna, hercle, nec pauca admodum,

Quaeque operae pretium sit dicere . Reddius urbi est
Diu negatus Histrio ;

Bisquae novem clausae , populo indignante, per annos
Jam comicae patent fores :

Sublati anfractus passim , salebraeque viarum .
Hinc saxo & hinc laterculo ;

Defensae leges; odia intercisa : diremptae
Lites perantiquae & graves :

Indictum sceleri bellum : meretricia labes
Absterfa : difficillimis

Nec non temporibus servata annona . Quid ultra?
Non orphano , non virgini ,
Tom. VII.

Præsidium viduae non defuit, & mihi toto

Nox una quadriennio

Extra urbem haud sane transacta; data inde Latinae

Sunt subcissa tempora

Etruscaeque lyrae non nunquam. Nec plura forsan

Egisse me non abnuo.

Egi autem? Sim stulte audax, nisi cetera dicam;

Egi haec, Deo sed auspice

Atque auctore Deo. Frustra vigilo ipse, vigil ni

Urbem Deus custodiat.

Dum studio, amore, animo nulli deesse satagebat Filicaja, requiem curarum animique oblectationem in Latina praesertim poesi conquirebat. Erant vero nonnulli qui perdere operam ipsum distarent, cum ejusdem Latina carmina cum Etruscis compararent: Facilis quidem & expeditus erat ad illa condenda; veterum scriptorum erat litterate peritus, adeoque callebat Latii linguam, ut vel res difficillimas, cujusmodi sunt quae ad *mugarinum*, tum florum rarissimum, de quo rogatu Laurentii Magalotii plura scripsit carmina, ad passerum venationem (1), ad ala-

(1) De hoc carmine ita Regnierius Gallorum elegan-

bastrorum sculpturas , ad falis , ceterarumque hujusmodi artium , quibus Volaterrae florent , fabricam pertinent , satis feliciter exponere posset . Nihilo tamen minus color quidam urbanitatis & succus , qualem in omnibus ferme saeculi XVI. poetis admiramur , & in nostrae etiam aetatis nonnullis , inter quos honoris causa nomino Zanottum & Vulpium , Latinis Filicajae carminibus deesse mihi videtur , ut propterea non admodum doleam pleraque eorum , quae condidit , quaque singulari ejus haeredum humanitate diu

V 2.

nissimus ad Magalotium scripsit .

Oh che nuova, oh che bel'a, oh che galante cosa il componimento del Sig. Sen. da Filicaja sopra la caccia de' passerì! E dove mai ha trovato egli il modo d'accomodargli così bene al gusto di chiunque abbia un po' di gusto, cui mens sapiat & palatum? Certo, ch'egli è un gran maestro di dire e di condire, arbiter dicendi & caenandi. Oh perchè egli non dà alle stampe le sue composizioni latine, così gravi e sode dove bisogna, così galanti e delicate, ove la materia lo ricerchi, e così belle e ingegnose da per tutto? Diale fuori, quando non fosse per altro che per dar a divedere

Che l' antico Latino

Negl' Italici cuor non è ancor morto .

in manibus habere mihi contigit, adhuc in tenebris latere. Non est tamen celandum, ut est locupletissimus testis Magalotius ipse, in Britannia plurimum celebratum fuisse Filicajae nomen ob illius Latina carmina, quae studiose colligebat Henricus Newtonus Britannorum ad Cosmum III. Legatus, ut civibus suis eorum exemplaria mitteret. Hujusmodi vero munera eo gratiora accidebant, quod saepius Filicaja ad nobilissimos Britannorum celebrandos Latinas Musas invitavit, & quae de Sommerio scripsit (1) non po-

(1) *Perché impariate a stimar l' Inghilterra, sappiate che per due sole ode comparsevi di vostro, il concetto dell' Autore vi è divenuto sì grande, che Mylord Sommer scrive all' Inviato che non c' è cosa che ci non desse per poterle tutte. Gli ho detto che tutte sono di molte, ma che se gliene potrà mandare anche qualcheuna di più di quelle che si sono date a lui. Il buono Inviato s' è messo a durar la fatica, che vedrete nell' aggiunto foglio di sua mano. Mandatemi quelle che vi par d'aggiungere, che si copieranno con tutte quest' altre. Il nostro Gori aveva già due volte fatto il possibile per farmi scendere la vostra ode Paolina con mettercela in cielo Empireo, e una fra l' altre jermattina sulla porta di S. Felicità. Con tutto ciò bisogna che io vi dica, che nel leggerla mi sono più volte avuto a scandalizzare del Gori, che non me ne avesse*

terant non esse acceptissima populo, propriorum meritorum laudatori superbo. Miror autem Filicajam eo tempore, quo hujusmodi scriptionibus operam dabat, vel putidius, vel invitius (nolo enim dicere de tam suavi homine fastidiosius) ad Etruscas Musas accessisse. Quod nonnulli tribuebant eorum, quae antea concinnaverat, carminum praestantiae, quasi hanc senescens aequare se posse desperaret: affirmabant alii persuasum esse poetae majorem se posse ex Latinis carminibus laudem colligere, quasi eorum nitore atque splendore omnium ocu-

V 3

detto più affai, e che nel dirmene non avesse accompagnato le parole con scagliamenti di vita, con buttare in terra il cappello, e talvolta con bestemmie. Oh che gran cosa, oh che gran cosa, oh che grandissima cosa! Grande per l'invenzione, grande per i pensieri, mirabile per l'unità, spaventosa per l'espressioni.

La prima volta che l'ho letta, pensavo per accreditarmi di notarvene qualcheduna. Ma poter del mondo bisognava copiarla tutta. Ma che cosa mai, per l'amor di Dio, è quella di considerare le figure di Cimabue, e poi quella di Tiziano e del Rubens con quella po' d'applicazione. Siete un vero Diavolo sempre, ma in Latino, il Lippi darebbe il suo voto a Plutone, che dovesse farvi Diavolo a due code.

los perstringeret; ipse vero aiebat Italicas
Musas (1), quae sibi in virili aetate propitiae
fuerant, pene averfari hominem senescen-
tem, & multis valetudinis incommodis af-
fectum.

*Viscerum e flagno mihi dira surgit
Aura, caelo praecipitat dies cum
Funcla. majoresque cadunt ab aliis
Montibus umbrae.*

(1) Postremum fortasse Italorum carminum, quae
concidit Filicaja, hoc loco refertur libebit, &
quod sit, meo judicio, elegantissimum, quod-
que pietatem viri religiosissimi redoleat, quod-
que sit ineditum.

Gl'è già la riva asferro, e la tenace
De' miei faldi deseri ancora io getto,
Nè più mi turba il tempestoso aspetto
D' un mar ch' ha guerre vere e finta pace.
Nè di vane speranze aura fallace
Più mi lusinga, e nel cangiato petto
Altra speme si desta, ed altro affetto
Cha ubbidiente alla ragion soggiace.
Onde fuor di periglio, a quel crudele
Mar mi rivolgo, ov' io rimasi assorto,
E' a cui tanti versai pianti e querele,
E dico a' miei pensier, chi quà v' ha scorto?
Calate omai le combattute vele,
E quel scioglieta i voti, è questo il porto.

*Aegritudo hinc & dolor & gravedo,
Inquies nec non rigida, ille se se
Dum levat flatus, regionem & omnem
Pectoris implet.*

*Vibro non acres ego tum jambos;
Immo habet plēctrum paries, habentque
Triste Musae iustitium & canendi
Nulla facultas.*

*Jamque me denus cruciat November;
Et medelis & medica arte tota
Jam fere absumpta mihi spes misello
Haud super ulla est.*

Haecenus de Filicajae carminibus. Si cui
vero aut perquam breviter, aut impolite
ejus laudes perstrinxisse videbor, illum de-
legabo ad Eustachii Manfredii carmen (1);
quo sic celebravit summi poetae merita, ut
magnum & persapientis hominis judicium non
mediocriter eruditi assentationem illud existi-
mare debeamus. Haud autem puto commemo-
randa, quae soluta oratione scripsit Filicaja;
quod quae mediocria sunt vix locum habere

V 4

(1) Hujus initium: *Verdi, molli, e fresco' erca Gra*

debeant in laudatione hominis, qui Musas adeo amicis expertus est, ut per eum maxime Itali non multum aut nihil omnino Graecis in lyrica poesi concedant. Nec minus illa laudanda sunt in Filicaja, quae a virtute proficiuntur. Quanta in eo comitas, quanta jucunditas, quam mollis animus ad deponendam omnem offensionem, quam fortis in adversis fortunae casibus ferendis! Quam idoneus ad conjungendas amicitias! Quanta caritas non modo liberorum, conjugis, ceterorumque sibi sanguine conjunctorum, sed etiam universorum hominum! Saepe miseros sic levavit, ut eorum calamitatis non solum adjutor, verum etiam socius videretur. Nihil dicebat, nihil faciebat, nihil cogitabat denique nisi considerate, cumque omnia ejus consilia resque omnes, quas gerebat, a Deo proficerentur, eodemque referrentur, imaginem antiquitatis in eo dixisses intueri. Quas vero curas, quas vigilias, quae consilia, quod justitiae studium ad rerum publicarum administrationem afferebat! Sunt qui narrant in rebus politicis eum non satis fuisse pru-

dentem, nec satis peracutum ad mala praevidenda, hominesque noscendos. Quod si reliquero incertum, illud omni asseveratione affirmabo neminem illo fuisse integriorem atque castiorem, neminemque cupidiorum suis officiis atque reipublicae satisfaciendi. Quare minime est mirandum, si Volaterrani maximis precibus a Cosmo III. postularunt de retinendo homine, quem juxta ac parentem diligebant atque venerabantur. Prorogata illi quidem fuit Praetura, sed hanc anno MDCC. cum Pisana commutavit. Biennio Pisis fuit, ex qua urbe Florentiam rediit auctus munere sane amplissimo, quod ad continendos in officio ipsos urbium atque oppidorum praefectos institutum esse videtur; quam rem praeter voluntatem atque opinionem sibi accidisse dicebat. Cum satis otii in patria nactus esset, de perpoliendis edendisque suis Italicis carminibus (qua in re non tam suo, quam prudentissimorum hominum judicio uti solebat) cogitationem suscepit, & eorum quidem impressionem inchoaverat, cum pleuritide correptus diem obiit supremum. Vel mortuus vivere videba-

tur; tantus illum honos, memoria, desiderium profecutus est amicorum. Denique haec in familiari Filicajae gentis sacello, quod est in S. Petri Aede, Scipioni Vincentii filio inscribi placuit, ut idem monumentum & paternae virtutis & suae pietatis posterì haberent.

D. O. M.

V *Incentio a Filicaja Senatori Florentino Senatoris Bracci filio, qui non vulgarem generis claritatem vicit ingenii laude & elegantia carminum cum Latinorum tum Etruscorum, quae totam rempublicam literariam gloria honestavit. Christinae Svecorum Reginae amicitia clarus. Joannis Sarmatarum Regis & Leopoldi Caesaris Augusti admiratione & literis celebratus. Ingenii laudem Volaterrana Pisanaque Practura praeclare gesta, aliisque publicis Senatoriisque muneribus egregie obitus, innocentia vitae, prudentia, modestia, religione, continentia, humanitate superavit. Scipio Filius Eques Divi Stephani Patreni optimo, qui omnibus ingens desiderium sui reliquit, lugens & meorore afflictus posuit.*

ANGELUS FABRONIUS

ANTONIO NICOLINIO

S. P. D.

SI forte tibi videor diu multumque tenuisse
suspensam expectationem, quam tibi dedi
scribendae vitae Iosephi Averanii praeceptoris
tui, satis iusta excusatio erit, quod ita disten-
sus fuerim in perficiendis edendisque aliorum il-
lustrum virorum vitis jampridem susceptis, ut
huic scriptioni minime tempus habuerim; quod-
que mihi Romae commoranti multa deessent adju-
menta ad illius hominis mores, factaque penitus
cognoscenda. Non mediocri profecto dolore af-
ficiebar, cum videretur jure a me exigi, ut opus
contexterem usui praescribam illorum, qui parabans
Urbanam editionem non solum Interpretationum
juris, sed aliarum quoque rerum, quas Latine
scripsit Averanius; verum usque mihi temperavi
dum Florentiam venirem, ut dignum aliquid &
tanto viro & expectatione hominum efficerem.
Quod me consecutum fuisse non ausum dicere.

Id certe omni studio, omnique diligentia curavi, cujus rei plurimos testes habeo, teque praeserim, ad cujus opem saepe confugi. Unde enim facilius res Averanii cognosci possunt quam ex te, qui ejus disciplinae alumnus fuisti, qui totum illud tempus, quo Pisis studiorum causa commoratus es, ejus jucundissimae convictionis fructum percepisti, qui omnia pene cum ipso habuisti communia, qui vivum omni officiorum genere coluisti, qui morienti adfuisi, mortuum vero & laudatione & sepulcri monumento decorasti? Non semel a te audiivi, tam gravi vulnere in ejus interitu percussus te fuisse, ut ferme jacueris exanimatus; nunc vero recordatione praesentiae-consuetudinis sic frui, ut beate vixisse tibi videaris, quia cum Averanio vixeris. Neque id immerito. Non mediocrem enim partem ex ejus laudibus exhausisti, atque in te transfudisti, quod ut assequere non magnopere quidem illi viro elaborandum fuit: neminem enim habebat clariorum quem tibi proponeret, quam te ipsum; te imitari, tecum ipse certare oportere dicebat, neque licere, tanta expectatione vel a teneris annis excitata, tantisque a natura in animo insitis quasi virtutum igniculis & seminibus, non tui similem

esse. Sed in multis maximisque laudibus tuis est praesertim quod praedicem miram illam bonitatem facilitatemque, qua cunctis hominibus prodesse, cunctis ingenii tui, doctrinae, consilii facem praesferre cupis. Quot in Etruria nominare possumus sapientiae laude florentes viros, qui vel opibus, vel gratiae, quibus plurimum polles, vel monitis tuis quidquid habent, & quicumque sint, se debere libentissime consentunt? Quot adulescentes, in quibus est indoles ad sapientiam concipiendam, voces tuae quotidie ad Academiam Pisanam impellunt hortanturque, tui aliorumque propositis exemplis, de retinenda Juris prudentiae dignitate? Verendum sane esset, nisi te, aliosque paucos tui similes haberemus, ne in illud tenebrosissimum tempus, quo nondum inventis artibus, nullam scientiae lucem homines adspexerant, sensim relaberemur. Quid dico sensim? Immo praecipites revolveremur, si invaleret opinio inscitissimorum hominum, qui non solum omni apparatu ornatuque denudant nobiles disciplinas, sed etiam funditus evertunt penitusque dissolvunt, revulsis vinculis, quibus illae continentur, & sine quibus artes esse non possunt. Id enim agunt insulsi nebulones, id moliuntur, ut persuadeant incautis ado-

*tescentibus in quacumque ferme facultate ac praeset-
 tim Juris prudentia, illam partem, quam theoreticam
 appellare solemus, quod in ea sua sit principio-
 rum cognitio, inutilem prorsus esse, atque id-
 circo in eam tantummodo, quae cum in agendo
 consistat, practice dicitur, omni conatu ac totis
 viribus incumbendam. Atque hi quidem cum le-
 ges harumque fontes ignorent, ac propterea res
 controversas ad sua principia nequeant revocare;
 nequeant quid cuique legi sit consentaneum, quid
 consequens acri judicio perpendere; nequeant de-
 mum dissidentium doctorum opiniones legum truti-
 na pensare, & ad normam veritatis dirigere,
 modo incerti vagantur & errant, modo cunctan-
 tur, haesitant, dubitant, quam viam insistant,
 & quo pedem figant ignorantes. Jampridem di-
 sputabatur an Juris consultus, qui divinarum hu-
 manarumque rerum notitiam proficeretur, maximis
 disciplinis instructus esse deberet, & omnibus pro-
 pe doctrinis eruditus, ut tam gravem personam
 posset pro dignitate sustinere; nunc vero socordiae
 & impudentiae devenimus, ut vulgo jactare &
 pro certo audeant homines affirmare, ne ipsis
 quidem perspectis legibus, neque veteri jure deli-
 bato, posse quem Juris consulti augustissimum no-*

men sibi arrogare , & magnarum obire judicia rerum , & gravissimas dirimere controversias. Profecto si praeclari Juris prudentiae antistites , qui totam aetatem in legibus interpretandis , inter se conciliandis , & ad forenses usum accommodandis totam aetatem vitamque contrivere , a morte ad vitam revocarentur , quo vultu , qua voce , quae gravitate circumforaneos istos tabulas increparent ? Idone nos purissimos vobis Juris prudentiae fontes reclusimus , ut vos illos perversarum opinionum faece contaminaretis ? Ideo veteres juris conditores nostris commentariis illustravimus , ut vos , illis explosis , semidoctos quosdam legulejos in forum inveheretis ? Ideo nostris interpretationibus leges in clarissima luce collocavimus , ut vos ipsis inconditas quasdam & putidas obscurissimorum hominum nugae anteferetis ? Nos , expostis legibus , juris prudentiam fundavimus , vos , iisdem neglectis , funditus evertistis ; nos legum imperio cuncta subjecimus , vos leges ipsas in vestram sententiam prave detortas temeritati vestrae subdidistis ; nos justitiam legum praescriptione circumscripsimus , vos commentitia aequitate a legibus aliena penitus subtulistis. Videbor profecto tibi optime causam agere Juris prudentiae , quod

te *ſim imitatus*; qui ſaepe ſoles non ſolum ſerius, ſed etiam verba in nobiliſſimae omnium facultatis dignitate defendenda ab Averanio mutuari, cujus vitam ſic accipies, ut amicitiae noſtrae monumentum, ſic leges, ut in ea imaginem tui quodammodo expreſſam intuearis. Cura ut valeas, tibiſque perſuade me in omni re erga te fun-
cturum officio benevolentiffimi atque amiciffimi; quem me tibi & fuiſſe ſemper exiſtimes velim, & futurum eſſe conſidas.

Florentiae Non. Sept. MDCCCLXVII.

JOSEPHUS AVERANIUS

Josephus Averanius filius Joannis Francisci Averanii, & Margaritae Sacchettinae Florentiae natus est XIII. Kal. April. an. a Christo nato MDCLXII. honesta quidem familia, cui contigit, ut tanquam in unam arborem plura genera, sic in illam multorum esset insita atque illuminata sapientia. Nam eodem, quo diximus, patre erant generati Benedictus & Nicolaus Averanii, quorum alter magnopere floruit eloquentia, omnique cum Graeca, tum Latina eruditione, alter Juris prudentia & mathematicis disciplinis adeo excelluit, ut inter primos numeraretur. Fratrum vero gloriae sic respondit Josephus, qui erat natu minimus, ut utrumque fama, doctrinaque superaverit. Patre usus est diligente, integro & casto, in primisque studioso litterarum, a quo mature & saluberrimis praeceptis, quae ad recte pieque vivendum pertinent, & grammatica eruditus fuit. Idem a prima aetate spem attulit summi ingenii, & non vulga-

Tom. VII.

X

ris virtutis ; grandiorque factus , cum ad Vincentium Glaream hominem S. J. , qui Florentiae publice rhetoricam docebat , ductus fuisset , clarius explenduit , quam generosi condiscipuli eum assequi se posse sperarent . Adjumenta quoque habuit ad litteras Graecas percipiendas ab Antonio Maria Salvini ; & brevi eo pervenit , ut sive Italice , sive Latine , sive Graece scriberet , ejus oratio colorata ac roborata appareret continua veterum scriptorum lectione . Nec solum illa aetate in oratoria se exercuit , sed etiam in poetica , maximeque Latina , ad quam eum natura formaverat . Cum jam , quantum factis esse videbatur , in hac mitiorum litterarum aquula feliciter navigasset Josephus , cursum ad graviores disciplinas direxit , ac primo ad Peripateticam philosophiam penetravit , monstrante viam Joanne Francisco Vannio S. J. Ne vero apud eam diutius moraretur fecit libertatis ac veritatis amor , cui nihil tam esse insensum atque inimicum vidit , quam omnia ponere in unius hominis auctoritate . Retinuit tamen quasdam sententias Aristotelis , quas vero similiores esse pu-

tavit; semperque probavit, in Juris prudentia praesertim, usum Aristoteliae disputandi rationis, dolens hanc corruptam fuisse Scholasticorum captionibus ineptissimisque argutiis. Aristoteli longe superiorem ponebat ejus magistrum Platonem, quem unum totius Graeciae doctissimum, & quasi quemdam Deum philosophorum fuisse dicebat. Itaque ejus libros, assidue pervolutabat, neque iis contentus, quaecumque extant veterum philosophorum scripta penitus voluit cognoscere. Memoriter etiam tenebat Epictetum & Ariannum, cum plurimum tribueret Stoicis in ea parte philosophiae, quae versatur in virtute & moribus. Post autem, auctore Vincentio Vivianio, adhibitoque doctore Josepho de Papa, ad mathematicas disciplinas & recentiore philosophiam venit; quibus in studiis, quanquam esset in alia distractus, tantos processus paucis annis effecit, ut tota vita in illa incubuisse videretur. Sed ita sunt maxima ingenia; quaecumque se in partem dederint, in ea ita excellunt, ut si nihil unquam aliud egerint. Sic cum Pisas se contulisset ad Juris prudentiam perdiscendam,

tam longe in hac facultate progressus est ; ut ipsi doctores Franciscus Maria Ceffinius , Petrus Paullus Borromaeus , & Antonius Rillius eum in hoc maxime admirarentur , ponerentque principem studiosorum . Habebat is quidem ad adipiscendam justī iniquique scientiam plurima instrumenta , antiquitatis notitiam , philosophiae ac praesertim moralis cognitionem , perfectam eruditionem Graecarum & Latinarum litterarum , & judicium acre ac certum ad unamquamque rem examinandam , momentisque suis ponderandam . Quam vero esset vigilans & industriosus , nullum asserre majus testimonium possum , quam quod primo anno , quo Pisis fuit , subse civis horis Archimedes & commentaria Eutocii Ascalonitae in eundem scriptorem e Graeco in Latinum converterit . Dignum opus hoc studiis eorum , qui litteris delectantur , existimavit , quod Commendinius , qui in interpretando Archimede elaboraverat , rem non absolvisset , quodque Rivaltus , qui eandem confecerat , multa peccasset , & Eutocium minime attigisset . Porro , ut est gravissimum Antonii Mariae Salvinii judicium , nihil fieri

perfectius potest interpretatione Averanii ; qui etiam multa addidit atque attulit de suo ad explanandos illustrandosque libros , qui sunt *de sphaera & cylindro* , *de spiralibus* , *de sphaeroidibus & conoidibus & de quadratura parabolae*. Illa quidem declarant praestantem Auctoris scientiam in mathematicis facultatibus ; nec minorem ostendunt , quae ipse non post multo scripsit de *momentis corporum gravium in planis inclinatis* , ut Galilaeum defenderet ab oppugnationibus Joannis Francisci Vannii S. J. , quem habuisse praeceptorem supra retulimus . Scriptum profecto edidisset Josephus pro suo singulari studio in illum Philosophum , nisi Aegidius Franciscus Gottignesus doctus vir ex eadem Societate eum in hac defensione antevertisset . Exaravit etiam nescio quaedam de Apollonio Pergaeo , credo , ut suis luminibus obscura multa illius mathematici illuminaret . Nimis vero longus essem , si singula enarrare vellem , quae in tractanda physica & fecit & scripsit . Nullum enim ferme diem abire sinebat , quin aliquid temporis concederet considerationi contemplationique naturae , in

quo illius animus, praesertim si aliquid occurreret, quod antea non bene cognitum, ac vero simile videretur, suavissima completatur voluptate. Observata & notata a se communicabat cum summis viris Laurentio Bellinio & Iosephe de Papa, quorum doctrinae splendor omnibus quidem lucebat, sed praesertim Iosepho, quem in oculis ferebant. Idem saepe etiam a terra in caelum ascendebat, ut cursus conversionesque stellarum, reliquaque caelestia nosceret: neque illud satis mirari queo, ipsum, nullo duce, per se assequi potuisse Ptolemaeum inter sidera spatiantem & abditissima naturae arcana permeantem. Nemo enim ignorat quanta in obscuritate rerum & verborum illius Almagestus versetur. Haec aliaque studia minime retardabant mirificos progressus, quos Iosephus in Juris prudentia faciebat, neque ejus voluntatem ab illa facultate vel minimum alienabant, quin immo magis magisque accendebant, cum ei esset persuasum, Juris consultum, qui divinarum humanarumque rerum notitiam profiteretur, maximis disciplinis instructum, & omnibus prope doctrinis eru-

ditum esse debere . Et sane qui reputat gravissimum testimonium , quod Benedictus frater Josepho impertivit , dum illum anno MDCLXXXIV. laurea insigniret , facile intelligit ipsum in aetatis flore ad eam laudem pervenisse , ut ferme dici potuerit ἐγκύκλιος διδάσκαλος . Insignia doctrinae multi etiam sine doctrina assequuntur ; sed tanta praeconia ab homine intelligente , & in quo ingenuus animi candor eminebat , assequi sola sapientia poterat . In hoc litterarum cursu comitem se prae-buit Josepho Nicolaus frater , de cujus hominis ingenio atque industria multa mihi videbor praedicasse , si hoc unum dicam , nunquam haesisse in fratris vestigiis persequendis . Postquam in patriam rediit Josephus , oblata est ei conditio per Vincentium Vivianum (huic enim mandata res erat) tradendi mathematicas disciplinas in Bononiensē Archigymnasio . Non dubitabat quidem is , quin cumulatissime Josephus expleturus esset mirificam expectationem , quam in recipiendo mandato commoverat . Verum ab ipso minime impetrare potuit , ut conditionem , honorificentissimam licet ; acciperet . Haec

recusatio pergrata fuit Cosmo III. Mediceo, qui retinendum in Etruria putabat adolescentem, de cujus praestanti doctrina multa audierat a Laurentio Magalottio, Francisco Redio, aliisque doctis viris, quemque omnes aiebant in aetatis flore non modo usum, sed habitum etiam virtutis consecutum fuisse. Itaque eodem ferme tempore munus ei detulit publice tradendi in Pisana Academia Institutiones Juris civilis. Extant litterae ejusdem Redii ad Donatum Rossellum datae Pisis prid. Kal. Febr. an. MDCLXXXV. *ab Incar.* quibus ei nuntiat Josephum in ineu-
do novo munere eam habuisse orationem, in qua excellens & plane admirabilis triumphavit eloquentia. Dolendum sane. neque hanc, neque alias, quas in illo Sapientiae domicilio habuit orationes, si unam *ex-
cipias de Jurisprudencia, Medicina, Theologia
per sua principia addiscendis*, ad nos pervenisse. Dubito an ponam in orationum numero, quas in tradendis laureis laudationes fecit, quarumque vidi ego septuaginta novem apud humanissimum amplissimumque virum Gabrielem Riccardium. Illud sine ulla dubi-

tatione statuo ac judico fuisse in Averanio vim illam divinam, virtutemque ornatè, copiose, varietate dicendi; talemque ejus existisse orationem, qualis, ut de L. Crasso dixit Tullius, in bono aedificio firmus paries, & satis splendens. Quidquid vero docebat, mirum, quam sine ullis salebris, sine ulla asperitate influeret in aures animosque discipulorum, eisque se non adscita, fucisque ac pigmentis quaesita, sed naturali pulchritudine ac suavitate commendaret. Neque solum legum cognitione pectus auditorum suorum Josephus implebat, sed per omnem antiquitatem, omnemque philosophiam gradiens, ipsos ad fontes ducebat, unde manarunt amplissima juris civilis flumina, per quae toto orbe sparsa atque diffusa multos summo homines ingenio, sed praesertim Cujacium, Merillium, Gothofredos, Brummerum, Bynkershoekium, & Noodtium strenue prospereque navigasse dicebat. Horum in numerum poterat & se ipsum referre, nisi sua sibi obstitisset modestia. Retulit certe Heineccius, cujus judicium nemo ignorat quanti faciendum sit, dum viros enumerat

e quorum scriptis adjumenta habuit ad suas Antiquitates Romanas conficiendas. Erant enim tum in manibus hominum libri duo *Interpretationum Juris*, cujus operis vulgandi haec Averanio data est occasio. Cum Florentiae commoraretur Henricus Brenkmanus Batavus, ut ope Florentini codicis Pandectas verae lectioni restitueret, saepe ad Josephum veniebat, ex cujus congressu doctissimisque sermonibus se capere fructum maximum dicebat. Accidit aliquando, ut legeret selecta quaedam capita ejusdem operis, in quibus admiratus limatum judicium, reconditamque doctrinam atque eruditionem, ab Auctore impetravit, ut sibi liceret specimen aliquod mittere ad Cornelium Bynkershoekium & Gerardum Noodtium, aliosque juris consultissimos viros cives suos. His illud probatissimum fuisse hoc erit indicio, quod non solum suaserunt, sed etiam rogarunt, ut integrum opus in vulgus ederetur, maximo affirmantes istud usui fore Juris prudentiae amatoribus. Facile annuit Josephus, quod approbatio a tanta auctoritate proficiebatur. Itaque autographum Brenkmano

concessit; hic vero ad Noodtium misit, cuius nutu atque consilio Lugduni Batavorum a Petro Vanderio an. MDCCXVI. typis impressum est. Summus plausus, quo duo priores *Interpretationum* libri excepti a doctis viris fuerunt, stimulavit Josephum, ut iis tres alios adjungeret, in quibus componendis expoliendisque plurimos evigilavit annos. Cumque vita excessisset, priusquam eos typis committeret, hujus rei conficiendae, si placuisset, negotium dedit amico & discipulo carissimo Antonio Nicolinio. Omnia hic studiosissime diligentissimeque curavit. Nam iisdem Vanderianis typis an. MDCCXLVI. opus sic excusum est, ut nihil fieri potuerit elegantius; & ne quid ejus perfectioni deesset, illud ipsum Philippus Martinus aequalis & condiscipulus Nicolinii indice copiosissimo ac summariis locupletavit. De quo toto opere cum aliquando judicium exquisissem Leopoldi Andreae Guadagnii, viri in principibus hujus saeculi Juris consultis profecto numerandi, hoc ab eo responsum tuli. *Praeclaro Interpretationum juris opere quantum Josephus Averanius praestantissimus Jurisconsultus Ro-*

manam Juris prudentiam illustraverit, ornaverit, auxerit, animo percipere is facile poterit, qui animadvertat, eum in propositis quaestionibus dissolvendis omnia accurate praestitisse, quae ad profligandos errores, ad Juris origines atque progressus investigandos, & in lucem proferendos, ad certam demum constabiliendam sententiam pervineant. Non tam quod alii Interpretes dixerint, quam quod Romani prudentes excogitaverint, summo ingenii acumine deligit, summoque judicio perpendit. Ubi saepe alii, si quid minus adsequi possunt, obelis configere, nodos non solve-
re, sed secare solent, hic noster optimis rationibus aperte declarat, haud temere a majoribus probatum id esse, quod habent vulgati codices. Quae supersunt in Justinianeis libris fragmenta non modo invicem, sed & cum classicis & assidu-
is tum Graecis, tum Latinis scriptoribus, quasi Cujacius alter, ita confert, ut aliis alii mutam praesferre facem voluisse videantur. Cognitione antiquitatis, ac victrici, ut mos est Geometrarum, ratiocinandi vi luculentissime id ostendit, quod post ingentes tot doctissimorum hominum in promovenda Juris prudentia labores caeca adhuc erat caligine circumfusus. Neque, ut cultiores non-

nulli Interpretes faciunt, sola ferme alicujus vocabuli, aut solemnioris ritus explicatione tota ejus disputatio circumscribitur, sed & ea, quae ad obscuram sive contrahentium, sive testatorum voluntatem interpretandam conducunt, ac forenses dirimunt disceptationes, fusa, doctæque prosequitur. Jam vero quanta verborum proprietas, quanta sententiarum perspicuitas in singulis operis hujusce capitibus enitet! In quamlibet certe ejus partem oculos verteris, non tam elegantissimum scriptorem, quam eximii prorsus ingenii acerri-mique judicii virum suspexeris. Haec Guadagnius, qui in iis exponendis nihil profecto amori in Averanium, cujus in disciplina fuit, concessit. Pleraque autem, quae sunt in his Interpretationum libris, explicavit Josephus auditoribus suis; tamque lautam supellectilem ad ea magis magisque illustranda conferebat, ut facile convinceret, neminem sine graviorum artium & doctrinarum instrumento ad Juris prudentiam posse accedere. Hinc saepe dicere solebat, illos turpiter errare, qui putant jus civile summatim percipi sine doctrina posse; nam cum haec facultas latissime pateat, eo firmiora doctrinarum fundamen-

ta, & altiores radices habere necesse esset: tanquam perniciem reipublicae fugiendam, insectandamque illam Juris prudentiam constatam ex colluvione legulejorum, coenoque opinionum inter se dissilientium, & plerumque cum antiqui juris integritate, cum ratione, cum ipsa veritate pugnantium; qui hanc sequuntur omnia sordido quaestu, non scientia, doctrina & dignitate metiri. Haec aliaque monita crebro inculcata studiosis erant industriae quidam ac laboris stimuli ad veram concipiendam sapientiam, elucebantque veluti signa itineris, quod ab iisdem erat conficiendum. Quo in itinere ut facilius progredierentur, omnibus patere voluit domum suam, tanquam officinam omnium magnarum facultatum; neque recusavit etiam habere domesticos convictores nonnullos adolescentes, in quibus praeclara esset ingenii virtutisque indoles. Possem plurimos illustres honoribus & fama nominatim referre, qui ex ejus schola prodierunt. Sed vereor, ne aut quemquam aliis praeferre videar, aut si quos praeteream incautus, offendam. Itaque satis mihi videbor dixisse, cum nominavero.

Joannem Gastonem Mediceum, quem ejus pater Cosmus III. Magnus Etruriae Dux consilio Henrici Norisii an. MDCLXXXVIII. Averanio tradidit erudiendum in disciplina juris. Exercuit Averanius Principem adolescentem diligentissime non solum in Juris prudentia, ejusque ministra & famula Graeca, Romanaque eruditione, sed etiam in contemplatione naturae. Cumque annis MDCXCIV. & sequenti, sociis & adjutoribus Cypriano Targionio aliisque doctis viris, plurima in Mediceis aedibus habuisset experimenta de viridiorum solis in vitris collectorum, videbatur renovasse nobilissimam illam Academiam, cui nomen erat *del Cimento*, adversantibus licet iis, qui cognitionem veritatis innocentiae labem aliquam aut ruinam fore putabant. Profecto Josephus nemini eorum, qui in eadem Academia excelluerunt, concedebat acumine diligentiaque, quod iudicium fecerunt quoque docti & intelligentes viri, qui de iisdem experimentis retulerunt. His perspectum habemus, viridiorum solis gemmas, ceterosque vel durissimos lapides, si unum excipias adamantem, qui

ſenſim abſumitur & evaneſcit; amiantum; talcum, multoque magis ligna, herbas, poma, caſeum, hiſque ſimilia brevifſimo tempore liqueſieri, & in cryſtallum converti; liquida vero corpora, ſales, plumbum, hydrargyrum abire in fumum; res ab aqua, vel in aqua genitas in calcem redigi; aurum, argentum, atque aes minime mutari, ſed priſtinam conſervare naturam; vitriolum cypri, aliaque metallica corpora verum, pulcherrimumque in metallum verti, ſic vero verſa haud amplius immutari. Haec eadem experimenta accuratiſſime eleganterque Etruſco ſermone deſcripſit Joſephus, qui nos quoque illud ſcire voluit, lunae radios nunquam vim tantam habere, ut calefaciant. Quod quia nullo modo ſine ſumma cura ac diligentia deprehendi per experimenta poteſt, hinc factum puto, ut multi, quamvis inſignes Philoſophi, in contrariam iverint ſententiam. Idem Piſis cum eſſet, ſumma felicitate renovavit ante oculos diſcipulorum ſuorum, quae Hawksbaeus habuerat experimenta de luce, & electricitate corporum; & dum tractaret Boyleanam machinam, vidit,

dit, & in medium attulit nova & incognita quaedam de pondere & elasticitate aeris. Multa quoque investigavit de odorum proprietate; & in iis componendis, quoad vixit, valde delectatus est. Sed praesertim in id incubuit, ut tempus constitueret, quo sonus propagatur, utque cognosceret, num ejus velocitas adversis ventis retardetur, secundis augeatur. Haec aliaque experimenta de sono fecit Averanius rogatu Laurentii Magalotii, qui eadem concessit postulationi Regiae Societatis Londinensis. Haec vero volens Averanii operam remunerari, illum honorifico decreto suum in collegium cooptavit. Nec minus excellebat Averanius in fabricandis telescopiis aliisque mathematicis instrumentis; omninoque videbatur ad physicas & mathematicas facultates natus, per quas, non secus ac per Juris prudentiam, potuisset sempiternae gloriae commendari, si famae cupidior fuisset. Illam laudem unice videbatur quaerere, ut aliorum utilitati serviret, quod quidem se consecuturum putavit, si Pisis Academiam institueret, in qua industrii adolescentes in omni re physica exer-

cerentur. Huic Academiae *Oppressorum* nomen dedit, legesque, quibus illa teneretur, Latine descripsit, verbis & sono subrustico imitatus antiquitatem. Nec minori Juris studioforum commodo multos praefuit annos illi Academiae, quae dicta est *Umbroforum*, quaeque ad excolendam Juris prudentiam fuerat condita. Continue enim adolescentes in thesibus modo ad philosophorum morem tenuiter differendi, modo ad copiam rhetorum in utramque partem exercebat; interdum etiam illos jubebat afferre orationes, in quibus aliisque rebus conficiendis, si quis ope sua indignisset, hanc nemini deesse patiebatur. Extant theses quaedam de jure belli & pacis, quae laudem non mediocrem pepererunt tum Averanio qui eas scripsit, tum Germano cuidam adolescenti, qui easdem publice propugnavit. Profecto nunquam conquiescebat, neque defatigabatur Josephus, antequam cumulatissime satisfecisset discipulis suis. Non paucos quoque liberalitate sua devinxerat, quibus rebus fiebat, ut quotiescumque in publicum prodiret, multi eum subsequerentur, & nemo ei par in civitate po-

neretur. Triennium ipse in explicandis Institutionibus laboravit, post quod tempus, anno scilicet MDCLXXXVIII. ad interpretandos Pandectarum titulos vocatus est; duxitque initium ab eo, qui est de fidejussoribus & mandatoribus, in quo libentissime versatus est propter ejusdem amplitudinem atque utilitatem. Accidit aliquando, ut Pisas adveniret Fridericus Regius Saxoniae Princeps. Is motus praeclara fama, quae de Averanio erat, voluit eum e superiori loco docentem audire. Rem gratam fore juveni Principi persuavit Josephus, si argumentum e publico Jure depromptum tractasset; fuditque pene ex tempore dissertationem illam *de Pignorationibus*, quae est in manibus, & ex qua facile intelligi potest, quanta in eo esset doctrinae copia (non tamen est celandum ipsum non aequè perfecte Juris publici, ut civilis, leges & instituta cognovisse) & quam plenus esset, uber atque elegans ad Latine scribendum. Inter haec Josephus Benedictum fratrem amisit, quem casum pro mutua conjunctione, benevolentia, quotidianaque consuetudine vehementer doluit. Quaesivit ipse

levamentum doloris in canendis mortui laudibus flebili ac molli carmine, illiusque vita Latine describenda, quae quidem praestitit suo more elegantissime: & hoc quoque se debere fratri dulcissimo putavit, ut ejus scripta Praefatione vindicaret ab illis, qui ea incondita, inordinata, multa quidem eruditione referta, sed non ornata, & sanguine ferme carentia dicebant. Fuit profecto Benedictus vir litteratus, idemque Latina eloquentia adeo excellens, ut nonnulli, & in his Janus Vincentius Gravina, non dubitaverint illum praeferre M. Antonio Mureto: Sed nescio, quomodo is, quem inter aequos sapientesque judices constat eloquentia praestitisse, non raro parum pressus & nimis redundans videatur; a quo vitio plurimum abfuit Josephus, qui suam copiam ita temperavit, ut in ejus orationibus neque superfit quidquam, neque desit. Si autem apparatu eruditionis instruere debebat aliquid scriptoris, non imitabatur illorum exemplum; quibus unice est propositum, ut multa proferant, non delectum, non modum, non ordinem spectantes, sed acri, quo pollebat,

judicio ex thesauris suis tantum expromebat optime convenientia, eaque non vulgaria, sed recondita; omnia vero distincte, & ordinate disponebat illustrabatque mira orationis elegantia. Fecit hoc in iis Italicis dissertationibus, quas dixit in nobilissima illa Florentina Academia Etrusci sermonis moderatrice atque custode, quarumque tria extant volumina ab Antonio Francisco Gorio annos aliquot post mortem Auctoris edita. Primum abundat doctrina veterum philosophorum, ac praesertim Platoniorum de Deo, ejusque natura. Plurima quoque habet ex intima Christiana theologia, & ex SS. Patribus, praecipue Graecis deprompta. Sunt & in eodem volumine, quae de acerbissimis cruciatibus, indignissimoque Servatoris nostri supplicio Josephus disseruerat, & Urbini an. MDCCXXVIII. mendose quidem typis impressa fuerant. Porro haec hominem in lectione SS. Patrum celebriorumque Theologorum exercitatissimum ostendunt, quorum sententias de generibus poenarum, quas Christus subiit, ad leges consuetudinesque veterum Romanorum eruditissime perpendit.

Hac enim via, quod verisimilius esset, in magna opinionum varietate statui posse putavit. Non incommode quaedam persequitur de coronis veterum: deinceps pluribus explicat, qua ratione in morte Christi deficere sol universae quidem terrae, exstinguique visus est; & pauca quaedam docet de Hebraeorum, Romanorumque magistratuum potestate, judiciorumque forma, ad levandam aliqua ex parte Pilati culpam in acerbissima injustissimaque Christi damnatione. Claudunt demum volumen disputationes duae de mundi fine, quibus Averanius suadere nititur, illum tum fore, quando cuncta astra ad idem, unde semel profecta sunt, redierint, quod temporis spatium annus magnus appellari solet, in quo, vix dicere audent astronomi, quam multa saecula teneantur. Secundum volumen plurima habet physica, quae mirabiliter explicant igneam solis naturam & summam lucis subtilitatem velocitatemque. Explicant etiam quae de corporum gravitate, hujusque legibus docuerunt philosophi, praesertim recentiores, rationemque reddunt, quare vis gravitatis minuatur, si corpus per

aquam descendat. Vidit hoc primus omnium Leibnitius: multa vero prompsit ex se Averanius ad illud ipsum confirmandum. Quod autem putaverit Leibnitius, illa observatione explicari facile posse causam ascensus & descensus hydrargyri in barometro, hoc nequitquam probat Averanius. Sunt etiam in eodem volumine (non commemoranda hic esse duco experimenta habita a Josepho cum ignario speculo & quaedam alia de sono, quia illa supra retulimus) erudita multa. Talia sunt, quae comprobant haud incognita fuisse veteribus non solum ignaria specula, sed etiam ea, quae formas aut augent aut minuunt; nec non illa, quae originem & progressionem naviculariae apud veteres persequuntur; & quae demum ostendunt nunquam fuisse in Liguria Apuam urbem, quamvis a Tito Livio Ligures Apuani nominentur. Postremo ad ornamentum voluminis accedunt binæ fanebres orationes, quibus Josephus laudes celebravit Philippi Corsinii & Laurentii Magalotii; & quae idem praefatus est de conjungendis praeclaris artibus & disciplinis cum Iuris prudentia, dum in

lucem an. MDCCIV, Florentiae emisit lyrical quaedam Anfaldi Anfaldii, viri utriusque juris consultissimi. Tertium volumen magna ex parte conficiunt erudita & curiosa multa de conviviis veterum. Haud pauci quidem e recentioribus praesertim tractant istud argumentum, quos omnes cum diligenter pervolutasset Josephus, undique flosculos in rem suam carpsit ac delibavit. Sed majora sunt, quae ipse per se investigavit, quaeque reclusa antea atque abdita in media antiquitate protulit in lucem, ut videatur voluisse omnes superare doctrina, eruditione, subtilitate atque elegantia. Epularia sequuntur pauca quaedam physica, metaphysica & juridica. Ostendunt priora, qui fieri potuerit, ut multi sine cibo diu vitam sustentaverint; commendant altera dulcem & altam non jam corporis, sed mentis quietem ad explicandum illum Homericum versum:

Ἦνε ἀναξ πάντων τε θεῶν, πάντων ἄνθρωπων;
versantur postrema in ea quaestione, utrum significatio Italici verbi *mobili* eo trahi possit, ut annonam comprehendat. Tribus his voluminibus quartum adjunctum est, in quo

sunt Latinae dissertationes duae, & oratio *de Juris prudentia, Medicina, Theologia per sua principia addiscendis*, de qua supra commemoravimus. Agit prior dissertatio *de Lampadum ludo*, eaque probatur illum non fuisse in usu apud Romanos, fuisse vero apud Graecos pervulgatum, qui Panathenaeis, Vulcanalibus, & Prometheis ipsum celebrare solebant in Ceramico. Probatur etiam eos qui hoc ludo certabant minime lampadem in orbem circumtulisse, sed a primo ad secundum, a secundo ad tertium, atque ita deinceps ad postremum usque eam traduxisse. *Ludos in genere* prosequitur secunda dissertatio, ostenditque a Lydis ludos ad fallendam famem in magna annuae caritate inventos fuisse, ab iisque nomen accepisse; non tamen omnia ludorum genera nos ipsis debere, certe non ludum calculorum, seu quod idem est, latrunculorum, cujus inventorem fuisse putat Palamedem Graecorum sapientissimum. De hoc autem ludo calculorum; de variis illo ludendi modis tum apud Graecos, tum apud Romanos; de ejus differentia cum ludis tesserarum & talerum; de vocibus ad omnia

haec ludorum genera pertinentibus, in quibus interpretandis doctissimi etiam viri saepenumero errarunt; & ut alia praeteream, de ludo quodam Ægyptiorum a Theute invento, in quo motus astrorum repraesentabatur, tam scite ac litterate differit, ut facile existimari possit, illum fuisse antiquitatis peritissimum. Ejus vero bonitatem declarant quae extrema dissertationis parte posuit ad penitus removendos homines ab aleae ludo, in quo sola dominatur fortuna, cujusmodi erant ludi talorum & tesserarum: si cupiunt animum relaxare, posteaquam gravibus seriisque rebus satisfecerunt, ludant latrunculis, in quo omnia sunt artis & ingenii; vel saltem, quodam retento modo, iis utantur lusionibus, in quibus cum fortuna certat ingenium, & fortis iniquitas solertia artis corrigitur, qualis erat ludus tesserarum cum calculis, cui Plato vitam humanam comparabat, & de quo Terentius in Adelphis act. IV. s. VII.

*Ita vita hominum, quasi cum ludas tesseris,
Si illud, quod maxume opus est jactu, non
cadit.*

Illud, quod cecidit forte, id arte ut corrigas.

Cum his posthumis Latinis monumentis Averanii optandum esset, ut ederentur quoque ejus laudationes, quas in tradendis doctrinae insignibus fecit (lucent enim in iis maxima eloquentiae & praeceptorum ornamenta) nec non libellus Latinorum carminum, quem Petrus Birmanus captus eorum nitore atque splendore olim edere meditatus est. Nam studia poetica, ut initio narravimus, in adolescentia Josephus fovit; & ex quo tempore juvenilis alacritas deferbuit, quamquam nunquam accesserit ad poeticas scriptiones, temperare tamen sibi non potuit, quin excellentiores poetas quotidie fere in manus sumeret, eorumque lectione, quasi condimento amoenitatis, graviorum studiorum asperitatem molliret. Mirum ! quam multa ipse memoriter, praesertim ex Plauto, Catullo, Virgilio, Horatio, & Juvenali recitaret, videbaturque nihil esse in iis non solum, sed etiam in aliis antiquitatis scriptoribus, quod illi esset incognitum. Satis de scriptis Averanii dictum erit, si hoc unum

addam, non pauca ejusdem judicialia & forensia extare. Nullo non enim tempore consulentibus de jure respondit; & interdum etiam ad caussarum defensionem advocatus venit, cum quidquam non cuperet magis quam exemplo suo ostendere, omnibus vivendum esse, fugiendamque oscitantem & dormitantem sapientiam. Romae apud XIIviros libris judicandis adfuit Antonio Mariae Duci Salviato, quocum vinculis beneficiorum & magni amoris erat conjunctus; Atque in ea defensione illud animadversum est, hominem, qui quidquid deferebat, multa commentatione & meditatione elaborandum esse putabat, ut mereri posset elogium; quod Hierocles philosophus Socrati tribuisse fertur, illius sermones tessleris esse similes, cum starent semper erecti quacumque caderent, iniquo tulisse animo morem, qui est in eo tribunali, scripto respondendi adversariorum argumentis paucarum horarum spatio. Romae dum fuit, in admirationem benevolentiamque sui multos adduxit, ac praesertim Anfaldum Anfaldium & Ferdinandum de Valentibus: hic vero non uno in loco

suorum forensium operum praeclara testimonia dedit Averanii doctrinae. Idem quoque ipsi XIIviri litibus judicandis, quod raro homini viventi contigit, non semel in suis *Decisionibus* Iosephi nomen auctoritatemque laudarunt. Quam vero longe lateque ejus fama vagaretur, declarant quae de eodem scripserunt Schultingius, Barbeiracius, Heineccius, Van-de-Water, Brenckmanus, Clericus, Menckenius, Noodtius, & Bynckershoekius; qui duo postremi ipsum quoque per litteras consuluerunt de controversia inter eos orta, quonam cessaverit tempore patrum jus occidendi exponendique liberos. Noodtius enim primos istud crudele jus delesse Valentinianum, Valentem, & Gratianum existimabat; citius legibus illud ipsum vetitum fuisse contendebat Bynckershoekius, cujus sententiam confirmavit Iosephus, usus praesertim testimonio Tertulliani *lib. 1. cap. xv. ad Nationes*, qui locus rem conficere videtur. Haec quoque non mediocris laus fuit ejus praestantis doctrinae, quod Victorius Amedeus Sardiniae Rex magnis praemiis ipsum invitavit ad docendam Juris prudentiam

in Taurinensi Lyceo. Quae omnia respiciens Cosmus III. Mediceus, voluit aliquando cum in Florentinum Collegium Vvirum litibus judicandis cooptare, quod gloriosissimum erat Iosepho non solum propter muneris amplitudinem, sed etiam quia tum, veteri instituto, minime ad illud admittebantur, nisi qui essent alienae civitatis. Verum is noluit Pisanam Academiam deserere, a qua nulla unquam res potuit ipsum divellere, nisi corporis infirmitas. Nam qui gracilis semper fuerat, & in graves mortiferosque non semel morbos inciderat, cum ad LXII. aetatis annum pervenisset, coepit assiduus doloribus (humores enim, qui corpus interfluunt, a cor corruerat) assiduaque febricula vexari. Postquam vero cum spe valetudinis recuperandae spem quoque amisit Pisas redeundi ad suum munus, hoc se abdicare cogitavit; cum vir castissimus assignatum muneri stipendium sine praesentia atque opera accipere se non posse putasset. Non tulit hoc Ioannes Gasto Mediceus, qui eo tempore ad Etruriae clavum sedebat, ac bono illum animo esse iussit, & illud curare unice, ut

diu vitam produceret. Cessit Iosephus Principis voluntati: ut vero ex animo omnem sibi scrupulum evelleret, totum illud tempus, quo sibi dabatur aliqua incommodorum levatio, absolvendis *Interpretationum Juris* libris consumebat. Sic enim, quod voce non poterat, ut Juris prudentiae studiosos erudiret, hoc idem monumentis litterarum assequi curabat. Consumpsit in his malis XIV. annos ea fortitudine, ut ne vel minimum a patientissimi hominis statu discesserit. Dixisses scopolum, quem non jam umbra quaedam sapientiae, sed summa sanctitas atque religio adversus omnes humanae vitae fluctus immotum fecerant. Cumque ad ceteras misérias postremo, quo vixit, anno accessisset apoplexis, nunquam vim tantam habuit proximae mortis aspectus, ut non plus haberet Christianus homo, fretus conscientia optimae mentis futurorumque bonorum spe, quod gauderet, quam quod aut angeretur aut perturbaretur. Et quotidie pascens animum sacrorum librorum lectione, & saepe instruens se caelesti Viatico, omnibus demum, quae ad religionem pertinent, sancte peractis, vi-

tac cursum confecit mane IX. Kal. Septembris an. MDCCXXXVIII. Funus ei satis honorificum factum est in S. Marci, ibidemque, sicuti jusserrat, sepultus est; ut is locus, quem religionis ergo vivus frequentaverat, & in quem singulari fuerat studio, mortuum reconderet ac custodiret. Neque multo post in peristyllo, quod Templo adhaeret, prope sepulcrum majorum meorum, Antonius Nicolinius praeceptoris benevolentissimo marmoreum monumentum faciendum locavit, in quo haec inscripsit:

JOSEPHO AVERANIO
CIVI FLORENTINO BENEDICTI ET
NICOLAI FRATRI
IN PISANA ACADEMIA LIII. ANNOS
LEGUM INTERPRETI
JURIS CONSULTORUM SUI
TEMPORIS MAXIMO
PHILOSOPHIA GEOMETRIA ASTRONOMIA
GRÆCIS LATINIS LITTERIS
POESI ELOQUENTIA
ROMANAE HISTORIAE COGNITIONE
CLARISSIMO
RELIGIONE MORIBUS SPECTATISSIMO
PRAECEPTORI OPTIMO
QUI VIXIT ANN. LXXV. MENS. V. D. IV.
QUI

OBIIIT IX. KAL. SEPT. ANNO A,
 CHRISTO NATO
 M D C C X X X V I I I.
 ANTONIUS NICOLINIUS
 EX MARCHIONIBUS PONTIS SACCI
 ET CASTRI CAMULIANI
 H. M. D. S. P. F. C.

Testamentum fecit, in quo scripsit haeredes aegrotos valetudinarii Religiosorum, quos vocant Hospitalitatis. Legavit etiam partem bonorum ad dotandas pauperes honestasque puellas. Postremo volens commodo utilitati-que studioforum servire, bibliothecam suam Academiae Pisanae reliquit. Haec quoque declarant Averanii pietatem in Deum, quam sic coluit tota vita, ut imaginem antiquitatis in eo dixisses intueri. Intentus erat animus ad omnia religionis munia obeunda; summa custodia sensuum; stans quotidie temporibus divinis precibus vacabat; nihil majoris momenti aggrediebatur, nisi consulto & propitiato Deo, neque unquam in suggestum ascendebat, quin prius templum aliquod ingrederetur ad divinam opem implorandam. Illum natura formaverat ad iracun-

diam propensum, sed hanc sic compressit, ut esset in eo, quasi cos fortitudinis, quemadmodum illam veteres Academici dixerunt, non peccandi occasio. Ex quo factum est, ut multorum sine offensione ad summam senectutem retinuerit benevolentiam, neminemque, etsi laceffit, laeserit. Si quando vero cogebat eum veritas, quam nulli disciplinae addictus unice semper amavit, aliorum opiniones convellere, nunquam eos nominabat, videbatque sedulo, ut confutatio, quod & in monitionibus observavit, omni acerbitate careret. Vix tamen ferebat, ut a discipulis suis sibi contradiceretur; nec defuit aliquando eorum unus ingenio, libertate dicendi, aliisque multis nominibus insignis, qui audacter in ipsum jaceret Cujacianum illud: *Si verum amamus, sumus invicem magistri, & discipuli*. De reliquo impense eos diligebat Josephus, & ab iis quoque dilectus est; cujus rei non mediocre argumentum est aeneum numisma, quod eidem dedicarunt. Ex una parte istud repraesentat effigiem Averauii, ex altera Parrhasium montem, templum & simulacrum Deae Themidis cum

hac inscriptione: THEMIS PARNASSIA; quae insculpta sunt ad indicandas praestantes, multiplicesque artes atque doctrinas, quas Iosephus cum perfecta Juris cognitione copulabat. Id ipsum suspiciens Laurentius Bel-
linius, in nobilissimo illo suo *de Bucchis* poemate dubitare se dixit (danda quaedam est licentia Poetae) an plures in Averanio essent animae. Quam laudem multiplicis eruditionis magnifice quoque extulit Nicolini-
us, cum Iosephum laudandum suscepisset apud Academicos Etruscae linguae custodes conservatoresque, ut omnia, quae amantissimi erant discipuli, officia & vivo & mortuo praestaret. Nimis vero longus essem, si singulos recensere vellem, qui summa de Averanio praedicarunt. Nihil enim ei invidia detraxit, semperque aequissimis usus est hominum judiciis. Itaque minime est mirandum, si sic Pisis fuerit, ut delata ei omnium consensu Academiae Dictatura videretur. Nec minoris erat ejus auctoritas apud cives suos. Multorum controversias tanquam honorarius arbiter judicavit, multis consilio praesto fuit; quod cum faciebat non quae-

stu & lucro, sed hominum caritate se duci palam ostendebat. Cum vero solitus fuisset iis temporibus, quibus Florentiae, propter vacationem a publico docendi munere, commorabatur, frequentare Academiam patriae linguae moderatricem, ita in ea praeistabat, ut omnia illius nutu geri viderentur. Quod tum maxime apparuit, quando ejus hortatu immensum opus susceptum est conficiendi Etrusci Lexici. Una enim vox Averanii, unum consilium incredibilem rei magnitudinem, ^{omn} difficultatem vicit. Quod vero in tanta exsultatione tantaque fama modestiam servaverit, neque unquam elati inflatique animi signum dederit, hoc magnum & mirabile debet judicari. Optime novit, & in se ostendit difficillimam illam societatem gravitatis cum humanitate, quae res plurimum valuit ad conciliandam ei apud homines auctoritatem & gratiam. Cultor, siquis unquam alius, castitatis & virginitatis, amicis adhortantibus se ad ducendam uxorem respondebat, nihil esse libero lectulo jucundius. Et qui voluptatem virtuti inimicam semper odit ac fugit, tam parce, continenter, sobrieque

vixit, ut illam vocem Socratis ad nundinas Athenis celebrari solitas egressi usurpare potuerit: *heu quot non ego!* At quantum comodo, voluptatique detrahebat, tantum liberalitati assignabat. Nam domum suam magno aere alieno liberavit: saepe Philippo Balduccio, qui ei erat a confessionibus; non mediocrem pecuniae summam dedit distribuendam egentibus, qui Paroeciam S. Marci incolebant: saepe quoque puellas, quae propter paupertatem conditionem reperire non poterant, dote attributa, collocavit. Et ne differendo videretur negare, semper habebat secum, quod statim daret opis ejus indigenti. Nulli vero amicorum fides ejus; nulli opera, nulli res familiaris defuit. Sic se gerendo minime mirum esse debet, si ejus vita omnibus fuit carissima, & mors peragorba.

DE LIBERTATE CIVITATIS FLORENTIAE

ejusque Domini. Pisis 1721. in 4. Propositum est Auctori probare adversus Principes Foederatos, tum ante Principatum Rempubliam Florentinam omnino liberam, & immunem fuisse: tum constituto Principatu ad hanc diem Principes eadem immunitate potitos, nulli fuisse obnoxios, & Carolum V., mutata forma Reipublicae, nec legitime potuisse; nec voluisse pristinam libertatem investire.

ESPERIENZE fatte collo specchio istorico di Firenze sopra le gemme, e le pietre dure. Harum rerum specimen prodit primum in Parte V. Tom. VI. della Galleria di Minerva: mox eadem experimenta prodire in Tom. VIII. art. IX. del Giornale de' Letterati d' Italia.

DISPUTATIO de jure belli & pacis. Floren. 1703.

PREFAZIONE alle Poesie Toscane di Mansignar Anfaldo Anfaldi impressa in Firenze nell' an. 1704.

VITA BENEDICTI AVERANII, & Praefatio ejus operibus. Exstant in primo volumine eorumdem operum, quae edita sunt Florentiae tribus voluminibus in folio an. 1717. Elegia in mortem ejusdem Benedicti extat in tertio volumine.

DISSERTATIO de Rapressaliis habita Pisis an. 1713. Edidit hanc primus Lazzarus Benedictus Miglioruccius an. 1732. Tom. IV. suarum Institutionum Juris Canonici pag. 75.

INTERPRETATIONUM JURIS LIBRI DUO.

Lugduni Batavorum apud Petrum Vander Aa, 1716. in 8.

---**LIBRI TRES POSTERIORES, PARS I. ET II.** Lugduni Batavorum apud Petrum Vander Aa, 1746. in 8.

ORATIO de Juris prudentia, Medicina Theologia per sua principia addiscendis, Pisis habita an. 1723. in solenni

pfuratione studiorum a V. Clariff. Josepho Averanio Pisano Antecessore, nunc primum edita sub auspiciis Illustrissimi & amplissimi viri Bonaventurae Nerii Badiae magno Etruriae Duci a consiliis. Veronae, in 8. Edidit hanc orationem Drauerus Cibancus, sub quo fido nomine occultari voluit Bernardus Tanuccius, qui Averanii disciplinae alumnus fuit.

LEZIONI sopra la Passione di Nostro Signor G. C. Urbino. 1738.

DISSERTATIO de Calculorum seu Latrunculorum ludo. Venetiis 1742. in Tom. VII. della Miscellanea di varj opuscoli.

LEZIONI TOSCANE dell' Avvocato Giuseppe Averani Accademico della Crusca Tom. I. in Firenze nella Stamperia di Gaetano Albizzini 1744. in 4.

---Tom. II. presso il medesimo 1746.

---Tom. III. presso il medesimo 1761.

MONUMENTA LATINA POSTHUMA JOSEPHI AVERANII FLORENTINI in Pisano Athenaeo Antecessoris nunc primum edita. Florentiae 1768 ex typographia Albizziniana.

CONSULTATIONES & responsa juridica varia seorsim edita.

OPERA INEDITA.

DEFENSIO propositionis, quam Galilaeus posuit initio Dialogi II. de lancis aequilibrio, cui diversa corpora, diversisque modis sunt appensa.

TRACTATUS de Sphaera.

ARCHIMEDES cum Eutocii commentariis Latine redditus, & notis & observationibus illustratus a Josepho Averanio.

LATINA CARMINA.

LAUDATIONES LXXIX. habitae in tradendis laureis.

INDEX VITARUM

QUAE IN HOC VOLUMINE CONTINENTUR

Antonius Vallifnerius	pag. 9.
Joannes Maria Lancifius	99.
Benedictus Bacchini	<u>182.</u>
Gerardus Capassius	<u>229.</u>
Benedictus Menzinius	<u>264.</u>
Vincentius a Filicaja	<u>293.</u>
Josephus Ayeranus	321.

I N D E X

RERUM NOTATU DIGNIORUM QUAE IN VII.

VOLUMINE CONTINENTUR.

A

Accolus Benedictus 192.

Acta SS. Crescii & Sociorum

210. 235. 236.Adamius Raymundus 224.Agnelli Pontificale 198.Andrejus 35. 135.Anguillarum ortus 30.

Anima ejus sedes 110.

Ansaldus Ansaldus 343.Antiquorum Iudi 355. & seq.Arcionus Abbas 174.Assaltus Petrus 129.Aetstinatorum Principum historia 195.Averanius Benedictus ejus eloquentia 340.

Averanius Iosephus ejus vita

321. Eutocium interpretatur

324. Galilaicum defendit 325

Academiae Pisanae addicitur

328. ejus orationes 329.Scientia juris civilis 330.experimenta physica 335.

opuscula juridica 339. fratris vitam scribit

340. ejus

dissertationes de Christi

passione 341. alia ejusscripta 343. Latina carmina347. quanta opiniode ejus doctrina 342 mores352. & seq.

B

Bacchinius Benedictus ejus vita 172. & seq. ephes-merides litteratorum scribit 186. ejus calamitate 188. 212. dialogos vulgat 190. opus de Monasterio Padolironensi 192. itinera 193. munera 197. Pontificale Agnelli vulgat 198. librum de Hierarchia Ecclesiastica 200. Piceinum confutat 206. mores 214.Baconus a Verulamio 28.Balthasarius Iosephus 1.Blancus Jo. Baptista 117.Boromaea Clelia 74.

Brasavolus Hieronymus 103.

Brinnius Thomas 37.Buffonius 52.Burgundius Horatius 57.

C

Capellus Gerardus ejus vita 219 controversia232. 235. 236 itinera 242.

quid senserit de constitutione

Unigenitus 243. odiain eum 246. mors & mores

248.

Carolus VI. 55.Casalechius 11.Catastra ejus origo 135.Chamaeleontis descriptio 43.

Christina Svecorum Regina

275. 295.Clarius Isidorus 205.Clemens XI. 62. 106. 108.125. 126. 128. 139. 243.283. 285.

Cleopatra ejus mors [134.](#)
 Clochius Antoninus [335.](#)
 Congrossius Carolus Franci-
 scus [57.](#)
 Cordis motus explicatus [130.](#)
 Cornelia Piscopia [185.](#)
 Corfinius Cardinalis [245.](#)
 Cosinus III. [236.](#) [241.](#) [267.](#)
 304. [335.](#)
 Cucurbitini vermes [36.](#) [116.](#)

D ^D
 Dupinius [204.](#)

E ^E
 Eustachii tabulae inven-
 tae [126.](#)
 Eutocii interpretatio [324.](#)

F ^F
 Antonius Jo. [126.](#) [127.](#)
 Filicaja [261](#) [274](#) ejus
 vita [293.](#) *lyrica* carmina
[295.](#) [299.](#) & seq. ejus
 calamitates [305.](#) munera
[304.](#) Latina carmina [307.](#)
 mores [312.](#)
 Fontaninus [298.](#)
 Fontana Felix [31.](#)
 Pontium origo [65.](#) & seq.
 Franciscus Magnus Etruriae
 Princeps II. & seq.
 Fungorum ortus [121.](#)

G ^G
 Aleatius Gulmanus [64.](#)
 Galli reprehensi [49.](#) [35.](#)
 Guadagnius Leopoldus [311.](#)
 Gualterus Nicolaus [68.](#)
 Guidius Alexander [274.](#) [281.](#)

H ^H
 Eisterys [135.](#)
 Hierarchia Ecclesiastica ex-
 plicata [200.](#) & seq.

Hippocrates [55.](#) [122.](#) [125.](#)
 Historiae naturalis fors [29.](#)

I ^I
 Jesuitae [354](#) [283.](#)
 Innocentius XIII. [244.](#) [254.](#)
 Infecta eorum ortus & mu-
 tationes explicatae [17.](#) [112.](#)
 & seq. distributio eorum in
 classes [40.](#)
 Jurisprudencia quomodo ex-
 colenda [317.](#) [334.](#)

L ^L
 Aderchius ejus contro-
 versiae [237.](#)
 Lamius [227.](#)
 Lancisius ejus vita [99.](#) ejus
 munera [104.](#) & seq. opus
 de subitaneis moribus [109.](#)
 & seq. de noxiis paludum
 effluviis [113.](#) de Romani
 caeli qualitatibus [114.](#) de
 sede cogitantis animae [138.](#)
 de fungis [122.](#) de Lauren-
 tino [123.](#) b'liothecam su-
 am dedicat [125.](#) Eustachii
 tabulas illustrat [126.](#) Mer-
 cati Metallothecam edit
[128.](#) opus de motu cordis
 & aneurismatibus [130.](#) ca-
 taractae originem inquir-
 rit [135.](#) mors [139.](#) mo-
 res [142](#) & seq.

Lazzerus Dominicus [253.](#)
 Locustae ad cibum propriae
[32.](#)
 Ludovicus XIV. [147.](#)

M ^M
 Abillonius Jo. [174.](#)
 Magalotus [308.](#) [337.](#) [343.](#)
 Malpighius Marcellus [10.](#) [12.](#)
[13.](#) [14.](#) [20.](#) [52.](#) [116.](#)

Martilius Ferdinandus 70. &
seq. 121.

Mariae Theresiae Imperatri-
cis laudes II. & seq.

Masinius Comes 176.

Marildis historia 193.

Medicinae studendae ratio 92.
& seq.

Menzinius ejus vita 364. car-
mina 69. 271. satirae ib.
cum Guidio & Filicaja com-
paratur 174. Romam con-
cedit 276. poeticam edie
277. mores 280. ejus lati-
na scripta 284. mors 289.
Mercati Metallotheca inventa
128.

Monachorum scholae 177.
Monelia 271.

Morgagnius 62. 117. 127.
133. & seq.

Mortierius 227.

Muratorius 195. 311.

N

Nicolini Antonius 313.
331. 334.

O

Oestrus ejus descriptio 39.
& seq.

P

P

Pagninus Josephus 257.

Paludum effluvia 113.

Patavina Academia ejus for-
tuna 22.

Pestis animalium unde 96. 113.

Petrarcha Franciscus 6.

Piceninus Jacobus 296.

Plinianum rus 123.

Poesis ejus natura 288. & seq.

Poupartius reprehensus 19.

R

Edius 13. 14. 15. 17. 30.
32. 266. 300.

S

Alicetus Natalis 95.

Saxoli falsa describitur 64.

Scorpiones quomodo venenum
emittant 31.

Sirius Victorius 185.

Sistrorum figurae variae 191.

Seruthionis descriptio 43.

Sugerius Abbas 179.

T

Argonius Cyprianus 335.

Triumphetus Laelius 11.

V

Alisnerius Antonius ejus
vita 9. & seq. quae ejus
scribendi ratio 15. dialo-
gos vulgat 20. Patavium ac-
cessit 22. ejus itinera 33.
quas in classes insecta di-
stribueret 40. quam corpo-
rum seriem exponeret 40.
ejus opus de hominis ge-
neratione 52. quam in me-
dicina exercitatus 60. a-
quam calidam commendat
61. Romam invitatur 62.
fontium originem indicat
65. & seq. ejus mores & lau-
des 77. opera edita 71. &
seq.

Vannius Jo. Franciscus 322.
325.


Vermium origo varia 16. co-
rum mutationes 17. lati
qui sint 36. seminales 33.
107. quomodo sint causa
pellis 36. & seq.

Verneyus 14.

ERRATA CORRIGE

pag.	lin.		
20.	18.	Quidquid hoc loco	Quaecumque hoc loco expo- nuntur
92.	21.	evelli potuerint.	evelli minime potuerint.
95.	14.	curaveritque,	curavissetque,
98.	11.	certe	fane
102.	2.	gerit	gereret
117.	6.	cucurbitorum	cucurbitinorum
126.	12.	ipsum	se
131.	12.	pronuntiat.	ille pronuntiat.
210.	6.	Moppium	Mozzium
215.	2.	epicedia	epicedica
231.	6.	suscepit exornare.	exornandam suscepit.
236.	3.	susceperat	agressus fuerat





148.
7.
50.

